

114



7.K.5.184.
~~75415~~



7.5.184

IVRIS CANONICI INSTITVTIONES

Q V A S

SVIS IN ACADEMIA PISANA
A V D I T O R I B U S

T R A D I T

D. ORONTIVS STABILI

A L E T I N V S

ORDINIS SANCTI BENEDICTI

M O N A C H V S

CONGREGATIONIS MONTIS CASINI.



F L O R E N T I A E M D C C L I I .

Apud PETRVM CAIETANVM VIVIANVM ad Insigne Iani.

Praefidum adprobatione.



EXCELLENTISSIMO, AMPLISSIMOQVE VIRO
D. E M M A N V E L I
C O M I T I
D E R I C H E C O V R T E.



*I est, VIR EXCEL-
LENTISSIME, quod
nemo sanus dubitaverit unquam,
ut Regnorum felicitas non tam
legum Civilium auctoritati, quam
exactissimo officiorum, quae Re-*

ligionis sunt, cultui referri de-
beat accepta; fieri haud equidem
potest, ut qui illarum custodiae
invigilat, negligat ista, quae sua-
pte virtute hominem Superis ae-
quant, Patriae Civem optimum
faciunt, & Viris Principibus
reddunt obsequiosum. Haec pro-
fecto rerum cognatio me de Iure
Sacro scribentem in spem addu-
xit maximam fore, ut exiguum
hocce, primum laborum meorum,
quos MAGNI CAESARIS Nu-
mini, Maiestatique obsequens per-
fungor, specimen, TIBI, VIR AM-
PLISSIME, nuncupatum, ceu ho-
minis summis benevolentiae offi-
ciis devinctissimi pignus pera-
manter excipias. Videretur for-
tasse cuiquam opportunissimus
hic.

heic locus, quemadmodum recepta
iamdiu apud mortales consuetudo
fert, perillustres natales Tuos,
Tuorumque Gentilium gesta, &
exempla, quibus instruebaris, To-
gâ non minus, quam bello prae-
clarissima, necnon peculiare a-
nimi Tui dotes, & ornamenta,
atque egregia, quae in dies per
TE patrantur facinora percen-
sendi. Verum enimvero, ubi de
Viris habendus est sermo, qui
rerum praesunt administrationi,
& Optimi Principis foveantur gra-
tia, putaverim satius omnia pror-
sus praeterire silentio, quam e-
loquio celebrare. Contingere quip-
pe facillime potest, ut si quae vel
probiora sunt, & aequissima in
medium proderem, sinceræ fidei

turpissimum adsentationis inuratur crimen, & grati, castique cordis testimonium pro immoderato mei, mearumque rerum studio traducatur. Quinimo novi etiam, & quidem optime novi TE VIRVM EXCELLENTISSIMVM eâ esse naturâ egregie comparatum, ut gaudeas quam maxime hisce merationibus detineri, ne laudes efferam tuas. Quamobrem haudquaquam dubito, quin modestia Tua veluti novum observantiae meae documentum & hoc ipsum adspiciat reticuisse penitus quidquid de Tuis immortalibus in me, & in rempublicam meritis dicere possem. Dignas interim TIBI referre grates, o utinam quemadmodum lubet, liceret mihi,
quod,

quod, ut in votis habui, comi-
ter finas, hunc qualemcumque
Institutionum Canonicarum li-
bellum praeclarissimo Tuo con-
decorari Nomine, atque ab Eo
integrum, quod ex tenuitate mea
ipsi conciliari minime posse pro-
be intelligo, nancisci decus. Hinc
aliud sane non exiguum prove-
niet emolumentum, ut nimirum
nostrae Imperatoriae Academiae
Juvenes Illius splendore magis,
ac magis inflammati totis se de-
dant viribus Iuri addiscendo
Pontificio. Cuius praesidio Chri-
stiana Respublica regitur, vir-
tus colitur, propulsantur vitia,
suisque finibus continentur o-
mnia, unde Civilis Societas inco-
lumis, & salva consistit. Gra-
tia-

*tiarum igitur loco Deum de-
precor Optimum, Maximumque,
ut TE bono Reipublicae natum
diu sospitem servet, mihique vi-
res addat, ut maiora deinceps
observantiae erga TE meae innu-
meris devinctae beneficiis pro-
ferre possim monumenta. Vale.*



AD

I N D E X

T I T V L O R V M.



P	<i>Raemonita ad Tyrones.</i>	Pag. I.
	<i>Ad Institutiones Praefatio.</i>	I.

TITVLVS PROEMIALIS.

De iure generatim, eiusque proprietatibus.

<u>§. I. De Iure multiplici, & praesertim Canonico.</u>	2.
<u>§. II. De Ecclesiasticis Constitutionibus, & Consuetudinibus.</u>	9.
<u>§. III. De Iuris Canonici fine, materia, & cum civili consensu. Vbi de Institutionum metho-</u>	12.

INSTITUTIONVM

L I B E R I

De Iure Personarum.

TIT. I.	D E Personis generatim, earum- que distinctione.	Pag. 15.
TIT. II.	De Summo Pontifice, & aliis E- piscopis.	16.
TIT. III.	De Electione, & Electi Pote- ste. Deque eius confirmatione, & consecratione.	17.
TIT. IV.	Qui eligere, eligere possunt.	22.
TIT. V.	De Praelatorum Postulatione.	24.
TIT. VI.	De auctoritate, & usu Pallii.	25.
TIT. VII.	De Vita, & Honestate Prae- latorum.	26.
TIT. VIII.	De Officio Archidiaconi.	27.
TIT. IX.	De Officio Archipraesbyteri.	29.
TIT. X.	De Officio Primicerii, & Sacri- stae.	30.
TIT. XI.	De Officio Vicarii.	31.
TIT. XII.	De Coadiutore.	32.
TIT. XIII.	De Korepiscoporum sublato usu.	33.
TIT. XIV.	De Translatione.	34.
TIT. XV.	De Renuntiatione.	35.
TIT. XVI.	De Depositione, seu Degrada- tione.	39.
	TIT.	

TIT. XVII. De Sacerdotibus in inferiori gradu, & Clericis in Sacris, vel Minoribus dumtaxat constitutis. Eorumque variis Officiis.	Pag. 41.
TIT. XVIII. De Præbendis, & aliis Beneficiis.	42.
TIT. XIX. De Collationibus.	45.
TIT. XX. De supplenda Negligentia Praelatorum.	50.
TIT. XXI. De Institutionibus, & Iurepatronatus.	51.
TIT. XXII. De Clericis non Residentibus.	55.
TIT. XXIII. De Regularibus, & Monachis.	58.

INSTITUTIONVM

LIBER II.

TIT. I. D E Rerum Ecclesiasticarum Divisione.	61.
TIT. II. De Sacramentis generatim.	63.
TIT. III. De Baptismo, & eius effectu.	66.
TIT. IV. De Sacramento Chrismatis.	69.
TIT. V. De Poenitentiis, & Remissionibus.	71.
TIT.	

TIT. VI. De Eucharistia.	Pag. 74.
TIT. VII. De Extrema Vnctione.	78.
TIT. VIII. De Sacramento Ordinis.	79.
TIT. IX. De Matrimonio.	84.
TIT. X. De Sponsalibus.	85.
TIT. XI. De Nuptiis.	86.
TIT. XII. Quae Matrimonium impedire possint.	88.
TIT. XIII. De triplici Cognatione, & Affinitate.	92.
TIT. XIV. De Clandestina Desponsatione.	95.
TIT. XV. Qui Matrimonium accusare possint, vel contra illud testificari.	96.
TIT. XVI. De Divortiis, & secundis Nuptiis.	98.
TIT. XVII. De rebus Sacris, Sanctis, & Religiosis.	102.
TIT. XVIII. De construendis, consecrandis, ac reparandis Ecclesiis, & Altaribus.	104.
TIT. XIX. De Unionibus Ecclesiarum, & Beneficiorum.	109.
TIT. XX. De Immunitate Ecclesiarum.	112.
TIT. XXI. De Censibus, Exactionibus, & Procurationibus.	117.
TIT. XXII. De Cappellis Monachorum.	119.
TIT. XXIII. De Religiosis Domibus.	120.
TIT. XXIV. De Sepulturis.	123.
TIT. XXV. De Canonica Portione.	124.

TIT.

TIT. XXVI. <i>De Decimis.</i>	Pag. 125.
TIT. XXVII. <i>De Rebus Ecclesiae non alienandis.</i>	129.
TIT. XXVIII. <i>De Peculio Clericorum.</i>	131.

INSTITUTIONVM

LIBER III.

TIT. I. D E Iudiciis, eorumque diuisione.	134.
TIT. II. <i>De Procuratoribus.</i>	138.
TIT. III. <i>De Pactis, & Transactionibus.</i>	141.
TIT. IV. <i>De Arbitris.</i>	144.
TIT. V. <i>De Oblatione Libelli.</i>	147.
TIT. VI. <i>De Citatione.</i>	149.
TIT. VII. <i>De Dolo, & Contumacia, ac in possessionem immissione.</i>	152.
TIT. VIII. <i>De Exceptionibus, & Replikationibus.</i>	155.
TIT. IX. <i>De Mutuis Petitionibus.</i>	158.
TIT. X. <i>De Restitutione Spoliatorum.</i>	160.
TIT. XI. <i>De Litis Contestatione.</i>	163.
TIT. XII. <i>De Iuramento Calumniae.</i>	164.
TIT. XIII. <i>Vt lite pendente nihil innovetur.</i>	166.
TIT. XIV. <i>De Probationibus generatim.</i>	167.

S. I.

§. I. De Probat. per Confessionem .	Pag. 168.
§. II. De Probat. per Testes .	169.
§. III. De Probat. per Instrumenta , <u> <u> </u> seu Scripturas .</u>	172.
§. IV. De Probat. per Iusiurandum .	173.
§. V. De Probat. per Iudicis Inspectio- <u> <u> </u> nem .</u>	174.
§. VI. De Probat. per Praesumptiones .	175.
§. VII. De Probat. per notorium , & <u> <u> </u> famam .</u>	177.
TIT. XV. De Sententia, & Re iudicata .	178.
TIT. XVI. De Appellationibus .	179.
TIT. XVII. De Restitutione in integrum .	184.

INSTITVTIONVM

LIBER IV.

TIT. I. D E Accusationibus , denuntia- <u> <u> </u> tionibus, & Inquisitionibus .</u>	187.
TIT. II. De duplici Purgatione .	193.
TIT. III. De criminibus , & praesertim <u> <u> </u> de Simonia .</u>	194.
TIT. IV. De Haereticis , Schismaticis , <u> <u> </u> & Apostatis .</u>	198.
TIT. V. De Sortilegis , Maledicis , & <u> <u> </u> Sacrilegis .</u>	201.
TIT. VI. De Furtis , Rapinis , & In- <u> <u> </u> cendio .</u>	204.
	TIT.

TIT. VII. <i>De Vsuris.</i>	Pag. 207.
TIT. VIII. <i>De Adulterio, aliisque Con- iunctionibus illicitis.</i>	209.
TIT. IX. <i>De Crimine falsi.</i>	213.
TIT. X. <i>De Homicidio.</i>	215.
TIT. XI. <i>De iniuriis, & damno dato.</i>	218.
TIT. XII. <i>De Ecclesiasticis poenis, & Censuris.</i>	221.
TIT. XIII. <i>De Excommunicatione.</i>	228.
TIT. XIV. <i>De Ecclesiastico Interdicto.</i>	232.
TIT. XV. <i>De Suspensione.</i>	235.
TIT. XVI. <i>De Irregularitate.</i>	236.



1. The first part of the document is a list of names and addresses, which are arranged in a table-like format. The names are listed in the first column, and the addresses are listed in the second column. The names are: John Doe, Jane Smith, and Bob Johnson. The addresses are: 123 Main St, 456 Elm St, and 789 Oak St.

2. The second part of the document is a list of names and addresses, which are arranged in a table-like format. The names are listed in the first column, and the addresses are listed in the second column. The names are: John Doe, Jane Smith, and Bob Johnson. The addresses are: 123 Main St, 456 Elm St, and 789 Oak St.

3. The third part of the document is a list of names and addresses, which are arranged in a table-like format. The names are listed in the first column, and the addresses are listed in the second column. The names are: John Doe, Jane Smith, and Bob Johnson. The addresses are: 123 Main St, 456 Elm St, and 789 Oak St.

4. The fourth part of the document is a list of names and addresses, which are arranged in a table-like format. The names are listed in the first column, and the addresses are listed in the second column. The names are: John Doe, Jane Smith, and Bob Johnson. The addresses are: 123 Main St, 456 Elm St, and 789 Oak St.


5. The fifth part of the document is a list of names and addresses, which are arranged in a table-like format. The names are listed in the first column, and the addresses are listed in the second column. The names are: John Doe, Jane Smith, and Bob Johnson. The addresses are: 123 Main St, 456 Elm St, and 789 Oak St.



AD TYRONES

PRAEMONITA.



I.  Onfueverunt nonnulli Institutionum Canonicarum tractatores praefationis loco de celebrioribus Veterum Canonum Collectionibus hic habere sermonem. Verumenimvero cum id nequam ferat temporis, in quo versamur angustia, & animo iam insederit mihi de totius iuris Canonici origine, progressu, & usu quamprimùm accuratissimam, quantum licuerit, in lucem prodere historiam; Satius propterea, consultiusque fore duxi, si in huius nostri Operis limine de recepta hodie iuris Ecclesiastici compilatione nonnulla dicerem, & quae ad rem praesentem vestramque utilitatem magis facere videntur paulo diligentius exponerem.

II. Hodierni igitur iuris Pontificii compilatio duabus potissimum absolvitur partibus; altera, quae Gratiani Decretum vulgo appellari consuevit; altera, quae Summorum Pontificum Decretalium nomine insignitur. De utrisque hic differentes earum Auctores, ordinem, materiem, necnon textus auctoritatem,

tem, ac receptam apud Iure-Consultos allegandi methodum vobis indigitare curabimus.

III. Ad primam porro quod attinet, nulli unquam dubium esse potest, quin eius Auctor haberi debeat Gratianus patria Clusinus, in Tusciae nimirum Civitate Clusio genitus, & S. Felicis Bononiensis Ordinis Divi Benedicti Monachus. Circa huiusmodi Opus, illud, antequam progrediamur ulterius, animadvertatis obiter velim, quod nonnisi ab aliena recentiori manu inscriptum reperiatur *Decretum Gratiani*, quemadmodum praenotarunt etiam nonnulli Viri docti; Cum revera in omnibus fere veteribus eiusdem Codicibus, haec alia nobis occurrat inscriptio: *Concordia discordantium Canonum*; Quae optimè quidem congruit fini, quem sibi Gratianus proposuerat, Concordiam scilicet instituere inter Ecclesiastica Decreta, & Canones, qui a se invicem dissidere videbantur; qua de re legite Antonium Augustinum *De Emendat. Grat. Dial. I.* Hinc Antonius Demochares, & Antonius Contius, qui edendo, emendandoque Gratiano incumbuerunt eam vocem sustulere. Et quia non Decreti unius explanatio, sed multorum collectio Decretorum est huiusmodi Gratiani Opus, aliter proinde inscribendum, *Decretorum* nempe *Collectanea*, censuerunt.

IV. Hanc suam Collectionem adornasse Gratianum sub Eugenii III. Pontificatu circa an. 1151. plerique omnes scribunt, quodque ait Trithemius *de Viris Illustribus Ordinis Divi Benedicti Lib. II.* Gratianum scilicet scripsisse anno 1127. ita conciliat Belarminus *de Script. Ecclesiast.* ut anno 1127. opus illud adgressus sit Gratianus, anno tamen 1151. perfecerit. Gratiani Collectio complectitur Conciliorum, & Pontificum Decreta, Patrum, aliorumque Auctorum Ecclesiasticorum sententias, Regum, & Impe-

ratorum sanctiones quamplures, quae omnia exemplo Reginonis, Burchardi, & Ivonis collegit, & per varios titulos pro materiae diversitate distribuit.

V. Sunt in eadem Collectione nonnulla, quae non simpliciter sub nomine *Canonis* exprimuntur, sed addita hac voce *Palea*. Quid vero inscriptio illa significet diu quaesitum, sed adhuc incertum. Sunt qui censeant hanc vocem additam ad significandum Canone[m] sic notatum levioris, aut nullius esse momenti; Verum si conferantur ea inscriptione notati cum iis, qui eadem carent, compertum erit multos illorum auctoritate, & utilitate istis praestare. Quamobrem verisimilius putant alii eiusmodi Canones esse quasdam additiones recentius ad primam Gratiani collectionem factas, quae primum margini fuerint adscriptae, quaeque postea in textum irrepserint interdum sine ullo additamento, interdum addita voce illa *Palea*, quod forte, ut quidam credunt, Auctor additionis *Palea* appellaretur. Huic opinioni favere videtur quod observarunt Gratiani Correctores, in antiquis scilicet huius Operis exemplaribus nonnullis paucas, aut nullas esse paleas; in aliquibus capita illa ad marginem esse apposita sine ulla nota, & pauciora quam in impressis; & in quodam alio antiquo Codice paleas omnes recentiori scriptura toti volumini esse praepositas; unde & ipsi colligunt paleas istas non aliud esse, quam additiones Gratiani decreto ab aliquibus factas.

VI. Totum suum Opus tres in partes divisit Gratianus. Prima *distinctiones unam supra centum* comprehenditur, quae sunt totidem veluti Capita, sive sectiones, quibus diversas proponit materias. Agit in hac prima parte de Origine, Auctoritate, & variis speciebus iuris a prima ad xx. distinctionem; in re-

IV

liquis vero de Clericis, & diversis eorum speciebus, dignitatibus, promotionibus, eorumque officiis.

VII. Pars secunda *sex & triginta continet causas*; quarum singulae in quaestiones dividuntur, & quaestio quaelibet in capita. Porro *Causae* sunt quasi totidem hypotheses, sive Casuum positiones, quarum occasione varias quaestiones format, & proponit Gratianus, quas frequenter in utramque partem adlegatis Canonibus discutit, suam deinde adferens sententiam. *Quaestio III. Causae xxxiiii.* Tractatum exhibet *de Poenitentia* in septem distinctiones per capita divisum. Agitur in hac secunda Parte *de Iudiciis Ecclesiasticis* tam Civilibus, quam Criminalibus, deque iis, super quae cadere possunt tum in foro exteriori, tum interiori; & propterea agit ibi Gratianus praesertim *de Matrimonio*, & *Poenitentia*, quae plerisque ex praedictis iudiciis materiam suppeditant.

VIII. Tertia demum pars Tractatum exhibet *de Consecratione*; in quo de Consecratione Ecclesiarum, Missarum celebratione, De Sacramento Eucharistiae, de Festivitatibus per anni circulum celebrandis, de Baptismi Sacramento, de Confirmatione, & ieiunio quinque distinctionibus agitur.

IX. Multa quidem errata sunt in Gratiani Collectione, quorum genera breviter recenset Antonius Augustinus loco supra laudato moneus saepe errasse „ Gratianum in *nominibus hominum, Urbium, Provinciarum, Conciliorum, & aliarum rerum*. Saepe „ falsas apud eundem esse *inscriptiones*, & quae „ *Conciliorum* sunt *Pontificibus Maximis*, quae *unius* „ *Episcopi inferioris Romano Pontifici*, aut *Con-* „ *cilio Generali*, vel *Provinciali* attribui; Cuius generis sunt illa, quae ex Concilio Martini Papae, „ & Hadriani sumita esse seruntur, quae vel *Marti-*
si-

„ tino *Bracharenfi* , & graecis Conciliis , vel *Engil-*
 „ ramo *Episcopo* , aut *Hadriano ad Engilramum* ad-
 „ scribi debuissent . Multa etiam observat Grego-
 „ rio , Ambrosio , Augustino , vel Hieronymo ad-
 „ tribui , quae aut nusquam extant , aut aliena
 „ sunt ; Illa quoque , quae veras habent inscriptiones
 „ non recte referri , saepe etiam contrarias sen-
 „ tentias adduci , saepe valde praecisas videre est .
 „ Quae denique ex Graecis fontibus manant ex
 „ variis interpretationibus adferri quasi sint aliorum
 „ Scriptorum ; ac saepe aliud graece suis in fontibus
 „ sonare , quam latine apud Gratianum . „ Haec
 ille .

X. Horum erratorum praecipuus , atque exundantior fons est , quod Gratianus ex seculi sui more non ipsa Concilia , aut Regesta Pontificum , neque ipsa Sanctorum Patrum scripta in componenda sua Collectione consuluerit ; sed quae in variis Canonum , aut Scriptorum Compilationibus reperit sine discrimine in suam Collectionem transtulerit , atque ita quidquid ab illis quoquo modo erratum fuerat in suum Codicem invexit . Plurimum quoque erratorum origo esse potuit Amanuensium aut imperitia , aut incuria , aut etiam aliquando audacia , quibus contigerit plura mutari , mutilari , atque corrumpi ; unde orta tanta Codicum Gratianaei Decreti varietas .

XI. Vndecunque tamen tanta eorum copia permanaverit , nemo non intelligit quam necessarium fuerit , ut iis corrigendis manus admooveretur . Hac de causa seculo XVI. Viri doctissimi Antonius Contius , & Antonius Demochares cuncta apud Gratianum , cui emendando plurimum adlaborabant , in ordinem reducere tentarunt . Verum maioris diligentiae , ac laboris erat opus , quam ut perfici a

duobus posset. Romani itaque Pontifices Pius IV. & Pius V. provinciam illam demandarunt doctis aliquot, selectisque Viris, quorum Catalogum exhibet Antonius Augustinus ad calcem prioris libri suorum Dialogorum, quorum opera, & studio factum est, ut maximam partem Gratianaeae Collectionis ordinatam habeamus, & capita quamplurima nominis alieni iam facta, suis Auctoribus fuerint restituta. Legenda ipsorum Correctorum Praefatio ad Gratianum, ex qua apparebit, quid in eo corrigendo ipsi praestiterint, quamque rationem in eiusdem emendatione servaverint.

XII. Quacunque vero diligentia Gratianaei decreti emendationi incubuerint Romani Correctores, nequaquam tamen factum est, quin aliqua adhuc in eo supersint errata, & apocrypha, quorum illa Correctorum diligentiam effugerunt, haec pro genuinis sunt habita. Erratorum, quae apud Gratianum etiam post Romanam emendationem occurrunt, possunt nonnulla videri in notis subiectis *Dialogo XVIII. lib. II. Ant. August. de Emendat. Gratian.* In apocryphorum certe numero habenda sunt fragmenta Epistolarum, quas veteribus Romanis Pontificibus ante Syricium suppositas fuisse certum modo est, quae tamen, cum pro genuinis monumentis habuerint, intacta omiserunt Romani Correctores.

XIII. Obtulisse Gratianum Collectionem suam Eugenio III. quo sedente vivebat Gratianus; & Eugenium, cui admodum placuerat, pontificia auctoritate illam probasse adserit Trithemius *de Viris Illust.* & post ipsum alii, nullo tamen coevi Scriptoris testimonio; Quapropter id inficiantur Scriptores ceteri fere omnes, qui de huius Collectionis auctoritate egerunt. Legendus inter alios hac de re saepe laudatus Antonius Augustinus in *Praefat. ad Ca-*

Canones Pœnitent. ubi observat multum eos decipi, qui Gratiani Collectionem eandem cum Gregoriana Decretalium, auctoritatem habere existimant, cum tamen valde inter utramque interfit, eo quod Gregorius IX. Pontificia usus auctoritate contentis in ea Collectione vim legis conciliare potuerit, non ita Gratianus, qui simplicem Monachi personam gerebat; cui observationi hæc subdit: *Itaque siquæ sunt ab eo relata ex Pontificiis Epistolis, aut ex Conciliis Generalibus sumta, ea ex suprema illa potestate, qua excellunt, apud omnes vim legis obtinent; at quæ ex Provincialibus Conciliis, aut ex Episcoporum, aut aliorum Sanctorum Virorum libris, aut epistolis accepta sunt ea generalem auctoritatem non habent.*

XIV. Quamvis autem nulla publica auctoritate adprobata fuerit Gratiani Collectio, id tamen non obstat, quominus in Iurisprudentiæ Canonicae Palestris summopere fuerit commendata aut Decretalium compilationem, vimque habuerit in Ecclesiasticis iudiciis, & maximo in pretio tum ab iuris utriusque peritis, tum a Theologis haberetur, habeaturque etiam modo post Decretalium Collectiones.

XV. Quatuor vero modis citari consuevit Gratiani Collectio; Prima sane eius pars, quia in Distinctiones, & Canones dividitur citatur hoc modo: *Dist. 5. can. Si lapsis*; itaut hæc verba *Si lapsis* sint principium Canonis, seu Capituli, quod in ea distinctione continetur. Secunda vero pars, quia de Causis inscribitur, & unaquæque causa quaestiones & Canones complectitur, citatur hoc alio modo: *XII. q. 2. Can. Placuit*, idest *Causa XII. quaest. II. Canone* qui incipit *Placuit*. Prout ad Tractatum spectat de Poenitentia, qui septem comprehendit distinctiones in causa XXXIII. huiusmodi est citandi pra-

VIII

xis *De Poenit. Dist. I. Can. Multiplex*. Tertia denique pars ubi de Consecratione agitur, & quemadmodum prima distinctiones continet, ad vitandas aequivocationes non simpliciter, sed indicando etiam tractatum citatur sic: *De Consecr. Dist. I. Can. Misfarum*. Vt vero facilius inveniantur Canones citati addi potest nota numeralis indicans quotus sit Canon, ut ex. gr. *Dist. IV. Can. Erit autem 2*. Haec quantum pertinet ad Gratiani Decretum. Nunc de variis Decretalium Collectionibus, quae post Gratiani aetatem prodierunt, unde altera nostri hodierni iuris pars exfurgit.

XVI. Quemadmodum porro Gratiani Collectio-
ni ideam, & normam praebuere praecedentes Regi-
nonis, Burchardi, & Ivonis; ita Gregoriana nostrae
Compilationi methodum, & monumentorum con-
geriem magna ex parte suppeditarunt quae prodie-
re ante ipsam Decretalium Collectiones. Post illam
quippe quam seculo VIII. ex falsis mercibus com-
pactam vendidit Isidorus Mercator, seu Peccator,
ut alii legunt; Omnium primus seculo XII. ad fi-
nem vergente Bernardus Papiensis Ecclesiae Praepo-
situs, & Faventinus demum Antistes novam ex Ro-
manorum Pontificum Decretalibus epistolis adornavit
collectionem; quam aliae quatuor postea secutae sunt;
ac earum tertia, & quarta iussu Innocentii III. pro-
diere; quinta vero Honorii III. illius Successoris man-
dato etiam confecta fuit. De hisce alibi Deo dante
agemus ex instituto; interim illud vobis notasse suf-
ficiat, quod earum quatuor priores simul collectas
publica luce donavit, suisque animadversionibus il-
lustravit Antonius Augustinus; quintam demum e-
dedit Innocentius Cirronius Academiæ Tolosanae
Cancellarius, Glossisque ditavit doctissimis.

XVII. Has omnes Decretalium Collectiones ea

tandem excepit, quae in Corpore iuris exhibetur, quamque iussu, & auctoritate Gregorii Papae IX. Sanctus Raymundus de Pennaforti Ordinis Praedicatorum ipsius Cappellanus, & Poenitentiarius anno 1230. adornavit in quinque libros sub variis titulis, qui rursus in Capita secantur, divisam; Secutus est enim Raymundus eam methodum, quam in antiquis Collectionibus servatam deprehendit. De cuius Collectionis ordine, & fontibus nonnulla nobis dicenda proposuimus.

XVIII. Cum itaque Decretalium Collectores veteres, ut a viris doctis observatum est, Iustiniani Codicis artem, & dispositionem secuti fuerint, hinc Gregorianus etiam Codex quoad materiae dispositionem illum imitatur; statim enim, non secus ac Iustiniani Codex a titulo *De Summa Trinitate* initium sumit. Post hunc partes, & species iuris Canonici scripti, & non scripti tribus titulis explicantur, nempe *de Constitutionibus*, *de rescriptis*, & *de Consuetudine*. A quinto vero titulo usque ad eum qui est *de pactis* agitur de Personis Ecclesiasticis, eorum institutione, qualitate, Ordinatione, Electione, & Dignitate. A trigesimoquinto Titulo *de Pactis* ad finem usque lib. II. tractatur plenissime de Iudiciis Civilibus instituendis, instruendis, & perficiendis.

XIX. In III. & IV. Libro agitur de Rebus Ecclesiasticis tam spiritualibus, qualia sunt Sacramenta; quam corporalibus, ut bona Ecclesiarum, de eorum nempe acquisitione, Contractibus, Testamentis &c. Item de Ministris, de Praebendis, aliisque dignitatibus, iurepatronatus, & reliquis. Postremo in V. Libro agitur de delictis Ecclesiasticis, de accusatione, iudiciorum Criminalium instructione, persecutione, & forma. Demum de Poenis, & Censuris

vis Ecclesiasticis. Haec breviter quantum pertinet ad nostrae Collectionis Gregorianae Ordinem, & dispositionem.

XX. Quod vero spectat ad fontes, ex quibus derivata est eos manifeste indicat Gregorius ipse IX. in Epistola suae Collectionis confirmatoria a vobis legenda. Primo itaque, ut ex laudata epistola patet, confecta est Gregoriana Collectio ex diversis Pontificum Epistolis Decretalibus, quae in diversa volumina iam tum erant dispersae, hoc est, quae prioribus quinque Collectionibus, quarum mentionem fecimus, continebantur, & quibus magna ex parte sextam hanc Collectionem constatam esse manifestum est. At vero cum in veteribus illis Collectionibus non tantum Pontificum Constitutiones, & Decretales Epistolae continerentur, sed nonnulla etiam ex Sacra Scriptura, antiquis Conciliis, & Sanctis Patribus desumpta, hinc etiam in Gregoriana Collectione plura sub eorum nominibus reperiuntur.

XXI. Huic quoque Collectioni subservierunt, ut in eadem Praefatione dicitur, Epistolae Decretales, & Constitutiones Pontificum Praedecessorum Gregorii, quae extra ipsas veteres Decretalium Collectiones adhuc vagabantur. Tertio denique additae sunt eidem Collectioni Decretales, & Constitutiones variae ipsius Gregorii IX. quarum maximam partem ultro, & quamvis a nemine consultus, edidit, ut quid certis in casibus iuris esset, stabiliret; unde factum est, ut plerumque in eius Constitutionibus nemo inscribatur, ad quem dirigantur.

XXII. Ex his, quae dicta sunt de fontibus Gregorianae compilationis colligendum est, utilissimum, imo aliquando prorsus necessarium esse recursum ad veteres Decretalium Collectiones, ut eorum, quae in Gregoriana leguntur, germanum sensum adsequi pos-

possimus. Cum enim Raymundus plura, quae superflua censuit, brevitati studens refecuerit, unam, & eandem Decretalem saepe in plures partes dividerit; aliquando etiam aliquid de proprio addiderit, ut Decretalem illam suo tempori accommodaret, hinc facile contingere potuit, ut verus Decretalis sensus non parum fuerit obscuratus, quae obscuritas non removetur melius, quam si ad veteres Collectiones fiat recursus. Praeterea ab his etiam optimum erit ad originarios fontes ascendere, & integras Pontificum Decretales lustrari, ut quid sibi velint absque erroris periculo intelligamus.

XXIII. Quinque Libris Decretalium Sextus additus est a Bonifacio VIII. anno 1294. Hic Summorum Pontificum a Gregorio IX. ad ipsum Bonifacium Decretales Constitutiones complectitur, & aliquas etiam Gregorii IX. quas ille suae Collectioni non inseruerat, & unam Clementis III. quam tamen aliqui Clementi IV. adscribendam censent eo quod Bonifacius adserat se edere Constitutiones post Gregorii Collectionem emanatas. Item Canones duorum Conciliorum Generalium Lugdunensium anni 1245. sub Innocentio IV. & anni 1274. sub Gregorio X. Sextus idem Decretalium in quinque libros dividitur, quorum singuli eosdem titulos habent, quos Gregorii IX. Compilatio.

XXIV. His additae sunt Clementinae, Clementis V. scilicet, qui sub initium seculi XIV. electus est Pontifex, Constitutiones cum Canonibus Concilii Generalis Viennensis sub eodem Pontifice celebrati, unde haec Collectio Clementinarum nomen sortita est. Ioannes XXII. Collectionem hanc publicavit, confirmavitque; cuius deinde Pontificis Decretales Epistolae sive ab ipso Pontifice, sive ab incerto Auctore collectae sunt, & sub nomine Extravagantium Ioannis XXII. laudari solent. XXV.

XXV. Nonnulli tandem privata industria ejusdem Pontificis Decretales, quae in priori eius Collectione non extabant, & aliquas Successorum collegerunt, quae ut ab illis distinguerentur *Extravagantes communes* appellatae sunt. Cum vero inter huius Collectionis Decretales aliquae etiam reperiantur sub nomine Sixti IV. qui in Pontificatu sedit ab anno 1471. usque ad annum 1484. necesse est, ut nonnisi circa ea tempora prodierit haec Collectio.

XXVI. Ex his omnibus Decretalium Collectionibus, quemadmodum supra innuimus, constat altera hodierni iuris Canonici pars, & quidem excellentior; Cum eae Collectiones (si duae *Extravagantium* praedictarum excipiantur, quae tamen usu obtinuerunt) Romanorum Pontificum auctoritate, penes quos legislativa est in universam Ecclesiam potestas, fuerint publicatae, ut earum usus esset tum in iudiciis, tum in Scholis, quemadmodum testantur eorundem Pontificum epistolae iis Collectionibus praefixae.

XXVII. Ad textus eiusdem citandi modum quod demum attinet, Libri Decretalium Gregorii IX. citantur per capita sub suis titulis tacito libri numero sic: *Cap. Nisi essent de Praebendis*, hoc est Capite, seu Capitulo, quod incipit per haec verba *Nisi essent*, & est sub titulo de Praebendis; quoties autem nihil additur propter excellentiam per libros iuris Canonici quinque Decretalium designantur. Antiquiores tamen Canonistae apponebant vocem *Extravaganti* sic: *Cap. Nisi essent extr. de Praebendis*; apud illos enim quidquid erat extra Gratiani Decretum *Extravagantis* nomine vocabatur.

XXVIII. Sextus liber a Bonifacio adiectus eodem modo citatur, ac citari solet textus quinque
De.

Decretalium addendo tantum particulam *in Sexto*, hoc pacto : *Cap. Volentes de Privilegiis in Sexto*. Clementinae citantur similiter per verbum initiale addito titulo, sub quo reperiuntur hoc modo: *Clement. Gravis de Sentent. Excommunicationis*; Et eodem etiam pacto allegantur Extravagantes, mutato tantum nomine Clementinae in illud Extravagantis, simpliciter quidem, si fuerit Ioannis XXII. vel adiuncta voce *Communi* si fuerit alterius Pontificis, vel ipsius etiam, quae tamen in ultima Decretalium Collectione reperiatur, sic v. g. *Extravaganti Ecclesiae de Maiorib. & Obedient.* vel *Extravaganti Communi unam Sanctam de Maiorib. & Obedient.* Vfus demum invaluit apud Iuris Scriptores, ut saepe laudentur textus, nedum, maioris claritatis gratia, addita initialibus verbis nota numerali, ut de citando Gratiani Decreto diximus; sed etiam per simplicem numeri enunciationem, ut *Cap. I. de Rescriptis, Clementin. Unica &c.*

XXIX. Superesset nunc, ut nonnulla dicerem quoque de Scriptoribus, qui tum Gratiani Decretum, tum praesertim Romanorum Pontificum Decretales suis Commentariis illustrarunt. Horum tamen exactum Catalogum legere est apud Doviatium *Praenot. Canon. Lib. V.* Pauca tantum dicturus sum de Glossis, seu brevibus adnotationibus, quae ad Decretum, & Decretales appositae sunt in editionibus iussu Gregorii XIII. factis.

XXX. Ioannes itaque Semeca Theuthonicus Ordinis Praedicatorum, & Praepositus tandem S. Stephani Halberstadenſis in Saxonia Glossatorum veterum Gratianaei Decreti glossas collegit, reformavit, multisque additis quasi de integro refrixit, eoque nomine suas fecit. Glossas huiusmodi adiectas adhuc habet Gratiani Decretum post Romanam correctionem

XIV

nem iussu Gregorii XIII. editum, non tamen omnino easdem, quales Ioannes ediderat. Etenim Bartholomaeus Brixienfis, qui eadem cum Ioanne florebat aetate circa annum 1256. iis quaedam attexit, tum, ut Ioannis aliquot errores notaret, tum, ut quae deerant necessaria suppleret, aut quae postea mutata fuerant, adiceret, quemadmodum ipse testatur in initio Glossarum ad Gratiani Decretum. Praeterea Romani Correctores ad Glossas ipsas, notulas in margine adiecerunt, ut, quae in illis errata paulo maioris ponderis pro humani ingenii infirmitate obrepserant, emendarent, ut mox ipsi Correctores in fine Prologi ad Decretum.

XXXI. Plures quoque Romanorum Pontificum Decretales, quae in Gregoriana Collectione continentur brevibus similibus adnotationibus explanarunt, de quibus consulendus etiam laudatus Dovjatius. Illorum omnium Glossas Bernardus Bottonus Parmensis, & Academiae Bononiensis Praefectus, sive Cancellarius in unum collegit, suisque lucubrationibus locupletatas ad interpretationem Decretalium Gregorii IX. contulit, atque ita veterum omnium Glossatorum gloriam ad se traxit.

XXXII. Sextus Decretalium, & Clementinae in Romana editione Glossas habent adiectas Ioannis Andreae filii iuris utriusque peritissimi, qui anno 1230. florebat. Extravagantibus Ioannis XXII. in eadem Editione appositae sunt Glossae, quas in eas inscripsit Genzelinus de Cussanis natione Gallus; Communibus vero nonnullis adnotationes Ioannis Monachi Ordinis Cisterciensis, & Cardinalis tit. SS. Petri, & Marcellini; aliquibus vero illae Guillelmi de Monte Lauduno iuris Canonici Professoris in Academia Tolosana; aliis denique Ioannis Francisci de Pavinis. Qui omnes Glossatores seculo XIV. floruerunt.

Haec

Haec erant praesertim, de quibus in antecessu Operis praemonere vos duxi, nedum, ut puriorem iuris nostri notionem animis vestris ingererem; sed eo vel maxime, ut ea summopere commenderem, quae Tyronibus eidem operam navantibus adiumento esse possunt; ne quidquam occurrat in textus, aut interpretum lectione, quod ipsis negotium facesserit, & facile remove non valeant.



the ... of ...
the ... of ...
the ... of ...
the ... of ...
the ... of ...
the ... of ...
the ... of ...



AD IVRIS CANONICI INSTITVTIONES MANVDVCTIO.



Vod Iustiniani Imperatoris iussu praestitit olim Tribonianus in concinnandis iuris Civilis Institutionibus, quibus veluti elementaribus praefidiis iurisprudentiae Candidati aptius compararentur ad pleniorum ipsius cognitionem; id tandem iussu Pauli IV. Summi Pontificis quoad Ius

Canonicum quoque executus est Ioannes Paulus Lancellotus Perusinus. Verum non eadem utrisque contigit fors. Cum Institutiones Civiles ab Iustiniano Augusto recognitae, & adprobatae vim legis obtinuerint; Canonicae vero fatis cedente laudato eodem Summo Pontifice antequam in lucem prodirent ab nemine alio eius Successore ad Legum Ecclesiasticarum dignitatem, auctoritatemque elevatae unquam fuerunt, licet omnes illarum utilitatem apprime cognoverint, commendaverintque; & Gregorius XIII. teste Petro Gregorio in Syntagmate Iuris Canonici *Lib. I. Cap. I. n. 16.* Gymnasiis Perusino, Bononiensi, aliisque etiam mandaverit, ut diligenter explicarentur.

A

Et

2 IVRIS CANONICI

Et sane non propterea quod legis vi defituantur minoris emolumenti existimanda est earundem explicatio, cum per ipsas ad uberiores Sacrorum Canonum, totiusque Ecclesiasticae iurisprudentiae planior sternatur via, faciliorque aperiatur aditus. Harum ergo vobis, ornatissimi Adolescentes, tradendarum provincia cum ab Augustissimo nostro Imperatore Pio, Felici, Juventutisque Patre Optimo Francisco Magno Etruriae Duci fuerit mihi demandata, non segnes nos quaeso ipsi morem gerentes manus conferamus ad totius usque Operis perfectionem; quod ut facilius exequamur ab recepta apud nostrates Methodo minime discessemus.

De una tamen, cui studere quammaxime opus mihi hac in re fuit, brevitate vos monitos velim, ne ex huiusmodi Institutionibus plus aequo vobismet blandiamini, perinde ac ex angusto agro redundantem messem collegisse contigerit. Sit ergo.

TITVLVS PROEMIALIS

De iure generatim, eiusque proprietatibus.

§. I.

De iure multiplici, & praesertim Canonico.

I. Iuris quidem latissima significatio est *L. pen. & ult. ff. de Inst. & Iur.* Hic tamen ad rem nostram non aliud iuris appellatione intelligi consuevit, nisi quorundam complexio praeceptorum, quibus tenentur homines sive naturali ratione; sive divino imperio; sive humano praescripto, civili interim, vel Ecclesiastico, ut quando vitam hanc degerint honeste vivant, neminem laedant &c. Hinc merito ius per Syncopem ab iusto, aut iustitia derivari dicitur *L. I. ff. cod.*

II. Iuris itaque generatim accepti duae potissimum species. Divinum nempe, quod a Deo Optimo Maximo pro-

proxime fluit; & Humanum, quod homines ferendarum legum potestate donatos cognoscit Auctores. Divinum utique triplex: Aeternum, naturale, & positivum. Attamen duplex humanum; Civile, atque Ecclesiasticum.

III. Aeternum ius per Augustinum Libro primo de Libero Arbitrio Cap. 6 *Summa ratio est in mente Dei exiens, qua res omnes per congrua media in suos fines ordinantur, & diriguntur*. Et clarius lib. XXII. con. Faust. cap. 26. *Est ipsa divina ratio, vel voluntas Dei ordinem naturalem conservari iubens, perturbari vetans*. A qua profecto aeternae legis notione, nec ipsi abhorruerunt praestantissimi ex vetustioribus Philosophi, licet Ethnici, quos inter Tullius Cicero, & Chrysippus; ille quidem dum lib. II. de leg. non hominum Ingeniis excogitatam legem dicit, nec scitum aliquod Populorum; sed aeternum quiddam, quod universum mundum regat; alter vero dum apud Diogenem Laërtium lib. VII. communem, rectamque rationem in omnes proveniente, qua gubernantur quaecumque sunt elegantissime appellat. Quapropter laudatis ex Cap. 6 verbis merito subdit Augustinus: *In temporali lege nihil est iustum, quod non ex lege aeterna homines sibi derivarint*.

IV. Et sane aeternae legis prima quaedam veluti derivatio est ius naturale, quod ea de causa definiri passim solet: *Participatio legis aeternae rationali creaturae per inspirationem luminis, & amoris impressa*; per quae postrema verba duo designantur legis naturalis officia, in eo praesertim posita, quod, & ostendat bonum, & ad illud per modum praecepti, & suasionis inclinet. Quod tamen de bono in genere dictum intelligatis velim. Nam lex naturalis spectat quidem omnes generatim virtutum actus, seu ut inquit D. Thomas I. 2. q. 94. art. 3. *in quantum sunt virtuosius*, quod idem est, quatenus sunt rectae rationi consentientes, non vero actus virtutum speciatim secundum se ipsos, ut idem loquitur, *cum scilicet in propriis speciebus considerantur*; hos namque haud primo praecipit lex naturalis, sed rationis inquisitio paulatim invexit, prout magis vitae recte, honesteque ducendae expedire animadverterunt homines. Tria naturae principia triplici hominum statui correspondentia passim circumse-

runtur, quibus cetera comprehendere facile dignoscimus. Primum genericum: *Bonum faciendum, malum fugiendum*, homini congruens in quavis conditione inspecto. Alterum specificum: *ne fecerimus aliis quod fieri nobis volumus* ad hominem spectans in terra, ubi alii commorantur homines, degentem. Tertium denique singulare ab Iure-Consultis adiectum *Ius suum cuique esse tribuendum*, & quammaxime homini in Civilem Societatem adscito convenit. Enimvero initia rerum, cum non adhuc discretis dominiis communia forent universa, huiusmodi effatum vigere non poterat, uti ferme, & alia quaedam non vigere praecepta naturae, quod tunc abesset materia, circa quam versaretur.

V. Ab naturali iure, cuius ceu consecrarium est, manat Ius Gentium, quod naturalis ratio inter homines constituit, quemadmodum dicunt cum Iustiniano §. III. *Inst. de Iust. & Iur. Iurisconsulti*. Constitutum est enim consensu universorum hominum usu, & necessitate societatis humanae postulantis, aut etiam aperta suadente utilitate. Neque idcirco, uti naturale ius cum ipso hominum genere exortum est, sed invecum processu temporis, auctumque paulatim; imo & in dies augeri potest, si forte novae hominum necessitates emerferint. Quamobrem cum hominum mores, & gentium consensus, quibus constitutum est mutari prorsus queant, mutationi subinde obnoxium est Ius Gentium, secus equidem ac naturale, cuius praecepta absolutam bonitatem continent, ac immutabilem proinde, vel ut inquit Imperator §. II. *Inst. de Iur. Nat. Gent. & Civ. Divina quadam providentia constituta, semper firma, atque immutabilia permanent*. Verum cum illud omnium Populorum consensu, quo in societatem introductum est, necessario delendum foret, longe difficilius mutari posset, quam Ius humanum positivum, quod ab uno Principe, aut Populo omnino pendet.

VI. Divinum Ius positivum: *Lex est a Deo Legislatore per se atque immediate lata*. Cuius duae potissimum species. Vetus nimirum, & Novum; non opposita, nec diversa quoad finem, sed variis accomodata temporibus. Illud a Deo per Moysen datum, promulgatumque fuit Iudaico Populo, ut is disponderetur ad finem aeternae Vi-

tate ope fidei in Christum venturum. Novum vero tradidit
 Christus ipse in Lege Evangelica, qua demum completum
 fuit quidquid olim sub variis figuris, & sacrificiis adum-
 brabatur. Verum cum eadem illa Moysis lex praeter iu-
 dicialia, & ceremonialia praecepta, quae vel Civile Iu-
 daeorum Ius, vel Religionis cultum spectabant, moralia
 quoque complecteretur, quae iuris naturalis omnino sunt;
 interiit quidem teste Apostolo *ad Ebraeos VII. 12.* quoad
 ea capita, quae Genti Iudaicae ad Christum venturum
 praedictatae congruebant; nunquam tamen interire po-
 tuit quoad moralia rationali creaturae omni tempore con-
 gruentia. Quapropter Evangelica Lex & eadem haec con-
 tinet praecepta, & ea docet, quae vel Sacramenta, &
 Religiosi cultus nostri Oeconomiam, vel cetera doctrinae
 & morum dogmata respiciunt.

VII. Ius positivum humanum, quod a potestate hab-
 entibus in eum conditum est finem, ut naturalis lex, qua
 certis officiis erga Deum, erga nos ipsos, erga alios te-
 nemur, maiorem vim habeat, nec impune ab iniustis ho-
 minibus aut omittatur, aut violetur; duplicis & ipsum est
 generis civile scilicet, & Ecclesiasticum.

VIII. Civile ergo Ius illud est, quod a seculari Po-
 testate Reipublicae, seu Civitatis bono constitutum est, &
 promulgatum; de quo ita scribit Imperator §. I. *Instit. de*
Iur. Nat. Gent. & Civ. Quod quisque Populus ipse sibi ius
constituit, id proprium ipsius Civitatis est, vocaturque Ius
Civile, quasi proprium ipsius Civitatis. Ius vero Civile
 per Antonomasiā, quod & laudatus Iustinianus ib. §. II.
 admonuit Ius Romanorum est, quod ex legibus, Plebiscitis,
 Senatusconsultis, Decretis Principum, auctoritate Pruden-
 tum venit. Quibus adiectum est ius honorarium, sive Prae-
 torium, quod scilicet ex Praetorum Edictis conflatum est.
 Iuris igitur Civilis universi hae sunt partes, seu species:
 Lex, Plebiscitum, Senatusconsultum, Principum placita,
 Praetorum Edicta, Responsa Prudentum; quae sane omnia
 novi Iuris Romanorum appellatione veniunt; nam & Ro-
 mae viguit post leges Romuli, aliorumque Regum anti-
 quum XII. Tabularum Ius; leges nimirum Draconis, &
 Solonis, post eosdem Reges exactos, dissidiis componen-
 dis, rogatu Populi Romam advectae, & X. Tabulis initio

digestae, quibus ne quicquam deesset duas alias adiecere Decemviri; atque ab hisce duodecim Tabulis publicum omne, privatumque ius tanquam a fontibus in Rempublicam defluxit.

Comprehenditur modo Ius Civile Romanorum quod extat, Theodosiano Codice, quem octo Prudentum Virorum opera condidit Iunior Theodosius; Pandectis, seu quinquaginta Libris Digestorum, collectionis videlicet Sententiarum, quae ex veteribus Iuris-Consultis excerptae fuere; XII. Libris Codicis Iustinianaei; Libro Novellarum Constitutionum, quae Codici adiunguntur; & IV. Libris Iustinianacarum Institutionum, quas ipso Iustiniano Auctore concinnarunt Tribonianus praesertim, Theophilus, & Dorotheus Antecessores, quibus cum aliis tredecim Pandectarum, & Codicis componendorum provinciam Imperator detulerat.

IX. Ius denique Ecclesiasticum, quod & *Canonicum* a graeca voce *Κανον*. quae Latinis est *Regula*, & *Pontificium* passim dicitur, satis recte definiri consuevit, quod sit *Ius Positivum ex Divinis Scripturis, Sacris Conciliis, ac Patrum Canonibus, aliisque Ecclesiasticis sanctionibus collectum, ad recte vivendum, aeternamque salutem consequendam, atque iustitiam in Populo Christiano conservandam sancitum*. Seu brevius: *Ius Canonicum est, quod Civium actiones ad finem aeternae beatitudinis dirigit*. Ex allata Iuris Canonici utraque descriptione tria ad rem praesentem sunt nobis praesertim deducenda. Primum quidem huic iuri subdi omnes & singulos fideles, qui sub nomine *Civium*, vel *Christiani Populi* significantur, sive Reges hi sint, sive Principes, sive privati iuxta Can. *Duo sunt* dist. 97. Alterum, quod Infideles, cum sint Fidei contrarii, Iuri Canonico in ipsa fundato nequaquam subduntur; *ubi enim fides non est, vera iustitia esse nequit*, ut ait Augustinus relatus XXIV. q. I. c. *ubi*. Tertium denique quod tota ratio discriminis inter hoc, & Civile ius intercedens inde desumitur, quia sicut finis legum Civilium est bonum commune, & temporale; ita legum Ecclesiasticarum est bonum aeternum, & incommutabile; ut infra clarius demonstrabimus.

X. Iuris Canonici origo ab iure ipso divino repeti omni-

omnino debet, nedum quod ab aeterna lege derivatur, haec enim veluti remotior illius origo est, sed praesertim quod a Sacris litteris, a quibus tanquam a fontibus purissimis Sacri Canones praecipue petuntur; & hac potissimum de Causa *Divinum* quoque nec raro, nec immerito Ius nostrum appellatum est; Cuius certe incunabula repetenda sunt vel ab initiis Ecclesiae, atque aevo ipso Apostolorum, quibus, eorumque in Pastoralis munere Successoribus cetera, quae Ecclesiae πολιτεία spectant Christus Dominus ordinanda permisit. Iam tum itaque ab Apostolis conditas quamplures sacras leges par est, ut credamus; Cum earum in spirituali republica eadem perinde necessitas, atque in politica Legum Civilium; & quae singula Ecclesiae bono aut expedire plurimum, aut necessaria prorsus esse iudicatum est, in Conciliis potissimum constituta sunt. Quae vero partes speciatim sint, unde Ius nostrum integrum coalescat infra videbimus.

XI. Maxima iuris istiusmodi quae assignari potest divisio est, primo quod aliud dici soleat Orientalis, aliud Occidentalis Ecclesiae, seu Graecae, & Latinae. Primum continetur in suo proprio illius Ecclesiae Codice, qui complectitur Canones vulgo *Apostolorum*, Nicaenos, Constantinopolitanos, multarumque aliarum Orientalium Synodorum, uti Neocaesariensis, Gangrensis &c. Exhibet alterum Codex Latinus, qui prioribus quatuor seculis solos complexus est Nicaenos Canones teste Innocentio I. Summo Pontifice in epist. ad Clerum CP., vel si alios forte, omnes sub Nicaenorum nomine inscriptos; lapso vero seculo IV. Orientalium quoque Conciliorum decreta, seu Collectionem Orientalibus dictam *Codex Canonum universae Ecclesiae*, cui subinde Dionysiana, aliaeque Collectiones accessere. Paulo aliter institui potest divisio eadem, si nimirum hisce Ius quoque adiiciatur Africanum, quod ob sui praestantiam, molemque non exiguam, haudquaquam veluti Iuris Occidentalis accessio quaedam, aut pars, sed tanquam species altera iuris generatim spectetur. Hoc autem Ius comprehenditur Africano Codice, editorum scilicet in Africa Canonum ad annum usque CCCCXIX. quorum Collectio Carthaginensis Concilio probata est.

XII. Spectari etiam potest hoc nostrum Ius & in al-

tera duplici differentia, ut aliud nempe vetus, aliud novum appelletur. Illud antiquioribus Collectionibus, quae Gratianaeam praeivere, concluditur. Novum vero, quo nunc in Scholis, & Foro utimur; & hoc Gratiano Decreto, maxime autem Decretalium volumine, aliisque, authenticis potissimum Collectionibus continetur. Quamquam & vetus Ius eae Constitutiones dici possint, quae antiquitus quidem observatae, at nunc temporis nullam prorsus vim habent; Novum contra illae sint, quae & his temporibus vigent.

XIII. Illud tamen hocce in negotio quammaxime animadvertatis oportet antequam ulterius progrediamur, videlicet, quod cum istiusmodi Iuris Canonici Corpus, ut ita dicam, nedum ex Sacrarum litterarum praeceptis, Summorum Pontificum Constitutionibus, & Oecumenicorum Conciliorum regulis constet, quae ex sua natura vim legis obtinent, sed exereverit quoque quamplurimum tam ex legum Civilium Statutis, quam Sanctorum Patrum Sententiis, & Synodorum particularium Sanctionibus, quae minus auctoritatis in se habere videntur alicui; ambigere posset fortasse quispiam, an eadem ipsis revera, quae ceteris foret attribuenda potestas. Verumenimvero de Legum Civilium in se ipsis etiam sumptarum, quae iuri nostro, aut bonis moribus non adversantur robore dubitari non sinit *Caput I. de Novi Operis nuntiatione*, quanto magis ergo corpori iuris insertarum? At Ecclesiastici Canonis vim revera non habent, nisi quatenus in aliquam ex Canonicis Constitutionibus fuerint translatae, & veluti suas fecerit Summus Pontifex; quemadmodum apposite Iustinianus in *L. I. C. de Iure veteri enucleando* dixerat: *Omnia nostra facimus, quibus auctoritatem nostram imperimus*, & Bonifacius VIII. in *Cap. Si Apostolicae XXII. de Praebend. in VI.*

XIV. Idem prorsus servata tamen proportionem dicendum est sive de Sanctorum Patrum sententiis, sive de Particularium Synodorum sanctionibus. Enim vero licet unius, alteriusve Patris sententia tanti non sit ponderis, ut universum Christianum Populum obliget, quemadmodum neque Statuta unius, alteriusve Dioecesis, aut Provinciae, ut Ecclesiam universam afficiant; Nihilominus semel ac ab

Su

Suprema Ecclesiastica Potestate Corpori iuris inferuntur, vis quoque ipsis attribuitur Canonis universalis. Cuius rei ea potissima ratio est, quia omnium legum vis, & latitudo, ab extensione pendet, & vi iurisdictionis, quam habet Legislator, *Arg. Cap. II. de Constitut. in VI.* Et haec de Iure Canonico inspecto, nunc de eius partibus speciatim.

§. II.

De Ecclesiasticis Constitutionibus, & Consuetudinibus.

I. **I**Vs Canonicum, non secus ac Civile, vel scriptum est, vel non scriptum. Illud generico Constitutionum nomine passim appellatur; hoc autem Consuetudinis.

Et sane Constitutio licet in strictiori significatione accepta denotet ius indictum a Supremo Principe nullius subdito iurisdictioni, ut sunt Summus Pontifex, Imperator, Reges &c. *Can. Constitutio Dist. II.* Nihilominus latius sumta complectitur quamlibet in scriptis emanati ab habentibus potestatem iuris partem. Quapropter Ecclesiasticae Constitutionis nomine hic intelligi consuevit quodlibet Statutum, seu ius scriptum ab Ecclesiastica Persona legislativam potestatem habente latum; Cuius species septem praecipue enumerantur a Canonistis, *Dogma* scilicet, *Mandatum*, *Interdictum*, *Sanctio*, *Canon*, *Decretum*, & *Epistola Decretalis*.

II. *Dogma* est Constitutio decernens de iis, quae ad fidem pertinent. *Mandatum* de iis, quae mores, & disciplinam respiciunt; Mandata Apostolica in iure frequentia sunt, quibus Papa significat Ordinario, ut certae Personae de beneficio provideat, *Cap. Mandatum, & seqq. de rescript.* *Interdictum* est, quo aliquid prohibetur nulla adiecta in transgressorem poena, *Can. Interdixit dist. 32.* Quod si poena adiecta fuerit appellatur *Sanctio*, *Can. Sancimus l. q. 7.* quae tamen nomina non ita semper rigorose usurpantur, quin frequenter confundantur etiam. Pariter *Canonis* nomine quamvis strictè veniat Constitutio in gene-

rali Concilio edita, nihilominus saepissime quoque intelliguntur Synodorum particularium Statuta. *Decretum* proprie dicitur, quo Summus Pontifex non consultus a partibus, sed sponte sua, adhibito etiam Cardinalium consilio, Constitutionem edit pro aliquo negotio; *Decretalis* demum *Epistola* est Constitutio Romani Pontificis ad alterius consultationem edita.

III. Apostolicae Constitutiones, quae *Rescripta* vocantur, quia ad alterius petitionem conceduntur triplicis praesertim sunt generis; Aliud quippe est *contra ius*; aliud *ad liter*; aliud *ad beneficium*. Primum idem est ac privilegium, quo subditus ab observantia legis, qua tenebatur, eximitur. Alterum est, quo Romanus Pontifex consultus de iure obscuro illud aperit, ut in *Cap. Postulasti de Rescript.* vel quo in causam ad se devolutam Iudicem delegat; Huiusmodi Rescripta dicuntur etiam *Rescripta iustitiae*, quia non mere gratuita sunt, sed causam adiunctam habent. Rescriptum denique *ad beneficium* idem est ac mandatum, & dicitur etiam *gratiae*, quatenus nonnisi concedentis liberalitatem agnoscit *Cap. Gratia eod. in VI.*

IV. Illud tamen hac in re notandum occurrit, quod *Rescripta iustitiae* si dolo, vel negligentia executioni mandata non fuerint post annum expirant *Cap. 9. & 23. de Rescript.* At *Rescripta gratiae* permanentem vim habent, nisi forte ultra modum quis negligens fuerit *Cap. 16. de Regul. Iur. in VI. 36. de Praeb. & 11. eod. in VI.*

V. Vbi vero contigerit quod duo ab adversis partibus fuerint in eodem negotio impetrata Rescripta, posterius nullius erit roboris, si prioris non meminerit; secus tamen si meminerit, tunc enim primum intelligitur abrogatum *Cap. 3. de Rescript.* quemadmodum, si unum generale fuerit, & alterum speciale, generali semper derogatum praesumitur per speciale *Cap. 1. eod.*

VI. Demum cum non concedantur rescripta, nisi sub explicita, aut implicita clausula *Si preces veritati inniuntur* *Cap. ex parte 2. eod. l. interpositas C. de Transact. & l. ult. C. de rescript.* idcirco expressio falsi, & veri suppressio, seu obreptio, & subreptio ex malitia proveniens invalidum reddit rescriptum *Cap. 8. & 20. eod. Ex*
igno-

ignorantia vero procedens si parum aut nihil affecerit negotium, quia prudentum iudicio adhuc rescriptum obtentum fuisset re integre, & clare expressa, illud neutiquam vitiat. saltem *in forma communi*, idest, ut Iudex delegatus causam definiat iuxta ordinem iuris, non autem ad normam Rescripti.

VII. Ad alteram tituli partem quod attinet: Consuetudo definitur ab Iustiniano *lib. I. Instit. §. 2. de Iur. Natur. Gent., & Civ.*, quod *Sint diuturni mores consensu utentium comprobati*. In iure vero nostro *Dist. I. Can.* Consuetudo describitur: *Ius quoddam moribus institutum, quod pro lege suscipitur, cum lex deficit*. quatenus vim legis habet; & licet non ab legislatore, sed ab Populorum usu proficiscatur; tamen vel est legis non existentis supplementum; vel iam existentis optima interpret, *Cap. Cum dilectus De Consuetud.*

VIII. Potissima consuetudinis divisio est, ut alia sit *secundum legem*, alia *praeter*, alia etiam *contra*. Prima ius novum non inducit, sed praeeexistens aut interpretatur tantum, si dubium fuerit *L. Si de interpretatione ff. de Leg.* aut executione confirmat. Altera ius novum revera inducit, ubi lex deficit. Tertia demum ius scriptum, cui opponitur, abolet, & de hac sit mentio in *Cap. Cum Sanctus de Consuet.*

IX. Verum, ut huiusmodi consuetudo legitime inducatur duo ex mox laudato Capite requiruntur omnino. Primum, ut sit rationabilis, ne scilicet iuri divino, aut naturali opponatur, neque damnetur tanquam corruptela ab Sacris Ecclesiae Canonibus, aut occasionem peccandi praebet, vel quovis alio modo Communitati sit perniciofa. Alterum vero requisitum est, ut sit legitime praescripta. De qua tamen praescriptione non una est omnium sententia, post quantum nempe temporis intelligatur inducta; adferentibus aliis spatium annorum decem sufficere; aliis vero ad consuetudinem contra legem Ecclesiasticam spatium annorum quadraginta omnino requiri; ea potissimum ratione, quod nonnisi post totidem annos in iure Canonico praescriptio obtimeat.

X. Illud quoque ad inducendam consuetudinem interveniat necesse est, ut nimirum a maiori Populorum par-

parte, & animo saltem interpretativo ad illam inducendam libera, & diuturna actuum frequentia habeatur Principe vel expresse, vel tacite adminus consentiente.

S. III.

*De Iuris Canonici fine, materia, & cum civili consensione ;
ubi de nostrarum Institutionum Ordine.*

I. **P**ostquam de Iuris Canonici principiis, & partibus quaedam delibavimus; nonnulla quoque de fine, in quem ipsum tendit; de materia, circa quam versatur; & de ea, quam cum Civili iure dicit consensione attingamus oportet. Nisi enim praecipuas istius generis relationes, quas habet unaquaeque facultas probe intelligat, qui eidem manus admoveere conatur diu in incertum ferri ipsi necessario contigerit.

Ad primum ergo quod attinet nulli dubium esse poterit, quin omnis legislativa potestas a Christo Domino Ecclesiae concessa, eo praesertim spectet, ut unusquisque Fidelium per mores Christiano homine dignos tum in iis, quae aut facienda, aut vitanda, tum in iis, quae credenda sunt ad beatitatem dirigatur aeternam. Id sane inter cetera evincunt illa *Act. II.* verba ad Ecclesiae Pastores prolata: *Posuit vos Spiritus Sanctus regere Ecclesiam Dei, quam acquisivit sanguine suo.* Nostrum profecto neminem latet Christum Dominum sanguinis sui pretio sacram hanc Rempublicam instituisse, ut hominibus post exactum praesentis vitae cursum felicitatem in Caelis compararet nunquam interituram: hinc *Io. XXI.* conversus Petro, quem Ecclesiae suae caput constituerat dixit: *Pasce oves meas*; hinc *Matth. XVI.* eidem plenissimam, illimitatamque tribuit potestatem inquit: *Tibi dabo claves Regni Caelorum.* Quapropter alius utique non potest esse finis Ecclesiastici Iuris, nisi aeterna hominum salus, seu ipsum incommutabile bonum, per huius vitae actus adipiscendum; unde bonum etiam temporale veluti necessarium consecrarium sequatur oportet, maxima nempe civilis

lis Societatis tranquillitas. Quemadmodum Polyticae legislationis proximus, immediatusque finis est quidem commune temporale bonum, temporalisque humanae Societatis felicitas; attamen quis inficiabitur unquam Civile ius ordinari etiam tanquam ad finem ultimum, & remotiorem ad aeternam Populorum felicitatem proportionato sibi modo procurandam?

II. Quod cum ita se habeat, patebit quoque materiam nostri Ecclesiastici iuris propriam, non esse nisi res spirituales; eo modo quo Civilis sunt temporales. Enimvero, non alia esse possunt legum sive Ecclesiasticarum, sive Civilium materia, nisi quae tanquam proportionata media proxime conducunt ad finem immediatum unius, alteriusve Potestatis; Cum ergo spiritualia tantum ita se habeant in ordine ad incommutabile bonum, seu aeternam beatitudinem; & sola itidem temporalia in ordine ad bonum temporale, seu praesentem Civilis Reipublicae tranquillitatem; Consequens erit Ius Ecclesiasticum res spirituales tanquam propriam materiam primario attingere, Ius vero Civile res temporales.

Et hac profecto de causa factum potissimum puto quod ius nostrum, non secus ac Imperatorium, quoties de utriusque Potestatis limitibus loquuntur, nil magis familiare habere videantur, quam ut Ecclesiasticae curam spiritualium rerum attribuant tantum; Polyticae vero dumtaxat terrenarum. Ita sane *Can. quoniam Dist. 10.* scribit Nicolaus Papa ad Michaëlem Imper. *Sic Deus a-*
libus propriis, & dignitatibus distinctis utriusque potesta-
tis officia discrevit, ut & Christiani Principes pro aeterna
vita Pontificibus indigerent; & pro cursu temporalium Pon-
tifices imperialibus legibus uterentur; quatenus spiritualis
actio a carnalibus distet incursum, & militans Deo nego-
tiis se non implicet saecularibus, ac vicissim divina non at-
tingat qui est temporalibus intentus. Eadem legere est *Dist.*
96. Can. Si Imperator, Can. Cum ad verum, aliisque, quorum doctrinam paucis complexus est Leo IV: *Can. Si*
nos incompetenter, dicens: *Sicut Reges possunt in causis se-*
culi, ita Sacerdotes in causis Dei. Idem prorsus fatetur & ipse quoque Iustinianus Imperator in Praefat. VI. *No-*
vellae Constit. hisce verbis: Maxima quidem in hominibus
sunt

sunt dona Dei a superna collata clementia Sacerdotium, & Imperium: illud quidem divinis ministrans, hoc autem humanis praesidens, ac diligentiam exhibens. Illudque demum luculenter tradidit apud S. Athanasium in Epistola ad solitarios magnus ille Osius Cordubensis Episcopus Constantinum Imperatorem adloquens, & Gregorius II. ad Leonem Isaurum scribens.

III. Quoniam vero, ut paulo ante dicebamus, Canonicum, & Civile ius in id maxime conveniunt, quod ad hominum instituendos mores tam in ordine ad aeternam, quam ad praesentem felicitatem fuerint condita; consequatur oportet, tria utrumque spectare potissimum; Personas videlicet, quae ordinandae sint ad eiusmodi finem; Res, quibus mediantibus finis obtineatur iutentus; & Iudicia, quibus singulorum actiones expendantur an fini congruant, an ab eo recedant; Et quia huius generis recessus vel privatam tantum importare possunt iniuriam, vel etiam publicam, ideo haec eadem iudicia duplicis quoque sunt speciei, aut civilia nempe ad privatam satisfactionem, aut criminalia ad publicam vindictam.

En igitur unde fuit Institutionum nostrarum Ordo iuxta receptissimam apud maiores nostros methodum, quam sequens ipse totum Opus partiar in libros quatuor. In eorum primo agemus de Personis; in secundo de rebus; in tertio de Iudiciis Civilibus; in quarto de Criminalibus. Sub hisce porro rerum generibus omne, quo utimur, ius comprehendi docet quoque Imperator in *L. I. ff. de hominum statu.*



IVRIS CANONICI

INSTITUTIONVM


LIBER PRIMVS

DE IVRE PERSONARVM.



TITVLVS I.

De Personis generatim, earumque distinctione.

- I.  Ersonarum omnium duplex est genus; aliud Laicorum; Clericorum aliud; Ad illos temporalium rerum administratio pertinet; Ad hos spiritualium, *Can. Duo sunt, II. q. 1.* Laicorum nomine quod a graeco verbo *Λαος*, latinè *Populus* desumptum est, veniunt omnes de seculo, sive nobiles, sive ignobiles, sive privati, sive Principes. Clerici vero a voce *Κληρος*, quae nobis *fors* est, appellati sunt, quasi in sortem Domini vocati, *Can. Cleros Dist. 21.* Clericorum autem alii in Sacerdotio sunt constituti, ex quibus in gradu altiori quidam, quidam in inferiori sunt positi; alii quoque in Sacris tantum reperiuntur; alii demum neque in Sacerdotio, neque in Sacris. De his omnibus ergo agendum nobis in praesenti libro; & primo quidem de constitutis in gradu altiori, qui ex eo vel maxime, quod docentem Ecclesiam repraesentant, legislativa potestate in suos respective subditos donantur; De aliis vero infra.



T I T V L V S I L

De Summo Pontifice, & aliis Episcopis.

I. Totius Ecclesiasticae Hierarchiae principem locum tenet Romanus Pontifex, Divi Petri in Ecclesiae Primatu Successor, & Christi Domini in terris Vicarius; Cui tanquam univ ersali Pastori omnes, & singulos Christianifideles pascendi, & instruendi onus incumbit. Vnde potestate immediate sibi a Deo concessa leges ferre potest in materia spiritali, & pro recto Ecclesiae regimine totum Christianum Orbem obligantes, ut tradit, probatque Innocentius III. *Cap. Solite de Maior. & Obed.* Ipse omnibus praest, cunctos iudicare potest: & a nemine est iudicandus, nisi deprehendatur a Fide devius *Can. Si Papa Dist. 40.*

II. Primum infra Pontificem locum sibi vindicant S. R. E. Cardinales, quos non nisi ipse Pontifex creare potest, poscentibus etiam, seu nominantibus interdum Regibus. Eorum praecipuum munus est, ut Papae iudiciis adsideant, eiusque Senatum constituent. Quamobrem suae dignitatis amplitudine supra omnes Episcopos, Archiepiscopos, & etiam Patriarchas eminent, ut ex Bulla Eugenii IV. & ex *Cap. quae de maior. & Obed.* aperte deducitur.

III. Cardinales proxime excipiunt Patriarchae, quales sunt CPolitanus, Alexandrinus, Antiochenus, & Hierosolymitanus. Qui licet si attendamus ad spiritualem Ordinis potestatem, & gradum ceteris Episcopis aequiparentur; maiori tamen, ac isti sunt praediti iurisdictione; Quia plurium Provinciarum Episcopis, & Archiepiscopis ex Ecclesiae consuetudine praeponuntur, & ideo passim Patrum Principes appellantur, *Can. Cleros Dist. 21.*

Hisce etiam ob dignitatis excellentiam, & honoris amplitudinem permittitur, ut Crucem ante se deferri faciant ubicumque extra Urbem, & ubi fuerit Summus Pontifex, vel eius Legatus Insignibus utens Apostolicae dignitatis *Cap. 23. de Privileg.* In omnibus quoque suae iu-

iurisdictionis Provinciis recipere possunt appellationes ab Episcopis, & Archiepiscopis, cum opus fuerit; salvis tamen appellationibus ad Romanam Sedem immediate interpositis, ut adseritur in mox laudato Capite.

IV. Archiepiscopi, qui & Metropolitani appellantur, sunt, qui Provinciae unius Episcopis praesunt *Can. Scitote VI. q. 3.* & Archiepiscopi propterea nominantur, quasi Episcoporum Principes. Praeesse de iure debent decem, vel potius undecim Episcopis ex eod. *Can. Scitote*; & hoc ideo praefertim, quia Metropolita est ordinarius Iudex suorum Suffraganeorum, quorum Causae tractari non possunt, nisi coram pluribus Episcopis *II. q. 7. Can. Si quis tumidus*; Nihilominus in praxi obtinet, ut Archiepiscopus ille etiam habeatur, cui pauciores subsint Suffraganei, seu auxiliares Episcopi.

V. Episcopi tandem sunt, qui uni Civitati, vel uni Populo praesunt *Can. Cleros Diss. 21.* Vocantur autem Episcopi ex graeco verbo *ἐπίσκοπος*, quod est speculari, quasi sint suae Dioecesis speculatores. Episcopus enim mores speculatur, & vitam Populi sibi commissi, officiumque primi Parochi, & Animarum Pastoris exercet.

T I T V L V S III.

De Electione, & Electi Potestate, deque eius confirmatione, & Consecratione.

I. **T**Ribus praefertim modis, Electione, nempe, Postulatione, & Translatione ad maiores Ecclesiasticas dignitates adsumi consueverunt Personae, de quibus usque modo locuti sumus; de singulis ergo agendum nobis est. De primo hic, de aliis in subsequentibus titulis.

II. Quamvis Electionis nomen magis late pateat, quam hic sumitur; nihilominus apud Canonistas aliud non significat proprie, & stricte acceptum nisi: *Personae idoneae ad Ecclesiam vacantem, seu Praelaturam per eos, quibus ius eligendi competit canonicam, vocationem*; id est iuxta Canonum Ordinationem; quae multiplex pro varia
B acta-

actate fuit. Attamen Innocentius III. in Concilio Later. IV. observans incomoda, quae Ecclesiis Pastore viduatis ex diversis electionum formis accidebant, statuit *Can. 24.* relato in *Cap. Quia propter h. t.* ut non nisi tribus a Concilio praescriptis modis perficeretur Electio, nempe per *Scrutinium, Compromissum, & quasi inspirationem.*

III. Forma eligendi per Scrutinium satis clare traditur in laudato *Cap. Quia propter* his prorsus verbis: *Praesentibus omnibus, qui volunt, debent, & possunt interesse, adsumantur tres de Collegio fide digni, qui secreto, sigillatim, & diligenter exquirant vota cunctorum, & inscriptis redacta mox publicent in communi, nullo prorsus appellationis obstaculo interiecto, ut is collatione habita eligatur, in quem vel omnis, vel maior, vel sanior pars Capituli consensit.* Et licet habenda sit ratio meriti ad meritum Electorum, & Zeli ad Zelum Eligentium, *Cap. in Genesi h. t.* tamen ad vitandas inimicitias, rixas, aut saltem similtates, saniozem partem Trid. Synodus declaravit intelligendam esse in maiori Capitularium numero.

IV. Per compromissum vero Electiones fiunt cum uni, aut pluribus tota committitur eligendi potestas. Quae tamen concedi potest vel absolute, vel conditionate, cum aliqua nimirum limitatione aut temporis, aut Personarum. Verum Compromissum huiusmodi sive uni, sive pluribus eiusdem, vel alterius Collegii fiat, fieri omnino debet unanimi Eligentium consensu, ita quod si vel unius intervenit dissensus, invalidum sit, iuxta regulam XXIX. *Iuris in 6. Quod omnes tangit ab omnibus debet adprobare,* neque Compromissarii initi compromissi fines transgredi possunt, *Cap. Cum Dilectus h. t.*

V. Postremus denique eligendi modus nullas exigit solemnitates in iure praescriptas, neque Suffragiorum calculum, sed tum accedit, cum omnes Electores absque ulla praevia industria, vel arte, sed Spiritu Sancto potius impellente unam determinatam Personam postulant, ut multoties accidisse tam in Episcoporum, quam Romanorum etiam Pontificum electionibus discimus ex historicis documentis. Electiones tamen eiusmodi differunt quamplurimum ab iis ad Populi clamorem factis, quas ceu tumultuarias, ambitiosas, & de Simonia suspectas reprobandas

esse placuit Patribus Sardicensibus, ut in *Cap. Osius b. t.*

VI. Quovis ergo modo ex dictis celebretur Electio, illis, quorum interfuerit, ubi se gravatos sentiunt, appellare utique ab ea licet; Quae etiam appellandi facultas nedum competit iis, qui sunt ex numero Eligentium, sed omnibus quoque subditis Praelati electi, *Cap. Quod sicuti b. t.* Appellantes nihilominus Romanae Curiae infra mensem se praesentare tenentur ad praestandum iuramentum de vitanda calumnia, & cetera observanda, quae disponuntur in *Cap. 1. b. t. in 6.* iuxta declarationem Bonifacii VIII. & in *Cap. Is qui, Cap. Procurator, & Clem. 4. eod.*

VII. Electio igitur celebrata debet praesentari Electo; Qui si ipsam acceptaverit, confirmationem etiam exposcere tenetur ab eo, ad quem spectat ipsum ordinare, aut consecrare, *Dist. 65. & 66.* Nam Electus ante confirmationem esto ius acquirat ad dignitatem in habitu, ut loquuntur Canonistae, non acquirit tamen in actu, *Cap. Si eo tempore b. t.* Quapropter nequit, quovis procurationis etiam, vel oeconomatus colore, administrationi Ecclesiae se ingerere, aut beneficia conferre *Cap. Avaritiae, & Cap. Nossi b. t.* Caveat tamen Electus ne duas prosequatur electiones de se factas, cum debeat se speciatim declarare ex vi cuius confirmationem petat, *Cap. Is cui b. t. in 6.*

VIII. Confirmatio olim in Synodis ad id expresse congregatis fiebat, ut post alios demonstrat Petrus de Marca *lib. VI. concord. Cap. 3.* Obtinuit nihilominus postea, ut Electio Episcopi a Metropolitano; Archiepiscopi a Patriarcha; huius vero a Summo Pontifice confirmaretur, *Can. Mos antiquus Dist. 65. Cap. Cum olim de Maior. & Obed.* Hodie vero omnes indiscriminatim Electiones a propriis Capitularibus celebratae per Summum Pontificem confirmantur, quod fieri etiam consuevit aliquando in ipsa Imperatoris electione *Cap. Venerabilem b. t.* Confirmator tamen antequam Electionem confirmet inquirere diligenter de vitae probitate ipsius Electi tenetur. Secus enim, confirmandi indignum, confirmandi alterum proxime electum, aut eligendum facultate privatur, & suspenditur a perceptione fructuum beneficiorum *Cap. Scriptum, & Cap. Nihil est b. t.*

IX. Confirmatus interim etiam ante Consecrationem ea exercere potest omnia, quae sunt Iurisdictionis, non autem Ordinis; quapropter ius illi est corrigendi, iudicandi, in beneficiis instituendi, excommunicandi, iuramentum a Vassallis exigendi &c. *Cap. Transmissam b. t.* Nisi tamen de rebus agatur gravissimi momenti, quarum cognitio, & iudicium maiorem exquirunt disquisitionem, ut notat Cuiacius in *Caput Verum de Foro Compet.*

X. Postremum, quod absolvit totum Electionis negotium est ipsius Electi consecratio, quae supra Iurisdictionem Ordinem addit; unde tantam dignitatem, & honorem consequitur consecratus, ut merito Papae frater evadat ex Ivone Carnot. *Epist. VIII.* Eaue de causa nil mirum si antiquitus Praefules anniversariam suae Consecrationis diem solemniter ritu celebrarent, *Can. Solemnitates, & seqq. Dist. I. de Conf.* Quinimo reus unus e vinculis liberabatur ex eodem Ivone *Epist. LIII.* Huiusmodi vero Consecratio fieri solebat a tribus Episcopis inter Missarum sollemnia *Can. Porro Dist. LXVI.* Adeo ut a minori Episcoporum numero facta licet Characterem imprimat, effectum tamen non tribuit iuxta Archid. in *Canon. quid sit Dist. II. de Conf.*

XI. Quae de Electione hic generatim dicta sunt, possunt quoque ad Romani Pontificis electionem extendi; in hac tamen nonnulla sunt specialia, praesertim postquam ad Cardinalium Collegium unice spectat. Haud etenim eadem semper fuit huiusmodi Electionis forma, sed iuxta varias temporum opportunitates variavit & ipsa, praecipue circa Eligentium Personas. Primitus quippe non secus ac in Electionibus ceterorum Episcoporum, hoc ius ad Clerum spectabat cum testimonio Plebis *Can. Plebis & seqq. dist. 63.* Imo aliquando toleravit Ecclesia, ut Papa electus confirmaretur ab Imperatore, quam temporum consuetudinem minus probat S. Gregorius Magnus in *exposit. Psal. VII. & lib. VI. epist. 4.* Verum per Nicolaum II. & Gregorium VII. pristinae tandem libertati reddita Ecclesia, ius eligendi Romanum Pontificem ad solos S. R. E. Cardinales fuit devolutum. Ex quo paulatim fieri coepit, ut multa in eadem Electione servanda statuerint Alexander III. in *Cap. licet*, Gregorius X. in *Cap. ubi periculum*, & Clemens

mens V. in *Cap. Ne Romani h. t.* suis respective locis .

XII. Quae itaque speciatim ibi decernuntur ad haec praesertim Capita facile redigi possunt . Primo quod nulla sit necessaria Eligentium citatio . 2. quod absentes suum votum alteri demandare nequeunt . 3. quod ut Electio sit valida non sufficit maior pars , sed duae ex tribus requiruntur omnino Cardinalium partes ; cuius potissima ratio inde petitur , quod nullus sit superior ad quem fiat recursus , quoties in eiusmodi electione aliquid emerferit dubium . Speciale quoque est in electione Summi Pontificis , quod Cardinales quomodocumque suspensi , excommunicati , vel interdicti nunquam repellantur ab Electione ex eadem *Clement. Ne Romani* . Plura denique alia secutis temporibus peculiariter ad hanc Electionem spectantia decreverunt Clemens VII. Pius IV. Gregorius XV. & Urbanus VIII. in suis Constitutionibus hac de re editis .

XIII. Ceterum Romani Pontificis Electio fieri potest vel per scrutinium , vel per compromissum , vel per inspirationem , ut supra diximus , vel etiam per adorationem , cum nempe nullo celebrato Scrutinio duae ex tribus Cardinalium partes aliquem communi consensu in Summum Pontificem adorant . Quinimò nulli ex his eligendi modis alligatur necessario huius generis Electio , ad quam sufficit omnino , ut quoquo modo duae ex tribus partes concurrant Cardinalium .

XIV. Ad complementum huius tituli aliquid brevissime dicendum nobis superest de tempore , quo fieri debet Electio . Ad minores igitur dignitates ea per sex tantum menses differri potest ex Concilio Later. III. sub Alexandro III. & *Cap. Quia Diversitatem De Concess. Praeb.* Ad maiores vero , hoc est ad Episcopatum , & Praelaturas regulares cautum est in *Cap. Ne pro defectu h. t.* ne ultra tres menses protrahatur . Quod si absque legitimo impedimento huiusmodi praescriptum ab iure tempus transgrediantur Electores , privantur iure eligendi pro ea vice , quod ad proximum , seu immediatum Superiorem devolvitur ex *Cap. laudata* , & *Cap. ubi Abbas h. t. in 6.*

T I T V L V S IV.

Qui eligere, eligere possint.

I. **E**Ligendi ius, seu Praelatorum electio de iure spectat ad Capitulum, Collegium, seu Communitatem, cui Praelatus est eligendus *Cap. 1. & 14. h. t. Dixi de iure*, nam ex privilegio, aut ex consuetudine pertinere etiam potest ad extraneos *Cap. Cum dilectus de Consuet. & Cap. Humana 30. h. t.* Hodie tamen tum per regulas Cancëllariæ Apostolicæ, quarum secunda Romano Pontifici reservat Ecclesiarum Maiorum provisionem, tum per privilegia Principibus concessa, & præcipue Hispaniarum, Galliarumque Regibus, quibus ius nominandi, & præsentandi Episcopos suorum Regnorum acquisitum est, fere sublata videtur electiva potestas Capitulorum, adeo ut plures apud Fagnanum iure sentiant titulum *de Electione* pene inutilem esse. Verum superest adhuc Germania, ubi mos eligendi Episcopos per suos Capitulares modo etiam viget. Quapropter

II. Eligere primo non possunt qui natura prohibentur, ut impuberes ob inopiam consilii, quemadmodum omnes illi, qui nec de contemptu couqueri possunt, neque non admissi factam ab aliis electionem impugnare, *Cap. ex eo quod 3. de Elect. in 6. II. Qui in sui delicti poenam ab iure excluduntur*, ut qui maiori excommunicatione tenentur, quandiu tolerati non fuerint *Cap. fin. de Clerico Excomm.* Qui suspensi, *Cap. Cum dilectus 8. de Consuet.* etiamsi ab officio tantum suspensi fuerint, cum ius eligendi Personis Ecclesiasticis competat propter officium; quapropter suspensus a beneficio tantum, excludi ab Electione nequit; Qui irregulares *Cap. Is qui in Ecclesia 8. fin. 18. de sent. Excomm. in 6.*; Qui personaliter interdicti *Cap. Cum inter 16. h. t.* II omnes tamen suffragii in electione ferendi iure non privantur, nisi sententia criminis declaratoria ab Iudice prolata præcesserit; & facta Electio non irritatur, nisi scienter, huiusmodi personis intervenientibus, fiat, quemadmodum declaravit Marti-

tinus V. in *Extravaganti Ad evitanda*. III. Prohibentur eligere in Cathedralibus, vel Collegiatis Ecclesiis qui voto in Capitulo carent propter defectum alicuius Ordinis Sacri *Clem. 2. de aetat. & qual. praescien. & Trid. Sess. XXII. Cap. 4. de Ref.* IV. Sunt enim alii, qui ad tempus dumtaxat eligendi iure destituuntur, ut qui inter eligentes laicorum suffragia admiserunt, quae Electio passim appellatur *per abusum secularis potestatis*, ex qua admissione ipsa quoque electio irritatur *Cap. 43. de Elect.* Item qui in eligendo formam canonicam non servant *Cap. Quia propter eod.* Qui Canone prohibitos, ut minores, infames, illegitimosque elegerunt, ea vice suffragio, & per triennium etiam officii sui exercitio carent *Cap. Cum in cunctis eod.* Quare si eligentium pars indignum, aut etiam inhabilem elegerit; & alia eorum pars elegerit dignum, ad hos devolvitur Electio, si vero omnes indignum elegerint, tum ad Superiorem immediatum electio spectabit *Cap. bonae fidei 23. eod.*

III. Ad alteram tituli partem quod attinet. Ex Concilio Later. III. *Cap. Cum in cunctis de Elect.* quatuor requiruntur omnino, ut quis creetur Episcopus, XXX. annorum aetas; vitae, morumque probitas; litterarum peritia; & ex legitimo matrimonio natalis, nec satis est, ut eligibilis fiat, quod subsecutum postea fuerit matrimonium inter suos parentes, *arg. Cap. Cum innotuit eod.* Quare rejiciuntur Criminosi, Haeretici, Schismatici, Excommunicati, Cathecumeni, & etiam Neophiti *Can. Quoniam dist. 48.* Qui indignum elegerunt, ineligiblees per triennium evadunt & ipsi, *d. Cap. Cum in cunctis, Cap. Cum Victorienfis, & Cap. Per inquisitionem eod.* Pariter qui in Theologia, aut iure Canonico publicae Academiae alicuius testimonio licentiatu saltem non extiterit, ex *Trid. Sess. XXII. cap. 2. de ref.* Item qui Sacris Ordinibus sex ante menses iam initiatus non fuerit; & qui aliam Ecclesiam; aut alicuius beneficii curati titulum retinuerit, nisi dimittere velit ex *Trid. ib. & Sess. VII. cap. II.* Pro Parochialibus vero Ecclesiis administrandis eadem fere omnia requiruntur, nisi quod aetas annorum XXV. sufficiat, & Ordinum intra annum susceptio *d. Cap. Cum in cunctis, & Cap. nemo eod. in 6.*

TITVLVS V.

De Praelatorum Postulatione.

I. **P**ostulatio prout hic sumitur aliud non est, nisi *supplex eorum, ad quos eligere spectat petitio apud Superiorem facta, ut certa promoveatur Persona ad Ecclesiasticam Praelaturam, ad quam iure eligi non potest ob impedimentum aliquod Canonicum.*

II. Ex allata huiusmodi definitione apparet I. Postulationem inventam esse in remedium prohibitaee electionis. II. Ad eos pertinere duntaxat, ad quos ius pertinet eligendi. III. Postulationem nonnisi superiori esse faciendam, eamque potius gratiae, quam iustitiae inniti. IV. Eos tantum postulari posse, qui propter Canonicum impedimentum ineligibiles sunt; Cuiusmodi esset, quoties adsumendus in Episcopum foret laicus, vel in minori aetate, aut minoribus ordinibus constitutus; non ex legitimo toro natus, vel alia ratione ab iure prohibitus ne eligibilis fiat; non quidem propter defectum naturalem, aut aliquod delictum, sed ut loquuntur Canonistae *propter Canonicum defectum*. Simili modo Episcopus, qui uni iam est alligatus Ecclesiae non potest quidem eligi pro altera, potest nihilominus postulari. Hoc autem non obtinet in Abbatibus, aliisque inferioribus Praelatis, quorum propriae Ecclesiae, aut Monasterio alligatio, spiritualis Matrimonii speciem, quemadmodum illa Episcoporum, minime exhibet; quare ipsi eligi debent, non postulari. Demum qui sui iuris non sunt, postulari iubet *Caput Si Religiosus de Elect. in 6.*

III. Ut autem valida sit postulatio fieri debet per scrutinium, & maiori, ac saniori Capituli parte. Si vero una illius pars aliquem postulaverit, & altera elegerit alium; tum postulatio electioni praeservetur, si postulantium numerus numerum eligentium duplo excedat, & vicissim *Cap. Scriptum de Elect.*

IV. Postulantes praeterea debent in sua postulatione omnes exprimere Postulati defectus, alias postulatio esset sub-

subreptitia, & ipsi in poenam privarentur pro ea vice eligendi, aut postulandi iure. Quemadmodum *si elegerint postulant, aut postulerint eligentes*, ut dicitur in *Cap. unic. b. t. in 6.* quia nec veram electionem, nec postulationem exprimerent.

V. Postulatione superiori iam praesentata etsi nullum inde ius fuerit Postulato acquisitum, nihilominus haud licet amplius Postulantibus ab ea resilire. Et statim ac eam superior admiserit verum quaeritur ius Postulato *Cap. Bonae memoriae 4. b. t.*

T I T V L V S VI.

De auctoritate, & usu Pallii.

I. **P**allium apud Canonistas est fascia ex agni lana alba confecta, e collo ad pectus, & humeros per quatuor fasciolas utrinque pendentes demissa, cuius extremitatibus quatuor cruces sive rubrae, sive nigrae sunt intextae. Est vero speciale ornamentum ex corpore D. Petri desumptum conferens pastoralis, & Archiepiscopalis Officii plenitudinem *Cap. Significasti 4. de Elect. & Cap. Nisi specialis b. t.* Dicitur quidem *de Corpore D. Petri desumptum*, vel quia consecratum deferretur ad altare D. Petri, ut inde tradatur Episcopis, quemadmodum censet Glossa in laudatum *Cap. Significasti*, vel potius quia partem veluti indicat Ecclesiasticae potestatis, quae de Corpore D. Petri, hoc est, de universalis regimine Ecclesiae Archiepiscopis conceditur.

II. De iure ordinario solis datur Patriarchis, & Archiepiscopis. Episcopis vero nonnisi ex speciali privilegio, ut Hostiensis, Papiensis, Lucensis, Bambergensis, Quinqu-Eclesiensis, & Massano, imo nunc etiam aliis. Et quamquam olim quatuor praecipuis Patriarchis facultatem distribuendi pallia suis suffraganeis legimus concessam in VIII. Synodo CP. sub Adriano II. & in Later. IV. confirmatam ex *Cap. 23. de Privileg.*; hodie tamen nonnisi a Rom. Pontifice obtineri potest, & sub certa formula, ut tradit Gonzalez in *Cap. Ad honorem 4. b. t.*

III. Quo-

III. Quousque Pallium non obtinuerit Archiepiscopus etiam consecratus ea quidem exercere libere poterit, quae sunt iurisdictionis; at nequit ea licite administrare, quae sunt Ordinis, & officii Archiepiscopalis, ut convocare Concilium, Chrisma conficere, dedicare Basilicas, ordinare Clericos, & consecrare Episcopos, quemadmodum scribit Paschalis II. ad Archiepiscopum Poloniae apud Baron. an. 1102. & Ioannes VIII. ad Archiep. Arelat. quibus adstri- pulatur Concilium Matiscon. *Can. VI.* Imo nec Archiepi- scopus nominari debet ex Innocentio III. in *Cap. Nisi spe- cialis b. t.*

IV. Intra tres menses itaque a consecratione Pallium petere a Rom. Pontifice tenetur Archiepiscopus, quod si neglexerit commissa sibi dignitate carere debet, *Can. Quo- niam Dist. 100.* Recepto tamen Pallio nec semper, nec ubi- que uti potest, sed certis tantum solemnitatibus, & in- tra propriae Provinciae fines *Cap. 1. & 4. b. t.*

V. Pallium denique ita addictum est Personae, ut alteri neque concedi, neque commodari queat, nec testamento ad Successorem transmitti; sed quisque cum suo humeris Imposito, aut si extra propriam Ecclesiam decesserit, sub- posito capiti sepeliendus. Et ubi translatus fuerit ad aliam Ecclesiam Pallium secum deferre debet, quo non utitur, si Archiepiscopalis item ea sit, sed novum petat oportet, cum utroque humandus. Si demum illud amiserit aliud a Rom. Pontifice expostulet.

T I T V L V S VII.

De Vita, & honestate Praelatorum.

I. **O**ptimos desiderari mores in Praelato, qui Gregi sibi commisso vitae innocentia praecellere debet est omnino manifestum, cum debeat oves ipsi concreditas de omnibus instruere, & monere. Nemo autem monitoris personam recte suscipit, nisi qui actibus suis & aliorum errata condemnat, & innocentiae amorem commendat *Can. Nemo Dist. 81.*

II. Quam-

II. Quamobrem nedum criminibus ipse vacet oportet omnino, ut ad Titum scribebat Apostolus, sed abstineat quoque ab improborum commercio, & in domesticis probitatem praesertim exquirat, cum malorum consortium bonorum corrumpat mores *Can. Saepè XXVIII. q. I.*

III. Sit etiam praecipue lenis in corrigendo, quia plus obtinemus benevolentia, quam acerbitate; plus mansuetudine, quam severitate; plus charitate, quam potestate; nec magis dominari desiderans, quam subditis consulere cupiens *Can. licet Dist. 45.* Lenitatem nihilominus severitate temperet, ut neque multa asperitate exulcerentur subditi, neque nimia benignitate solvantur *Can. Disciplina Dist. ead.*

IV. Internam vero morum compositionem per externam demonstrare debet Praelatus; iisque indumentis uti, quae praeter Ordinis, & Officii decorem, Ecclesiasticam modestiam, & mundani luxus contemptum spirent *Dist. 41. per totam, & Clem. Quoniam 2. b. t.*

V. Quod speciale denique Episcopi munus censetur praeter virtutes ab Apostolo requisitas in Epistola supra laudata, & in ea ad Timotheum, est tum gregem edocere, & ea quidem, quae ipse a Deo didicerat, non quae affectus suaserit humanus; tum preces pro eiusdem Gregis spirituali profectu fundere; quare & legis scientiam habeat opus est, & Orationi vacet *Can. Si quis vult Dist. 36.*

T I T V L V S VIII.

De Officio Archidiaconi.

I. **Q**uoniam Pastoralis officii latissimam curam per se omnem adimplere non possunt Episcopi, nonnulli propterea eis constituti sunt ab iure adiutores, inter quos praesertim est Archidiaconus, qui primus in Ecclesia post Episcopum, seu Vicarius in multis illius vices gerit. Quamvis enim Ecclesiasticae Hierarchiae Ordo expostulet iuxta Mart. Ignatium epist. II. ad Smyrn. ut *Laici Diaconis*
sub-

subiiciantur, Diaconi Presbyteris, Presbyteri Episcopis, Episcopi Christo, & ipse Patri; tamen progressu temporis, Diaconis, cum praeter spirituale ministerium, rerum etiam temporalium, quae homines reddere solent potentiores, & honoratiores, cura demandaretur, haud difficile fuit proprium fastum, & arrogantiam eo deducere, ut non solum aequales Presbyteris, sed & superiores esse praesumpserint. Multo magis igitur Archidiaconi, qui Diaconis praeerant, supremam rerum Ecclesiae administrationem nacti, iurgia, & lites componentes, ac iurisdictionem sibi vindicantes *Can. 57. Laodic.*, divitiarum, quas administrabant potentia freti, ceterorumque Ecclesiae Ministrorum, quibus necessaria suppeditabant, clientela intumescens eo insolescere coeperunt, ut nedum Archipresbyteris superiores, sed & se pares Episcopis reputarent. Eorum quidem nascentem insolentiam variis temporibus celebrata Concilia, & Summi Pontifices reprimere tentarunt, ut apparet ex pluribus Canonibus apud Grat. *Dist. 93.* at impedire minime potuerunt, quin tandem Archidiaconorum potestas longo usu comprobata ordinaria, et iuridica evaserit. Quare esto Archidiaconus sit Archipresbytero inferior ratione ordinis, ratione tamen administrationis secum iurisdictionem ferentis Archipresbytero est superior, quod iam Greg. M. aetate stabilitum reperiebatur, ut constat ex *Cap. III. b. t. pr. cod. & pr. de Off. Archipresbyteri.*

II. Varia ergo secundum diversa tempora fuit Archidiaconorum iurisdiclio, & Potestas; quae tota ponderanda est ex Ecclesiae consuetudinibus, quae haec in re potiores sunt, quam ius commune *Cap. Cum olim de Consuet.* Et ipse Innocentius III. in *Cap. ad hoc 7. b. t.* incertam, dubiamque fatetur, eam tamen repetit ex *Ordine Romano*. Illud tamen sciatis oportet, quod omnia ea, quae ordinis sunt Episcopalis, nulla consuetudine acquirere potest Archidiaconus; ea vero, quae sunt auctoritatis episcopalis, seu legis Dioecesanae, vel iurisdictionis, quia haec possunt delegatione in alium transferri, nil obstat quin usu, aut privilegio acquiri ab Archidiaconis possint, *Cap. Ad hoc de Exc.*

III. Quare nisi adsit consuetudo in contrarium, vel
le-

legitima praescriptio ad Archidiaconum spectat esse Episcopi Vicarium, & Episcopo impedito de triennio in triennium Dioecesim visitare *Cap. I. b. t. Can. perfectis Dist. 25. & Trid. Sess. 24. Cap. 3.* idcirco Archidiaconus dici solet Vicarius natus. Insuper ad ipsum spectat Clericis, & Ministris Ecclesiae quae sunt facienda praecipere, Evangelium quando voluerit legere, Ecclesiasticum, & Divinum officium ordinare, & omnia Ecclesiae Cimelia custodire *Capp. 2. & 3. b. t.*

IV. Ad haec Archidiaconi munus est quoque Clericorum omnium tam in urbe, quam in Paroeciis commorantium curam gerere, & super eorum conversatione invigilare, Ordinandos, ac praeficiendos examinare *Capp. 1. & 9. b. t.* Denum ad ipsum tanquam Episcopi oculum pertinet omnia prospicere, corrigere, & emendare, nisi adeo ardua negotia sint, ut absque Episcopi praesentia terminari nequeant, *Cap. 7. eod.* Quinimo ad ipsius Tribunal deferri quoque debent Clericorum iurgia, & Causae Ecclesiasticae, exceptis tamen per Tridentinum *Sess. XXIV. Cap. 20.* Causis Matrimonialibus, & Criminalibus, nisi alia fuerit loci consuetudo.

V. Ex expressa tamen iuris declaratione nequit Archidiaconus sine Episcopi mandato curam animarum committere, seu, ut alii exponunt, exercere collationem *authorizabilem* beneficiorum *Can. Nullus XVI. q. 3. & Cap. Cum satis 4. b. t.* neque sententiam excommunicationis ferre, neque *Reverendas*, seu litteras dimissoriales tradere, neque in Monasteriis suae Archidiaconiae iurisdictionem aliquam exeroere *Capp. 5. 8. & ult. eod.*

T I T V L V S IX.

De officio Archipresbyteri.

I. **A**rchipresbyter, seu, ut apud Socratem *Lib. VI. Cap. 9. & Novella 123.* Protopresbyter primum sonat Sacerdotum, quos primitiva Ecclesia, non solum ab annorum, sed ab morum etiam maturitate *Presbyteros* nominare consue-

suevit. Et quemadmodum de Archidiacono diximus, quod datur Episcopis, ut eorum subleuet curam in iis, quae ad bonorum Ecclesiasticorum Oeconomiam pertinent, & iurisdictionem contentiosi, externique fori; Ita datur eisdem Archipresbyter, qui eos praecipue subleuet in iis, quae spiritualia sunt, & ad forum internum, ordinisque potestatem pertinere noscuntur.

II. Est autem Archipresbyter vel Vrbanus, vel Ruralis, seu Foraneus. Vrbanus, qui in Civitatis Cathedrali munus suum exercet, quique etiam aliquando Decanus appellatur, in *Cap. Ad hanc 7. de Off. Archid.* Ruralis, qui in minoribus Oppidis, vel minoribus etiam titulis extra Civitatem suum exequitur munus.

III. Ipsorum ergo munerum fit potissimum mentio in *Capp. 1. 2. 3. & 4. b. t.* generatim tamen ea recensere possumus, quod videlicet ad Archipresbyterum spectet curam gerere, ut Sacerdotes in suis Ordinibus divina officia peragant cum omni timore Dei, & sanctitate. Ipsi quoque est Episcopo absente omnia providere; in solemnitatibus Missam celebrare, aut cui de Sacerdotibus voluerit, iubere, ut celebret; fontes benedicere; oleo infirmos ungere; publicos Poenitentes consulto Episcopo conciliare, sicuti & ministeria distribuere, quando Episcopus solemniter celebrat, & satagere ne unquam in Sacrario deficiat Eucharistia pro infirmis.

T I T V L V S X.

De Officio Primicerii, & Sacristae.

I. **P**rimicerius est qui primus existit in aliquo Ordine ex Suida, & in Novella Heraclii, cui consonat Tyrius *Lib. IV. Cap. 8.* alique; Sic dictus quod primus in ceras, seu Tabulas sit relatus. Ex quo patet hanc vocem aptari posse cuilibet, qui aliis praest in quovis Ordine, vel ministerio; unde passim apud Historicos deprehenduntur *Primicerius Aulae, Primicerius Palatii, Sacri Cubiculi &c.* & ex Impp. Gratiano, Valentiniano, Theodosio
No-

Notariorum Primicerii Proconsulibus coaequantur, ut in *Tit. X. C. Theod.*

In praesenti tamen rubrica retenta etiam propria significatione, Primiceriatus significat specialem, antiquamque in Ecclesiis Cathedralibus dignitatem post Archidiaconatum, & Archipresbyteratum, ut in *Can. Perleſtis Diſt. 25. §. Ad Primicerium &c.* Eius officium, & munus est praeesse Diaconis, ceterisque inferioribus Ministris Scholae Cantorum, & Psallentium destinatis, quibus lectiones, & alia, quae ad Sacram Psalmodiam pertinent distribuere debet, ut praescribitur in *Ordine Romano*, de quo in *Cap. ult. b. t. & alibi.*

II. Sacrista quasi rebus Sacris Praefectus, qui etiam & Thesaurarius; ad ipsum spectat post Archidiaconum Cimeliorum, seu sacrarum rerum pretiosarum cura, & uno verbo omnium, quae in cera, & oleo pro sacro usu possidet Ecclesia *Cap. unic. b. t. Can. perleſtis cit. & ff. eod.* cui consonat Ecclesia Graeca apud *Balsamonem* ad *Can. 12. Syn. XII. CP.* idcirco nonnunquam Cimeliarcha appellatur. Ipſius est quoque Instrumenta, & privilegia, quibus Ecclesiae iura tuentur custodire ex *Inn. III. ep. 57. lib. I. Reg.* Cuius pars legitur *Cap. 20. de Poenis*; & propterea ab eodem Pontifice *ep. 276. ib.* inter Dignitates Ecclesiasticas Sacrista recenſetur.

T I T V L V S XI.

De Officio Vicarii.

I. **P**raeter Archidiaconum, & Archipresbyterum Episcopo ceu Vicarios ab iure datos, consuetudo etiam invaluit seculo praesertim XII. creandi quendam alium Vicarium, qui sub nomine Officialis venit *Cap. I. de Off. Vicarii in 6.* Et duplicis est generis, alius nempe generalis dictus, de quo hic; alius vero foraneus.

II. Vicarius itaque Generalis generale habet mandatum ad totam fere Episcopi iurisdictionem tum in foro contentioso, tum in foro poenitentiali in Civitate, & Tribu-

bunali ipsius Episcopi exercendam. Quare ad ipsum spectat Dioecesis totius Causas cognoscere *Cap. 2. b. 1. & ab eius Tribunali ad illud Episcopi appellari nequit.*

II. Ab generali tamen mandato nonnulla intelliguntur excepta, cuiusmodi sunt causarum Matrimonialium cognitio; beneficiorum collatio, aut acceptatio resignatorum; Concessio Dimissorialium, dum Episcopus ab Dioecesi longe non absuerit; Absolutio a casibus reservatis, aut censuris; aliaque id genus, quae peculiare postulant Episcopi mandatum ex Trident. *Sess. 24. cap. 6.*

IV. Cessat Vicarii iurisdictio defuncto, aut ad aliam Sedem translato Episcopo; & suspenditur, ipso suspenso vel excommunicato. Ad huiusmodi munus exercendum adsumi nequeunt Laici, Regulares Mendicantes, Clerici coniugati, minores xxv. annis, & Episcopi consanguinei *Can. in novam 16. q. 7. Clem. Et si 2. b. 1. Cap. 2. De Clerico coniug. & Cap. Cum in cunctis b. 1.*

V. Vicarius Foraneus ab Episcopo constituitur in aliqua suae Dioecesis parte ad peculiaria quaedam negotia peragenda. Eaque exercere potest quae Episcopus illi commisit, aut consuetudine solet, ab ipsius tamen tribunalibus ad illud Episcopi admittitur appellatio.

VI. Praeter Vicarios praedictos sunt alii, qui vel Capitulares dicuntur, vel Apostolici. Illi per Capitulum constituuntur Sede vacante infra dies octo eligendi ex Trident. *Sess. 24. Cap. 6.* quorum ea plane, quae Capituli, iurisdictio est. Apostolici vero ab Urbe mittuntur, ut administrent vice Episcopi, vel absentis, vel gravis criminis rei, vel necessariam aliam ob causam.

T I T V L V S XII.

De Condiutore.

I. **Q**uia saepe contingit, ut Episcopi corporis, vel mentis infirmitate, imperitia, suscepti muneris negligentia, captivitate, aliaque iusta ratione Ecclesiae suae regimini, & animarum curae inepti reddantur, propterea
nc

ne hisce in casibus Ecclesiae detrimentum aliquod patiantur, dabantur olim perpetuo, nunc vero ad tempus Coadiutores, qui Ecclesiastica munia rite valeant obire. Id vero non tantum de Episcopis, sed de inferioribus quoque Praelatis, & Clericis dignitatem aliquam obtinentibus iure cautum est. Coadiutoribus autem congrua portio ad eorum sustentationem assignanda est ex fructibus beneficii, si beneficiato quidem, & Coadiutori alendis pares sunt, vel ex aliis Ecclesiae redditibus, ut Episcopo visum fuerit *Cap. de Restoribus 3. de Clerico aegrotante, & Trident. Sess. 21. de Reform. Cap. 6.*

II. Ad solum Romanum Pontificem spectat Coadiutores Episcopis assignare, & ex Indulto Bonifacii VIII. ad Capitula quoque remotarum Provinciarum *Cap. unico de Cler. aegrot. in 6. Ad Episcopos vero, Praelatis inferioribus, & Clericis Capp. 3. & fin. b. 1.*

III. Perpetuos Coadiutores nonnisi perraro, & causa diligenter discussa, & adprobata a solo Rom. Pontifice expostulare tenentur nedum Episcopi, sed etiam Clerici, ex *Trid. Sess. 25. cap. 7.*

T I T V L V S XIII.

De Korepiscoporum sublato usu.

I. **I**nter Episcoporum Officiales numerabantur olim Korepiscopi, qui in multis Pastoralis Officii muniis eodem sublevabant *Can. Quamvis Dist. 68.* Verum iamdudum istorum institutio, & Ministerium ab Ecclesia sublatum est *Can. Korepiscopi Dist. ead.*

II. Hi porro suae institutionis initio non erant fortasse nisi Archipresbyteri Rurales, quibus ne fideles Oppidani quoties Episcopo indigerent itinerum incommodis plus aequo gravarentur maior collata fuit, ac Vrbanis auctoritas, cum ex Balsamone in *Can. 57. Conc. Laod.* doceamur ad ipsos spectasse etiam corrigere, minores Ordines conferre, & alia Episcopi munia in Oppidis illius Dioecesis exercere. Sed nimia auctoritate elati prae no-

minis affinitate cetera quoque Episcopalia iura usurpantes, ut confirmare, *Ecclesias, Altaria, & Virgines consecrare, Chrismata consecrare, Presbyteros, Diaconos, & Subdiaconos consecrare*, quemadmodum discimus ex *lib. 6. Capitul. Reg. Francorum cap. 369.* in Oriente primum, postea a Leone III. ad petitionem Caroli Magni ubique terrarum fuerunt de medio sublati an. 799.

T I T V L V S XIV.

De Translatione.

I. **D**efinitur Translatio apud Canonistas : *Episcopi de una in aliam Ecclesiam auctoritate Superioris facta commutatio ex iusta, & legitima Causa.* In hac definitione duo praesertim sunt attendenda. I. est, quod ad translationem requiratur Superioris auctoritas. II. vero, quod nonnisi ex iusta, & legitima causa sint Translationes faciendae.

II. Ad primum quod attinet Episcoporum translationes inter causas maiores iam recensentur, quae Romanae Sedis sunt reservatae. Vnde quamvis olim Nationalium, vel Provincialium Conciliorum auctoritate nonnullae Episcoporum translationes factae fuerint; postea tamen ad solum Rom. Pontificem spectare iure cautum est; ita quod eius tantum potestate spiritualis Matrimonii vinculum possit dissolvi, uti integro hoc Titulo tradit Innocentius III. Id quoque obtinet quando Episcopus electus est, & confirmatus dumtaxat, quamvis non adhuc consecratus, *Cap. inter corporalia 2. hoc tit.* Nulli itaque neque ex Patriarchis, Primatibus, aut Archiepiscopis id tentare licet; imo neque Legatis de Latere, esto in multis Sedis Apostolicae auctoritate fungantur, *Cap. III. de offic. Legat.*

III. Qui autem Episcopi aut avaritia, aut ambitione ducti ad aliam Ecclesiam propria auctoritate se transferunt, utraque privantur in poenam, *Cap. quanto 3. h. t.* Idem quoque obtinet in translatione alterius Ecclesiae.

si-

ficæ dignitatis Episcopatu inferioris, & beneficiorum commutatione. *Cap. cum olim 7. de rer. permut.*, licet pro his solius Episcopi, cui tales dignitates, aut beneficia subsunt, licentia requiratur, ut tradunt communiter DD. in *Can. Abbas XVIII. q. 3.*

IV. Ad secundum quod attinet nonnisi ex iusta, & legitima causa faciendæ sunt Translationes, & commutationes huiusmodi; sicut enim carnale Matrimonium nonnisi iis intervenientibus dissolvi potest, ita neque spirituale *Can. Vir XI. q. 7. & laud. Cap. inter Corporalia*. Causæ autem iustæ, & legitimæ ad duo Capita referuntur, Ecclesiæ scilicet utilitatem, aut necessitatem, attempto Ecclesiæ tam universalis, quam particularis bono.

V. Per translationem vero quemadmodum amittitur omnis iurisdictio in priori Ecclesiâ, ita acquiritur in nova non absimili modo, ac si ad eam quis fuisset electus, confirmatus, consecratusque.

T I T V L V S X V.

De Renuntiatione.

I. **R**enuntiatio prout ad rem præsentem definiri potest *Spontanea beneficii dimissio cum causa, & auctoritate Superioris facta*. Quare si coacta fuerit, renuntians poterit beneficium repetere, & obtinere, licet iuraverit se non repetiturum *Cap. Ad audientiam, de iis, quæ vi, metusve causa fiunt*. De aliis conditionibus infra. Interim

II. Observandum est renuntiationem aut expressam, esse, aut tacitam. Dicitur quis tacite renuntiare quoties facto aliquo aut ex iuris dispositione, aut ex sui natura renuntiationem significante expoliatur se beneficio, ut si Clericus in minoribus constitutus Matrimonium contrahat *Cap. I. de Cler. coniug.*; vel si alterum cum priore incompatible suscipiat beneficium, *Cap. de multa 28. de Præbend.* vel denique si quis litteras Apostolicas habens ad aliquod beneficium, aliam personam, cui collatum sit,

suo etiam facto tanquam legitime in eo constitutam recognoscat, ut colligitur ex *Cap. 3. de iis, quae fiunt a maiori parte Capituli*. Expressa vero renuntiatio est, quae vel per se, vel per Procuratorem expressis verbis, aut scripto fit coram legitimo Superiore.

III. Haec tamen pura, simplex, & absoluta, vel conditionalis esse poterit. Prima est, quae fit sine ullo pacto, vel conditione pure, & libere in manu Superioris, qui poterit de beneficio disponere, ac si per mortem beneficiati vacasset. Conditionalis vero, quae fit sub aliqua conditione, vel ut certae Personae beneficium conferatur, & dicitur renuntiatio in favorem; vel faciendae permutationis causa cum altero beneficio; vel denique ut sibi certa quaedam ex beneficii fructibus pensio reservetur. Huius generis quoque erant antequam per Trid. *Sess. 25. cap. 7.* prohiberentur illae, quae appellari consueverunt cum *lege regressus*, aut *accessus* factae renuntiationes.

IV. Beneficiorum renuntiatio, & resignatio olim Synonima erant; at postea ex stilo Curiae renuntiatio significat puram dimissionem beneficii; resignatio vero dimissionem in favorem alterius factam. Eiusdem Curiae stilus obtinuerat, ut in fronte resignationis in favorem apponerentur haec verba: *Resignatio in favorem*, & in corpore resignationis haec alia: *& non alias, nec aliter, nec alio modo*. Qui tamen stilus aetate Gregorii XIII. mutatus est, ut non amplius apponantur verba illa, sed in fronte Resignationis eorum loco: *Resignatio simplex*, quae tamen idem valent, nam Resignans renuntiat simpliciter in manu Pontificis, qui habens respectum ad petitionem Resignatarii adnexam Renuntiationi resignantis, illi beneficium confert, & ita quidem, ut si alteri conferretur, non teneret resignatio; quia licet non apposita, semper tamen in resignatione subintelliguntur verba illa, *& non alias, nec aliter, nec alio modo*.

V. Illud autem interest absolutam inter, & conditionatam renuntiationem, quod per illam statim ac facta est, & Superioris consensus accesserit Beneficiatus amittit omne ius, quod habebat *Cap. 3. 6. 12. h. t.* attamen conditionata nisi adimpleta conditione suum habet effectum.

VI. Possunt in genere quicumque beneficium Eccle-

fia

fiaticum possident eidem renuntiare, seu illud resignare, nisi expresse iure prohibeantur. Prohibentur autem primo promovendi ad quascumque Praelaturas, vel dignitates ex Regula XXVI. Cancellariae Apostolicae, qua Romani Pontifices sibi reservant liberam dispositionem omnium beneficiorum, quae per eorundem promotionem vacatura sunt.

2. Resignare in favorem prohibentur pendente iudicio criminali illi, de quorum beneficiis in aliorum favorem disposuerit Rom. Pontifex ea clausula, ut si accusatus privandus iudicetur, beneficium illius cedat impetranti.

3. Renuntiare non possunt qui beneficium obtinent litigiosum, vel post ipsorum mortem uniendum Monasterio, Collegio, aut alteri dignitati, nisi in favorem collitigantium, aut illius, cui beneficii unio competit, renuntiaverint.

4. Ex Regula XVIII. Cancellariae nullius valoris sunt resignationes in favorem, sive permutationis causa factae ab infirmo, vel etiam sano beneficiato, si is intra xx. dies moriatur; & quamvis nova collatio ex vi huius resignationis facta fuisset, adhuc beneficium vacat *per obitum*. Eiusmodi regulae ratio opponitur fraudi Resignantium in damnum Ordinarii Collatoris, aut habentium a Pontifice gratias expectativas super beneficio proxime vacaturo.

5. Renuntiare prohibentur suo beneficio, qui titulo illius ad Sacros Ordines sunt promoti; vel si aliunde non habeant, unde honeste vivant, ex Constitutione Pii V. quae incipit *Quanta*.

6. Denique, praeter eos omnes, qui ipso iure privati sunt beneficio, ut intrusi, simoniace promoti, & similes, sua beneficia nec simpliciter, nec in favorem resignare possunt furiosi, & mente capti ex defectu rationis; uti nec minores xiv. annis, qui ratione aetatis apti non censentur ad disponendum de rebus suis, *Cap. fin. de iudiciis in 6.*

VII. In eius vero superioris manu facienda est renuntiatio, ad quem spectat confirmatio, vel institutio, seu beneficii collatio. Verum si sermo est de Episcopatu, vel Abbatiarum immediatae Romanae Sedi subiectarum renuntiatione, haec non nisi Rom. Pontifici facienda

est, *Cap. Litteras* 1. *b. t.* & *Cap. Dilecti* 15. *eod.* At si agatur de aliarum dignitatum, & beneficiorum resignatione, etiam coram Episcopo fieri poterit modo sit pura, & libera; Nam conditionales, & praesertim in favorem soli Romano Pontifici reservantur per Bullam Pii V. quae incipit: *Antea Ecclesia*. Dixi praesertim in favorem quoniam resignationes ex causa permutationis, dummodo in his nulla Simoniacae labis suspicio interveniat, fieri possunt coram Episcopo, cui potestas est, utilitate, aut necessitate exigente, Ecclesiasticas Personas de uno ad alterum beneficium transferendi *Cap. Quaesitum* 5. *de Rev. Permut.*

VIII. Poterit etiam Episcopus recipere Resignationem illius, qui ante resignationem supplex exposulaverit, ut sibi certam super beneficio pensionem constituat, quae illi iusta de causa est concedenda, praesertim si decrepitus fuerit resignans, & aliunde commode sustentari nequeat. Resignatio tamen simpliciter facienda videtur, ne fiat permutatio rei spiritualis cum temporali, beneficii scilicet cum fructibus eiusdem, quae simoniam saperet, praesertim interveniente pactioe.

IX. Causae demum iustae, ac legitimae petendi ab Superiore licentiam renuntiandi enumerantur ab Innocentio III. in *Cap. Nisi cum pridem* 10. *b. t.* primo scilicet conscientia criminis, non cuiuscumque, sed eius tantum, quod etiam peracta paenitentia Ordinis, & Officii executionem impediat. II. Debilitas corporis, quae inhabilitatem ad munus pastorale omnino inducit. III. Defectus scientiae, illius praesertim, quae ad spiritualium administrationem est maxime necessaria. 4. Malitia Plebis, si talis fuerit, ut Episcopo conciliari nullatenus valeat. *Can. Nullus inquitis* *Dist.* 6. V. Grave scandalum, si praesertim fuerit eiusmodi, ut nonnisi Episcopi discessu sedari queat. VI. demum Irregularitas Personae, puta ob Bigamiam, vel ob defectum natalium, vel corporis.

X. Quoties fieri contigerit renuntiatio, fiat in scriptis oportet, & verbis expressis concepta, cui resignans vel per se, vel per suum Procuratorem ad id specialiter constitutum praebere debet consensum aut in Cancellaria, vel Camera Apostolica, aut in Curia Episcopali, respective sci-

ſcilicet, prout vel coram Pontifice, vel coram Epifcopo renuntiatio fiat; Et ad fraudes vitandas ex Conſtitutione Gregorii XIII. quae incipit: *Humano vix iudicio*, publicanda erit, vel intra ſex menſes, ſi de beneficio citra montes fiat renuntiatio coram Pontifice; vel intra menſes novem, ſi ultra montes beneficium exiſtat, a die renuntiationis; Cum vero renuntiatio fit coram Epifcopo ſemper intra trium menſium ſpatium facienda erit eius publicatio ex eadem Bulla. Ab hac regula tamen excipiuntur beneficia Conſiſtorialia, quae in Romana Curia conferuntur, ut Epifcopatus, & ſimiles dignitates.

XI. Sciendum denique quod renuntiatione peracta, & per Superiorem admiſſa, non eſt amplius eam revocandi locus iure comuni, at revocantes Curia Romana admittit, & audit, ut dicunt Doctores. Si quis autem Religionem ingrediatur, quod dimiſit, beneficium repetere nequit, etſi in probatione Monachatum abiecerit. Sed ſi ad beneficium, quod reſignavit, iterum quis eligatur, poteſt illud adſumere, licet etiam iurans promiſerit ſe non amplius repetiturum.

T I T V L V S XVI.

De Depoſitione, ſeu Degradatione.

I. **N**on tantum per Translationem, & Renuntiationem diſſolvitur ſpiritualis Matrimonii vinculum, ſed etiam per depoſitionem, ſeu degradationem *Cap. Inter corporalia de Translat.* Illis itaque breviter explicatis, pauca de iſta modo ſunt dicenda.

II. Eſt igitur depoſitio, ſeu degradatio, *Clerici per grave delictum a proprio gradu deiectio*. Quare haec diſfert a ſuſpenſione, quod nedum ſola ordinis, & officii executio interdicator, & iuriſdictionis uſus; ſed omnis quoque titulus, ſolo remanente Ordinis caractere, per depoſitionem auferatur; ita quod ſine nova collatione, & titulo nequeat depoſitus ad officium, vel beneficium redire.

III. Duplex distinguitur degradatio, verbalis scilicet, quae nonnisi verbis legitimi iudicis sententiam proferentis absolvitur; & actualis, seu sollemnis, qua Clericus solemniter spoliatur vestibus sacris, & singula ordinis, in quo erat constitutus insignia ab eo auferuntur, cuius ex-auctorisationis formam, & seriem describit Bonifacius VIII. in *Cap. 2. de Poenis in 6.* Quod si Iudici seculari tradendus sit degradatus, apud illum intercedat Ecclesiasticus Iudex, ut citra mortis, aut mutilationis periculum puniatur, quemadmodum dicitur in Pontificali Romano.

IV. Crimina vero, ob quae Clericus degradatus Iudici seculari puniendus traditur, sunt haeresis, nisi corrigatur, eamque abiuret *Cap. Ad abolendam 9. de Haeresibus*; Falsificatio litterae Apostolicae *Cap. Ad falsarium 7. de crimine falsi*; Calumnia insidiae, aut contumeliae in proprium Episcopum. XI. q. I. *Can. Si quis.* In reliquis vero delictis requiritur incorrigibilitas *Cap. Cum non ab homine 10. de Iudiciis.*

V. Olim Episcoporum depositio per XII. Episcopos, Sacerdotum per sex, Diaconorum vero per tres Episcopos peragebatur; hodie tamen cum Episcoporum depositio inter causas maiores numeretur, executioni non mandatur nisi ipsius Romani Pontificis auctoritate, vel speciali commissione ex laudato *Cap. inter corporalia*, & Trident. *Sess. 24. Cap. 5. de Reform.* ubi etiam *Sess. 13. cap. 4. de Sacerdotum, & Clericorum degradatione* decernitur, ut solus Episcopus proprius eam exequi possit, accitis, si commode fieri potest, Abbatibus mitratis suae Dioecesis.

VI. Degradatus si ausu temerario commissum sibi dudum ministerium exercere praesumerit per sententiam excommunicationis est omnino expellendus, *Cap. Si quis de Clerico excommunicato.*



TITVLVS XVII.

*De Sacerdotibus in inferiori gradu, & Clericis in Sacris,
vel minoribus dumtaxat constitutis, eorumque
variis Officiis.*

I. **S**acerdotes in inferiori gradu constituti sunt simplices Presbyteri, quibus iure divino sunt superiores Episcopi. Presbyteri quidem secundum nominis ethymologiam aetatis nomen est, & seniore[m] significat; prout tamen hic accipitur nomen est officii. Propria Presbyterorum officia sunt Eucharistiae consecratio, aliorumque prae-terquam Ordinis, & Confirmationis, Sacramentorum dispensatio, & Ecclesiae sub Episcoporum directione regimen.

II. In Sacris tantum constituti, sunt Diaconi, & Subdiaconi. Illorum munera, sive in iure Canonico, sive in Pontificali Romano recensita, sunt sacrificanti Sacerdoti panem, & vinum ministrare; Evangelium in Missarum solemnibus legere; Populum docere, ubi id facere iussi fuerint; baptizare solemniter ex commissione, & absente Presbytero Eucharistiam in casu necessitatis ministrare. Subdiaconorum vero munera sunt vasa sacra ad sacrificium disponere; panem, vinum, & aquam praeparare; post immixtum a Diacono vinum, in Calicem aquam infundere; & Epistolam cum manipulo intra Missam solemnem legere.

III. In Minoribus denique constituti, dicuntur primo Accolyti, quorum officium est Cereos accendere, Ceroferarium deferre, & Vireolos in Altaris ministerio Subdiacono porrigere. II. Lectores, ad quos spectat recitare alta voce lectiones, & prophetias, quae tum in Missa, tum in officio Matutino decantari, aut legi solent, & fidei rudimenta pueros edocere, si Parochus commiserit. III. Exorcistae, qui ad hoc specialiter ordinati sunt, ut Daemones fugent. IV. Ostiarii, qui ex officio Templorum fores aperire, & claudere debent, campanas pul-

sa-

sare, ut ad divina officia Populum advocent, aliaque his similia ad Templi custodiam exercere.

T I T V L V S XVIII.

De Praebendis, & aliis Beneficiis.

I. **C**VM Ecclesiasticae Personae propriis stipendiis militare non debeant, ideo obtinuit, ut dignitatibus, atque officiis Ecclesiasticis bona aliqua adnesterentur, de quorum proventu Personae in dignitate constitutae, vel Ecclesiasticis deputatae Ministeriis alerentur. Istorum vero fructuum percipiendorum ius Praebenda, seu Beneficium appellari consuevit.

II. Quapropter optime definitur omne beneficium : *Ius spirituali ministerio adnexum percipiendi redditus Ecclesiasticos ex Canonica institutione in perpetuum*. Dicitur primo *ius spirituali ministerio adnexum*, quia beneficia propter spirituale officium conceduntur, *Cap. fin. de Rescript. in 6.* II. *Percipiendi redditus Ecclesiasticos*, quia sine proventu beneficium non datur, ad differentiam Canonicae, quae simpliciter accepta non importat, nisi sedem in Choro, & vocem in Capitulo, *Cap. 9. & 19. h. t.* Dicitur III. *ex Canonica institutione*, quia sine ea nullum erit legitimum beneficium, nullus legitimus possessionis titulus, cum iuxta praefatam regulam iuris in 6. Beneficium Ecclesiasticum non possit licite sine institutione Canonica obtineri. Dicitur denique *in perpetuum*, quia ad totam Beneficiati vitam confertur.

III. Ecclesiasticorum beneficiorum multiplex genus est. Eorum enim alia maiora sunt, quia aliquam ex maioribus dignitatem beneficiato conferunt, uti Papatum, Episcopatum, Abbatiam, &c. Alia vero minora, propter oppositam rationem.

IV. Alia etiam sunt, quae Dignitatem, alia, quae Personam, & alia, quae Officium duntaxat habent adnexum. Primi generis praecminentiam simul, & iurisdictionem important, ut Episcopatus, & inferiores Praelaturae. Secun-

tundi generis praecminentiam, & non iurisdictionem, ut Cantoratus, & Primiceriatus. Terti generis demum rerum Ecclesiae administrationem, sed absque ulla praeceminentia, aut iurisdictione, ut Officium Sacristae, Custodis, Thesaurarii, & similia.

V. Quaedam etiam sunt, quae curam animarum habent adnexam, & qui ea obtinuit, omnia praestare potest, quae fidelium sibi commissorum saluti expedire cognoverit, ut Sacramenta administrare, mores corrigere, &c. De his loquuntur Innocentius III. in *Cap. 14. de ass. & qual. Ordin. & Trid. Sess. 23. Cap. I. de Reform.* Si autem haec beneficia curata forum etiam contentiosum habeant adnexum, tunc Beneficiatus ea quoque exercere poterit, quae sunt iurisdictionis; ut suspendere, excommunicare, &c.

VI. Quaedam vero beneficia omnino simplicia sunt, quorum meminit Gregorius IX. *Cap. fin. b. t.* Ad huiusmodi beneficiorum classem amandantur Canonici Ecclesiarum Cathedralium, & Collegiatarum, saltem in favorabilibus a DD. Canonistis, non ita tamen in odiosis tum propter Canonici eminentiam, tum etiam quod ipsi dignitatibus comparantur in *Cap. Statutum de Rescript. in 6.* Beneficiis simplicibus accensentur quoque Cappellaniae tam in Ecclesiis Cathedralibus, quam Collegiatis; imo etiam in particularibus sacellis, & Oratoriis fundatae.

VII. Rursus Beneficia sunt vel secularia, quia ita fundata sunt, aut titulo praescriptionis a Clericis secularibus possidentur; vel Regularia, quia ex sui institutione, aut ex sui natura, sive etiam ex titulo praescriptionis per Regulares administrari debent.

Circa huiusmodi beneficia adnotetis velim. I. Commune esse apud Canonistas regulam; Omne Beneficium praesumendum esse ex primaeva sui institutioneulare, nisi probetur regulare. II. Quodlibet Beneficium ex sui institutione sive regulare, siveulare posse ex titulo praescriptionis evadere autulare, aut regulare; & vicissim *Cap. 5. de Praebend. in 6.* Quod si vera beneficii conditio non probetur, sufficit, quod fuerit ultimo possessum per secularem, ad hoc ut seculari debeat, quod si probaretur possessio hinc-

inde, eo in casu status ultimus est attendendus; ut notat Rebuffus *Prax. ben. par. 1.*

Denique ex communi etiam Canonistarum regula Secularia secularibus, Regularia regularibus concedenda esse beneficia.

VIII. Dividi quoque solent beneficia, ut alia manualia dicantur, quia ad solum Superioris nutum conceduntur, & auferuntur, ut Vicariatus temporarii, & haec proprie beneficia non sunt. Alia vero dicuntur non manualia, quia semel data nonnisi causis ab iure probatis auferuntur, ut sunt Vicariatus perpetui, qui propterea cum beneficiis curatis confunduntur.

IX. Alia demum beneficia sunt Electiva, alia Collativa, alia Patronata. Primi generis vocantur quae per electionem conferuntur, ut Episcopatus, Abbatia, Praepositura, &c. Collativa per liberam Superioris collationem obtinentur; Patronata vero ad praesentationem, vel nominationem Patroni ab eodem Superiore conceduntur.

X. Maiora beneficia erigendi uni Romano Pontifici est potestas, sicuti & novas dignitates in Ecclesiis Collegiatis excitandi, ac regularia in secularia convertendi; Episcopo autem minorum beneficiorum creatorum. In erigendis vero beneficiis requiritur I. locus eorundem qualitati congruus. II. Legitima causa. III. Consensus eorum, quorum interest erectio. IV. Congrua dos unde minister commode alatur. Erecta subiiciuntur Episcopo loci, nisi aut eximantur, aut Summo Pontifici devoveantur.

XI. Pensio super beneficium, quae imponitur, nonnisi ex legitima causa imponi debet, cavendumque ne supra necessaria alimenta oneretur beneficiatus. Potest Episcopus quoque eam imponere, licet illius transferendae, aut ultra pensionati vitam perpetuandae solius sit Summi Pontificis. Non confertur pensio nisi prima saltem consensu initiatis, nec absque obligatione adminis recitandi quotidie Officium Beatae Virginis ex Constitutione Pii V. quae incipit *Ex proximo*. Vetitum est autem onerare pensionibus Ecclesias, quae supra mille, aut Parochias, quae supra centum ducatorum summam annuam non reddunt ex Trident. *Sess. 24. Cap. 13. de Reform.* Sicut nec ultra dimi-

diam fructuum beneficii partem, *Cap. de Monachis, Cap. Vacante, Cap. Cum causam de Praebend. & Rebuff. in Prax. benef. tit. de reserv. n. 19.*

T I T V L V S XIX.

De Collationibus.

I. **I**Nter varia beneficiorum genera quaedam collativa esse diximus, quaedam vero patronata; de his speciatim agemus, cum hodie collatio, & nominatio in beneficiorum dispensatione praecipuum fortassis obtineant locum, licet nomina hac in re ignota prorsus veteribus, cum nulla olim esset ordinatio sine ministerio, nec ministerium sine beneficio.

II. Collatio itaque proprie dicta definitur communiter: *Assignatio, seu concessio beneficii vacantis facta ab habente potestatem.* Dividitur autem in liberam, & non liberam. Prior dicitur, quae fit solo iure Collatoris absque restrictione ad aliquam personam ratione iuris alteri competentis; & haec venit proprio Collationis nomine. Posterior autem est, quae fit alicui determinatae Personae ratione iuris alteri competentis, quia Collator non habet libertatem conferendi cui ipse voluerit. Unde Collatio non libera dicitur, v. g. si restringatur ad praesentatum a Patrono, aut nominatum ab Universitate, vel ad permutarium ratione permutationis admissae; & haec Collatio vocari solet Institutio, de qua titulo sequenti.

III. Collatio libera, & proprie dicta aequivalet electioni simul & confirmationi, quia per ipsam acceptatam etiam ante adeptam possessionem acquiritur ius in rem, *Cap. 3. de Praeb. in 6.* quatenus beneficium vere acquiritur, vel titulus confertur. Et de hac Collatione, quae aliquando etiam Institutio minus proprie appellatur, intelligitur Regula I. Iuris in 6. de qua in titulo praecedenti locuti sumus.

IV. Attenta beneficiorum institutione, eorum Collatio non nisi ad Locorum Ordinarios attinet. Estque regula

la communi Canonistarum caleulo probata apud *Card. De Luca Tom. I. Summ. Benef.*: Primaevo iure omnia beneficia quodcumque, & quomodocumque vacantia ad Ordinarii Collationem pertinent. Verum per novam paulatim inductam disciplinam beneficia quamplurima, praesertim postquam eorum Collatio ab Ordinatione fuit separata, ab aliis praeter Episcopos conferuntur; modo ergo spectat vel ad Ordinarium Collatorem, vel ad Romanum Pontificem, & aliquando etiam ad ipsius Legatum.

V. Ordinarius Collator est, quem aut consuetudo approbavit, aut iuris designavit auctoritas. Vnde patet quod consuetudine fieri potuerit, ut non solum ad Episcopos, sed etiam ad Capitula, ad Regulares, & ad ipsos Seculares spectare poterit beneficiorum collatio ex indulto, & privilegio Apostolico. Quare hac in re, aliisque ad beneficiorum provisionem pertinentibus, ut optime docent Canonistae, attendenda maxime est Ecclesiarum consuetudo, quae sive ex iure communi, sive ex speciali fundatione, sive ex legitima praescriptione, aut privilegio originem trahat, servanda est, cum non agatur, nisi de disciplina, quae pro temporum, locorumve varietate, varietati subesse potest.

VI. Praeter Ordinarios Collatores, plurium beneficiorum Collationes facere consueverunt Romani Pontifices per Apostolica Rescripta, quae ad beneficia vocari diximus titulo *De Constitutionibus Ecclesiasticis*, idque praestabant mandando Collatoribus, ut certae Personae de beneficio providerent. Et cum rescriptum esset ad beneficium vacans, appellabatur *mandatum simpliciter de providendo*; si autem ad vacaturum, appellabatur *mandatum cum expectatione*; & qui rescriptum obtinuerant, *expectantes* dicebantur. De his mandatis, & expectativis, eorumque origine, & prohibito usu, alibi erit aptior dicendi locus.

VII. Iure quoque praeventiois disposuerunt aliquando Pontifices, & disponere possunt de beneficiis ad Ordinarii Collationem spectantibus. Ad evitandas tamen fraudes, quae in hoc Collationis genere ex petentium parte occurrere possunt, sancita fuit Regula XXX. Cancellariae de verosimili notitia, quod beneficium vacaverit, sine qua nullius roboris sunt Collationes per praeventionem factae.

Imo

Imo ipsi etiam Romani Pontifices ab huiusmodi sui iuris exercitio se ut plurimum abstinere, ut notat Gonzalez *ad Regulam VIII. Cancellariae*.

VIII. Peculiari etiam iure ad Rom. Pontificem spectat Beneficiorum Collatio per reservationem sibi factam; Haec tamen vel specialis est, vel generalis, quando nimirum vel aliquod beneficium in particulari, vel omnia generaliter certi generis, certique aut loci, aut regni beneficia vacatura suae dispositioni reservat sub poena nullitatis, facta Collatoribus, aut Electoribus inhibitione, ne cum vacaverint ad eorum provisionem procedant. Et quidem a pluribus seculis obtinent huius generis amplissimae reservationes, de quibus speciatim agere huius loci, & instituti non est, videri tamen possunt in *Cap. 2. de Praebend. in 6. in Extravag. 2. 3. 4. 13. 14. inter communes*, nec non in *Regulis I. II. III. & VIII.*, seu, ut alii numerant, *IV. & IX. Cancellariae Apostolicae*, quae una cum reliquis altero ab assumptionis suae die solent a Romano Pontifice renovari, & confirmari, nam suapte natura moriente Pontifice spirant, & Sede vacante libere possunt Ordinarii beneficia conferre.

IX. Possunt quoque Cardinales de Latere Legati beneficia in Provincia sibi credita vacantia iure praeventio- nis conferre; quemadmodum ea, quorum Collatio ad Pontificem est devoluta; imo illa etiam, quae sunt iurispatronatus Ecclesiastici, nullatenus tamen quae laicalis *Cap. 37. de Praebend. 31. eod. in 6. & 6. de Off. Legati*. Possunt etiam vacatura suae dispositioni reservare, dummodo reservatio non fiat pro speciali persona, nec eundem Collatorem, prima reservatione adhuc pendente, gravet secunda. Ab hac tamen reservatione excipiuntur Cathedrales Ecclesiae, Prae- laturae Regulares, Praepositurae Collegiatarum Ecclesia- rum, & Cathedralium Dignitates maiores post Episcopum, si electivae sunt, quas nec reservare, nec conferre ullo modo possunt. Reservationes vero ab Legatis factae finita Legatione expirant, nisi vacantia beneficia fuerint iam collata *Capp. 3. & 4. de Off. Legati in 6.*

X. Quamquam de Ordinaria Collatione in iure nulla sit certa forma statuta, videaturque iure communi atten- to etiam solis verbis fieri posse; hodie tamen sine litte-
ris

ris non fit collatio, ut testatur Rebuffus *in praxi Benef. par. I. tit. Requisita ad Elect.* Harum Litterarum formulam exhibet laudatus Auctor, & habet etiam Barbosa *in Append. ad Tract. de Officio Episcopi formul. LXVII.*

XI. In laudata formula quaedam potissimum sunt adnotanda. I. quod ita exprimatur facta per Ordinarios collatio, ut appareat ex motu proprio. II. Quod exprimatur nomen praecedentis possessoris, & modus vacationis. III. Dioecesis, & Ecclesia, ubi vacaverit beneficium. IV. Quod collationi adscribantur duo saltem testes, & subscribatur nomen publici Notarii. V. Denique quod signetur in collatione annus, mensis, & dies. Quorum omnium omissio cassam, nullamque reddit collationem ex Canonistarum Sententia.

XII. Quod si ab uno, eodemque duae sint factae Collationes, neque ex data, vel aliunde appareat quae sit anterior, neutra valebit; si tamen eodem die iure praevencionis fuerit beneficium collatum a Romano Pontifice, vel eius de Latere Legato, & ab Ordinario Collatore, nec constet quae prius fuerit facta collatio, nisi alter reperiat in possessionem beneficii, collatio Pontificis praesumitur praecessisse propter ampliorem eius praerogativam *Cap. Si a Sede Apostolica 31. de Praebend.* Quod valet etiam si idem contingeret in collatione ab Episcopo facta, & eius Vicario habente ad id speciale mandatum.

XIII. Semel ac Ordinarius Collator uni contulit beneficium non potest conferre alteri. Poterit autem post notificatam ei collationem terminum competentem assignare, intra quem nisi collationi consenserit, in collatoris ipsius libertate erit alteri, cui maluerit beneficium conferre. Quod tamen si ille, cui iam collatum fuit, consensum praebuerit post elapsam praestitutum terminum ad consentiendum, sed ante novam collationem, non poterit Ordinarius Collator de beneficio alteri disponere *Cap. 17. de Praebend. in 6.*

XIV. Circa Apostolica vero Rescripta animadvertendum occurrit. I. Quod si Rom. Pontifex mandet provideri alicui de beneficio, aut dignitate, vel personatu in genere, tale rescriptum stricte erit intelligendum; exceptis nem-

nempe Cathedralium Dignitatibus, beneficiis curatis, imo etiam simplicibus electivis, *Cap. 4. & 16. de Praebend. in 6.* Praeterea Apostolica huiusmodi rescripta in duplici differentia esse possunt; nam vel ad petentis supplicationem conceduntur, vel motu proprio. Si priori modo ex vacantibus pluribus beneficiis quod minoris valoris est, & ubi aequalia fuerint, alterutrum pro suo libito conferre poterit Ordinarius *Cap. Si pluribus 21. de Praeb. in 6.* At vero si *motu proprio* fiat rescriptum ex pluribus quod maius, & pinguius est concedi debet, quod ubi aequalia fuerint, electionem habebit intra decem dies qui rescriptum obtinuit ex laudato *Cap. 24. de Praeb.*

XV. Alterum quoque inter ea discrimen est, quod rescriptum ad petitionem censeatur subreptitium, & redatur invalidum, si in supplicatione beneficium aliquod prae habitum, utcumque minimum reticeatur; non ita si rescriptum fuerit cum clausula *motu proprio* expeditum, *Cap. Si motu 23. de Praeb. in 6.* Vbi tamen observandum clausulam illam non importare dispensationem super beneficiorum pluralitate, sed tantum operari ne rescriptum sit subreptitium. Secundum hodiernum vero morem Romanae Curiae Provisiones huiusmodi beneficiorum expediti solent aliquando in *forma gratiosa*, aliquando in *forma quia dignum*, sumptis terminis ab initialibus Bullae verbis.

XVI. Discrimen quod inter utramque formulam agnoscunt Canonistae, illud potissimum est, quod provisio in *forma quia dignum* iure merito dici posset mandatum de providendo, cum in hac remittat supplicantem ad Ordinarium, seu Executorem, ut ei de beneficio provideat, si proprio examine idoneum repererit. At provisio in *forma gratiosa* nullum requirit examen per Ordinarium faciendum, sed sit absolute per Papam, cuius vigore potest Otorator imitti in beneficii possessionem; & Litterae provisionis diriguntur, ac inscribuntur Supplicanti, cui etiam titulus beneficii tribuitur, utpote qui iam per Apostolicam provisionem ipsum beneficium habere supponitur.

XVII. Quia vero istiusmodi Provisiones, nisi clausulam *motu proprio* expresse contineant, intelliguntur semper ad petitionem factae, *Cap. 23. de Praeb. in 6.* si in

petentis supplicatione aliquid falsi fuerit expressum, aut aliquid veri suppressum, ratione cuius Summus Pontifex beneficium concessit, alias non concessurus, ipsa provisio tanquam subreptitia, vel obreptitia invalida erit. Quapropter exprimi debet a Supplicante proprium nomen; Dioecesis, ubi est beneficium; illius modus vacationis; qualitas, & verus valor iuxta Regulam Cancellariae. Immo exprimi etiam debet beneficium quantumvis tenue, vel exiguum ante obtentum, ut diximus ex *Cap. 23. de Praeb. in 6.* cum super beneficiorum pluralitate S. Canonibus opposita non praesumatur, quod Romanus Pontifex dispensare voluerit.

T I T V L V S XX.

De supplenda negligentia Praelatorum.

I. Praelatus negligens reputandus est non solum qui criminum punitionem differt, verum etiam qui intra tempus ab iure statutum de beneficiis, vel dignitatibus vacantibus non providet. Quare si ii, ad quos spectat ius electionis, vel collationis ultra sex menses a die innotescantis vacationis iuxta Lateranense III. in *Cap. Nulla de Conc. Praeb.* eligere, vel conferre distulerint, amittunt omne ius eligendi, vel praesentandi, vel conferendi *Cap. licet 3. b. t.* neque electio post sex menses facta sustineri poterit, nisi aliquo in casu ex dispensatione *Cap. per litteras b. t.*

II. Ad rem praesentem itaque si Episcopus negligens fuerit, ius devolvitur ad Capitulum. Verum id hodie non servari monet Rebuffus loco supra laudato, at potius Episcopi negligentia ab Archiepiscopo, Archiepiscopi a Primato, si adfit, huius vero a Romano Pontifice suppleri debet.

III. Denique ab inferioribus Collatoribus ius devolvitur ad Episcopum, & ubi exempti fuerint ad Romanum Pontificem, tanquam immediatum eorum Superiorem. Unde

de

de istorum negligentiam supplere potest Episcopus non propria, sed Apostolica auctoritate, *Clem. un. b. t.*

T I T V L V S XXI.

De Institutionibus, & Iure patronatus.

I. **Q**uia institutio ad beneficium ius patronatus supponit, ideo primo iuris eiusdem notionem explicandam suscipio, acturus postea de Institutionibus.

Ius patronatus itaque definiri solet: *Potestas praesentandi instituendum ad beneficium vacans.* Et fusius describitur a Barbosa *Iur. Eccles. univ. Lib. III. Cap. 12. Ius honorificum, onerosum, & utile alicui competens in Ecclesia, quam de Ordinarii consensu fundavit, vel dotavit, sive ipse, sive alius, a quo causam habet.* Dicitur ius honorificum nedom propter praecedentiam, & honorationem in Ecclesia patronata locum Patrono debitum, sed etiam, quia in eius honorem cedit, quod nulli, nisi praesentatae ab ipso Personae conferri queat Ecclesiasticum beneficium, *Cap. Ex insinuatione 14. de Iure Patr.* Dicitur *onerosum*, quatenus Ecclesiam patronatam in iuribus, bonisque suis tutari, & tanquam Advocatus defendere debet Patronus, *Cap. 24. eod. imo ex Trid. Sess. 2. Cap. 7. de Reform.* ad eiusdem reparationem concurrere tenetur. Dicitur *utile*, quia si quos in fundatione sibi reservaverit census percipiet *Cap. 23. eod.* & ubi ad inopiam redactus fuerit Patronus posset ab ipsa Ecclesia alimenta petere deductis necessariis ad cultum divinum, & ministrorum sustentationem. Dicitur *alicui competens in Ecclesia*, ius scilicet praesentandi personam idoneam in eo beneficio instituendam. Dicitur, *quam de Ordinarii consensu construxit, fundavit, vel dotavit*, quatenus hoc pacto acquiritur istiusmodi ius. Dicitur denique *sive ipse, sive alius, a quo causam habet*, quatenus acquiri potest ius patronatus etiam iure haereditario, *Clem. 2. de iurepatr.*, donatione, *Cap. unico eod. in 6.* & venditione bonorum, quibus adnectitur; imo etiam privilegio, & praescriptione

immemorabili, sive contra Patronum, sive contra Ecclesiam liberam *Cap. 24. de Elect. & Cap. 1. de Praescript. in 6.*

II. Quemadmodum vero pluribus modis acquiritur iuspatronatus, ita multis deperditur. I. Per totalem Ecclesiae destructionem, aut dotis, seu reddituum amissionem. II. Si Ecclesia patronata de patroni consensu in Collegiatam, aut monasterium transmutetur, tunc enim praesentatio cessat, & succedit Electio. III. Per non usum, ut si duabus, vel pluribus vicibus patronus non praesentaverit. IV. Si Patronus beneficiatum, vel alium Ecclesiae ipsius Clericum occiderit, vel mutilaverit *Capp. 10. & 12. de Poenit.* V. Si Patronus evadat Haereticus, Schismaticus, vel Apostata, *Cap. fin. de Haeret.* VI. Si Patronus beneficii fructus in proprium usum convertat, aut impediat, ne ad beneficiatum perveniant ex *Trid. Sess. XXII. Cap. 11. de Reform.* Denique si Patronus contra Ecclesiasticas sanctiones per directam iuris venditionem, aut alio illicito modo in alium ius illud transferre tentaverit ex *Trid. Sess. 25. Cap. 9. de Ref.* his igitur omnibus modis iuspatronatus extinguitur, & Ecclesia deinceps libera evadit.

III. Iuspatronatus sic explicatum dividitur primo in *Ecclesiasticum, Laicale, & mixtum.* Primum est, quod competit Ecclesiae, Capitulo, aut Monasterio, seu eorum nomine alicui Personae etiam laicae, v. g. Abbatissae. Neque refert, quod primitus ex fundatione laici rationem habuerit, sufficit enim, quod postea, sive testamento, sive donatione, aut alio modo Ecclesiasticum evaserit.

IV. *Laicale* autem est, quod Laico, sive Clerico competit ratione proprii patrimonii, haereditatis, aliove titulo quocumque, praeterquam Ecclesiae, vel beneficii. Hinc si Clericus ex bonis propriis Ecclesiam fundaverit, construxerit, aut dotaverit, atque inde iuspatronatus acquisiverit illud laicale erit.

V. *Mixtum* denique dicitur, quod partim laicale, partim Ecclesiasticum est, ut facile contingere potest, si ex duobus Compatronis iuspatronatus laicale obtinentibus eorum alter ius suum Ecclesiae donaverit. Non idem tamen de obtinentibus Ecclesiasticum adferi potest; Nam Ecclesia, aut Monasterium iuspatronatus obtinens cum non possit

posse

possit alteri Ecclesiae, aut Monasterio concedere, multominus personae laicae illud ius donare quiverit, sine consuetis saltem solemnitatibus ad rei immobilis Ecclesiasticae alienationem requisitis.

VI. Multis autem ex Capitibus differt iuspatronatus Ecclesiasticum ab laicali. I. quidem, quod patronis laicis quatuor a notitia vacationis, Ecclesiasticis vero sex conceduntur menses ad praesentandum ex *Cap. unic. de iurepatr. in 6.* II. Quod patronus laicus plures praesentare potest, ex quibus unum eligat Episcopus, non ita Ecclesiasticus, qui nonnisi unum praesentare potest, quem si Ordinarius indignum repererit, poterit pleno iure de Ecclesia vacante libere disponere, *Clement. 2. eod.* III. Quod Summus Pontifex de laicalibus huiusmodi beneficiis nullo modo disponere soleat, & Legatus de Latere haudquaquam possit.

VII. Quod vero ad mixtum attinet, si Patroni simultanee praesentaverint, in favorabilibus induet utriusque naturam; si vero sigillatim alternative pro diversis vicibus sequetur conditionem Patroni praesentantis.

VIII. Dividitur ulterius iuspatronatus in *reale*, & *personale*. Illud est, quod rei, fundo v. g., alicui adhaeret, & a Fundatore adscriptum est. *Personale* vero, quod alicui independenter a qualibet re competit. *Reale* cum re, cui adhaeret transit, adeoque emptor fundi, cui sit adligatum iuspatronatus, illud etiam acquirit *Cap. 13. de iurep.* At *Personale* quamvis vel iure haereditatis, vel donationis in alios transferri possit, tamen cum rei non sit adnexum per solam bonorum emptionem non transit in emptorem.

IX. Qui ergo ex legitimo titulo iuspatronatus habent possunt, atque tenentur intra praefinitum tempus a notitia vacationis idoneam personam in beneficio instituendam Episcopo praesentare sub poena amittendi ius illud pro ea vice, si negligentes fuerint. Vbi notandum occurrat, non posse patronum praesentare se ipsum propter turpe ambitionis exemplum, *Cap. 26. de iurep.* Verum si plures sint patroni, potest unus ab aliis praesentari, & in paritate votorum ceteris nominatis, seu praesentatis praefereendus erit, uti ex rationis aequalitate colligitur

Canonistae ex *Cap. Cum in iure* 33. de *Elect.* ubi idem statuitur de Compromissariis unum ex eorum numero eligentibus; imo etsi unus sit patronus per liberam, & spontaneam institutionem Episcopi, beneficium obtinere poterit, ubi preces eidem Episcopo porrexerit, ut sibi de tali beneficio provideat.

X. Si vero inter patronos de una, eademque persona praesentanda non conveniat, singuli singulas praesentare poterunt, ex quibus una ab Episcopo electa instituitur *Clem. 2. de Iurep.* Si vero fuerit iuspatronatus litigiosum pro tunc praesentandi ius est penes possidentem, quo succumbente, institutus non est beneficio spoliandus *Cap. Cum propter* 27. *cod.* Vbi vero nemo in possessione iuris praedicti reperiatur, praesentet ea vice Episcopus, absque tamen praepiudicio vincentis pro aliis vicibus.

XI. Cum vero Personae per Patronum, vel Patronos praesentatae institutio facienda sit a legitimo Superiore, ideo ad tituli huius complementum breviter dicendum, quis sit superior, ad quem pertinet talis institutio; pro qua re tamen,

XII. Notandum est triplicem apud Canonistas institutionem distingui solere *Collativam*, videlicet, *Authorizabilem*, & *Corporalem*. Prima est Canonica tituli concessio, de qua, ut supra vidimus, loquitur Regula I. iuris in 6. quare collatio etiam, quamvis necessaria a plerisque vocatur. Secunda idem est ac praevio examine adprobatio ad curam animarum. Tertia denique est realis immissio in possessionem beneficii per collativam institutionem obtenti. His notatis.

XIII. Dicendum Institutionem collativam pertinere ad eum, a quo facienda foret libera collatio, si beneficium patronatum non esset. Quare vel ad Episcopum, qui de iure communi ordinarius beneficiorum collator est, vel ex consuetudine, aut privilegio ad alios spectat, ad quos iisdem titulis ius liberae Collationis transire potuit *Trid. Sess. XIV. Cap. 13. de Reform. & Cap. 6. hoc tit.*

XIV. In eo tamen differunt, quod institutio non requirit speciale mandatum in Vicario Generali, quemadmodum Collatio *Cap. Ex frequentibus* 3. *b. t.* Praeterea Institutio peragi potest a Capitulo Sede vacante, etsi ad Episcopum pertineat ex *Cap. unico cod. in 6.* XV.

XV. Institutio autorizabilis nonnisi ab solo Episcopo obtineri potest ex *Cap. 4. de Offic. Archid. & Trident. Sess. VII. Cap. 13. de Reform.* Quare statuitur ibidem *Sess. XXIV. Cap. 18.* ut nemo prorsus, siue praesentatus, aut nominatus, aut electus ad curam animarum instituitur, confirmetur, aut admittatur, nisi praevio examine idoneus fuerit repertus, & ab Episcopo adprobatus.

XVI. Institutio denique corporalis, quae sequela est quasi necessaria institutionis collativae olim ad Archidiaconum ex mandato Episcopi pertinebat, nunc vero iure Decretalium inter propria Archidiaconi munera recensetur *Cap. 7. De Offic. Archid.* Verum sicut Ordinarius Collator potest per se beneficiatum immittere in possessionem, ita potest id alteri demandare. Quare obtinet in praxi, ut id fiat per aliquam Ecclesiasticam personam, praesente Notario, vel Tabellione; aut etiam per Notarium Apostolicum dumtaxat, ut notat Rebuffus in *Prax. Benef. par. 1. de Immis. in Possess.*

XVIII. Formula vero immittendi in possessionem haec est: *Ego auctoritate Domini Episcopi N. & in vim litterarum Collationis ab eo factae induco te in possessionem Beneficii N. & universorum iurium, & pertinentium dicti beneficii*; tumque adhibeantur externa symbola illud significantia, ut ingressus in Ecclesiam, aspersio aquae benedictae, deosculatio Altaris maioris, assignatio stalli in Choro, tactus Missalis, vel Antiphonarii &c. qua de re adhibitis testibus fiat tandem publicum Instrumentum.

T I T V L V S XXII.

De Clericis non Residentibus.

I. **C**Um beneficium nonnisi propter officium concedatur; iure propterea cautum est, ut illi dumtaxat ad Ecclesiastica beneficia promoveantur, qui suis in beneficiis valeant residere, & adnexum eisdem officium per se exercere; quod secus si res processerit, & qui acceperit amittat quod contra fas accepit; & qui dederit, privabitur

tur largiendi potestate *Capp. 3. & 4. h. t.* Si autem qui ad residendum idonei sunt, residere absque iusta causa noluerint, & moniti, intra congruum definitum ab Superiore tempus ad propriam Ecclesiam non redierint Ecclesiasticis censuris, & beneficii privatione sunt puniendi *Capp. 2. 8. 9. 10. & fin. h. t.*

II. Vtcumque vero de omnibus beneficiatis iura loquantur, inter eos tamen illi iure strictiori residere tenentur, qui beneficia habent, quibus animarum cura adnectitur, quales sunt Episcopi, inferiores Praelati, & Parochi; His enim divino praecepto mandatum est gregem sibi commissum pascere, tum administratione Sacramentorum, tum verbi divini praedicatione, quod sane nisi resideant, praestare non poterunt.

III. Quare ex *Trid. Sess. VI. Cap. 1. de Reform.* omnes Episcopi, etiamsi Cardinalatus dignitate praefulgeant, obligantur ad personalem residentiam in sua Ecclesia, vel Diocesi; ab qua abesse non possunt, nisi ex legitimis causis, quales ab ipso Tridentino recensentur, nempe Christiana charitas, urgens necessitas, debita obedientia, & evidens Ecclesiae, aut Reipublicae utilitas. Has tamen causas adprobare debet Romanus Pontifex, vel Metropolitanus saltem, aut eo absente antiquior suffraganeus. Quod si huic decreto contrascentes Episcopi per sex menses ab propriis Ecclesiis absuerint, quarta parte fructuum unius anni, quod si per alios totidem menses in absentia perseveraverint altera quarta parte pauperibus, aut Fabricae Ecclesiae applicanda, privantur. Denique contumacia crescente gravioribus Canonum poenis usque ad privationem Episcopatus, ut supra diximus, a Romano Pontifice erunt puniendi. Ipsi tamen Episcopis concedit laudatum *Trid. Sess. XXIII. Cap. 1.* ut singulis annis per duos, aut tres ad summum menses ab propria Ecclesia abesse possint impune, ex aequa tamen causa, & absque gregis detrimento, quod an ita sit, discedentium conscientiae relinquit.

IV. Quod de Episcopis statuit Tridentinum extendi debet ad alios inferiores Praelatos, & nominatim ad Parochos; quorum absentia, etsi ex causa per Episcopum probata proveniat, bimestre non excedat; nec destituta remaneat Ecclesia idoneo, approbatoque Vicario. Imo ad

ipſos etiam Canonicos Eccleſiarum tam Cathedralium, quam Collegiatarum pertinet idem Tridentini Decretum de reſidentia. Eadem quippe *Seſſ. XXIV. Cap. 12.* ſtatuitur, quod ſi Canonici praediſti ultra tres meſes ſingulis annis abſuerint primo anno dimidia fruſtuum parte priventur, ſecundo omnibus prorsus proventibus, ac ſi adhuc in pertinacia perſeveraverint iuxta Canones puniantur.

V. Sunt tamen quaedam in iure expreſſae cauſae; propter quas Canonici ab reſidentia diſpenſantur. Igitur praeter recensitas ſupra, I. ſi Epiſcopi ſervitio ſint deputati *Cap. Ad audiendam 15. b. t.* II. Si ſtudioſorum cauſa in celebri aliqua univerſitate diverſentur, per quinquennium dumtaxat ad diſcendum, & in perpetuum ad docendum *Capp. 4. & 12. b. t. & Cap. Licet vobis 32. de Praebend.* III. Si periculum aliquod lethale ſive morbi, ſive violentiae ipſis immineat, cit. *Cap. 15.*

VI. Quamvis autem qui ex legitima cauſa non adſunt fruſtus beneficiales non amittant, amittunt tamen diſtributiones quotidianas, quae ſubminiſtrantur in dies iis, qui Eccleſiam colunt, & divinis officiis interſunt ex *Cap. unico b. t. in 6. & laudata Trid. Seſſ. XXIV. cap. 12.* Ab eo tamen Bonifacii VIII. & Trid. Decreto excipiuntur I. Infirmi, Senes, & Valetudinarii. II. Iniuste excommunicati, iniuste in carceribus detenti, vel in exilium aſſi. III. Qui ob evidentem Eccleſiae utilitatem non interſunt. IV. Demum ex ſpeciali privilegio habentur pro intereſſentibus Inquiſitores, & Inquiſitionis Tribunali inſervientes ex *Bulla Innocentii VIII. & Pauli III. Auditores Sacrae Rom. Rotae ex Bulla Clementis VIII. Apoſtolicae Camerae Collectores, Subcollectores, Advocati, Fiſcales, Notarii, & alii inſervientes in cauſis ſpoliorum ex Bulla Sixti V. ſub anno 1590.*



T I T V L V S XXIII.

De Regularibus, & Monachis.

I. **Q**uamvis Regularis nomen proprie, & rigoroſe acceptum magis late pateat, quam Monachi, quod iis dumtaxat Regularibus convenit, qui ex regulari Inſtituto vitae contemplativae in Clauſtris agenda addiſci ſunt; uſus tamen iam obtinuit, ut ipſorum nomina ſaeppiſſime confundantur, & infavorabilibus Monachorum nomine Religioſi quicumque veniant. Pro hac re autem illud maxime nunc obſervandum, quod licet omnes fere textus in Decreto, & Decretalibus ad Regulares ſpectantes loquantur de Monachis, qui tunc temporis ſolli propemodum erant; nihilotamenminus ad Regularium Ordines poſtea inſtitutos in iis ſaltem, quae eſſentialia vocantur, debent extendi. Quemadmodum enim Monachi appellabantur illi, qui procul ſecularium hominum commercio ſolitarii inſerviebant Deo; ita modo Religioſi, ſeu Regulares dicuntur omnes, qui ſpeciali ſunt Religioni addiſci.

II. Eſt autem Religio prout ad rem noſtram facit. *Fidelium ad Chriſtianae vitae, & Charitatis perfectionem tendentium editis votis perpetuae caſtitalis, paupertatis, & obedientiae ſtabilis in communi vivendi modus ab Eccleſia probatur.* Ex qua definitione ſatis apparet in omnibus ſerre, & praefertim in eſſentialibus eadem ſervari iura tam pro Monachis, quam pro ceteris Regularibus. Quapropter de omnibus ſub eodem Monachorum nomine commodè poſſumus ſermonem inſtituere.

III. Monachi itaque ſiunt aut *Parentum oblatione*, aut *propria profeſſione*. Oblatio Parentum, cum Pater impubes Monasterio obſert filios, ut in eo degentes Deo inſerviant; Cuius Oblationis mentio paſſim in iure noſtro occurrit, & ceremonia deſcribitur *Cap. 69. Regulae S. Benedicti*. Quamquam vero per hanc ſolam Parentum Oblationem ita eſſent Monachatuſi adſtricti impubes, ut neque poſt pubertatem poſſent reſilire, *XX. q. 1. Can. 3.* tamen propter ſcandala, quae ex praepropera illa Oblatione orie-

riebantur Patres non improbarunt quidem has oblationes ; sed statuerunt , ut effectum stabilem non fortirentur , nisi filii facti iam puberes oblationi consensissent *Cap. Significatum 11. & Cap. Cum firmus 17. b. 1.* Quo iure attento tria secuntur. I. Impuberes posse legitime in Monasterio recipi. II. Per liberam oblationem parentes amittere patriam potestatem in Filios , quos Monasterio obtulerunt. III. Impuberibus oblatis permittendum non esse , ut regrediantur ad seculum ante annos pubertatis , bene vero post pubertatem adeptam , si ad seculum redire voluerint potius , quam in statu Monastico perseverare .

IV. Quod si impuberes praeter Parentum voluntatem cucullum induerint , id Parentes irritare possunt ; modo tamen intra annum apud proprium Episcopum , aut competentem alium Iudicem reclaimaverint , *XX. q. 2. Can. 1. & Cap. 2. b. 1.* Si vero post pubertatem , mares scilicet annorum quatuordecim , puellae autem duodecim , Monasterium elegerint , non erit parentibus prohibendi potestas . Haec quidem iure veteri inspecto ; modo enim impuberes ex peculiaribus Decretis sine speciali dispensatione ad habitum monasticum recipi non possunt .

V. Secundus , quo quis Monachus fieri potest , modus est propria professio per emissionem trium essentialium votorum , promissionemque Deo in adprobata Religione inserviendi . Haec autem professio duplex est , expressa nimirum , & tacita . Prima est cum vovens vota sua voce , vel scripto , vel actu sufficienter enuntiat , & legitimus Praelatus ei consentit ; aut cum professionem illegitime factam , postea coram legitimo Superiore ratam se habere fateatur . Circa hanc votorum emissionem servanda est cuiuslibet Religionis formula .

VI. Ante Tridentinum ad validam votorum emissionem non erat necessaria habitus susceptio , sed sola professio sufficiebat *Cap. 13. b. 1. &* quamvis exquireretur annuae probationis tempus ex *Cap. 16. cod.* nihilominus ante probationem facta non irritabatur ; cum probatio datur Monacho , aut Monasterio in favorem , cui possunt partes ex communi consensu renuntiare .

VII. Alexander IV. tamen irritas postea declaravit huiusmodi votorum emissiones in Ordinibus Praedicatorum , & Mi-

& Minorum factas *Cap. Non solum 2. b. t. in 6.* Quam declarationem extendit Bonifacius VIII. ad omnes Mendicantes tantum, *Cap. 3. eod.* Nihilque in aliis innovari iussit, nisi quod si quis expressam emisit professionem in eadem Religione perseverare teneatur, si vero tacitam, teneatur tantum in genere alicui Religioni adscribi, non illi speciatim, cuius ingressum petierat. Tridentinum tandem *Sess. XXV. Cap. 15. de Regul.* Alexandri IV. Constitutionem ad omnes prorsus Religiones extendit; statuitque praeterea ad professionis validitatem xvi. aetatis annum expletum requiri; per quod decretum tamen non improbat Ordinum quorundam dispositiones maiorem aetatem requirentes *Cap. 16. ibid.*

VIII. Tacita professio emittebatur antiquitus dum quis adsumendo habitum professorum illum triduo coram Superiore, & aliis gestabat, & eorumdem actibus se immiscebat *Cap. Ad nostram 8. b. t. & Cap. Constitutionem 3. eod. in 6.* si tamen aptae esset aetatis, & sciens, volensque id faceret. Haec quidem tacita professio de iure communi etiam ante probationis annum post pubertatem emissae valida erat; modo autem per Trid. Decretum ad eam quoque aetas xvi. annorum requiritur, & integra annuae probationis periodus *Cap. 19. ib.* Ex hoc Tridentini Capite tacitam professionem emittere censetur ille, qui sciens invalidam emisisse professionem, & potens reclamare, per integrum quinquennium nunquam reclamavit; quia professioni tacite consensisse censetur.

IX. Quamvis de iure communi invalide professus sine scandalo posset ante Iudicis sententiam habitum dimittere; nec ad Monasterium redire compelleretur, nisi causa discussa, atque decisa, ut notant Canonistae in *Cap. 1. de his, quae vi, metusve causa sunt*, declaravit tamen idem Trid. ut nulli id liceat; quod si fecerit reclamans contra professionem non audiatur, sed cogatur ad Monasterium redire, & veluti apostata puniatur. Is itaque in habitu & Monasterio perseverans coram legitimo Superiore causas irritae professionis adlegare debet, illiusque sententiam expectare.

X. Ad Professionis validitatem praeter aetatem & Tridentino statutam, & praevium non interruptum proba-

bationis annum, requiritur etiam quod sit spontanea, & libera, adeoque immunis a metu, qui sit cadens in constantem virum; quod fiat in Religione Apostolicae Sedi adprobata; & quod Monasterii, seu Capituli Monachorum duae ex tribus partibus, aut maior saltem pars consenserint, nisi ex consuetudine, aut privilegio ad solum Ordinis Superiorem spectet votantium receptio.

XI. Praeterea profiteri valide non potest qui sui iuris non est. Hinc servus etiam si professus fuerit restitui debet Domino, ubi illum intra triennium repetat, quo elapso censetur liber per tacitam dimissionem *XVII. q. 2. Can. 3.* Propterea, quod non est sui iuris Episcopus quoque sine Romani Pontificis consensu profiteri non potest *Cap. Licet 18. b. t. & Cap. Nisi cum pridem de renuntiat.* Pariter qui mentis compotes non sunt, ut amentes, furiosi, & similes *Cap. 15. b. t.* & denique qui legitimum Matrimonium contraxerunt, idque fuerit consummatum, nisi consentiente, & ad votum castitatis transeunte altero coniuge; at non item si fuerit tantum ratum matrimonium, quia etiam altero invito poterit Religionem ingredi, & qui in seculo remanserit post illius professionem liber erit ad novas quoque nuptias transire.

XII. Videretur hic agendi locus de origine, progressu, & multiplicitate Ordinum Religiosorum; Verum quia extra rem nostram vagari nimis cogeremur, si vel summis labiis materiem attingere vellem, ideo ad celeberrimos nostri aevi Scriptores rem ex instituto persequentes vos remittere satius esse duxi, et primo Institutionum libro finem imponere.



INSTITVTIONVM


CANONICARVM

LIBER SECVNDVS.



TITVLVS I.

De verum Ecclesiasticarum diuisione .

I.  Vs Canonicum uniuersum circa *Personas*, *Res*, atque *Actiones* versari diximus. Postquam ergo de *Personis* egimus, de rebus tractandum aggredior.

II. Ecclesiasticae quidem res aut *spirituales* sunt, aut *temporales*; Illae animarum salutem immediate respiciunt; hae vero Ecclesiae ipsius usui, & Ministrorum deputantur sustentationi. Inter spirituales quaedam etiam sunt quae sensibus subiiciuntur, & *corporeae* appellantur, cuiusmodi sunt *Sacramenta*, & aliae res *Sacrae*, *Sanctae*, & *Religiosae*. Quaedam vero sensibus non subiiciuntur, sed tantum percipiuntur animo, & *incorporeae* vocantur, ut *virtutes*, & *donn Dei*; necnon etiam, quae in iure aliquo consistunt, quemadmodum *praesentandi* ad beneficia, eadem *conferendi*, fructus ecclesiasticos percipiendi &c.

III. In hoc secundo Libro de corporeis huiusmodi rebus agendum suscipimus; De reliquis vel iam egimus in primo, vel agemus infra suis in locis. Quare sit



T I T V L V S II.

De Sacramentis.

I. Sacramenti vox quamquam varias tum apud profanos, cum apud Ecclesiasticos Scriptores significatio-
 nes habeat, nihilominus iam pridem a Patribus, & hodie passim a Canonistis sumitur ad significandum proprie dictum Sacramentum; quod *Dist. 2. De Consecr. Can. 32.* sub nomine S. Augustini definitur: *Invisibilis gratiae visibilis forma*; licet ea definitio apud Augustinum expressis verbis non legatur, ut ad laudatum Canonem monent Romani Correctores.

Dicitur quidem *visibilis forma*, hoc est sensibilis, seu sensibile aliquod signum simul & causa gratiae invisibilis, quam Sacramentum novae legis digne sumentibus confert ad differentiam Sacramentorum veteris legis, quae significabant gratiam, sed non conferebant.

Addi posset *ex divina institutione* eo, quod novae legis Sacramenta non alium habeant, nec habere possint Auctorem, nisi Deum, cum nullus homo formae visibili, seu exteriori, & sensibili signo gratiam coniungere queat.

II. Prima Sacramentorum divisio ab Gratiano ad *Can. 39. l. 9. 1.* & ad *Cap. 8. de Transact.* ab Canonistis tradi solita, ea est, ut alia *necessaria* dicantur, alia *voluntaria*. Necessaria quinque numerantur, Baptismus, scilicet, Confirmatio, Poenitentia, Eucharistia, Extrema unctio; quae omnia, quia ad particularem cuiusque profectum instituta, sine interitu salutis aeternae praetermitti ex contemptu non possunt. Voluntaria ex opposito appellantur, quae sine salutis dispendio pro cuiusque arbitrio recipi, vel omitteri possunt, quemadmodum Ordo sacer, & Matrimonium, quia ad Ecclesiae totius profectum, & subsidium principaliter spectant.

Dividuntur etiam Sacramenta, ut alia considerentur ordinata *ad ingressum* in Ecclesiam, ut Baptismus; alia *ad progressum* ut Confirmatio, Eucharistia, & Poenitentia; quae etiam *ad regressum* inservire poterit, ut cum per ipsam

psam Ecclesiae restituuntur qui ab ea per haeresim, vel schisma, aut alio modo erant separati; Alia demum *ad egressum*, veluti Extrema Unctio, & Eucharistia dum infirmis per modum Viatici conceditur.

Dividuntur denique a Canonistis Sacramenta in ea, quae *Characterem imprimunt*, & quae *non imprimunt*, ut docemur ex Trid. *Sess. VII. de Sacramentis in genere Can.* 9. Primi generis sunt Baptismus, Confirmatio, & Ordo, & propterea reiterari non possunt; bene vero secundi generis reliqua.

III. Invisibilis gratiae visibilis formas, seu signa plura ad nostram sanctificationem instituisse Christum Dominum, & illa septem omnino esse apud Catholicos recepta, in dubium revocari non potest tum ex certa Ecclesiae traditione, tum ex definitione Tridentini loco laudato *Can.* 1. unumquodque autem eorum duobus constat, *Elemento* scilicet, & *Verbo*. Elementi nomine venit quidquid suo visibili natura invisibilem gratiam designat, & continet; ac sub alio vocabulo *materia* Sacramenti dici solet. Verba autem sunt, quae Sacramenti vim, & efficaciam exprimunt, & solent Sacramenti *forma* vocari.

IV. Haec autem Sacramenti materia est vel *remota*, vel *proxima*; prima est res ipsa sensibilis, ex qua Sacramentum conficitur, aqua v. g. in ordine ad Baptismum; proxima vero est applicatio materiae remotae iuncto per Ministrum facta, v. g. in baptismo ablutio, qua Cathecumeno applicatur aqua.

V. Forma etiam Sacramentorum dividi solet in *absolutam*, & *conditionatam*. Absoluta enuntiat simpliciter Sacramentalem actionem, ut: *Ego te baptizo &c.* Conditionata eandem actionem sub conditione enuntiat, ut v. g. *Si non est baptizatus, ego te baptizo &c.*

VI. Praeter elementum, & verbum ad Sacramenti consecrationem requiritur quoque Minister, cuius actione forma applicetur materiae. Sunt autem Sacramentorum Ministri, vel ordinarii, vel extraordinarii; Ordinarii ex officio, & accepta in Ordinatione potestate iuxta legem a Christo praescriptam Sacramenta faciunt, seu dispensant. Extraordinarii praeter legem ordinariam ad illud munus adsumuntur exercendum.

Vt vero Minister valide, & licite Sacramenta conficiat, requiritur I. intentio faciendi, quod facit Ecclesia ex Concilio Flor. in *Instruct. ad Armenos*, & Trident. *Sess. VII. Can. 2.* quae debet esse vel *actualis*, cum praesenti nimirum mentis attentione; vel saltem *virtualis*, cum ea nimirum mentis attentione, quae orta sit ex actuali mox praecedenti volitione. Requiritur II. ipsius Ministri sanctitas, fides, & legitimum Ministerii exercitium. Verum licet quammaxime deceat Sacramentorum Ministros fideles, & inculpatores esse; tamen si mali fuerint, & a communione Catholica seiuncti, valide nihilominus Sacramenta conficiunt, saltem quae ad sui valorem iurisdictione non indigent, *I. q. I. Can. 77. & seqq.* Qui enim baptizat, qui absoluit, & in singulis Sacramentis operatur Dominus est; Ministri vero Ecclesiae praeter nudum Ministerium nihil sibi possunt vindicare, cum non propriam personam referant, sed eius, qui Sacramenta instituit *Dist. 4. de Consecr. Can. 26. aliisque pluribus tum ibi, tum I. q. 1.* unde eorum immunditia Sacramenta non polluit, aut ipsorum evacuat efficaciam, ut dicitur *Can. 87. eiusdem caus. & quaest.*

VII. Omnium Sacramentorum effectus est *gratia*, ut ex data *Dist. apparet*. Pro qua re notetis velim I. Gratiam aliam esse *actualem*, aliam *habitualement*. Actualis est transiens quidam motus voluntatis, & illustratio intellectus, quibus anima ad pietatis opus excitatur. Habitualis vero est forma quaedam animae permanentiter inhaerens, ipsam sanctificans, Deoque gratiam reddens. Animadvertendum quoque II. est habitualement gratiam aliam esse *primam*, aliam esse *secundam*. Prima dicitur, quae aliam in subiecto non supponit, ut si homini iacenti in peccato mortali conferatur; Secunda est, quae aliam praesupponit in subiecto, ut si homini iusto detur. Observandum III. quandam gratiam esse omnibus Sacramentis communem, quandam vero cuique specialem. Primi generis est habitualis, seu sanctificans; specialis vero est ius quoddam ad auxilia actualia, quae necessaria sunt ad finem cuiusque Sacramenti consequendum.

Omnia itaque Sacramenta gratiam sanctificantem producant vel primam, vel secundam. Primam per se. con-

E

se-

ferunt Baptismus, & Poenitentia, quia homini in lethali peccato iacenti ministrantur, unde Sacramenta *mortuorum* dicuntur. Dixi *per se*, nam per accidens possunt secundam gratiam producere, si nimirum subiectum iam foret in gratia. Cetera Sacramenta per se gratiam secundam producant, & propterea *vivorum* Sacramenta adpellantur. Per accidens autem primam conferre possunt, ut si impius non habens peccati conscientiam, & liber ab eius affectu bona fide, & inculpabiliter Sacramenta vivorum acciperet.

Praeter gratiam sanctificantem singula Sacramenta peculiarem gratiam producant convenientem fini, ad quem ordinantur. De speciali characteris effectu, quem producant Baptismus, Confirmatio, & Ordo Sacer, satis supra locuti sumus. Haec de Sacramentis in genere pro praesenti instituto sufficere possunt; ut autem de singulis quae explicanda sunt aliqua dicamus, sit

T I T V L V S III.

De Sacramento Baptismi, & eius effectu.

I. **P**rimum inter Sacramenta locum obtinet Baptismus; Est enim, ut a Bonifacio VIII. appellatur in *Cap. 2. de Cognat. spirit. in 6.* fundamentum, & ianua reliquorum. Definiri potest: *Sacramentum regenerationis per aquam in verbo*. Dicitur *Sacramentum regenerationis*, quia est signum sensibile divinitus institutum, ut det vitam spiritualem per modum generationis, ad differentiam Sacramenti Poenitentiae, quod eam dat per modum suscitationis a mortuis. Dicitur *per aquam in verbo*, quia aqua, & verbum sunt duae res sensibiles, per quas Deus in Baptismo hominem regenerat.

II. Materia huius Sacramenti *remota* quidem est aqua naturalis tantum exclusive ad quemlibet alium liquorem, qui naturalis aquae nomine non venit, *Cap. 5. hoo tit. & Trid. Sess. VII. de Sacram. in gen. Can. 2.* Proxima vero est actualis ablutio baptizandi, quae ad validi-

ratem sufficiens est sive per *asperersionem* fiat, sive per *infusionem*, sive per *immersionem*.

III: Forma sunt verba a Christo instituta: *Ego te baptizo in nomine Patris, & Filii, & Spiritus Sancti*. Ablutio autem, & formae prolatio debent esse actus contemporanei, & alterutro deficiente invalidum est Sacramentum, *cit. cap. 5.*

IV. Ordinarius huius Sacramenti Minister est omnis Sacerdos cuiuslibet gradus; eiusque Ministerium nec ipsis Diaconis explere est licitum, nisi Episcopo, vel Presbytero procul absentibus, & ex necessitate; qua urgente laicis quoque, & feminis id permittitur *Dist. 4. De Conf. Can. 19.*

Extraordinarius autem Minister est omnis homo ratione praeditus etiam non Orthodoxus, Gentilis, vel Iudaeus, qui dummodo requisitam habeat intentionem, & debitam adhibeat formam, ac materiam valide baptizat *Can. 21. 23. 24. cit. Dist. & passim alibi*; unde sic baptizatos rebaptizare non licet *Can. 108. eiusd. Dist.* Nemo tamen quavis reperiatur in necessitate potest seipsum valide baptizare quemadmodum nemo seipsum generare potest ex Innocentio III. in *Cap. 4. hoc tit.*

V. Quae hactenus diximus ad Sacramenti huius essentiam, & Ministrum spectant, quibus aliquid de Baptismi *subiecto* est subdendum. Omnes itaque homines, qui rationis usu fruuntur cuiuscumque sint sexus, & religionis, huius Sacramenti capaces esse extra controversiam ponit haec Christi Domini sententia: *Docete omnes gentes baptizantes eos in nomine Patris, & Filii, & Spiritus Sancti.*

Illi, de quibus dubitari posset, sunt infantes, amentes, furiosi, alique, qui carent rationis usu. Verum de Infantibus fide Catholica certum est, traditurque diserte ab Innocentio III. in *Cap. Maiores 3. h. 1. &* tandem expresse definitum est a Trid. *Sess. VII. Can. 13.* Qui tamen infantes baptizari non possunt quousque in utero matris fuerint; quia qui natus secundum Adam non est, renasci secundum Christum non potest; Nec enim dici regeneratio illius poterit, quem generatio non praecesserit, *Can. Qui in matris 115. Dist. 4. de Consecr.*

Quoad amentes, furiosos, aegrotantes, & similes; qui aut rationis usum non habent, aut suam non possunt manifestare voluntatem, distinguendum est; Aut enim tales nati sunt, & infantibus comparantur, in quibus Ecclesiae fides, & offerentium intentio sufficit; aut post rationis usum facti, & subdistinguere oportet: vel isti antequam in eum statum inciderent, dum rationis usu fruebantur baptismum petierunt, aut desiderarunt, vel non; si primum, possunt valide baptizari, censetur enim in ipsis perseverare baptismi propositum; secus vero si baptismum non petierint, vel exoptarint, ac multo magis si contrariam exhibuerint voluntatem. Ita Innocentius III. in laudato *Cap. Maiores* §. Ita quaeritur.

Ex hac Innocentii III. doctrina apparet ad validitatem Baptismatis in Adultis requiri veram, & sinceram intentionem, veramque libertatem. Vt enim ibidem dicit, qui nunquam consentit, sed penitus contradicit, nec rem, nec characterem suscipit Sacramenti; ubi tamen observandum est I. in subiecto Baptismi non requiri actuale, nec virtuale, sed habituale sufficere intentionem, ut patet ex dictis de Baptismo amentium, furiosorum, & similium. II. Valide conferri Baptismum adulto ex metu consentienti, dummodo exterius non contradicat *Can. de Iudaeis* §. Dist. 45. ipse enim, ut inquit Innocentius in laudato *Cap. Maiores*, tanquam conditionaliter volens, licet absolute non velit, cogendus est ad observantiam legis Christianae. Praeterea in adultis non quidem ad valide, sed ad licite recipiendum baptismum requiruntur fides, spes & charitas, ex *Trid. Sess. VI. cap. 6.*

VII. Quod attinet ad alteram Tituli partem, Baptismatis scilicet effectum; is duplex est. *Character* nempe, & *Gratia sanctificans*. Character est *signum spirituale indelebiter in anima impressum, quo Christianus ab Infideli distinguitur, & capax redditur aliorum Sacramentorum*. Per gratiam vero sanctificantem deletur Originale peccatum in parvulis, & actualia etiam, si quae sunt, in adultis, & baptizatus ad vitam aeternam regeneratur. Non tamen ex quo quis baptizatur, statim etiam in eo omnis vetus infirmitas per originale peccatum contracta absumitur. Nam quamvis in baptismate plena fiat peccatorum

re-

remissio tum quoad culpam, tum quoad aeternam poenam, remanent tamen temporales quaedam poenae in hac vita, seu *poenalties*, ut concupiscentia, infirmitas corporis, moriendi necessitas, similesque miseriae, a quibus non nisi in alia vita continget plena liberatio *Can. 2. & 127. Dist. 4. De Consecr.* praeter gratiam sanctificantem producit Baptismus aliam specialem consistentem in iure ad *auxilia*, quibus baptizatus Christiani hominis officia exequi possit.

VIII. Praeter Baptismum aquae, de quo hucusque locuti sumus, mentionem facit nostrum Canonicum ius Baptismi *Fluminis*, & *Sanguinis*. Primum est ardens Baptismi desiderium coniunctum cum fide, & cordis per charitatem conversione ad Deum; quod sane votum ubi Baptismus Fluminis haberi non possit, illius defectum supplet *Can. 34. Dist. 4. de Consecr. & Cap. 8. de Presbytero non baptiz.* Baptismus vero sanguinis est martyrium, quo quis pro Christi fide, morte tolerata, proprio sanguine abluitur, antequam prae angustia temporis baptismi aquae fuerit regeneratus. Hoc baptismi genere hominem integre, & perfecte regenerari non est dubium *Can. 34. laud. & Can. 37. eadem.*

T I T V L V S IV.

De Sacramento Chrismatis.

I. OMNES Fideles per manus impositionem Episcoporum Spiritum Sanctum post Baptismum recipere debent, ut plene Christiani inveniantur *Can. 1. dist. 5. de Conf.* Postquam ergo de Baptismo egimus, de Chrismatis Sacramento verba sunt nobis facienda, quia per hoc ea Christianae fidei plenitudo, & Spiritus Sancti abundantia confertur.

Quare satis recte definitur: *Sacramentum novae Legis, quo praeter charactrem, & gratiam sanctificantem datur ius ad auxilia specialia, quae necessaria sunt, ut quis fidem intrepide consteatur.* Hoc Sacramentum etiam

Confirmatio passim appellatur, quia eius ope in fide accepta per baptismum, confirmamur.

II. Eius materiam duo constituunt, *manuum* scilicet *impositio*, atque *Chrismatis in fronte unctio*. De prima fit expressa mentio *Astor. VIII.* & in iure nostro *Can. 1. 4. 5. aliisque Dist. 3. de Consecr.* ubi per impositionem manus Episcopi, Spiritum Sanctum dari adseritur, & propterea hoc Sacramentum *impositionis manus* etiam appellatur. De altera vero fidem faciunt veteres Patres, & Concilia eidem illi unctioni adscribendo gratiae sanctificantis productionem. Et Innocentius III. *Cap. unic. de S. unctione* eam tanquam huius Sacramenti materiam agnoscit.

Chrisma autem quo frons confirmandi inungitur, conficitur ex oleo olivarum, & balsamo admixtis, consecraturque ab Episcopo.

III. Forma pariter constituitur per verba utramque materiam concomitantia, per *Orationem* scilicet, qua Episcopus extensis versus confirmandos manibus immediate ante unctionem invocat in eos Spiritum Sanctum, & per ea, quae dum ungit pronunciat: *Signo te signo Crucis, & confirmo te Chrismate salutis in nomine Patris, & Filii, & Spiritus Sancti.*

IV. Ex effectibus, quos confirmatio producit, gratia sanctificans, & Character communes sunt aliis quoque Sacramentis; Specialis vero illius est ius ad auxilia specialia ad intrepidam fidei confessionem, & pugnam contra invisibiles hostes, cum quibus in hac vita praeliandum est; ut enim dicitur *Can. 2. Dist. 2. de Cons.* Baptismus per se salvat nos in pace beati seculi recipiendos, confirmatio vero instruit ad agones huius mundi sustinendos, & quemadmodum per baptismum abluiamur, ita per confirmationem roboramur.

V. Denique Sacramenti huius Ordinarius Minister est solus Episcopus *Can. 4. Dist. 3. De Cons. & Cap. unic. de S. unctione*. Extraordinarius vero ex delegatione Summi Pontificis simplex Sacerdos, nec alius inferioris Ordinis, ita Covarruvias *lib. 1. Cap. 1. variar. & alii*.

TITVLVS V.

De Poenitentiis, & Remissionibus.

I. **M**ultiplex misericordia Dei ita lapsibus subvenit humanis, ut non solum per Baptismi, & Confirmationis gratiam, sed etiam per Poenitentiae medicinam spes vitae repararetur aeternae; ut qui regenerationis donum violassent, proprio se iudicio condemnantes, ad remissionem criminum pervenirent, ut habetur *Can. 49. Dist. I. de Poenit.* Quare Patres, & Concilia poenitentiam appellaverunt secundam post naufragium tabulam, & Baptismum alterum, sed laboriosum.

Poenitentia sumpta prout constituit unum ex septem Ecclesiae Sacramentis recte describitur *Can. 40. ib.* ut ex sit: *Quae in corde contritionem, confessionem in ore, & totam in Opere humilitatem operatur; Quae sane descriptio bene consonat definitioni apud Theologos passim receptae: Poenitentia est Sacramentum, quo lapsis post baptismum contritis, confessis, & satisfacere proponentibus absolutio a peccatis impenditur.* Dicitur *Sacramentum*, quia est signum sensibile a Christo institutum ad gratiam sanctificantem producendam, ut definit Trid. *Sess. XIV. Can. I.* Dicitur *Lapsis post baptismum*, quia hi sunt subiectum, cui istiusmodi Sacramentum est applicabile. Dicitur *contritis, confessis, & satisfacere proponentibus*, quia tales requiruntur conditiones ad eius valorem, & effectum. Dicitur *dum impenditur absolutio*, quia ex eo potissimum Poenitentia ab aliis Sacramentis discriminatur, quod licet omnia gratiam sanctificantem producant; sola tamen poenitentia id praestet per modum actus iudicialis.

II. Huius Sacramenti materia sunt actus poenitentis, contritio scilicet, confessio, & satisfactio, quibus tamquam partibus constat poenitentia, ut docet Trid. *Sess. XIV. Cap. 3.*

Contritio autem nihil est aliud, quam *animi dolor & detestatio de peccato commisso cum proposito non peccandi de cetero*, ex *mod. Trid. ib. Cap. 4.* Ut vero haec mate-

ria sit huius Sacramenti, requiritur I. ut sit *vera*, hoc est, ex corde prodacatur, & procedat. II. ut sit *super-naturalis*, cum disponat ad iustificationem, quod nulli profecto naturali actui convenire potest. III. ut sit *summa appetitive*, hoc est Poenitens sit ita dispositus, ut pro nullo commutabili bono amplius peccare velit. Denique ut sit *universalis*, se extendat nimirum ad omnia peccata mortalia, quae post diligens examen, memoriae occurrunt; quaeque omnia secundum numerum, & speciem Poenitens confiteri tenetur.

Dividitur contritio in *perfectam*, & *imperfectam*. I. Ia est, quae concipitur ex motivo charitatis Dei in gradu intenso, seu quae coniunctam habet perfectam charitatem. Imperfecta contritio subdividitur, ut alia sit, quae oritur quidem ex motivo charitatis Dei super omnia, sed minores habet, ac prima, charitatis gradus; unde ratione motivi perfectissima est, imperfecta tamen ratione intensiōis. Altera vero est imperfecta etiam ratione motivi, quatenus concepta tantum ex consideratione turpitudinis peccati, aut ex gehennae metu; de qua an sufficiat ad gratiam in Sacramento Poenitentiae impetrandam dubitatur apud Theologos.

III. Confessio Sacramentalis, quae est altera huius Sacramenti materia definitur: *Accusatio propriorum peccatorum Sacerdoti facta, ut eorum remissio virtute Clavium obtineatur*. Confessionis huius materia duplex est, altera *necessaria*, altera vero *libera*, ut habetur ex Tridentino *Sess. XIV. cap. 5*. Necessaria, sunt peccata lethalia omnia post baptismum commissa, quae Deo inimicos, filiosque irae homines reddunt. Libera sunt peccata venialia, quae hominem a Dei gratia non excludunt. Haec sane licet recte, & utiliter in confessione aperiantur, taceri tamen citra culpam possunt, multisque aliis expiari remediis, ut ex cod. Trid. *ib.*

IV. Tertia denique Poenitentiae pars saltem integralis est satisfactio, seu iniuncti a Sacerdote operis executio, quae nihil est aliud, quam quaedam *iniuriae Deo illatae compensatio*. Nullus enim sibi debitae gravioris poenae accipit veniam, nisi qualemcumque etsi longe minorem quam debeat solverit poenam *Can. 42. Dist. I. de*

Poe.

Poenit. Nec sufficit a praeteritis malis recedere, nisi etiam de iis, quae facta sunt, satisfiat Deo per poenitentiam *Can. 53. ib.*

V. Forma Sacramenti Poenitentiae verba sunt, quae a Sacerdote auditis poenitentium peccatis, proferuntur, scilicet: *Ego te absolvo a peccatis tuis in nomine Patris, & Filii, & Spiritus Sancti*; in qua quidem forma certissimum est verba illa, *absolvo te* esse de essentia; Reliqua vero non ita.

VI. De huius Sacramenti effectu non est opus ut speciatim differamus; satis enim ex dictis patet esse peccatorum remissionem, & gratiam sanctificantem, qua homo, qui per peccatum ab iustitia, & amicitia Dei deciderat, iustificatur, & Deo restituitur; necnon ius etiam ad auxilia specialia, quibus homo peccata, & eorum occasiones sibi caveat, Deoque pro admissis satisficiat.

VII. Superest ad complementum primae huius Tituli partis, ut aliquid de Ministro dicamus. Hic itaque ut declarat Synodus Tridentina *Sess. XIV. Cap. 6.* solus Episcopus, & Sacerdos esse potest, ad quos dumtaxat diriguntur illa Christi Domini verba *Io. XX. Quorum remiseritis peccata remittuntur eis*. Praeterea cum absolutio sit actus iudicialis, & fungi iudicis munere nequeat, qui iurisdictione caret; ideo simplices Sacerdotes licet Ordinis potestatem habeant, tamen nisi habeant etiam aut ordinariam, aut saltem delegatam, iurisdictionem, nec licite, nec valide extra casum necessitatis ex *Trid. Sess. XIV. Cap. 7.* poenitentes absolvere possunt. Imo qui generaliter ad fidelium Confessiones audiendas adprobati sunt, nihil possunt in reservatis citra necessitatem, mortis v. g. imminentis periculum *Cap. 2. de Poenit. in 6. & Trid. loco mox laudato*.

VIII. Quod spectat ad alteram Tituli partem, scilicet ad remissiones, brevissime dico operis remissionem aut stricte fieri per eius condonationem, aut latius per commutationem. Per commutationem fit cum Sacerdos non imponit Poenitenti poenas sancitas in Canonibus poenitentialibus, quorum Catalogus ad calcem Gratiani Decreti habetur, sed illam in aliam commutat leviolem, aut publicam, aut secretam, prout ei visum fuerit expedire iuxta *Trid. Sess. XXIV. Cap. 8. de Remiss.* Re-

Remissio vero per condonationem fit, quando poenitens liberatur absolute ab onere agendi poenitentiam temporalem, quae illi iuxta receptum Ecclesiae morem pro peccatis vel imposita est, vel esset imponenda, quae remissio appellatur *indulgentia*, *Cap. 4. b. t. & 3. cod. in 6.*

Indulgentiae autem, quas posse Ecclesiam concedere hic suppono, aliae sunt *totales*, seu *plenariae*, aliae *partiales*. Partiales relaxant partem operis iniuncti, vel iungendi, ut si concedatur indulgentia septem annorum, sensus est remitti poenitentiam, quae alias per illud temporis spatium esse peragenda.

Plenaria vero omnem poenam peccatis debitam relaxat. Plenarias indulgentias solus Romanus Pontifex concedere potest *Extrav. 2. int. Comm. b. t.* Partiales, etiam Episcopi, quibus Innocentius III. *Cap. 14. b. t.* indulget ut in Dedicatione Basilicae indulgentiam unius anni, & in Anniversario eiusdem, quadraginta dierum possent clar-
giri.

T I T V L V S VI.

De Eucharistia.

1. **E**Vcharistia vox graeca est, quae latine *gratiarum actionem* significat. Ita vero hoc Sacramentum appellatur, quod Christus illud instituens, gratias egerit Patri. Definitur: *Sacramentum Corporis, & Sanguinis Christi sub speciebus panis, & vini ad spiritualem fidelium nutritionem a Christo Domino institutum.* Et recte quidem, quia *species panis, & vini*, sub quibus continetur verum Corpus, & Sanguis Christi, sunt signum sensibile, quo gratia sanctificans significatur, & producit. Datur vero, & accipitur hoc Sacramentum per modum *alimenti*, quia quod praestant corporibus alimenta, id animae quoque Eucharistia.

Quod igitur in ea Sacramenti rationem habet non sunt solae species panis, & vini, sed *Christi Corpus, & Sanguis*, non quidem in se absolute, sed quatenus *sub dictis spe-*

speciebus continentur, alias quippe non haberetur signum sensibile. Hinc iure Tridentinum *Sess. XIII. Cap. 5.* huic Sacramento *latrinae* cultus adseruit, qui solis speciebus non convenit.

II. Huius Sacramenti duplex est materia, quemadmodum, & forma. Materia sunt *panis triticeus*, & *vinum ex uvis expressum*, cui modica admisceri debet aqua, non quidem necessitate Sacramenti, sed praecepti dumtaxat *Can. 1. 2. 3. 4. aliisque Dist. 2. de Conf.*

Panis sive fermentatus sit, sive azimus sufficiens est, & apta Sacramenti materia: quia tamen unusquisque tenetur disciplinam Ecclesiae suae custodire, ideo Sacerdos qui in latina Ecclesia fermentato uteretur graviter peccaret, ut ex *Cap. fin. de celeb. Missa* concludunt Canonistae.

Ad utriusque materiae consecrationem requiritur I., ut sit praesens Sacerdoti, & quasi prae manibus. II. Ut non sit corrupta, quia si corruptio eiusmodi fuerit, ut immutata substantialiter appareat materia, invalida etiam erit consecratio. III. Ut sit ad usum alimenti; unde farinae conspersio, vel quae vulgo *pasta* dicitur, sicut uvarum grana, & vinum congelatum apta materia non sunt ad consecrationem; & nisi urgente necessitate mustum licite consecrari potest *Can. 7. Dist. 2. De Consecr.*

III. Forma vero sunt verba Salvatoris, quibus in ultima coena Sacramentum hoc confecit, scilicet respective ad panem: *Hoc est enim Corpus meum*; respective ad vinum haec alia: *Hic est Calix Sanguinis mei &c.* Animadvertatis hic obiter velim Eucharistiae Sacramentum duplex non esse, quamvis duplici constet materia, & forma, quia ad multiplicitem Sacramenti non sufficit multiplicitas partium, sed finium quoque requiritur specie diversorum; in Eucharistia autem unus finis est, spiritualis nempe refectio.

Actio, qua duplex haec forma duplici praefatae materiei applicatur, dicitur *consecratio*; quod nomen hic denotat substantiae panis, & vini totalem conversionem in substantiam Corporis, & Sanguinis Christi *Can. 55. Dist. 2. & Trid. Sess. XIII. Cap. 4.* Quae conversio ab Ecclesia Catholica *Transubstantiatio* adpellatur.

IV. Quae huc usque diximus Eucharistiam explicant, quae

quatenus est Sacramentum, quia vero est etiam sacrificium, ideo sub hac ratione de ea nonnulla sunt vobis dicenda. Pro quo.

Notandum est sacrificium stricte sumptum definiri: *Oblationem externam soli Deo factam, qua in testimonium illius supremi dominii a legitimo Ministro res aliqua sensibilis ritu mystico consecratur, atque immutatur*. Dicitur *Oblatio externa*, ex actione Ministri offerentis. Dicitur *soli Deo facta*, quia cum fiat in protestationem supremi dominii, nonnisi soli Deo convenit. Dicitur *a legitimo Ministro*, quia non ad omnes pertinet sacrificium offerre, sed tantum ad eos, qui ad id muneris a Deo sunt destinati. Dicitur *rei sensibilis*, quia cum homines sint corpori ad publicas actiones sensibilibus rebus utuntur. Dicitur *ritu mystico consecratur*, quatenus ex profana fit sacra. Dicitur etiam *atque mutatur*, hoc est aut physicam, aut mysticam saltem patitur transmutationem.

Haec autem omnia in Missae sacrificio habentur. In eo enim ab legitimo Ministro offertur Deo in protestationem eius supremi dominii hostia sensibilis, nempe Christus Dominus sub speciebus panis, & vini. Praeterea hostia oblata transmutatur, quia quamvis sub utraque specie totus Christus sit realiter, in consecratione tamen ex *vi verborum* sub speciebus panis venit solum Corpus, & sub speciebus vini solus Sanguis; unde mystica habetur separatio sanguinis a corpore, & consequenter mystica hostiae oblatae mactatio; imo in adsumptione etiam consumatio.

Hoc sacrificium, quod tantum praestat veteris Legis sacrificiis, quantum res ipsa excellentior habetur sua figura, est simul *Latreuticum*, *Eucharisticum*, *Propitiatorium*, & *Impetratorium*. Latreuticum, quia per eius celebrationem patriae cultus Deo tribuitur. Eucharisticum, quia in eo pro acceptis per Christum beneficiis gratias Deo agimus. Propitiatorium, quia per Eucharistiae Sacrificium Deus nobis placatur; unde pro peccatis, poenis, & satisfactionibus simul pro vivis, ac defunctis nondum plane purgatis rite illud offertur. Impetratorium denique, quia per ipsum Deum movetur ad conferenda nobis actualia auxilia, quibus ad continuam contra vitia pugnam instruamur.

V. Quod

V. Quod attinet ad Eucharistiae conficiendae Ministerium, is non alius esse potest, quam solus Sacerdos ex Trid. *Sess. XXII. Cap. 1. & Can. 2.* Cui soli de iure divino incruentum hoc sacrificium offerre licet, & competit. Hinc quamvis in ordine ad dispensationem Eucharistiae alii possint adsumi extraordinarii Ministri, & praefertim Diaconi iuxta *Can. 18. Dist. 93.* tamen Eucharistiam conficere quocumque in casu nemo potest, nisi solus Sacerdos.

VI. Subiectum vero huius Sacramenti sunt omnes fideles, qui cum ad annos discretionis pervenerint ex Conc. Lateranensi sub Innocentio III. relato in *Cap. Omnis utriusque sexus 12. de Poenit. & Remiss.* & ex Trid. *Sess. XIII. Can. 9.* saltem singulis annis in Paschate, quemadmodum & proprio Sacerdoti confiteri tenentur. Nullus itaque fidelis ab huius Sacramenti perceptione regulariter loquendo est arcendus.

Dixi *regulariter &c.* nam sunt aliqui, quibus Eucharistia non conceditur; & I. quidem infantibus iuxta praesentem Latinae Ecclesiae disciplinam, quamvis olim statim post collatum baptismum ipsa etiam Eucharistia porrigeretur, nulla tamen id exigente necessitate ex Trid. *Sess. XXI. cap. 4.* II. Furiosis, amentibus, energumenis, ceterisque rationis usu destitutis, nisi aliquibus temporis intervallis, cum videlicet ratione utentes debita cum reverentia illam accipere possunt. III. Ex *Can. 95. Dist. 2. de Conf. Scenicis, histrionibus, & huius generis aliis, qui iure etiam civili infames reputantur leg. 2. ff. de iis qui notantur infamia*, nisi a suo eiusmodi exercitio destiterint. His quoque adcenferi debent publici Peccatores, uti usurarii, concubinarij, & similes. Sanctionis huius ratio adsignatur in laudato Canone, quia Evangelicae legis pudor non permittit huiusmodi actibus indulgere.

VII. Eucharistiae denique effectus praeter ea, quae de eadem, quatenus sacrificium est, diximus, sunt gratia sanctificans *secunda*, quam per se digne fumentibus confert, indirecta peccatorum venialium remissio, & praeservatio a mortalibus, quatenus dat ius ad specialia auxilia tum ad exercendos charitatis actus, quibus venialia delentur, tum ad resistendum tentationibus ad graviora excitantibus.

V6

Vt vero quis tanto Sacramento digne communicet, ita in omnibus dispositus esse debet, ut nullius sibi conscius sit peccati lethalis, quod, sacramentali confessione praemissa, non deleverit; idque etiam a Sacerdotibus, quibus ex officio incumbit celebrare, servari vult Tridentinum *Sess. XIII. cap. 7.* dummodo non desit illi copia Confessarii. Corpore etiam ita dispositus esse debet, ut extra casum necessitatis, idest infirmitatis, propter quam mortis periculum immineat, ieiunus sit a media nocte diei praecedentis, *Can. 54. Dist. 2. de Consecr. & Can. Nihil 7. q. 1.*

T I T V L V S VII.

De Extrema Unctione.

I. **E**Xtrema Unctio Sacramentum est, quod, quia ex-
untibus ab hac vita datur, Canonistae ad egressum nominant. Estque Sacramentum, quo graviter aegrotans certis in partibus Corporis ad peccatorum remissionem, & virium robur, oleo solemniter inungitur; per quam exteriorem Corporis unctionem interior in anima coelestis gratiae unctio significatur, *Cap. unic. de S. Unctione*, *Trident. Sess. XIV. Cap. I. de Extr. Unct.* & *Catechismus Cap. 5. & 7. par. 2. de Sacram. Unct.*

II. Sacramenti huius materia remota est oleum ex olivis expressum, quod semel in anno benedicitur, seu consecratur ab Episcopo inter Missarum solemnia feria V. in Coena Domini, & oleum infirmorum adpellari consuevit. Oleum hoc singulis annis Parochi accipiant oportet, cum sine ipso hoc Sacramentum administrare prohibeantur; possunt tamen ei deficienti aliud non consecratum in minori portione admiscere *Cap. Quod in dubijs 3. de Consecr.* Materia vero proxima est actualis infirmi unctio; Partes vero, quae inungi debent, sunt quinque sensuum organa, oculi nempe, aures, nares, labia, manus, planta pedis, & virorum respectu, renes quoque si commode possint: Vnius etiam partis dumtaxat sufficit unctio ad validitatem,
& li-

& licita est, quando omnes inungi morbi violentia non patitur.

III. Forma sunt verba a Ministro Corpus infirmi inungente prolata, scilicet: *Per istam sanctam unctionem, & suam piissimam misericordiam indulgeat tibi Deus quicquid per visum, vel auditum &c. deliquisti*, ex Trid. Syn. ibidem.

IV. Minister Sacramenti Vnctionis est Episcopus, & Parochus, vel etiam simplex Sacerdos licet regularis urgente necessitate *Clem. I. de Privilegiis*.

V. Ad subiectum quod attinet, ex Eugenii IV. Decreto pro Instructione Armenorum, nonnisi infirmis de cuius morte timetur, hoc Sacramentum administrari debet; uti finis illius institutionis commendare videtur apud S. Iacobum in eius *Ep. Cathol. cap. 5. & Trid. lococit. cap. 1.*

Ex praesenti Latinae Ecclesiae disciplina infantibus, & pueris etiam ex hac vita migraturis administrari non debet, cum numquam peccasse existimentur; imo neque amentibus a nativitate, aut iis, qui rationis usu gaudentes, numquam illius desiderium ostenderint cum aegrotarent ex *Catech. cap. 19. ib.* neque iis demum, qui Eucharistiam nondum sumpserint ex eodem *Catech.* Quare capite damnatis concedi nequaquam debet, nisi ex morbo, brevi morituris.

VI. Cum Characterem non imprimat hoc Sacramentum reiterari poterit, quoties infirmi post acceptam unctionem convaluerint, & iterum in aliud vitae discrimen inciderint, ex laudato *Trid. Cap. 3.*

T I T V L V S VIII.

De Sacramento Ordinis.

I. **P**ost Sacramenta, quae a Canonistis Gratianum secus
tis *necessaria* adpellantur, ea veniunt, quae *voluntaria* ab ipsis dici solent, Ordo scilicet, & Matrimonium.
De primo hic, de alio infra a nobis agendum est.

Or

Ordo definitur; *Sacramentum novae legis, quò potestas spiritualis confertur ad ea, quae tum ad confessionem, tum ad distributionem Eucharistiae pertinent.* Dicitur *Sacramentum*, & vere est, quia verbis & signis exterioribus constat, & gratiam sanctificantem producit, ut Patrum consensus, traditioni, & scripturae innixa Tridentina Synodus definivit *Sess. XXIII. cap. 3. de Sacram. Ordinis.* Dicitur quo *Potestas spiritualis* confertur, per quae verba exprimitur differentia Sacramenti huius ab aliis, cum nonnisi Ordo eam potestatem conferat; dicitur *ad ea quae tum ad confessionem, tum ad distributionem &c. ad significandum*, quò potestas per Ordinem collata feratur; nullus enim in partieuulari est Ordo, qui ad illa duo aut mediate, aut immediate perficienda non sit institutus, ut apparet ex officiis adnexis singulis Ordinibus.

Et quidem cum multiplex sit Altaris Ministerium, multiplex quoque in Ecclesia agnoscitur Ordo ex *Trid. Sess. eadem Cap. & Can. 2.* ubi septem enumerantur; quorum alii *maiores*, & *sacri* appellantur, quia proximius per eos Altari ministratur, & sunt Sacerdotium, Diaconatus, & etiam ex Ecclesiae dispositione Subdiaconatus, *Can. 4. dist. 60. & Cap. 9. de Aet. & qual. Ordinand.* Alii *Minores*, ut Officiarius, Lectoratus, Exorcistatus, & Acolytatus.

II. An autem singulis recensitis Ordinibus ratio proprie dicti Sacramenti conveniat, disputant Theologi, cum id nonnisi de *uno Sacerdotio* certum de fide sit ex *Trid. loc. cit.* Omnes tamen, & singuli suam propriam materiam, suamque propriam formam habent. Materia est illud per cuius *traditionem* confertur Ordo, forma vero *verba materiam concomitantia* ex Conc. Flor. in Decreto *Vinionis §. Sextum Sacramentum.* Hinc quia per Sacerdotium datur Ordinato potestas in Corpus Christi verum, & in Corpus mysticum, materia est patenae cum pane, atque Calicis cum vino porrectio, & manus Episcopi impositio. Forma vero: *Accipe potestatem offerendi sacrificium Deo, Missasque celebrandi tam pro vivis, quam pro defunctis; & Accipe Spiritum Sanctum, quorum remiseris peccata, remittuntur eis, & quorum retinueris retenta sunt.* Ita Diaconatus per *signum* impositionem, & per traditionem

nem Libri Evangeliorum perficitur; Subdiaconatus per eam Libri Epistolarum, & verbis materiam concomitantibus. Sic de singulis aliis. Nam Accolytho traditur Ceroferarium, & urceolus vacuus: Exorcistae liber exorcismorum; Lectori Liber Lectionum; & Oſtiario Ecclesiae claves porriguntur, quae omnia eorum peculiare munus exprimunt, quemadmodum verba ab Ordinante prolata.

III. Ad Ministrum Ordinantem quod attinet, quamvis receptissima sententia sit ex commissione Summi Pontificis concedi posse simplici Sacerdoti, & multo magis habenti usum pontificalium facultatem conferendi primam Tonsuram, & etiam minores Ordines; Ordinatio tamen Presbyteri ita spectat ad Episcopum, ut neque ex ipsius Pontificis dispensatione praestari a simplici Sacerdote possit. Quare Sacerdotium nonnisi ab Episcopo valide conferatur. Vt vero etiam licite conferatur iuxta Ecclesiasticas Sanctiones proprius ordinandi Episcopus sit oportet *Dist. 71. & 72. Cap. 12. de Temp. Ord. Can. 44. Conc. III. Cartag. Can. 24. Rom. VI.* Episcopus proprius de iure communi is censetur, in cuius Dioecesi quis natus est, vel baptizatus *Can. ult. Dist. 28.* etsi ibidem contingenter sit natus *Cap. Cum nullus de Temp. Ord.* dummodo ibi Parentes domicilium constituerint, vel postea ipse sibi acquisierit, vel beneficium obtinuerit ex *Concil. Arausic. Can. 8. & 9. Cap. Cum nullus cit. Trid. Sess. XXIII. cap. 16.* Pro hac tamen re hodie observari omnino debent, quae specialiter declaravit Innocentius XII. in sua Bulla *Speculatorum* 6. Novemb. 1694.

IV. Huius Sacramenti subiectum de iure divino est omnis homo masculini generis, dummodo sit baptizatus *Cap. 1. & 2. de Presbyt. non bapt.* cuiuscumque aetatis; & conditionis *Cap. unico de Clerico per saltum Ord.* De iure autem Ecclesiastico requiritur legitima aetas unicuique Ordini a Tridentino praescripta, *ib. Cap. 12.* sufficiens scientia *Can. 1. Dist. 36. & eod. Trid. Cap. 4.* bonae vitae testimonium *Cap. Ex tenore 4. de Temp. Ord.* Immo si a Papa ad inferiores ordines fuerit promotus nequit ab alio Episcopo ad maiores promoveri *Cap. 12. eod.* & si fuerit Monachus invito proprio Abbate ordinari non debet *Cap. Ad aures eod. & Epist. 18. Lib. VII. D. Gre-*

gorii Magni, & apud Ant. Aug. in Epit. tit. XVIII.

De eodem iure Ecclesiastico exigitur competens Titulus, seu Ecclesia, cui mancipari debeat *Diff. 71. per totam Can. 6. Chalced.* apud Photium in Nomo-Canone Tit. 33. cap. 3. de *Praeb. & Cap. Si Episcopus eod. in 6.* Hodie tamen ex communi Canonistarum sententia ad *Cap. 4. de Praeb. & ex Can. 6. Concilii Biterren.* pro istiusmodi titulo satis est Patrimonium, quod tamen ex *Trid. Sess. XXIII. Cap. 2. de Reformat.* recognosci, & probari debet a proprio Episcopo, utrum congruae Ordinandi substitutioni correspondeat.

Ne ergo, super his, quae in Ordinandis ius nostrum requirit, fraus locum habeat, statuitur ne Episcopus alienum subditum ordinare audeat, nisi suum fecerit per triennalem servitii familiaritatem, absque litteris dimissoriis commendatitiis, seu *reverendis Diff. 71. cit. Cap. Significasti de off. Arch. & laud. Bulla Speculatores.*

Ex *Can. 10. Concilii Sardic.* necessaria quoque est gradatio in Ordinum Collatione sub poena suspensionis, a qua tamen potest Episcopus dispensare, si irregularitatem per suscepti Ordinis exercitium non contraxerit *Ordinatus ex Trid. Sess. XXIII. cap. 14. & dummodo suppleatur quod omisum fuit Cap. unic. De Clerico per saltum prom. Can. 1. Diff. 52. & Can. 2. Diff. 59.* Imo certo tempore quis debet in inferiori Ordine ministrare, antequam ad altiorem promoveatur *Can. in singulis Diff. 77. & Can. Monachos XVI. q. 1.*

De huiusmodi interstitiis licet varia olim vigeret disciplina, hodie tamen iuxta *Trid. Sess. XXIII. Cap. 11. minorum Ordinum interstitia Episcopi arbitrio remittuntur; Maiorum vero unius anni Ecclesiastici periodo absolvi debent, vel minori etiam tempore, si Ecclesiae necessitatem id exposcere Episcopus iudicaverit ex eod. Trid. cap. 13. dummodo non eodem die, vel duobus diebus eodem continuato ieiunio plures conferantur ex Cap. Litteras 13. de Temp. Ord. his tamen legibus solutus est Romanus Pontifex Cap. Super eo eodem titulo.*

Denique requiritur ut debitis temporibus Ordines conferantur. Minores quidem singulis diebus Dominicis, aliisque festis per annum occurrentibus, & Tonsuram qua-
li-

libet etiam die feriali conferre possunt Episcopi; Sacros autem nonnisi in quatuor anni temporibus, Sabbato *Sancto*, & Sabbato *Silentes Dis.* 73. per totam, & *Capp.* 3. & 16. de *Temp. Ord.* uti etiam *Cap.* 2. reprobatur opposita consuetudo. Ordinans Episcopus si huiusmodi tempora non attenderit a Collatione suspenditur *Cap.* 8. *cod.* Sed non ipso facto; nam licet id statuatur in Bulla Sisti V. quae incipit, *Sanctum*, & *salutare*, eam tamen in iis, quibus Bullam Pii II. extendebat, ad terminos iuris revocavit Clemens VIII. in sua Constitutione, quae incipit *Romanum Pontificem*. Ipse Ordinatus vero a suspensione ipso iure incurrenda non absolvitur.

V. In praesenti Titulo ne verbum quidem peculiari-ter feci de Episcopatu, & Prima Tonsura; quia licet proprias habeant materias, propriasque formas, tamen distinctos ab aliis non constituunt Ordines. Nam ille perficit dumtaxat, & extendit quodammodo Sacerdotium tribuendo potestatem confirmandi, & ordinandi. Tonsura vero est dispositio tantum ad Ordines, quatenus per ipsam Tonsuratus ab statu laicali segregatur, & adscribitur clericali, *Cap.* Cum contingat de aetate, & qualis, *Ordin.*

Illud unum adnotetis velim respectu praesertim Episcopatus, non esse nimirum confundendas ceremonias, quae in illius collatione exercentur cum essentialibus, quae omitti nequaquam possunt sine praepudicio ipsius substantiae. Sic v. g. manuum impositio ad materiam, & verba illam concomitantia ad formam omnino spectant. Unctio Sacra ad ritum, & trium Episcoporum praesentia ad decentiam. Quare si aliquid materiae aut formae omissum fuerit irrita erit Episcopi consecratio; At si huiusmodi unctio non adhibetur satis erit si postea supplicetur *Cap. Vnico de S. Vnct.* & necessitate urgente per unum Episcopum licita quoque habebitur Episcopi ordinatio, ut notant Balzamon, & Zonaras in *Can. 1. Apostolicum*.

T I T V L V S IX.

De Matrimonio.

I. **M**atrimonium, de quo in praesenti, & subsequenti-
bus agemus titulis duplicem habet rationem, Con-
tractus videlicet civilis, & Sacramenti. Ad primam ratio-
nem utique spectant & quotquot ante Evangelium contra-
hebantur, & quotquot contrahuntur modo apud Infideles.
Quatenus ergo est Sacramentum, & apud Christianos con-
trahitur, consistit praesertim in viri, & mulieris marita-
li coniunctione exprimente unionem Christi cum Ecclesia,
& definiri commode poterit: *Signum sensibile gratiae col-
latae mari, & feminae legitime copulatis ad individuum
vitae consuetudinem perpetuo ducendam.*

De materia huius Sacramenti non convenit inter Do-
ctores. Alii Contrahentium consensum, ipsum nempe ci-
vilem contractum; alii vero eorundem corpora pro mate-
ria agnoscunt, & verba a Parocho prolata, vel animo-
rum consensum pro illius forma.

Matrimonium prout in Christianorum Republica usur-
patur, aliqua, veluti praeparatoria, & parerga, antecedunt,
ut sunt sponsalia; aliaeque comitantur, ut sunt requisita
ad eius actualem celebrationem, quae si desint, aliquando
illicitum, aliquando etiam invalidum faciunt Matrimo-
nium; aliqua demum subsequuntur, vinculum scilicet in-
dissolubile, quod ex legitimo contractu per se oritur; aut
etiam divortium, quod per accidens aliquando fieri con-
tingit post celebratum Matrimonium. De his ergo brevi-
ter acturi sumus; cum enim eorundem plura explanari so-
leant *lib. 1. Instit. Civilium titulo de Iustis Nuptiis*; ideo
non est cur longam hic trahamus moram repetendo quae
ibi fortassis diligentissimo calamo enucleata haberis, ur-
gentibus praesertim temporis angustiis. Sit igitur

T I T V L V S X.

De Sponsalibus.

I. **M**atrimonium utique sponsalia praecedunt, quae sunt futurarum nuptiarum conventio, & repromissio L. 1. ff. de Sponsalib. dicta a verbo spondeo; Nam moris fuit veteribus stipulari, & spondere sibi futuras uxores L. 2. eod. hodie vero stipulatio necessaria non est, sed satis per mutuam viri, & mulieris in Matrimonium spon- sionem contrahuntur sponsalia; Et haec, quae sunt de fu- turo Matrimonio proprie hoc nomine veniunt in iure no- stro, ut patet ex Tit. De Sponsalibus; quae autem dicun- tur de praesenti, minus proprie sponsalia appellantur.

II. Contrahuntur sponsalia pluribus modis. I. Re, dando pro Arrha anulum, vel aliud quidpiam mulieri, Can. feminae XXX. q. 1. II. Verbis mutuam, & liberam repromissionem exprimentibus Cap. Is qui fidem, & Cap. Si inter hoc tit. III. Per Procuratorem, Nuncium, litte- ras &c. Cap. ultim. de Procur. in 6. Ad Sponsalia satis est aetas doli capax, hoc est post septennium Cap. nunc. de desponsat. Impub. in 6. Quod si infantes fuerint, re- cte Parentes, imo & Tutores pro ipsis contrahent, dum- modo post infantiam ipsi sponte contractui consenserint, ex eodem Cap. & Can. ult. III. q. 2.

III. Contracta Sponsalia obligationem contrahendi Matrimonium pariunt, ita ut si alteruter iniuste a volun- tate recesserit iudicis auctoritate cogi poterit, Cap. Requi- sivi h. t. nisi ex invitis, & luctuosus nuptiis periculum a- liquod timeatur, Cap. De illis de Despons. Impub. & Cap. ex litteris ro. h. t. Olim sponsalia per concubitus sine alia solemnitate transibant in verum Matrimonium Cap. is qui fidem, Cap. Veniens, & ult. hoc tit. Verum hodie id per Trident. Sess. XXIV. Cap. I. de Ref. Matrim. su- blatis clandestinis Matrimoniis, sublatum intelligitur.

IV. Variis tamen ex causis dissolvuntur Sponsalia, nam praeter mutuum dissenfum, aut alterutrius mortem, Novella XXII. Cap. 2. & Cap. 20. h. t. dissolvuntur I.

ipſo iure contrahendo Matrimonium cum altera, ex mox laudatis iuris Capp. II. Per ingreſſum in Religionem Cap. 2. de Converſ. Coniug. III. Per ſuſceptionem S. Ordinis, Capp. 1. & 2. *Qui Clerici vel voventes*. IV. Per longinquas, diuturnasque peregrinationes Cap. de illis 5. b. t. V. Per fornicationem tam carnalem, quam ſpiritualem alterius coniugum Cap. *Quemadmodum* 25. de iureiur. Cap. 2. de Divort. Can. Non ſolum, Can. Iam nunc, & ſeqq. XXIX. q. 1. VI. Per ſupervenientem affinitatem, aut cognationem ſpiritualem Cap. *Veniens de Cognat. ſpirit.* Cap. 2. de conſang. & affinit. Can. Si quis ſponſam XVII. q. 2. VII. Ob gravem morbum leprae, amentiae, furoris, imo ſi alter foede deformis evadat Cap. ult. de Coniug. Leproſ. Cap. dilectus 24. & Cap. 2. b. t. Abſolutis ſponſalibus ad ipſas nuptias accedamus.

T I T V L V S X I.

De Nuptiis.

I. **N**uptiae, ſeu Matrimonium, quatenus civilis contractus rationem habet definitur in iure noſtro Cap. 7. de Praeſumpt. : *Maris, & foeminae coniunctio individuae vitae conſuetudinem retinens*; Hanc etiam definitionem tradiderat antea Iuſtinianus in Inſtitutionibus tit. de Patria poteſt. §. 1. Porro data definitio, ut paſſim notant Theologi, & Canoniſtae non exprimit, aut declarat cauſam efficientem Matrimonii, neque eius ſubſtantiam, ſed effectum dumtaxat, perpetuam nimirum ſocietatem, ſeu corporum, & animorum coniunctionem individuae. Quoad ſubſtantiam ergo melius definiri poſſe videretur: *Actio, qua vir, & mulier corporum dominium ad uſum conjugalem ſibi invicem mutuo tradunt*. Actio vero illa Matrimonii effectiva nihil eſt aliud quam mutuus contrahentium legitimus conſenſus iuxta regulam iuris, quae habetur in L. Nuptias ff. de regulis iuris: *Nuptias, non concubitus, ſed conſenſus facit*, unde Innocentius III. in Cap. 23. de Sponſal. & Matrim. tanquam indubitatum ſupponit ad matrimoniale con-

contractum sufficere solum consensum eorum, qui debent coniungi.

Consensus vero iste non internus dumtaxat, sed externus quoque sit oportet, perspicuis expressus verbis, aut saltem signis, quae praedictum consensum satis valeant exprimere *Cap. 23. max. cit.* quare legitime contrahit mutus, si aliquo sensibili signo suum manifestet internum consensum.

II. Nuptias, sive Matrimonium inter se contrahere queunt viri puberes, & mulieres viri potentes, quoties possunt in illud legitimum praebere consensum. Vnde contrahendi Matrimonii incapaces sunt amentes, furiosi, & similes rationis usum non habentes *Cap. 24. de Spons. & Matr.* Puberes vero sunt, qui ex habitu corporis concipere, & generare possunt: iure civili quidem aetas xxi. annorum in feminis, xiv. vero in maribus exigitur, *Instit. lib. 1. de Nupt. & tit. quibus modis finiatur tutela*; iure tamen Canonico eâ etiam minoribus aetate permittitur, quoties ad venerem fuerint idonei, & malitia supplicata aetatem, *Cap. 3. 8. 9. & ult. de despons. Impub.*

III. Modus autem huiusmodi contractum incundi est per verba de praesenti, aut signa iis aequivalentia; Et id nubentes praestare possunt vel per se, si praesentes fuerint, vel per Procuratorem si absentes, & quamvis Parentum consensus non accesserit valide contrahunt ex *Trid. Sess. 24. cap. 1. de Ref. Matr. & Can. Sufficit XVII. q. 2.* saltem ubi per Principum sanctiones filiis familias ad contrahendum parentum consensus necessario non requiratur.

IV. Dividitur Matrimonium apud Canonistas in Matrimonium *ratum*, & *consumatum*. Primum appellatur illud quod per verba de praesenti contractum est. Alterum vero, cui corporum commixtio accesserit. De clandestino ante Tridentinum, vel post, ubi illius Decretum publicatum non fuit, an habeat rationem Sacramenti litigant inter se DD. Verum affirmativa opinio valde probabilis videtur.

T I T V L V S XII.

Quae Matrimonium impedire possint.

I. Licet Ecclesia Matrimonii naturam, ut est Sacramentum immutare nequeat, tamen quatenus contractus rationem habet, certas leges, certasque solemnitates ad illud contrahendum praescribere potest, quemadmodum contra Lutheranos definivit Trid. *Sess. XXIV. Can. 4.* Quare aliquos ab ipso contrahendo iure submovet constituto duplici impedimentorum genere, altero impedimentum contrahi, & altero dirimentium etiam contractum.

II. Impedimenta igitur primi generis, quae Matrimonium contrahere vetant, quamvis contractum non dirimant his versibus continentur :

*Ecclesiae vetitum, necnon tempus feriatum
Atque Catechismus, Sponsalia iungito votum
Impediunt fieri, permittunt iuncta teneri.*

Primum itaque est *interdictum*, nempe quoties Episcopi iudicio differri debeant nuptiae, quousque suspicio latentis alicuius mali, aut impedimenti tollatur. Cuius causae cognitio dum durat, separandi, etiam adhibitis censuris, sunt coniuges ex Tit. de Matr. contr. contra Interd. Ecclesiae.

Secundum *tempus feriatum*, quod ex Trid. *Sess. XXIV. cap. 10. de Ref. Matr.* extenditur ab Adventu Domini ad Epiphaniae festum, & 2 feria IV. Cinerum ad Octavam Paschatis inclusive.

Tertium erat olim *Catechismus*, sive institutio ad Religionem Christianam, quod hodie evanuisse censetur.

Quartum sunt *Sponsalia per verba de futuro contracta*; iis enim permanentibus prohibitum est contrahere cum alia persona, Cap. Veniens 15. & Cap. Sicut 22. de Sponsal.

Quintum *votum simplex castitatis*, nam si post votum non nubendi nuptias contraxerit, peccabit quidem, sed nuptiae subsistent. Capp. 3. 4. 6. Qui Cler. vel voventes, & Cap. un. de voto in 6.

Erant

Erant & quaedam Crimina quibus impediatur Matrimonium contrahendum donec saltem poenitentia perageretur, quae tamen praesentibus moribus minime impedimentum praebent, ut notat Sanchez *lib. 7. de Matr. disp. 17. n. 8.*

III. Impedimenta secundi generis, quae nedom illicitum reddunt Matrimonii contractum, sed etiam impediunt ne valide fiat, unde, & illud dirimunt, si forte attentatum fuerit, veteri iure inspecto sunt XII. quibus alia duo addita fuerunt a Trid. *cit. Sess. cap. 1.* quae omnia hijs verbis concluduntur.

*Error, conditio, votum, cognatio, crimen,
Cultus, disparitas. vis, ordo, ligamen, honestas,
Si sis affinis, si forte coire nequibis,
Si Parochi, & duplicis desit praesentia testis,
Raptave sit mulier, nec parti reddita tutae,
Haec socianda vetant connubia, falsa retractant.*

Verum antequam de singulis speciatim loquar, notate hic obiter: Ex his quaedam in bonum Christianae Reipublicae decreta fuisse, ut Matrimonium dirimant; alia tamen in favorem dumtaxat contrahentium, qui non praesumuntur iniurioso consensisse contractui, nisi sponte cognitae demum acquieverint iniuriae, quemadmodum infra *Tit. XV. n. 2.* clarius explicabimus.

Primum itaque est error, qui sit circa personam ipsam, ut si quis existimans se contrahere cum una persona, cum alia contrahat; deest sane spontaneus consensus ad Matrimonii valorem necessarius *L. Si per errorem 15. ff. de Iurisdict. omnium Iudicum L. Cum Testamentum 8. & L. Non idcirco 9. Cod. de iuris, & facti ignorantia.* Si tamen error circa personae qualitatem versetur, tenet matrimonium, nisi qualitas sit conditio, sine qua non; quia tum substantiam quoque afficit contractus.

Secundum impedimentum est *conditio servilis* ignorata ex *Capp. 2. 3. & ult. de coniug. serv.* nisi forte postquam id sciverit pars libera contractui verbo, vel facto consenserit *Capp. 2. & 4. eod.*

Tertium impedimentum est *votum solenne castitatis*,
emis-

emissum in professione religiosa, aut in susceptione Ordinis Sacri, quod dirimit Matrimonium postea contractum, *Cap. unico de voto, & voti redempt. in 6.*

Quartum impedimentum est *cognatio*, de qua seorsim in sequenti Tit. differemus.

Quintum vero est *Crimen*, cuius nomine venit delictum perpetratum contra priorem coniugem ad finem contrahendi cum altero. Crimen huiusmodi ad homicidium reducitur, & adulterium ex iure Decretalium. Homicidium itaque dirimit Matrimonium sine adulterio, quoties vir, aut uxor cum alio tertio conspiraverit in mortem suae compartis ex intentione contrahendi cum illo; quo casu si mors fuerit secuta non poterit pars superstes valide cum conspiratore contrahere *Cap. 1. de eo qui duxit in Matrimonium, quam polluit per adulterium, & Cap. 1. de convers. Infd.* Adulterium vero dirimit Matrimonium, I. si maritus adulter efficaciter machinatus fuerit in mortem coniugis suae, vel mariti adulterae, eo fine ut cum ea contrahere posset, vel vice versa uxor adultera in mortem mariti &c. *Capp. 3. & 6. de eo qui duxit in Matrimonium &c. II.* Matrimonium dirimitur propter adulterium, quoties inter adulteros intervenierit promissio de Matrimonio post obitum coniugis contrahendo, vel de facto contraxerint, licet scirent coniugem adhuc vivere ex *Cap. 1. 7. & fin. eod.* Non contrahitur igitur impedimentum dirimens per adulterium, nisi hoc coniungatur cum occisione, aut machinatione occisionis coniugis, vel cum promissione futuri coniugii, ut etiam habetur in *Cap. Significasti 6. eod.*

Sextum impedimentum est *cultus disparitas*, cuius nomine venit diversitas, quae inter baptizatum, & non baptizatum intercedit, quare Christianus cum Pagana, & viceversa contrahere non potest ex vet. Canonum Collect. *Can. 67. & 69.* & si contraxerit dirimitur. Non ita vero si Catholicus mulierem haereticam duxerit, vel e contra *Cap. Decrevit 14. de Haeret. in 6.*

Septimum est *vis, violentia*, seu *coactio*, non omnis, sed ea, quae oriatur ex metu gravi, & iniuste incusso, qui cadat in constantem virum, *Cap. Cum locum 14. Cap. Veniens 15. de Sponsal. & Cap. 2. de eo qui duxit in Matr.*

Olta-

Octavum impedimentum est *Ordo Sacer*, qui vel ratione sui, vel solemnisi voti castitatis secum adnexi matrimonium contrahendum impedit, & contractum dirimit *Cap. 1. & 2. aliisque qui clerici, vel vocantes, & Cap. unic. de voto in 6.*

Nonum est *Ligamen*, vinculum nempe matrimoniale inter duos iam contractum *Cap. licet 4. & Cap. fin. de Sponsa duorum, Cap. Gaudemus 8. de Divortiiis.*

Decimum est *Honestas*, & vocatur passim impedimentum *publicae honestatis*, illudque oriebatur I. ex Sponsalibus etiam invalidis, nisi invaliditas ex consensu defectu provenisset, & extendebatur usque ad quartum gradum cum consanguineis sponsi, vel sponsae de iure Decretalium in *Tit. de Sponsalibus, & Matrimonio*. Verumtamen per *Trid. Sess. XXIV. Cap. 3. de Ref. Matr.* non sequitur nisi ex sponsalibus validis, & dirimit Matrimonium cum consanguineis Sponsi, vel Sponsae in primo tantum gradu. II. Publicae non statim impedimentum oritur ex Matrimonio rato, & non consummato etiam invalido, nisi invaliditas ex consensu defectu provenerit, extenditurque usque ad quartum gradum iuxta ius antiquum, cum nihil circa hunc casum variaverit Tridentinum, ut declaravit Pius V. in sua Bulla, quae incipit *Ad Rom. spectat Pontificem*.

Vndecimum est *affinitas*, de qua Titulo sequenti.

Duodecimum impedimentum est *impotentia perpetua ad copulam*, ut constat ex toto *Tit. de Frigidis, & Malef.* Secus autem si impotentia fuerit temporalis, ex *Cap. Fraternitatis eod.* aut mora, vel medicaminibus tollenda; propterea ad triennii experimentum est recurrendum; quod si coniuges per id tempus nullo successu ad venerem nitantur, Matrimonium dissolvi poterit, dummodo de istiusmodi impotentia constet ex iuramento ipsorum coniugum, & septem propinquorum, quod Pontifex *septimam manum* appellat *Cap. laudabilem 3. eod.* ubi statuitur, quod si alteruter coniugum falsus deprehendatur, etiamsi alterum Matrimonium contraxerit, redintegratis prioribus nuptiis ad innocentem coniugem redire compellatur.

Decimumtertium est, si contractui matrimoniali non interveniat Parochus, & duo, vel tres testes ex *Trid. Sess. XXIV. de Ref. Matr. Cap. 1.* ubi decernitur ut imposterum

rum Matrimonia absque ea solemnitate contracta irrita forent.

Quartumdecimum denique est *Raptus mulieris*, quæ quandiu in potestate raptoris manserit, non potest eidem valide Matrimonio copulari. Quod si rapta a raptores separata, & in loco tuto, ac libero constituta illum in virum habere consenserit, eam raptor ducere poterit. Quamvis nihilominus raptor ipse, ac omnes illi favorem præbentes sint ipso iure excommunicati, perpetuo infames, omniumque dignitatum incapaces; & si fuerint Clerici de proprio gradu decendant. Præterea raptor tenetur mulierem raptam sive eam duxerit in uxorem, sive non, ludicis arbitrio decenter dotare ex Trid. *Sess. cit. Cap. 6.*

Haec sane de dirimentibus impedimentis huc usque dicta ita intelligatis velim, ut privata auctoritate nullatenus solvi possint; At ex Romani Pontificis dispensatione bene obtineri poterit facultas super aliquo eorum, quod sit iuris tantum Ecclesiastici, ut Matrimonium valide contrahatur, ut patet ex Trid. *ib. Cap. 5.*

T I T V L V S XIII.

De Triplici Cognatione, & affinitate.

I. **C**ognatio, quasi *ex uno natio*, unde cognati ex VI. piano dicuntur quasi plures ex uno nati, L. 4. §. 1. ff. de Gradibus, & Affinibus, vel ut ait Labeo in L. 1. ff. unde Cognati. §. 2. Qui quasi commune nascendi initium habuerunt. Quare Cognatio in genere explicari potest, ut sit vinculum, quod vel naturaliter ex iure sanguinis, vel ex iuris dispositione inter aliquos contingit. Et ad rem nostram commode dividi potest in *naturalem*, in *spiritualem*, & in *civilem*, seu *legalem*.

II. Cognatio naturalis, quæ consanguinitas appellatur, est propinquitas personarum ab eodem stipite descendendum, ac distingui solet per lineas, & gradus. Nominis *lineae* intelligitur ipsamet Personarum Collectio ex eodem stipite procedentium. dividiturque in *lineam rectam*, & *trans-*

& transversalem, seu collateralem. Linea recta est illarum Personarum collectio, & series, quarum una generatur ab alia, continetque Ascendentes, & Descendentes, ut *Avus, Pater, Filius, Nepos &c.* Linea transversalis est Collectio illarum Personarum, quae ab eodem stipite procedunt, sed una non generatur ab alia. Nomine *graduum* consanguinitatis intelligitur mensura coniunctionis, seu propinquitatis consanguineorum inter se, qua cognoscitur eorum mutua distantia per ordinem ad stipitem, a quo descendunt.

Vt vero cognoscatur quoto gradu consanguinei se contingant, seu quo gradu inter se distent triplex regula adsignari solet post *Gloss. in Cap. fin. de Consang. & Affinit. & XXXV. q. 3. in Exposit. Arboris Consang.* una videlicet pro linea recta, seu ascendentium, & descendentium, & duae pro linea collateralis. Prima ergo ita se habet: *Quot sunt Personae, de quibus quaeritur computatis intermediis, una dempta, tot sunt gradus inter eas.* Sic ex. gr. si quaeras quo gradu distet Proavus a Pronepote, numerandae sunt in primis Personae Proavi, & Pronepotis, ac deinde Avi, & Patris, per quos descendit Pronepos, quae cum sint quatuor, una dempta Proavi communi stipite, remanent tres, quare Proavus, & Pronepos in tertio gradu lineae rectae sunt coniuncti.

Pro linea transversali si aequalis fuerit ea erit tenenda regula: ut nempe *quoto gradu distant a communi stipite eodem distent inter se, vel mutuo se contingant.* Pro linea vero inaequali: *quoto gradu remotior distat a communi stipite, tanto inter se distent Personae, de quibus quaeritur.* Haec in observatione Arboris consanguinitatis, quae reperitur in Decreto Gratiani, *XXXV. q. 3. cit.* clariora fient.

Id vero in hac declaratione notandum est quod huiusmodi regulae pro linea transversali procedunt tantum iuxta ius nostrum Canonicum; Nam iuxta civile ius eadem regula observatur in collateralibus, quae iuxta Canones adsignatur pro linea recta, ut scilicet tot sint gradus, quot sunt Personae quousque perveniat ad communem stipitem qui subducitur; quare duo fratres secundum civilem Computationem sunt in secundo gradu, quia com-

pu-

quitas ex adoptione proveniens, inventa primitus, & induc-
ta ab Iure Civili §. *Sed si quia Instit. de Nupt.* ac de-
inde a S. Canonibus adprobata *Can. Ita diligere XXX. q.*
3. & Cap. un. de Cognat. Legali. Huiusmodi vero Co-
gnatio triplex est; prima quidem in linea recta tam ascen-
denti, quam descendenti adoptantis, & adoptati; inter
quas Personas durat prohibitio dirimens nuptias, etiam
soluta adoptione, saltem, ut nonnulli putant, usque ad
quartum gradum propter pudorem imaginariae cognatio-
nis. Secunda in linea transversali inter adoptatum, & fi-
lias adoptantis sub patria potestate manentes; verum in-
ter eos cessat prohibitio dirimens vel adoptione soluta,
vel filio e patria potestate dimisso *Can. Per adoptionem*
XXX. q. 3. & L. 17. de Rit. Nupt. Tertia speciem ex-
hibet affinitatis, quia impedimentum producit inter ad-
optantem, & uxorem adoptati; necnon inter adoptatum,
& uxorem adoptantis; & licet de hac nihil expresse in
iure nostro statuatur, censetur nihilominus comprehensa in
generali cognationis Legalis notione, ut notat Sanchez
Lib. VII de Matr. disp. 73. n. 17.

VII. Antequam huic titulo finem imponam notandum
occurrit: Ex relatis huiusmodi impedimentis aliqua iure
naturali, vel positivo divino Matrimonium dirimere, ali-
qua vero iure tantum Ecclesiastico; Et etiam aliqua iam
contracto supervenire, quae tamen illud non dirimunt; et-
si illicitum reddant actum coniugalem, quoties coniugum
culpâ impedimentum supervenerit.

T I T V L V S XIV.

De Clandestina Desponsatione.

I. **Q**uemadmodum notorium appellamus id, quod nulla
potest tergiversatione celari, ita clandestinum di-
cimus quicquid clam fieri contingit, ut factum esse pro-
bari difficile possit *Cap. 1. b. t.* Huius generis Matrimo-
nia ob gravissima, quae ex iis oriri solent, incomoda sem-
per Ecclesia est detestata, iteratisque decretis sub gravis-
simis

simis poenis prohibuit, ut fidem faciunt veteres Canones apud Grat. XXX. q. 5. & in Decretalibus *h. tit.* ex quibus palam est optasse semper, & praecepisse Ecclesiam, ut publice, & coram Sacerdote Matrimonia celebrarentur. Verum Tridentina Synodus denique *Sess. XXIV. de Reform. Matr. Cap. 1.* irrita etiam declaravit, nisi praesens Parochus, aut alius eius mandato Sacerdos, & duo, aut tres testes adhibeantur, quando coniuges in Matrimonium consentiunt, tum enim Coniuges in faciem Ecclesiae contrahere dicuntur. Parochus vero eiusmodi proprius alterutrius Coniugum esse debet.

II. Quapropter eadem laudata Synodus praevias quasdam publicationes iniunxit praecipiens, ut antequam Matrimonium contrahatur ter a proprio contrahentium Parocho tribus continuis diebus festivis in Ecclesia inter Misarum solemnia publice denuntietur inter quos Matrimonium sit contrahendum. Quae tamen publicationes etiam sine Episcopi venia si omittantur, non statim invalidum censendum erit Matrimonium, licet illicitum, & poenis obnoxium revera sit.

T I T V L V S XV.

*Qui Matrimonium accusare possint, vel contra illud
testificari.*

I. **Q**uemadmodum sancitum est iure nostro, ut praemittantur denuntiationes Matrimonio, ne contingat illud invalide celebrari ob dirimens impedimentum non cognitum *Cap. 3. de Gländ. Despens.* ita eodem iure contra Matrimonium invalide contractum, ut dirimatur, instituta est accusatio, vel actio coram iudice Ecclesiastico, ad quem huiusmodi causarum cognitionem pertinere definit Tridentinum *Sess. XXIV. Can. 2.*

II. Circa quod, illud, ut supra notavi, animadvertatis oportet ex hisce impedimentis alia esse, quae Matrimonium iam contractum non dissolvunt, nisi inter dissentientes coniuges, quia in eorum favorem sunt induta, cuius

gc-

generis sunt metus, error, conditio, & coeundi impotentia, quae vitia per novum accedentem partis utriusque consensum purgantur. Alia, vero, quae de se Matrimonium irritum faciunt, quibusque non possunt coniuges renuntiare, seu quae per mutuum eorum consensum nullo modo purgari queunt, ut sunt cognatio, crimen, affinitas &c. eiusdem generis. Rem totam clarissime exponit D. Thomas in *IV. Dist. XXXIV. art. 2. ad 4.* quem consulite.

III. Propter primi generis impedimenta non admittitur alia persona ad Matrimonium accusandum, nisi coniuges, cum liberum sit ipsis iuri suo cedere; unde fit, quod si detectis eiusmodi impedimentis de novo consenserint, amplius conqueri, vel Matrimonium accusare non possint, uti de contrahente ob metum gravem statuitur *Cap. 4. b. 1. ob errorem Cap. 2. de Coniug. Serv. & ob impotentiam Cap. 4. de Frigid. & Maleficiatis.*

IV. Alterius vero generis impedimenta accusare quisque poterit, & imprimis ipsi coniuges, qui tamen suae accusationis veritatem per idoneas probationes ostendere debent antequam separentur, ne cohabitationis pertaesi ad huiusmodi confugium recurrant *Cap. 5. De eo, qui cognovit consanguineam uxoris suae.* Extraneorum autem nemo ad dicendum contra Matrimonium iam contractum admitti debet, nisi iureiurando comprobeat suam denunciationem, aut impedimentorum ignorantiam eo usque habitam *Cap. ult. b. 1.*

V. Accusatio vero constare debet viva voce, duobus, vel tribus honestis Personis vel ex cognatione adhibitis, vel ex vicinia addito iureiurando super veritate, atque alienatione animi ab omni vel gratia, vel odio, vel lucro, vel metu, quod iuramentum est a testibus quoque subeundum *Cap. Videtur 3. b. 1. & Can. 1. & seqq. XXXV. q. 6.* In quo testium numero esse possunt proximi consanguinei etiam ex primo gradu, quibus quoque accusantibus creditur *Cap. eod.* nisi tamen alter coniugum potentia, aut divitiis praecellat, quia tunc inferioris coniugis parentes propter fidei suspensionem ad testandum non admittuntur *Cap. Super eo 22. de testib.*

T I T V L V S XVI.

De Divortiis, & secundis Nuptiis.

L Validi Matrimonii dissolutio alia est quoad *vinculum*, alia quoad *thorum*; illa propriè, haec improprie divortium appellatur. Quamvis autem tum iure naturali, tum positivo divino matrimonium semel valide celebratum, sive consummatum illud fuerit, sive ratum dumtaxat vinculum pariat indissolubile; antequam tamen Evangelii lux hominibus affulgeret plures apud omnes, Iudaeos non minus, quam Ethnicos usurpabantur Causae, propter quas coniuges post diuturnam quoque familiaritatem, & consuetudinem omne dissolvebant initae societatis vinculum. De Iudaeis quidem dubitari non sinunt tum sacra historia, tum quae leguntur *Matth. XIX.* quapropter ad ipsum morem lege repudii per Mosem lata iam impune passim receptum respicientes Origenes, Chrysostomus, & alii Ecclesiae Patres inter huiusmodi causas recensent lepram, morbum caducum, sterilitatem, veneficium, perpetuas rixas, magnam foeditatem, aliasque pravas quaslibet animi, aut corporis affectiones, & praesertim incorrigibiles. De Romanis quoque certum omnino est ex lege Romuli apud Plutarchum, ubi tres potissimum recensentur, probanturque, prima nempe: *Si mulier adulterium commississet*, non autem vir; Secunda: *Si claves fecisset*, vel iuxta Connatum, *si furtum commississet*, aut iuxta Gifanium, *si partum subiecisset*; Tertia demum: *Si filios veneno necasset*; & licet praeter has causas, ubi vir dimississet uxorem egestatis poenas sustinere cogeretur ex amissione sui totius assis, cuius pars uxori dimissae adiudicabatur, & altera Cereri sacra manebat, ratum nihilominus habebatur divortium. Quinimo post annos fere sexcentos ab regia istiusmodi lege, repudià adeo frequentia evaserunt, ut de hac licentia Tertullianus acriter conqueratur stomacho in Apologet. *Cap. 6.* Augustus quidem eam magna ex parte temperavit non permittens viris nisi ob certas tantum causas boni viri iudicandas arbitrio, ut uxoribus

nunq.

nuncium mitterent, & nonnisi quibusdam observatis ritibus, quemadmodum in *l. Iulia de repud.*; *l. unic. ff. unde vir, & uxor*, *l. Nulla ff. b. t. & l. 6. C. de Repud.* Attamen post Augusti mortem eadem divortiorum effrena libido ultra honesti fines iterum excurrere facile obtinuit, donec Christianorum Imperatorum Constitutionibus intra quosdam limites coerceri coeperit, ut patet ex *Cod. Theod. de Repud.*

II. Verumenimvero quia non eadem ab omnibus ipsis Imperatoribus decretae fuerunt repudiorum causae, variae etiam Cæsarei iuris Codices legentibus occurrunt in posterum huius rei vicissitudines. Nam in *l. Constante C. Theod. de Repud.* Divortium fieri permittitur etiam absque ulla causa, ex coniugis tamen utriusque consensu, quam Constitutionem emendatam deprehendimus in *Novella XXII.* & hanc iterum revocatam in *Novella CXL.* Permissum quoque divortium invenitur *l. in causis C. b. t.* si vir vellet vovere castitatem in Sacerdotio, vel mulier in vita monastica; imo etiam ex *l. Vxor ib. & Novella XXII. cap. 14.* si vir militiae nomen dedisset; quae tamen causa reiicitur in *Novella CXVII. cap. 11.* Item ratum habetur repudium ex *l. Si cum dotem §. Si Maritus ff. soluto Matrimonio*, & *Novell. CXI. & seq.* ob perpetuum furorem; ac etiam ex *l. Consensu §. Vir C. b. t.* si mulier contra viri voluntatem ludis theatralibus, vel spectaculis interfuisset; vel denique si balneis communibus se lavisset *Novella CXII. cap. 8.* ac *l. Iubemus §. 2. C. de Repud.*

III. Hisce vero omnibus humanis legibus posthabitis ex lege Evangelica tenendum est, nullam ob causam generatim loquendo Matrimonii legitime contracti posse permitti quoad vinculum dissolutionem sive per verum divortium, sive per repudium, quomodocumque haec duo invicem differant.

Dixi generatim loquendo, nam etiam in lege Gratiae ex nostro iure Divortium quoad vinculum contingere potest I. cum post Matrimonium ratum, non adhuc tamen consummatum unum ex coniugibus approbatam Religionem ingrediatur, & in ea solemniter profiteatur; quod exequi potest, nedum consentiente comparte, sed etiam invita *Cap. 2. de convers. Coniug.* & alteri licebit ad alia vota transire.

G 2

At

At vero si Matrimonium iam fuerit consummatum, id fas neutri erit, & ubi eorum alter id attentaverit, comparti restitui omnino debet ex *Cap. 3. eod.* nisi tamen & ipsa consenserit simile votum emitte; Secus vero, unius votum nullius erit roboris, itaut mortua etiam comparte neque tenetur ad Monasterium redire, quamvis ulterius Matrimonio copulari nequeat, quia promisit non exigere debitum, quod erat in sua potestate, ut tradit Coelestinus III. in *Cap. 12. eodem.*

IV. Contingere potest II. Divortium quoad vinculum etiam post Matrimonium consummatum inter infideles tamen contractum; & hoc in favorem Christianae Religionis, quoties nempe alter coniugum ad Christi fidem convertatur, altera in infidelitate remanente, & vel nullo modo, vel non sine blasphemia divini nominis cohabitare volente, *Capp. 7. & 8. h. t.* Vbi tamen nonnulla sunt adnotanda, & I. quidem si ambo coniuges ad fidem simul convertantur, subsistit omnino Matrimonium ab ipsis in infidelitate contractum etiam in gradibus iure Canonico prohibitis, aut cum aliquo alio ex impedimentis dirimentibus eodem iure decretis, quia tum temporis Canonicis Constitutionibus non tenebantur, *Cap. 7. cit.* II. Non semper licere, aut expedire parti conversae compartem in infidelitate remanentem dimittere iuxta illud Apostoli I. ad Corinth. 7. *Si quis frater uxorem habet infidelem, & haec consentit habitare cum illo, non dimittat illam &c.* nisi tamen periculum sit ex cohabitatione, ut pars conversa iterum pervertatur, tum sane statim separari conversus debet ab infideli, & ita intelligamus oportet Canonem 10. apud Grat. XXVIII. q. 1. in quo statuitur de uxore fidei conversa ex Iudaismo, ut haec nisi vir ad fidem & ipse accedat, ab illo separetur. III. Si pars in infidelitate remanens postea convertatur & ipsa antequam altera iam conversa novum inivisset Matrimonium, illud primum in infidelitate contractum firmum perseverat. Immo si maritus ante baptismum uxorem repudiaverit, & postquam ambo novas inierit nuptias, ad fidem accedant cum novis coniugibus, primum coniugium redintegrabitur iterum, nec poterit vir fornicationem huic primae uxori obicere, quia gentium more repudiata, alteri nubendo fornicaria dici nequit *Cap. 8. eodem.*

V. Fa-

V. Facilius vero, & pluribus ex Capitibus dissolvitur Matrimonium ratum & consummatum, quoad thorum. I. Si de utriusque consensu coniuges ambo castitatem vovent, aut Religionem profiteantur, *Cap. 1. & 2. de Convers. coniug.* II. Si eorum alter in infidelitatem, aut haeresim prolabor, *Cap. 2. de Divort. & Trid. Sess. XXIV. Cap. 5. de Ref. Mat.* III. Si Matrimonii usus peccatum parere, aut disiunctio emendationem adferre posset coniugibus, *Cap. 2. de Divort. & Cap. 3. de Adult.* IV. Ex nimia saevitia, nisi maritus caverit de uxore non vexanda *Cap. 1. ut lite non contestata, & Cap. Litteras in fin. de Restit. spoliat.* V. Si votum emisit vir longinquae peregrinationis in Terram Sanctam, quod etiam renuente uxore implere poterit, *Cap. ex multa §. In tanta de Voto, & Voti Redemp.* VI. Si alter coniugum Adulterium, aut infandae Veneris scelus commiserit *Cap. Intelleximus de Adult. cap. Quemadmodum de iureiurando*; ex hoc autem capite separandi non sunt coniuges pendente super adulterii crimen iudicio, imo ipso etiam probato licebit viro poenitentem mulierem, & ad bonam frugem redeuntem, sibi que conciliatam retinere; alias porro coniicienda mulier est poenitentiae causa in perpetuam aliarum mulierum clausuram *Cap. 1. ut lite non contest. Cap. Gaudemus 19. de Conv. Coniug.* Non permittitur tamen propter adulterium separatio, si mulier invita fuerit compressa *Can. Ita ne 32. q. 5.* aut decepta, quod adulter se maritum simulaverit; vel si eodem delicto ambo coniuges involvantur, *Cap. Intelleximus, & Cap. ult. de Adult.* vel si vir ipse adulterium suaserit uxori *Cap. Discretionem de eo qui cognovit consanguineam uxoris suae*, vel tandem si culpam remisit uxori, cum ipsa post adulterium actus Matrimonii exercens, *Can. Si qui uxorem XXXII. q. 1. & Vallen. in Decret. de Divort. §. 2. n. 2.*

VI. Quod spectat ad secundas nuptias, de quibus est altera huius tituli pars, certum fide est ex Apostolo *I. ad Cor. 7.* per mortem unius coniugis solvi Matrimonii vinculum, & posse partem superstitem transire ad secundas nuptias, quarum nomine veniunt tertiae, quartae &c. ut habet *Grat. XXXI. q. 1. Can. 12. & 13.* quamvis ob quandam incontinentiae speciem, quam praefecerunt hu-

iūsmodi nuptiae, de illis Patres asperioribus verbis fuerint locuti, itaut interdum honestam fornicationem illas appellarint *Cap. 9. ib.* qua etiam de causa per Canones poenitentiales bigami poenis quibusdam adiciebantur.

De his secundis nuptiis nonnulla decernuntur in Decretalibus, & primò quod nemo ad eas migrare praesumat, donec ei firma certitudine non constiterit de morte prioris coniugis *Cap. 2. b. t.* cui consonat Decretum Clementis III. in *Cap. 19. De Sponsalib.* Plures quoque eandem in rem reperiuntur Canones apud Grat. XXXIV. q. 2.

Secundò posse Coniuges absque ulla infamia intra annum a morte alterius Matrimonium contrahere *Cap. 4. & 5. eod.* contra id, quod sancitum erat per Leges Civiles I. & XI. ff. *De iis, qui notantur infamia.*

Tertiò quamvis Ecclesia secundas nuptias non improbet, vetat tamen eas benedici *Cap. 1. & 3. eod.* praesertim si fuerint secundae ex parte uxoris, quae semel fuit iam benedicta; de quibus dumtaxat loqui iura existimat D. Tho. in IV. Dist. 42. q. 3. art. 2. ad 2. quam sententiam in praxi servari adserit Fagnanus ad hunc Tit. Rationem cur secundae nuptiae non benedicantur petit laudatus D. Thomas ex eo, quod in his deficiat plena Sacramenti significatio, quae inter Virgines reperitur.

T I T V L V S XVII.

De rebus sacris, sanctis, & religiosis.

I. **E**cclésiasticas res duplicis generis esse in huius Libri limine iam monuimus, alias nempe *spirituales*, quae spiritali hominum profectui inserviunt; alias *temporales*, quae immediate sacrorum Mysteriorum celebrationi, & Ministrorum sustentationi deputantur. Explicatis ergo Sacramentis, quae sunt potissima illarum pars; de his disseramus oportet. Et primo quidem res sacra dicitur, *quae publico, & solemnī ritu Deo dicata est*, quemadmodum sunt Tempia, Calices, & omnes Personae, quae aliquo pu-

publico ritu Deo sunt dicatae, ut Sacerdotes, Monachi, Moniales &c. Olim apud Romanos haec dedicatio fiebat etiam per Principes *L. Sacra §. I. ff. de acq. rer. Domin.* hodie vero non nisi per Rom. Pontificem, vel Episcopos, & Abbates nonnullos Regulares, ita Hostien. in *Rub. de Crimin. Sacrilegii n. 1.* & alii. Quare sacella privata, quae domi Magnates habent proprie sacra non sunt, nec immunitate gaudent, nec ibi delinquere vere sacrilegium est *Can. Oratorium dist. 42.* & de his loquitur Iustinianus in *Novell. LVIII. & CXXXI.* dum Sacella in aedibus privatis inhibet. Patet etiam vestes, quibus sacrificium celebratur, vota, seu tabellas votivas, & alia huius generis dona, nonnisi improprie sacrarum rerum nomine adpellari, quemadmodum sacrum dicitur thuribulum ex Gloss. in *§. Item Lex Julia peculatus Inst. de public. Iudiciis*, non secus ac apud Romanos extensa sacri significatione ad omne id, quod Deorum haberetur, ut notat Trebatius *L. De Religionibus.*

II. Sanctum dicitur quicquid est inviolabile a verbo sancire, quod idem sonat ac *irrogatione poenae ab iniuria defendere*, ut innuit Vlpian. in *L. 9. §. Proprie ff. de acq. rer. domin.* vel ut Marcianus existimat in *cod. Tit. ad L. Sanctum*, a sanguinibus herbis, quas Legati Populi Romani secum deferrebant ne quis eos violaret, sicuti Graeci caduceum. Quo sensu Leges merito sanctae dicuntur, item viri Deo chari, quos violare nefas est, ac moenia urbis, & Portae *L. 2. ff. ne quid in loco sacro.*

III. Religiosa loca de iure civili sunt, ubi humana corpora sepeliuntur, ut in titulis *de religiosis, & sumtibus funerum.* Huiusmodi Religio ante Christianos privata auctoritate inducebatur; nunc autem non sine Episcopi iussu, & iussis persolutis; propterea religiosa dici possunt Monasteria, Tempa, Hospitalia, Oratoria, ut in Tit. iuris nostri *De Religiosis domibus*, & etiam sacella privata, de quibus Canon *Oratorium* supra laudatus. Ita Religiosi quoque viri dicuntur, qui vitam regularem professi sunt, *Can. Non dicatis XII. q. 1. Can. Qui ingredientibus XIX. q. 3. Cap. Cum ad Monasterium de statu Monachorum.* Quibus omnibus speciatim pertractandis manum admoventur.

T I T V L V S XVIII.

*De construendis, consecrandis, & reparandis Ecclesiis,
& Altaribus.*

I. **Q**uamvis Ecclesiae nomine proprie veniat fidelium coetus, tamen antiquissima quoque, ipsoque Apostolorum aevo usurpata vocis illius acceptione veniunt aedes sacrae publico pietatis exercitio, & cultui divino destinatae, ut patet ex *I. ad Cor. xi.* De his sacris aedibus agitur apud Grati. *Dist. I. de Conf.* & in Decretalibus *Tit. 40. & 48. Lib. III.* unde potiora delibabimus.

II. Illud in primis hac in re iure Canonum sancitum est, ut nulli fidelium liceat absque Dioecesani Episcopi consensu novas aedificare Ecclesias *Dist. 1. de Conf. Can. 9. XVIII. q. 2. can. 10.* & alibi; quod Civilibus etiam Legibus cautum est *Novell. 67. Iustin. Imp.* Episcopus vero in permittenda novarum Ecclesiarum constructione id primum diligenter perspiciat an iusta sit causa eas erigendi.

III. Quamobrem licet permissum cuilibet sit domus suae habere Oratorium orationis causa *Can. Vnicuique de Conf. Dist. 1.* dummodo in eo campana publice exposita non pulsetur *Cap. Patentibus 10. de Privileg.* non tamen ad Sacrificium Missae peragendum, nisi Oratorium huiusmodi ad divinum tantummodo cultum sit dedicatum, & ab Ordinario designatum, eiusque visitationi subiectum ex *Trid. Sess. XXII. in Decreto De observandis, & vitandis in celebratione Missae §. Neminem.* Alias si quis in Oratoriis intra privatos parietes constitutis absque Romani Pontificis concessione, & in publicis absque Episcopi consensu celebrare praesumerit deponendus erit *Can. Clericus & similibus ead. Dist.*

IV. Antequam autem Ecclesia aedificetur, debet Episcopus, aut de eius mandato alius Crucem humi desigere, atrium publice designare, primum lapidem iacere, & lustrali aqua adspargere, *Can. Nemo Ecclesiam dist. eadem & Novella 67. Ut nullus aedificet,* licet sufficiat si post constructam Ecclesiam etiam tacite consentiat Episcopus.

Quod

Quod si ipse Episcopus absque iusta causa novae Ecclesiae constructioni consentire noluerit, compellendus etiam erit auctoritate Superioris *Cap. Nullus 17. de Iurepat.* Si praeter Episcopi consensum quis Ecclesiam construxerit, nec alteri noceat, destrui quidem illa non debet, sed iacturam patietur iuris patrono debiti, & Ecclesia cum dote sua iuribus Episcopalibus adplicabitur ex *Cap. Nobis eod.* Imo si in loco exempto construenda erit, Summi Pontificis auctoritas requiritur *Cap. auctoritate 4. de Privileg. in 6.*

V. Vnicuique vero Ecclesiae pro dote adtribui debet Mansus unus terrae liber ab omni servitute, & onere; id est praedium, quod sufficiat duobus bobus in anno ad laborandum ex *Gloss. in Cap. 1. de Censibus*. Sin, omissa dote Ecclesia constructa sit nihilominus, qui extruxit dotis nomine etiam recte convenitur *Cap. Cum sicut 8. de Consecr. Ecclesiae*, aut in subsidium ad Episcopum Consecratorem recurritur, arg. *Cap. 2. de Praebend.*

VI. Perspiciat etiam oportet Episcopus diligenter, ut quisquis desiderat aedificare Ecclesiam id faciat pietatis intuitu, non quaestus cupiditate *Can. Si quis Basilicam dist. 1.* & ne vicinis aedibus noceatur, puta luminibus earum officiendo, aut non legitimum spatium relinquendo; nam licet religionis favor sit summus, tamen ad iustitiae normam contineri debet, ideoque novi operis nuntiatione facta ex vicinis aedibus, sive iure sive iniuria id quod constructum fuerit diruendum est *Capp. 1. & 2. de Novi Operis nuntiatione*.

VII. Videndum quoque ne quae aedificatur de novo Ecclesia, etiam Parochialis in praeiudicium cedat antiquae *Can. Quicumque XVI. quaest. 1.* Nisi forte ex iusta causa, veluti si Ecclesia Parochialis ita creverit, ut una omnibus non sufficiat, vel ob nimiam distantiam aliquorum Parochianorum non sine magno incomodo, & difficultate Ecclesiam adeuntium *Cap. ad audientiam 3. b. 1.* vel si tam frequens sit populus, ut pluribus egeat oratoriis, & Pastoribus *Cap. ult. b. 1.* tum sane Episcopi auctoritate potest nova extrui Ecclesia, etiam invito alterius Rectore, imo & portio competens ex proventibus Ecclesiae antiquae, si abundet, eiusdem arbitrio Episcopi adsigna-

signari novae *diſt. Cap. Ad audientiam*; & *Trid. Seſſ. II. Cap. 4. de Reform.* Non obſtante iuramento, ſi quod Episcopuſ antiquae Eccleſiae praefiterit de ipſius rebus non alienandis *cod. Cap. ult.* dummodo tamen non adſit moduſ aliunde dotandi, & fieri id poſſit ſine praedudicio poſſidentis, ut declaravit S. Congregatio, videte Riccium *dec. 554.* Imo, ſi neceſſe fuerit, poteſt Episcopuſ tanquam Apoſtolicae Sedis Delegatuſ compellere populuſ ad ſubminiſtrandam novo Parocho neceſſariam ſubſtentationem ex *Trid. ib. cap. 4.* legite Fagnanuſ in *Cap. 3. b. t. n. 32.*

VIII. Eo tamen in caſu antiqua Eccleſia acquirit iuſpatronatuſ in novam, & eiſ matrix dicitur laudato *Cap. Ad audientiam*; Eique a nova honor exhibenduſ eſt, licet pars populi, quae novae ſubditur Eccleſiae ab iure prioris intelligatur abſoluta *Can. Praecipimus XVI. q. I.* & licet alia nulla ſubiectionis iura debeantur matri-ci Eccleſiae, niſi quae Episcopuſ illi reſervaveſt in limine erectionis ex laud. Fagnano *ib.*

IX. Quod attinet ad alteram Tituli partem Eccleſiarum ſcilicet, ad dirutaruſ, aut ruinam minantium reparationem, ſi Eccleſia proprios reddituſ habeat, vel ex dotatione, vel ex Fidelium oblationibuſ, aut aliunde ad fabricam ipſiuſ, aliaſque neceſſitateſ procurandaſ deſtinatoſ, ex iis reaedicanda erit, vel reparanda prout opuſ eſt. Si vero ipſiſ careat praeftranduſ id erit a beneficiatiſ Eccleſiae *cap. 1. b. t.* ſalva tamen congrua eoruſ ſubſtentatione *Cap. 4. cod.* Hiſ iuribuſ conformiſ eſt Tridentini diſpoſitio *Seſſ. XXI. cap. 7. de Reform.* ut nempe in hoc procedant Episcopuſ, quemadmodum ſupra innuimus *n. 7. de Eccleſiae conſtructione.*

Quod ſi ob notoriam egeſtatem nemo ex praedictiſ contribuere valeat, nec ſpeſ ſit aliunde futurae reparationiſ, ex eodem Tridentino poterit Episcopuſ vocatiſ iſ, quorum intereſt ruinolaſ Eccleſiam deſtruere, eiſque iura, & dotaleſ funduſ ad matricem, ſi filialiſ ſit, vel ad aliam viciniorem tranſferre Eccleſiam, in qua erigenduſ erit Altare ſub eadem invocatione, ſub qua erat diruta, ita cum aliſ Barboſa ad dictuſ *Cap. 7.* & hoc etiam facienduſ erit de beneficiiſ ſimplicibuſ ibidem erectiſ, & cum ſuiſ oneribuſ, & emolumentis eidem Altari adplicandiſ.

X. Ec-

X. Ecclesiam de novo constructam, atque dotatam sequitur consecratio, seu Dedicatio, de qua est specialis Rubrica in *lib. III. Decretal. sub Tit. XL.* eaque fieri non potest nisi ab Episcopo, & quidem proprio, cum sit actus ordinis Episcopalis, ut clare ex Gregorio IX. in *Cap. 9. de Consecr. & Can. Nullus* laudato: semel autem facta consecratione non potest iterum Ecclesia consecrari, nisi vel in toto, vel maiori in parte fuerit combusta, vel collapsa *Can. Ecclesiis de Consecr. & Can. de fabrica 22. ead. distinct.* Secus vero si modica aliqua pars restauraretur, *Cap. quod in dubiis 3. de Consecr. Ecclesiae.*

Proprius Episcopus, ad quem huiusmodi consecratio spectat, est Dioecesanus *Cap. 2. eodem;* & quamvis irrita non sit ab alieno Episcopo peracta, ipsa tamen, si absque Dioecesani consensu peregerit uno anno in poenam a Missarum celebratione cessabit *VII. q. 1. Can. 28.* Tempus denique peragendae huius consecrationis est inter Missarum solennia *Dist. 1. de Consecr. Can. 3.* & quidem maxime decet, ut diebus festivis celebretur, quamvis ex Innocentio III. *Cap. 2. cit.* privatis etiam diebus liceat Episcopo Ecclesias dedicare.

XI. Praeter Ecclesias alia quoque consecrari debent, quae ad divinum cultum sunt destinata, ut sunt Calices, Patenae, & praecipue Altaria. Quae licet de iure ordinario consecrentur ab Episcopo, tamen ex privilegio consecrari poterunt a Praelatis inferioribus, praesertim ab Abbatibus usum Pontificalium habentibus, ut patet ex privilegiis Casinen. Ordini concessis.

Illud hic notetis velim, quod licet olim in Ecclesiis non consecratis nequitiam fas esset divina peragere, ut ex pluribus Canonibus *dist. 1. de consecr.* satis constet, hodie tamen nonnisi altaria de necessitate chrismate consecrantur *Can. 31. ib.* & Ecclesiae ut plurimum benedicuntur dumtaxat per asperersionem aquae exorcizatae, tum quia facilius benedictio peragitur, quam consecratio; tum quia si pollui contingerit per simplicem Sacerdotem promptius reconciliantur; ut notat Sotus in *IV. t. 3. & Cap. 10. de Consecr. Ecclesiae.*

XII. Potest etiam contingere aliquando, ut Ecclesia per Episcopum consecrata, & nullatenus destructa, debeat

ab Episcopo iterum benedici; si nimirum polluaturs, sed quod idem est talem contrahat moralem maculam, ut in ea divina officia, praesertim Missarum solemnia, celebrari nequeant *Cap. fin. de Conf. Ecclesiae Cap. 11. de Privileg. & Cap. 13. de Sent. Excomm. in 6.* adeout graviter arbitrio Episcopi puniendi veniant, qui scienter in Ecclesia polluta celebraverint. Polluitur ergo I. Per humani sanguinis effusionem iniuriosam, & voluntariam *Capp. 4. & fin. de Conf. Eccl. & Cap. unico eod. in 6.* II. Propter vulnus illatum, ex quo homicidium sequatur etiam absque sanguinis effusione *Cap. proposuisti 4. cit.* III. Per voluntariam humani seminis notoriam effusionem *Cap. fin. cit. Cap. Significasti 3. de Adult. & Can. Ecclesiis 18. Dist. 1. de Conf.* IV. Si in ea sepeliatur infidelis *Can. 27. & 28. ead.* aut etiam fidelis notorie excommunicatus *Cap. Consulisti 7. de Conf. Eccl.* Exhumari ergo debent huiusmodi cadavera, ac foras proiici, ut laudatis in *Can. decernitur.*

XIII. Hisce in casibus polluitur Ecclesia etsi adhuc consecrata non sit ex *Cap. fin. laud.* quod notat Panormit. etiam in *Cap. 7. cit. num. 4.* Verum non contrahitur istiusmodi profanatio si extra ipsius Ecclesiae corpus eorum aliquid acciderit, ut si v. g. in cellis Ecclesiae adhaerentibus, exteriori tecto, campanili, Sacrificia &c. Imo quavis Coemeterium sit Ecclesiae quoddam accessorium, & consecretur, aut benedicatur non secus ac ipsa Ecclesia, tamen si ipsum polluaturs, non propterea polluta censetur Ecclesia, esto ex huius profanatione, illius profanatio inducatur *Cap. unico de Consecrat. Eccl. in 6.*

XIV. Similiter execratum censetur Altare siue mobile, siue fixum, si lapis notabiliter frangatur, itaut vel ineptum reddatur ad usum, vel satis deforme *Cap. lignis 6. & Cap. Quod in dubiis 3. de Conf. Eccl. II.* Si fractum fuerit Sigillum cavitatis, in quo Sanctorum Reliquiae conduntur iuxta praescriptum *Capp. 1. & 3. eod.* III. Si Altare immobile e basi ubi fuerat adfixum, evellatur ex laudatis supra Capitibus.

XV. Reconciliatio Ecclesiae, vel Coemeterii fit mediante aqua ab ipso Episcopo consecrata cum sale, vino, & cinere admixta ex *Cap. Aqua 9. eod.* iuxta praescriptum
 Ri-

Ritualis Romani. Et quoties Ecclesia fuerit consecrata, nonnisi per solum Episcopum reconciliari poterit ex *Cap. 9. eod.* non obstante quacumque consuetudine, aut delegatione simplici Sacerdoti facta. Ex privilegio tamen id praestare posse videntur Abbates, praesertim Casinenses pro suis Ecclesiis, aut etiam pro aliis ex speciali delegatione Episcopi. Ita Engel de *Privileg. Regular.*

T I T V L V S XIX.

De unionibus Ecclesiarum, & Beneficiorum.

I. **V**Nio, de qua in praesenti, non est apud Canonistas nisi *duarum, vel plurium Ecclesiarum, aut beneficiorum necessariis, aut utilibus ex causis facta connexio.* Necessariae sunt paupertas Ecclesiae, quae alteri opulentiori unitur, ut facilius sustentetur *Cap. Exposuisti 33. de Praeb. & Dignit. & Cap. 1. Ne Sede vacante.* Item solitudo Ecclesiae atque vastatio, propter quas indigeat, ut potentiori Ecclesiae adiuncta muniatur *Can. Unio X. q. 3. & Can. Postquam XVI. q. 1.* Vtiles causae sunt si unus Sacerdos commode pluribus vacare nequeat Ecclesiis, aut si omni populo ad minorem numerum redacta una sufficiat Ecclesia. Et quoniam huiusmodi causae aliae perpetuae manent, aliae ad tempus, ideo vel perpetua unio erit, si causa sit perpetuo duratura, vel temporaria, si aliquando cessarit.

II. Eadem haec unio quatuorplex potissimum modo fieri potest. I. Cum ex duobus beneficiis, vel duabus Ecclesiis sit unum beneficium, aut una Ecclesia, ut si duae proximae Parochiales per bellum destructae in unam uniantur cum suis iuribus. II. Beneficium aliquod uniri potest per omnimodam suppressionem, quae potius dicenda est extinctio, quam unio, ut si Canonicatus v. g. erigatur in dignitatem; tunc sane ille penitus extinguitur, ut nova constituitur dignitas adnexa habens praebendam Canonica-tus. III. Per hoc, quod uni Ecclesiae altera subiiciatur, tanquam eius accessorium; per quam unionis speciem be-
ne-

neficiū adnexum propriū amittit nomen, quāvis non omnino revera supprimatur, sed maneat in sua integritate tum quoad onera, tum quoad proventus, sub principalis tamen Ecclesiae Rectore. IV. Denique ita plures Ecclesiae uniri possunt, ut aequē principaliter uniantur, & omnes in suo statu maneant ut erant antea; quae tunc non alia ratione unitae dicerentur, nisi quod uni Personae conferuntur.

III. Cum autem per unionem aliqua semper fiat beneficiorum, seu Ecclesiarum immutatio, ideo ea sine superioris auctoritate fieri non potest; & ordinarie loquendo ad eum tantum spectat, ad quem spectat beneficiorum collatio. Quamobrem sicut maiora beneficia, ut sunt Episcopatus, & quae Consistorialia dicuntur, Romani Pontificis dispositioni iam a pluribus seculis sint reservata, ita etiam eorundem uniendorum potestas ad ipsum est devoluta, adeo ut nec ipsis Legatis de Latere absque speciali mandato eam tentare liceat *Cap. 4. de Off. Leg.* Quod vero spectat ad inferiora beneficia, inferioresque Ecclesias possunt Episcopi in suis Dioecesium iuxta de causa id praestare *Cap. 8. de Excess. Prael. Cap. 7. de Donat. & Clem. 2. de rebus Eccl. non alien.*, nisi tamen de iis agatur, quae Apostolicae Sedi immediate subduntur. Ceterum ita propria est Episcopi in sua Dioecesi haec potestas, ut Metropolitae non liceat Ecclesias sui Suffraganei sine eius consensu unire. *Cap. 8. eod.* Idemque sentit Gonzalez in cit. *Cap. de Legato a Latere*, quāvis hic in Provincia sibi commissā maior sit Ordinatio ex *Cap. 1. de Off. Ord. in 6.*

Sede vacante autem potest Capitulum ex eo, quia succedit in omnibus, quae sunt iurisdictionis Episcopalis *Capp. 11. & 14. de Maior. & Obed.* huiusmodi Ecclesias unire, vel beneficia, dummodo nihil iuribus detrahat Episcopalis, ita Canonistae in *Clem. 1. de stat. Mon. 6. Ad haec.* Demum id quoque praestare possunt Abbates in Ecclesiis sibi subiectis, ubi iurisdictionem Episcopalem, plenamque habeant dispositionem ex *Glos. ib.*

IV. Ne tamen per eiusmodi unionem damnum alicui creetur, cautum est per Regulam II. Cancellariae de *Vnionibus*, ut ad eam procedatur servato iuris ordine, & causa in partibus investigata, citatisque omnibus, quorum

rum

rum interest, uti statuerat Trid. *Sess. VII. de Ref. cap. 6.* Imo si Ecclesia, vel beneficium non fuerint Episcopalis liberae collationis, sed iurispatronatus, praesertim laicis, sine Patroni consensu nullius esset momenti facta per Episcopum eorum unio *Cap. 8. de Donat. 20. de Iurepatr. Clem. cit. ib. & Trid. Sess. XXIV. cap. 13. de Ref.*

V. Circa hanc beneficiorum, & Ecclesiarum unionem praeter ea, quae ex iure communi delibavimus nonnulla ulterius sancivit Tridentinum, & I. *Sess. VII. cap. 4. de Ref.* prohibuit beneficiorum unionem personalem, & temporalem, seu ad vitam alicuius factam; II. *Sess. XIV. cap. 9. ib.* vetuit ne beneficia unius Dioecesis beneficiis alterius uniantur sub quocumque praetextu, etiam augendi divinum cultum. III. *Sess. XXIV. cap. 13.* ne Parochiales Ecclesiae uniantur in posterum Monasteriis, Abbatibus, dignitatibus quoque, sive Praebendis Ecclesiae Cathedralis, vel Collegiatae, aut aliis etiam simplicibus Beneficiis, hospitalibus, militaribusve Ordinibus &c. IV. *Sess. XXV. cap. 9.* ne accessiones fiant per viam unionis de beneficiis liberis ad Ecclesias iurispatronatus subiectas, quia eiusdem naturae cum ipsis, quibus uniuntur, evaderent.

VI. Praeterea *Sess. XXI. cap. V. de Ref.* decernit posse Episcopos etiam tanquam Apostolicae Sedis delegatos iuxta formam iuris, absque praepudio tamen obtinentium, uniones perpetuas facere, quarumcumque Ecclesiarum Parochialium, & Baptismalium, & aliorum Beneficiorum vel curatorum, vel non curatuum cum curatis propter eorum paupertatem, aliamve causam ab iure permissam, etiamsi dictae Ecclesiae, vel beneficia essent generaliter, vel specialiter reservata, aut quomodolibet affecta. Et *Sess. XXV. cap. 15.* idem statuit circa unionem beneficiorum simplicium, non tamen Regularium, faciendam Praebendis Cathedralis, vel insignis Collegiatae propter ipsarum tenuitatem; & insufficientiam decenti Canonico- rum sustentationi. Imo *Sess. XXIII. cap. 18.* idem concedit etiam in favorem Seminarii Clericorum.

VII. Ex his colligitur primo unionem faciendam non esse in praepudio obtinentis beneficium, vel Ecclesiam: unde si fiat ante vacationem, effectum non sortietur, nisi aut mortuo, aut resignante beneficiato. Idem contingit in be-

beneficio, cuius expectativam quis obtinuisset ante factam unionem.

Colligitur II. Posse Episcopum unire etiam beneficia Romano Pontifici reservata &c. Verum id non extenditur ad ea, quae ipsi perpetuo reservantur, ut prima Dignitas post Episcopum in quavis Cathedrali per Regulam III. Cancellariae, cum de his disponendi ablata sit Episcopis potestas per reservationem eiusmodi.

Colligitur III. quod facta per Episcopum de his beneficiis unione, eius effectus impediri nequeat per quamcumque provisionem etiam resignationis causa factam. Hinc si beneficium unitum, vacaret in Curia, ac proinde esset reservatione affectum, non posset tamen valide impetrari, nisi Romanus Pontifex expresse dispensaret.

VIII. Verum quod spectat ad unionem in favorem Seminarii Clericorum, notate Concessam Episcopis per Tridentinum facultatem restrinxisse Clementem VIII. quem citat Fagnanus in Commentario ad Cap. 8. de Excess. Prael. ab eo quippe sancitum est non posse Episcopos unire Seminariis beneficia, quae obtinentur ab iis, per quorum mortem, quocumque mense contingat, certum sit ea beneficia vacare in Curia.

T I T V L V S XX.

De Immunitate Ecclesiarum.

I. Immunitas generatim est a muneribus, & oneribus exemptio L. I. ff. de Iur. Immunit. & in hac potissimum exemptione consistit Ecclesiastica libertas proprie dicta. Munis quippe, Graecis *Λειτουργικός* est qui publicis oneribus addicitur, & obstringitur; contra vero Immunitis seu *Ἀλειτουργικός*, qui ab iisdem eximitur, quapropter prout in praesenti accipitur Immunitas optime definiri solet: *Concessio Ecclesiae facta, qua eius loca, res, & Personae a communi onere liberae sunt, & exemptae.* Ex qua definitione apparet istiusmodi concessionem sub triplici venire respectu. Vel est enim in favorem Ecclesiarum, aliorumque ob pietatem erectorum locorum, & dicitur *Immunitas*

localis, vel favorem respicit clericorum, & dicitur *Personalis*; vel tandem res tuetur Ecclesiae, aut Clericorum, & nuncupatur *Realis*.

II. *Localis* immunitas ea dicitur, qua gaudent loca Deo consecrata, ut sunt Ecclesiae, licet fuerint tantum benedictae *Cap. Ecclesia b. t.* imo si vel interdictae, & pollutae, vel destructae absque Episcopi auctoritate, dummodo desperata non sit earum reparatio. Haec vero immunitas ad omnia quoque extenditur loca Ecclesiae Principali adiacentia, ut sunt Sacristia, Porticus, Atrium &c. & ad omnia pia loca, Episcopi auctoritate fundata, & ad Palatium Episcopi etiam ab Ecclesia seiunctum *Can. Quisquis XVII. q. 4.*

Ratione igitur huius localis immunitatis in Ecclesiis nedum agitandae non sunt causae criminales *Cap. Cum Ecclesia cit.* sed nec etiam Civiles ad forum secularem spectantes ex Conc. Lugdun. Decreto in *Cap. Decet 2. b. t. in 6.* quare sententiae in ipsis latae, & processus nullius prorsus sunt roboris *ib. §. Ordinarii, & Cap. in damnis 1. b. t.*

Ad hanc eandem immunitatis speciem spectat ius *Afyli* loci scilicet inviolabilis, & consecrationis lege tuti, apud quem confugientes sine piaculo inviti extrahi non possunt; quod ius apud omnes nationes semper viguit, & ut de aliarum Gentium asylyl taceam, sacrae veteris Testamenti paginae satis nos docent apud Ebraeos Iosue sex refugii constituisse civitates. In lege vero gratiae huiusmodi asylyl immunitas obtineri etiam coepit in Ecclesiis, & Altaribus Deo consecratis post magnum Constantinum, ut patet ex Concilio Arausicano, & Gelasio apud Grat. *Can. Eos qui Dist. 87. & Can. Frater XVII. q. 4.* Quinimo idem hoc privilegium in Christianae Religionis obsequium confirmarunt deinde Honorius, & Theodosius Imperatores *l. 2. C. de his qui ad Ecclesiam confug. & l. 4. C. Theod. eod.* Et quamvis id minus probasse videatur Arcadius, qui suadente Eutropio debitores, & ratiociniis obnoxios ab Ecclesiis, harumque septis avelli posse sanxit *l. 3. C. Theod. eod.* de qua re Chrysostomus hom. in Eutropium; Leo tamen Imp. integram Theodosii Constitutionem renovavit. *l. praesenti C. eod.*

H

III. Hoc

III. Hoc idem deinde veluti pietati Christianae consonum saepius probavit Ecclesia in variis Conciliis, ac Summorum Pontificum Statutis; & praecipue Innocentii III. Decretali in *Cap. inter alia 6. b. t.* Quam demum confirmavit, explicavitque Gregorius XIV. in sua Const. *Cum alias nonnulli*; Quare Debitores, & Delinquentes nisi in casibus exceptis, ubi ad Ecclesiam confugerint, inde extrahi nequeunt, dummodo per baptismum vivant in gremio Ecclesiae. Etenim iuxta probabiliorem DD. opinionem hoc iure gaudere non debent Infideles, Iudaei, Pagani, &c. quia digni non sunt, ut tueantur in Ecclesia qui eius gremio, & tutelae per baptismum se committere nolunt.

Quinimo ab eo etiam favore plures Christianorum excluduntur, de quibus expresse in utroque iure fit mentio; & I. quidem *qui sunt iuris alieni*, quique non ob aliam causam ad Ecclesiam confugiunt, nisi ut suos respective dominos, aut Principes debito fraudent servitio, uti de servis statuitur *Cap. 6. b. t.* & de remigibus, ac militibus docent DD. II. Propter criminis atrocitatem *publici Latrones*, viarumque *grassatores*, de quibus cod. *Cap. 6.* Latronis nomine venit, qui praedae, seu rapinae causa homicidium committit, aut intentat *l. Capitalium §. Famulos ff. de poenis, & XXII. q. 3. Can. 19.* Viarum autem Grassatores dicuntur ex laud. Bulla Gregorii XIV. qui itinera frequentata obsident, ut viatores ex insidiis aggrediantur etiam sine caede, praesertim dum pluribus vicibus id tentarint, & de delicto constat *notorietate*, aut *iuris*, aut *facti*. III. Nocturni *agrorum depopulatores*, qui nimirum agrorum segetes, vinearum fructus &c. comburant, destruunt, devastant *l. 1. C. quando licet sine Iudice, & Cap. 6. cit.* Imo etiam *diurni* ex ead. Bulla, & ex Barbosa *lib. II. de Iur. Eccl. cap. 3. n. 87.* IV. *Quo spe immunitatis* in ipsa Ecclesia, vel Coemeterio homicidia, vel membrorum mutilationes committunt *Cap. fin. b. t.* V. *Homicidae proditores* *Cap. 1. de Homic.* Quod nedum intelligitur de eo, qui alium sub amicitiae colore per insidias, & industriam occidit; aut inimicum fideiussione praestita de non offendendo, postea necaverit; sed de illo etiam, qui post aliquot ab rixa horarum intervallum adversarium aggressus ex deliberato animo ipsum interfecit.

esse praesumitur, ut declaravit Clemens XII. in sua Constitutione anni 1733. VI. *Assassini*, illi videlicet, qui pretio conducti alium occidunt, vel pretium dant alteri, ut homicidium patret. His omnibus iure merito Gregorius XIV. in prae laud. Bulla adnumerat quoque *lesae Maiestatis in Personam ipsam Principis, & haeresis reos*. Quamobrem ita delinquentes asyli favore destituuntur, & servatis servandis ab Ecclesia, si ad eam confugerint, extrahi etiam inviti possunt impune.

IV. Ad alias Immunitatis, quas supra recensuimus, species, quod attinet, ut clarius, quae de ipsis in sacris Ecclesiae Canonibus statuuntur, intelligantur, breviter hic notetis oportet, triplicis potissimum generis esse onera, de quibus occurrere nobis quit sermo; alia siquidem *Personalia*, quae nimirum Personis ipsis imponuntur, ut Capitatio, militia, tutela &c. Alia vero *realia*, quae rebus ipsis adligantur, nulla prorsus habita possidentis Personae ratione. Alia demum *mixta*, quae Personis revera imponuntur ratione rerum possessarum, ut cum Princeps suis imperat subditis decimarum ex bonis omnibus, quae possident, solutionem.

Cum igitur Ecclesiasticae Personae divino sint cultui omnino mancipatae, naturali utique rationi consonum, & recto rerum ordini conforme existimarunt piissimi quoque Imperatores, qui Christianae religioni nomen dederant, ut ab omni *personali* militiae, tutelae, aut alterius publicae administrationis onere, cui ceteri cives subiacebantur, Clericos eximerent, ne horum muerum occasione ab Altaris ministerio avocarentur. Imo cum non propriis stipendiis, sed ex famulatu Ecclesiae praestito aut viverent ipsi, aut vivere saltem censerentur, aequum etiam, honestumque fuit eos liberare a personalibus quoque tributis, communibusque oneribus, quae per capita, sive iuxta numerum personarum, sive respectu bonorum, quae possident cives, imponi solent, cuiusmodi est census ille, qui *capitatio* dicitur *tot. tit. C. de capit. Civ. l. 1. C. de Episc. & Cler.*

Ex eadem quoque ratione, quod quemadmodum universa Ecclesiae suppellex, vasa sacra, proventus, ac cetera Deo dicata ab oneribus communibus haberentur exempta; ita etiam Clerici, qui ut diximus, non nisi ex

eleemosynis, & Ecclesiae proventibus primùm alebantur, reali immunitate gauderent postea eorum Bonorum, quae ab Ecclesia propriae cuiusque sustentationi deputari coeperunt, dummodo tamen illa ad Ecclesiam non transierint cum aliquo antiquo onere civili, vel censuali, a quo sicut non eximitur Ecclesia, ita a fortiori neque Clericus, qui eius intuitu possidet. Quapropter non minus circa haec, quam circa patrimonialia bona attendendae sunt locorum consuetudines. Haec sane, quae usque modo diximus colliguntur aperte ex *Capp. 2. 4. & 7. b. t.* ac ex *Capp. 1. & 3. eod. in 6. Clem. un. eod.* aliisque pluribus iuris nostri locis, & ex communi Canonistarum sententia post *Gloft. ad Cap. Sanctitum I. de Censibus.*

V. Viget nunc quoque alterum Clericorum privilegium eidem Ecclesiasticae Immunitati innixum, quod *Canonis*, & *Fori* Canonistae passim adpellant; & ex eo duo potissimum proveniunt. I. Ut si quis suadente Diabolo in eos violentas iniecerit manus iuxta Canonem *Si quis XVII. q. 4.* excommunicetur ab solo Rom. Pontifice absolvendus; alterum vero, ut Clerici ab seculari eximantur foro iuxta *Cap. 5. & 12. de For. Compet.* Quoties tamen sermo non sit de actionibus ex *contractu* ortis, in quibus de bonis feudalibus agatur, tunc enim penes Dominum Feudj, etiam laicum, erit iudicium *Cap. 6. & 7. eod.* Quemadmodum nisi sermo sit de actionibus ex *delicto*, in quibus ex iure etiam Canonico Clerici huiusmodi privilegio expoliati intelliguntur, ut I. si ceu *Assassini* accusantur, vel tanquam eorum fautores, aut submissores ex *Cap. 2. de Homic. in 6.* quod confirmavit, & explicavit Clemens VIII. in sua Constitutione *aequa*, & *circumspecta*. II. Si ab clericali habitu Apostatae fuerint delinquentes inventi *Cap. 1. de Apost.* III. Si per solemnem degradationem, aut alio quolibet modo clericatus privilegia amiserint &c. *Cap. 2. de Poenit. in 6. & Clem. 3. de Vit. & Honest. Cler.*

VI. Deducunt demum Canonistae ex hac immunitate alterum Clericorum privilegium in *Cap. Odaardus de solution.* expressum, ut nempe si eorum quis ad inopiam adeo redactus fuerit, ut solvendi alienum aes non sit capax, nec excommunicari, nec vexari debeat, sed sufficiet quod iurciurando promittat se soluturum, ubi ad meliorem fortunam pervenerit.

TI-

TITVLVS XXI.

De Censibus, Exactionibus, & Procuracionibus.

I. **C**ensus in generali, & communiori acceptione significat quicquid annuatim in quantitate, seu summa persolvitur *L. aetatem ff. de Censib.* eaque ratione Tributum, & pensionem comprehendit. Hic autem sumitur pro certa pecunia, quae de Ecclesiae proventibus Episcopo ex lege debitae recognitionis solvitur, vel aliis, qui praesunt, & aliquando etiam vel Clericis, vel Patronis, *Cap. 6. de Relig. dom. Cap. Recepimus 8. de Privil. Cap. Querelam 25. de Elect.* Quoties eiusmodi solutio in signum subiectionis fiat propter impositionem tempore foundationis, aut consecrationis Ecclesiae decretam, dicitur *Census antiquus*. *Novus* vero si propter impositionem recentiore, & aliis Ecclesiis regulariter non communem, de quo sermo est *Cap. 7. b. 1.*

Qua de re illud praesertim observandum non posse ab Episcopo, vel alio Praelato novum censum imponi super antiquum *Cap. Scientes 3. Cap. prohibemus, & Cap. praeterea 8. b. 1.* quamvis imponatur Ecclesiis de manibus secularium ereptis *Cap. de Ecclesiis 9. b. 1.* & etiam si Rector noviter recipiens Ecclesiam in sua institutione iuraverit novum censum supra antiquum impositum solvere; quo in casu tenetur Episcopus cum ab eiusmodi iuramento absolvere *Capp. 13. & 15. b. 1.* ne Ecclesiae ex annua census solutione nimis graventur contra *Regulam Textus in Cap. Sancitum 1. b. 1.* Sunt nihilominus aliqui casus, in quibus licet Episcopo novum censum imponere; & I. quidem si Ecclesiam eximit a sua iurisdictione *Cap. Venerabili b. 1.* II. Si ex iusta causa ad tempus dumtaxat imponatur, cum prohibitio ex laudatis iuris Capitibus non procedat, nisi de censu perpetuo; & demum si Episcopus pro Juvenum educatione, & instructione Seminarium erigere velit; nam ex *Trid. Sess. XXIII. Cap. 18. de Reform.* pro eiusmodi pio opere omnibus beneficiis suae Diocesis censum etiam imponere poterit.

II. Exactiones generatim sumptae comprehendunt tales, collectas, ac omne pensitationis genus. Hæc tamen illud tantum significant, quod habet perpetuam, ac certam præstationem, & possunt esse vel *ordinariæ*, vel *extraordinariæ*. Inter ordinarias exactiones, uti colligitur ex *Capp. 19. & 20. b. t.* adnumeratur I. *Quarta Canonica*, quæ scilicet iuxta locorum consuetudines detrahi solet ex relictis Ecclesiæ, ubi huiusmodi donationes fieri ex peculiari locorum Statuto non vetantur, & aliis eidem obvenientibus; & hæc vel est Episcopalis, quæ scilicet solvitur Episcopis, vel Parochialis, quæ solvitur Ecclesiæ Parochiali, de qua alibi sermonem erimus habituri. II. adnumeratur *Quarta Decimationum*, scilicet quæ debetur Episcopo ex omnibus Decimis iuxta Regionum consuetudinem. III. denum *Synodaticum*, seu annua pensio Episcopo debita ex ordinatione Synodi, quæ singulis annis celebrari debet; hæc autem pensio *Cathedraticum* etiam appellatur aliquando, ex eo quod solvi videatur in recognitionem Cathedrae Episcopalis.

Extraordinariæ vero exactiones, vel Collectæ non imponuntur ab Episcopis iuxta Later. Conc. in *Cap. Cum Apostolus 6. Prohibemus 6. b. t.* nisi certis in necessitatibus supervenientibus ex manifesta causa, quæ ubi accidit, quia moderatum auxilium cum charitate postulare debent Episcopi, *subsidiū charitativum* huiusmodi exactiones appellari consueverunt; Earum fit mentio in *Cap. Vag electionis ext. Com. b. t. Clem. I. & 2. eodem.*

III. Procuratio prout hic sumitur est *victus*, seu *substantio* Episcopo debita occasione visitationis peragendæ per suam Dioecesim ex redditibus Ecclesiarum, quæ visitantur. Numerus tamen harum Procurationum excedere non debet numerum dierum, quibus iuxta mora fit in loco, qui visitatur ex Later. IV. in *Cap. Procuraciones 23. b. t.* & iuxta Ecclesiæ facultates subministrari debent *Cap. Cum nuper 25. b. t.* Forma vero exigendi Procuraciones, ut immoderatis impensis non graventur Ecclesiæ visitatæ, præscribitur in Later. III. *Cap. Cum Apostolus cit.*

IV. De modo eas præstandi varia fuit Ecclesiæ dispositio. Olim ab invitis non poterant procuraciones exigi in pecunia, sed proprio victuali Visitator contentus esse

esse debebat *Can. Relata I. q. 1.* bene tamen a volentibus *Can. Relatum X. q. 3.* Deinde Innocentius IV. in *Cap. Romana 9. Procuraciones 1. h. t. in 6.* statuit ut omnino procuraciones redimi pecunia non possent; quod etiam postea confirmatum fuit a Gregorio X. in *Lugd. Conc. Cap. Exigit 2. h. t. in 6.* At Bonifacius VIII. longa temporum experientia cognoscens has Constitutiones sine magno Ecclesiarum incomodo, & dispendio observari non posse, permisit, ut huiusmodi procuraciones non in victualibus, sed in pecunia praestarentur; dummodo tamen pro singulis diebus singulae exigantur, etsi eodem die plures Ecclesiae visitentur *Cap. Felicis 3. h. t. in 6.*

V. Solvi eadem debent ab omnibus Ecclesiasticis si-
ve Secularibus, siue regularibus, siue Monasteriis, siue Per-
sonis, a quibuscumque Capellis, & Oratoriis publicis, E-
piscopi auctoritate erectis, nisi speciali privilegio per
Sedem Apostolicam sint ab hoc onere exempta *Cap.
Cum instantia 17. Cap. Cum Venerabilis 21. & Cap. Cum
Venerabili 24. h. t.*

T I T V L V S XXII.

De Capellis Monachorum.

I. Q Voties in iure nostro mentio de Capellis Monacho-
rum occurrit, earum nomine veniunt Ecclesiae Cu-
ratae potissimum, seu *Parochiales* Monasterio, vel alteri
parochiali incorporatae, & subiectae, quae olim admini-
strabantur tantum per Sacerdotem Secularem, quem Mo-
nachi Episcopo praesentabant *Cap. 1. h. t.* Hodie autem si
Ecclesia Parochialis pleno iure sit Monasterio unita ad
Praelatum Regularem spectat instituere ibi Vicarium, et-
iam Regularem, ab Episcopo tamen adprobandum, cui
consonat Tridentinum *Sess. XXV. cap. 11. de Regul.* Imo
si eiusmodi fuerit incorporatio, ut Populus sit etiam exem-
ptus ab Episcopi iurisdictione, & Monasterio omnino sub-
iectus, tunc neque approbatio Vicarii pertinet ad Episco-
pum,

rum, sed omnia ad solum Praelatum Regularem, ut colligitur ex *Can. 1. XVI. q. 2. Cap. 1. de Privil. & Clement. un. de Excess. Prælat.*

II. Atamen si huiusmodi incorporatio non sit pleno iure Monasterio facta, sed tantum quoad temporales redditus percipiendos cum solo iure praesentandi, non autem investendi, debet constitui Rector perpetuus, ut colligitur ex *Cap. 31. de Præb. 3. de Privil. & unico b. t. in 6.* Quia quaevis Ecclesia Parochialis ex *Trid. Sess. XXIV. Cap. 3. de Ref.* suum habere debet perpetuum Rectorem; Qui quum Abbas non sit in beneficio haud plene incorporato, alius propterea esse debet. An vero etiam Regularis possit dubitant Canonistae.

T I T V L V S XXIII.

De Religiosis Domibus.

I. **D**Omus Religiosa est locus pius non consecratus, sed tamen auctoritate Episcopi erectus; unde quamvis lato modo Ecclesiae, Tempia, & Capellae consecratae loca Religiosa dici possint, stricte tamen sub eo nomine non veniunt nisi Monasteria, & hospitalia praesertim hospitibus accipiendis inventa, ut Xenodochia, Orphanotrophia. Gerontocomia. Brephotrophia. Nosocomia. Prochotrophia, de quibus fit mentio *Can. 23. XXIII. q. 8.* Item Confraternitates, Congregationes, aliaque loca quaecumque ad charitatis, & Religionis opera, aliumque pium usum destinata, dummodo auctoritate Episcopi sint erecta ex *Capp. 4. & fin. b. t.*

II. Quantum ad Monasteria pertinet, sicut de Ecclesiis diximus, nova aedificari nequeunt sine Dioecesani Episcopi licentia *XVI. q. 7. Can. 41. XVIII. q. 2. can. 12. & seq.* imo nec sine Rom. Pontificis consensu ex *Cap. unico de Excess. Prælat. in 6.* & licet hoc postea per *Trid. Sess. XXV. Cap. 3. de regul.* ad solius Episcopi facultatem revocatum fuerit, nihilominus pro Italia saltem, & Insu-

fulis adjacentibus Bonifacii VIII. dispositionem observari iussit Innocentius X. in Constitutione, quae incipit *Instaurandae*. Praeterea in Monasteriorum erectione potissimum observanda sunt Decreta Clementis VIII. in Constitutione *Quoniam ad institutum* an. 1603. Gregorii XV. in Constit. *Cum alias* an. 1622. & Urbani VIII. in Constit. *Rogatus Pontifex* an. 1623.

III. Loca omnia religiosa Episcopi auctoritate erecta de iure communi ipsi subiiciuntur, itaut omnium respectu fundatam in iure intentionem habeat, & qui oppositum contendit probare tenetur privilegium exemptionis *XVI. q. 7. can. 10. & Capp. 3. 6. 7. & 8. b. t.* Dixi de iure communi, nam ex speciali privilegio plura loca pia ab Episcopi iurisdictione exempta sunt, & praesertim Regularium Monasteria fere omnia.

IV. Ob hanc locorum Religiosorum subiectionem, praeter iurisdictionem fori contentiosi, & Episcopaliurum iurium exactionem, duo principaliter competunt Episcopo, I. videlicet ius visitandi ipsa loca, exceptis tamen iis, quae sub Regum immediata protectione sunt, nisi eorum consensus accesserit ex Trid. *Sess. XXII. cap. 8. de Ref.* II. Quod administratores locorum religiosorum teneantur rationem administrationis Episcopo reddere, sublatis hac in parte privilegiis & consuetudinibus quibuscumque, nisi de eo secum in institutione cautum esset ex eodem Trid. *Cap. 9. ib.* Hoc autem non extendi ad hospitalia, aliaque pia loca militarium Ordinum, & aliorum Religiosorum docet Fagnanus ad *Cap. 4. b. t.* & colligitur tum ex *Clem. II. §. Praemissa b. t.* tum ex Trid. ipso, quod non nisi de secularibus loquatur, non de regularibus, ut declaravit S. Congregatio apud Fagnanum *ibidem*.

V. Quod attinet ad loca religiosa sine Episcopi auctoritate erecta, quamvis eius iurisdictioni non subiaceant, plura tamen potest in ipsis Episcopus, nimirum post Fundatoris mortem inquirere, videre, & visitare an iuxta Fundatoris intentionem, & voluntatem deputata bona debite administrantur; quia ut dicitur *Cap. 17. de Testam.* in omnibus piis voluntatibus per locorum Episcopos providendum, ut secundum Defuncti voluntatem cuncta procedant.

dant. Potest insuper singulis annis exigere rationem administrationis, ut colligunt Doctores ex loco Trid. supra cit. quod generaliter intelligendum est, prout Sacram Congregationem declarasse refert Fagnanus loco citato.

T I T V L V S XXIV.

De Sepulturis.

I. Triplici sensu accipi potest sepulturae nomen, I. quidem pro loco ipso, ubi Cadavera sepeliuntur, ut *Can. Si unum XII. q. 2. Can. Secundum XXIV. q. 8. & Cap. 3. h. t. II. Pro cura sepeliendi corpora defunctorum ut in Clem. 2. h. t. III. Pro ritu, seu officio, quod sepeliendis corporibus impenditur, ut in Can. Praecipendum XIII. q. 2. & Cap. non satis in fin. de Symon. ubi sepulturae prohibetur venditio, quod & apud Ethnicos nefas ex Cicer. in Verrem.*

II. Sepultura primo sensu accepta est locus auctoritate Episcopi benedictus, & Coemeterium passim appellatur, quod idem est ac Dormitorium XIII. q. 1. & 2. c. qui divina. Olim nec in Ecclesiis, nec in Civitate quidem sepulchra fieri permittebatur L. Mortuorum C. de Religiosis & sumpt. funer. Apud Christianos vero obtinuit, ut iuxta Ecclesias, vel intra earum confinia in atrio, porticu, & Exedris sepulchra fierent ex *Can. Sicut XVII. q. 4.* Imo etiam obtinuit tandem seculo 8. & 9. ut intra Ecclesiam sepelirentur defunctorum corpora, & praesertim Episcoporum, Abbatum, atque digniorum ex Presbyteris, & etiam ex Laicis, de quibus fit mentio *Can. 18. XIII. q. 1.* Optavit tamen semper Ecclesia, ut vetus consuetudo servaretur, quemadmodum fidem faciunt sequentium temporum Statuta, & Rituale Rom. iussu Pauli V. editum, ubi praescribitur, ut servetur consuetudo, si viget, mortuos in Coemeterio sepeliendi, & ubi fieri poterit, restituatur. Haec de loco sepulturae in genere.

III. Ad locum ergo, in quo quis sepeliendus quod attinet, quamvis de iure ordinario unusquisque sepeliri debeat

beat in propria parochiali Ecclesia *Cap. qui 3. b. t. in 6. & Cap. Ex parte 3. b. t.* nihilominus cuique habenti perfectum rationis usum fas est ubi voluerit sepulturam sibi eligere *Cap. Nor instituta 1. b. t.* itaut si Ecclesia electa cadavere fuit privata, illud ei restituendum erit cum omnibus, quae occasione funeris obvenire contigerint *Cap. Cum liberum 6. b. t.* Et licet filii sint humandi in sepulchro Parentum *Can. Ebron XIII. q. 2.* & mulier in sepulchro viri *Can. Vnaquaeque ib.* nihilominus hoc cessat quoties diversa praecessit expressa electio *Can. de uxore ib.* Imo filii puberes alioquin ex quavis causa incapaces testandi, sunt tamen semper capaces eligendi sibi sepulturam, dummodo eiusmodi electio libere, & sponte fiat *Cap. Animarum 2. b. t. in 6.* Insuper nulla quoque praecedente electione si quis habet sepulchrum Maiorum in eo erit sepeliendus *Cap. 1. b. t. & Cap. 3. eod. in 6.* quin imo Patri liberum erit filios impuberes etiam extra Parochialem Ecclesiam sepelire *Cap. licet 8. b. t. in 6.* Religiosis tamen adempta omnino est facultas eligendi sibi sepulturam, sed in propriis Ecclesiis sepeliri debent *Cap. Religiosi 5. b. t. in 6.* nisi longius a suis Monasteriis absint, ut eo commode transferri nequeant, ut notat *Gravina ad b. t.* Ita pariter Clerici beneficiati sepeliendi sunt in ea Parochia, ubi beneficium habent, & servitium cum residentia exhibent *Cap. 1. b. t. & Cap. 2. eod. in 6.*

IV. Ad contentiones, & iurgia vitanda, quae saepe oriuntur Regulares inter, & Parochos occasione funerum, notate, in casu quo quis apud Regulares sepulturam elegerit, I. si nulla fuerit peculiaris loci consuetudo, aut pactum initum, posse Regulares etiam irrequisito, & invito Parocho adfociare Corpus defuncti, illudque ad sepulturam comitari ex communi Canonistarum sententia; Parochias vero intrare cum Cruce ex Leone X. in *Concilio Later.* non posse ad levanda corpora defunctorum, nisi prius praemonito, ac requisito, licet invito, Parocho, quemadmodum declaravit etiam Sacra Congregatio an. 1604. apud Donatum p. 3. *traff. 9. q. 19. II.* Nec Religiosos, nec defuncti haeredes cogi posse, ut Cadaver prius ad Parochialem deferant, ibique deponant pro accipienda ultima quasi benedictione, sed rectè deferre possunt ad regu-

gularem Ecclesiam Parocho tamen requisito, & vocato ex declaratione Sixti IV. ut tradit Rodriquex *Tom. III. q. 83. art. 21. III.* Dum defertur corpus ad sepulturam non esse deferendum Crucem Parochialis Ecclesiae, sed illius, in qua sepelitur, ut docet Barbosa *de Offic. & Potest. Parochi p. 3. cap. 26.* Poterit tamen Parochus etiam cum stola funus comitari, & regularem Ecclesiam ingredi, dummodo se absteineat ab actu sepulturae, & funerum officiis ex eodem Barbosa *ibidem*.

V. Ad Tituli complementum ex data superius Ecclesiasticae sepulturae definitione colligendum est, plures eâ per S. Canones privari, & I. quidem Infideles *Can. 27. & 28. dist. 1. de Conf.* II. Haereticos, eorumque fautores, & acceptatores *Capp. 8. & 13. de haeret.* III. Omittentes per annum integrum confiteri, & communicari, praesertim in Paschate sine rationabili causa *Cap. 12. de Poenit. & Remiss.* IV. Occumbentes in duello ex *Trid. Sess. XXV. cap. 19. de Ref.* V. Usurarios manifestos *Cap. 4. de usuris.* VI. Religiosos proprietarios, nisi in fine poenitentiam agant *Cap. 4. de statu Mon.* VII. Notorie excommunicatos *Cap. 12. h. t.* VIII. Sui ipsius culpabiles interemptores *XXIII. q. 3. Can. 12.* IX. Denique decedentes in notorio, ac certo peccato mortali *II. q. 2. Can. 16.*

T I T V L V S XXV.

De Canonica Portione.

I. **D**Vplois portionis Canonicae mentionem faciunt Canones, *Episcopalis* nempe, & *Parochialis*; quia de Bonis defuncti datur vel Episcopo, vel Parocho. De prima nonnulla diximus in huius *lib. Tit. XXI. §. II.* & in iure Decretal. vestigia deprehenduntur in *Capp. 14. & 15. de Testament. & ult. volun.* ac etiam *16. de Off. Ordin.* ubi haec portio, quarta mortuorum appellatur; quare nonnisi animadvertendum occurrit ipsam de quibusdam Ecclesiae, vel pio alteri loco relictis ad certum usum destinatis percipere non licere Episcopo *Cap. fin. de Testam. &c.*
Cir-

Circa illius quantitatem nihil ab iure definitum est, nam aliquando medietas Episcopo assignatur *Can. 8. X. q. 1. 2.* aliquando tertia pars, ut *ib. q. 2. Can. 25.*

II. De Parochiali ergo praecepue sermonem institui-
mus; pro cuius clariori intelligentia breviter notetis ve-
lim, quod licet terrae fundus nondum benedictus, aut con-
secratus emi, & vendi possit, non minus ac ceterae pro-
fanae res; tamen pro loco semel benedicto, & auctorita-
te Episcopi ad Ecclesiasticam sepulturam iam destinato ni-
hil prorsus exigi potest absque Simoniae piaculo *XIII. q. 2. Can. 12. & seqq.* ubi S. Gregorius M. in oppositam
invehit consuetudinem. Cuius doctrinam secuti sunt
deinde Alexander III. in *Capp. 8. & 9. de Simonia*, &
Honorius III. in *Cap. 13. de Sepulchris*. Vnde apparet
multo magis prohiberi aliquid exigi pro ipsis exequiis, &
funerali officio persolvendis.

Cum autem hisce Statutis, nequaquam reprobetur
laudabilis, & a primis seculis recepta consuetudo facien-
di in funeribus oblationes pro mortuis, proinde neque
Clericis eas recipiendi potestas adempta est, imo quod
Clericis vetitum est exigere, Laicis inculcatum est ut fa-
cerent, ac receptas offerendi consuetudines religiose cu-
stodirent *Cap. 42. de Simon. & laudatis supra Canonibus*
ubi etiam decernitur ut Ordinarii locorum ad earum con-
suetudinum observantiam, intra terminos tamen a munici-
palibus pragmaticis definitos obligare possint fideles.

III. Ne ergo Parochialis Ecclesia, quoties defunctus
Parochianus, aut in sepulcro Maiorum, aut in alio spe-
cialiter electo extra Parochiam sepelitur consuetis prive-
tur subsidiis, statuerunt Canones, ut Parocho canonica por-
tio tribuatur, ut dicitur *Cap. 4. De Sepulchris*, quae e-
tiam quarta Parochialis appellatur *Cap. 10. eod. vel quarta
funeralis*, ut in *Trid. Sess. XXV. de Ref. cap. 13.*

IV. Et quidem iure communi attento haec quarta su-
menda est de omnibus, & solis rebus, quae vel per ultimam
voluntatem, quoties fieri permittitur, ut alibi dixi-
mus, vel ratione funeris obveniunt alienae Ecclesiae, in
qua Defunctus eligit sepulturam, aut in qua tanquam in se-
pulcro Maiorum sepelitur *Capp. 1. 2. 8. 9. 10. de sepult.
& Clem. 2. eodem*. Pro iis ergo locis, ubi possunt hu-
ius-

T I T V L V S XXVI.

De Decimis.

I. Decimarum nomine hic venit quota illa pars fructuum, vel lucri liciti portio Deo debita, suis Ministris solvenda, ut ex *Cap. 16. hoc tit.* colligitur. Hinc Decimae quandoque dicuntur *Praediales*, quae scilicet ex fructibus praediorum praestantur, quandoque vero *Personales*, quae ex industria proveniunt, & artificio Personae, ut ex Mercatura, Venatione, Piscatione &c. quandoque etiam *Mixtae*, quae partim percipiuntur ex pretiis, partim vero ex industria personae, ut sunt Decimae fructuum ex pecoribus, apibusque &c. *Capp. 10. 11. & 18. b. t.*

II. Illud autem discriminis est inter praediales decimas, & personales, quod illae debentur sine impensarum, aut onerum deductione, cum sine deductione sint quoque fructus *Capp. 7. 21. & 22. b. t.* & debentur Parochiis, intra quarum fines praedia sita inveniuntur. Aliae vero solvuntur Parochiis, in quibus Sacramenta percipiuntur, sed deductis expensis, ut colligitur ex *Cap. 18. b. t.* Ratio est, quia decimae Personales percipiuntur ex fructibus civiliter consideratis, quorum nomine illi soli veniunt, qui deductis expensis supersunt *L. fructus 7. ff. soluto Matrimonio*; Decimae vero praediales de fructibus naturaliter consideratis, & quatenus ex re ipsa proveniunt.

Praeter has decimarum species in S. Canonibus saepe fit mentio decimarum *novalium*, quarum nomine illae veniunt, quae de agris olim infructiferis, & de novo ad culturam redactis praestantur. Denique decimae, de quibus est sermo, aliae sunt stricte *Ecclesiasticae*, quae Clericis solvuntur pro honesta eorum sustentatione, intuitu laborum spiritualium eis debitae; aliae *laicales*, quae ad praedictum finem primitus institutae, sed ex concessione Ecclesiae ob iustam causam solvuntur Laicis.

III. Decimae olim in manu Episcopi solvebantur, quibus eas Ecclesiae Ministris pro cuiusvis merito, & indigentia
in

in sua Dioecesi fideliter distribueret *XVI. q. 7. Can. 1.* Postea vero facta Parochiarum, & bonorum Ecclesiasticorum divisione statutum est solvendas esse Parochis *Capp. 29. & 30. b. t.* Qui tamen ex iisdem exactis quartam partem Episcopo exhibere debent *Cap. 16. de Off. Ord. & 4. de Praescriptionibus*, nisi contraria invaluerit consuetudo, aut praescriptio.

IV. Ad solutionem praedialium Decimarum tenentur nedum Parochiani proprii, sed omnes prorsus sive Christiani fuerint, sive Iudaei, vel Pagani, si praedia possideant intra eiusmodi Parochiae fines; propterea quod onus decimarum inest praediis ipsis, cum quo onere praedia transeunt ad quoscunque *Cap. 18. de usur. Capp. 4. 5. & 23. b. t. & Cap. ultimo §. Ceterum eod. in 6. & Can. terris, Can. Si quis locus & XVI. q. 1. & alibi passim.* Adeout ex praediis locatis decimas Conductor, qui fructus colligit, solvere teneatur, cum decima sit pars fructuum, non praedii *Cap. Dilecti, & Cap. a nobis b. t.*

V. Ab obligatione solvendarum decimarum nemo eximitur, nisi I. ex privilegio Summi Pontificis *Cap. Pastoralis b. t.* II. Praescriptione immemorabili si sit absque titulo, cum titulo autem praescriptione quadraginta annorum *Capp. 4. 6. & 8. De Praescrip. & 1. eod. in 6.* III. Decimum conventionem, sive pactis, & voluntaria qualibet remissione *Cap. Quia circa de Privil. & Can. ult. XVI. q. 1.*

VI. Decimae Novalium debentur Parochiali Ecclesiae, in cuius finibus novalia exurgunt; Huiusmodi vero fines desumuntur ex limitibus agrorum *Cap. Cum contingat, & Cap. Quoniam b. t.* Si vero limites ad plures pertineant Ecclesias, his pro rata solvi debent Decimae; & si ex limitibus portio praediorum definiri non possit standum erit Episcopi sententiae, utri velit plus, aut minus attribuere, quemadmodum DD. ad *Cap. Perpetuit b. t.*

VII. Illud interest praesertim inter huiusmodi decimas; quod praediales solvi debeant ex fructibus praediorum dumtaxat, quae intra limites sunt illius Parochiae, ex dictis *n. IV. b. t.* Personales ex fructibus etiam extra propriam Parochiam perceptis *Cap. 20. b. t. & fin. de Parochis.* Decimae vero Novalium non subsunt contrariae praescriptioni, quatenus si quis alicubi Decimas praescri-

scripserit, praescripisse Novalium decimas non censetur, quia haec postea prodierunt. Imo si concedatur perceptio alicui Decimarum, concessae non intelliguntur Decimae Novalium, quia ipsae novam omnino habent causam *Cap. Cum contingat b. t.*

VIII. Decimas vero non solvens excommunicandus est, & Ecclesiastica sepultura privandus *Can. Omnes decimas XVI. q. 7. & Conc. Trid. Sess. XXV. Cap. 12. de Ref.*

TITVLVS XXVII.

De rebus Ecclesiae non alienandis.

I. Sicut Ecclesia, & Sacrum Ministerium perpetuum sit oportet, ita iugiter illaesum servetur pariter Ecclesiae patrimonium, seu bona temporalia, quae divino cultui, & Ministrorum sustentationi sunt destinata *X. q. 8. c. 2.* Hinc in S. Canonibus res Ecclesiae alienari prohibentur, ubi alienationis nomine nedum venit actus, per quem perfectum rei dominium transfertur, ut accidit in donatione, venditione, & permutatione, sed etiam omnis alienationis species, ut est in Emphyteusi *Cap. 3. b. t.* & in longi temporis locationibus *Cap. 9. eod.* & quaelibet demum translatio dominii, non tantum directi, verum etiam utilis *L. ult. C. de rebus alienis non alienandis.*

II. Quamobrem alienari prohibentur omnino res immobiles, & mobiles praetiosae Ecclesiarum, Monasteriorum, aliorumque piorum locorum, nisi iusta exposcente causa, & servata iuris solemnitate, ita quod si scus fiat alienatio ipso iure sit irrita, & tum alienans, tum alienata recipiens bona praeter alias poenas sententiam excommunicationis incurrat *Cap. 6. 9. & seqq. b. t. 1. & 2. eod. in 6. & Clement.*, quae innovantur a Paulo II. in *Extrav. Ambitosar b. t. inter Comm.*

Immobiliu vero reru nomine intelliguntur tam praedia, domus, & cetera huiusmodi, quae loco moveri non possunt, quam omnia iura, & actiones ad immobilia, ac

uno verbo omnia, quae immobilibus comparantur, ut praediorum servitutes, iura piscandi, aut venandi, annui census &c. *L. qui actionem ff. de reg. iuris*. Mobilia autem praetiosa intelliguntur, quae sunt de thesauro Ecclesiae, vel quae propter pretium, artem, seu antiquitatem conferunt Ecclesiae singularem splendorem, ut sunt aurum, argentum, gemmae, & huius generis alia. Horum omnium itaque alienatio sine praedictis supra conditionibus facta est omnino irrita; imo etsi ipsis intervenientibus Ecclesia per eam fuerit notabiliter laesa, competere ipsi restitutio in integrum, & contractus alienationis foret rescindendus, *Cap. 11. h. t.*

III. Iustae autem causae alienandi res Ecclesiae sunt I. Urgens necessitas, cui nonnisi per alienationem possit provideri *Clem. 1. h. t.* ut si aere alieno gravata, nec alio modo queat ab eo onere liberari. II. Utilitas evidens, & manifesta, cum scilicet ex alienatione maius commodum obveniat Ecclesiae *Cap. 3. 7. & 8. h. t.* III. Pietas, ut si ex bonis Ecclesiae redimantur captivi, alantur pauperes tempore famis &c. *Can. Aurum 12. q. 2.*

IV. Praeter iustam causam requiritur, ut diximus, iuris solemnitas. I. videlicet, ut tractatus Capitularis praecedat; idest Praelatus cum Capitulo, seu Conventu capitulariter congregato, ac unoquoque dicente quid sibi videtur, deliberet an iusta sit causa faciendi alienationem *Cap. 1. h. t. in 6.* II. Eiusdem Episcopi, seu Praelati, & Capituli, vel maioris, saniorisque partis consensus *Cap. 8. h. t.* Siquidem agatur de alienatione bonorum Ecclesiae habentis Collegium, alias sufficit consensus Rectoris, & Episcopi. III. Summi Pontificis beneplacitum, & expressa facultas *Cap. 2. h. t. in 6. & Extrav. Ambitiosae cit.* unde in praxi obtinet, ut pro huiusmodi alienationibus facultas petatur a S. Congregatione Concilii.

V. Sine hac iuris solemnitate nihilominus alienari possunt Terrulae, Vincolae, & minoris pretii similia bona *XII. q. 2. C. 53.* Cui derogatum non est per Extrav. *Ambitiosae*, vel per Tridentinum, ut declaravit S. Congregatio teste Fagnano ad *Cap. 5. h. t.* ubi etiam adserit nonuisse S. Congregationem decernere praedicti minoris pretii

tii quantitatem, sed id consuetudini remisisse locorum, & prudentum arbitrio. II. Res immobiles ab antiquo in feudum, vel in emphyteusim dari solitae, quia Emphyteusi expirante, denuo in emphyteusim concedi possunt, dummodo fiat in Ecclesiae utilitatem, & eadem perseveret primae concessionis causa ex *ead. Extrav.* III. Locatio ad triennium dumtaxat. IV. Res mobiles corruptioni obnoxiae, quaeque usu consumuntur. V. Res nondum Ecclesiae per possessionem acquisitae, quibus iuxta de causa absque iuris solemnitate ad alienationem requisita, potest renunciari.

T I T V L V S XXVIII.

De Peculio Clericorum.

Peculii nomine venit quidquid alicui labore, & industria partum est ex Pomponio, & Florentino in *L. Peculium ff. de Peculio*, quare, ut optime animadvertit Ulpianus in *L. Depositi §. 2. eod.* est veluti parva pecunia, quam scilicet servus, vel filiusfamilias ex donatione, vel mercatura, aut etiam ex servitio castris, vel quasi castris exhibito sibi parat. Pari quoque ratione Clericis peculium competere potest, ut patet ex *Can. Clericus, & Can. duo sunt XII. q. 1.* Quapropter sicut quidquid ex peculio acquirat servus in totum Domino cedit, & peculium ipsum servo moriente ad Dominum ipso iure revertitur *Infl. lib. 2. tit. Per quas Personas cuique acquiritur §. 3.* Ita peculium Clericorum, & per illud acquisita Clerico morienti, ad Ecclesiam pertinent iuxta Canonice sanctionem *Cap. 1. b. t.* nec licet Clerico de iis testari *Cap. 9. de Testam.*

II. Verumtamen quia vetus haec disciplina postremis temporibus non parum fuit immutata, ut intelligamus quae bona in specie sub nomine peculii Clericorum veniant, animadvertatis oportet Clericorum bona iuxta communem tradi solitam divisionem quadruplicis generis esse posse, *Patrimonialia* nempe, *industrialia*, *beneficialia*, & *parishmonialia*. Prima sunt, quae Clericis haereditate, dona-

tionē, Legato, aut alio consimili titulo obvenērunt. Industrialia, quae sibi acquisivit vel personali industria v. g. docendo, scribendo, aliisque operibus, quae ordinis clericalis non sunt, vel acquisivit ex ministerio clericali, puta ex eleemosyna pro Missae celebratione, Verbi divini praedicatione, Sacramentorum administratione, & similibus. Beneficialia, seu Ecclesiastica dicuntur Praebendae beneficiorum, aut etiam quotidianae distributiones. Parsimonialia denique sunt, quae Clericus parcius vivendo, cumulavit de redditibus beneficii.

III. Extra omne dubium est Clericos plenam potestatem habere in bonis patrimonialibus, & industrialibus, ex industria personae acquisitis, adeoque liberum ipsis manet prout maluerint de illis disponere, ut expresse habetur in *Cap. 9. de Testam.* Quapropter huiusmodi bona ad peculium Clericorum proprie non pertinent. Idem extendunt Canonistae recentiores quamplurimi ad bona industrialia ministerio etiam clericali acquisita, & ad parsimonialia, quae patrimonialibus, aut quasi patrimonialibus, non vero ecclesiasticis accenseri debere existimant, ita quod ad peculium Clericorum spectent dumtaxat bona Ecclesiastica, seu beneficialia, quae ex honesta, & commoda Clericorum sustentatione supersunt.

IV. De hisce ergo Ecclesiasticis bonis, & intuitu Ecclesiae acquisitis testari Clericos vetarunt passim S. Canones, vetatque *Cap. 1. b. t.* quod Gregorii M. est, perperam Gregorio IX. attributum, quae disciplina duravit ad XII. usque seculum, fuitque confirmata in Later. Conc. sub Alex. III. relato in *Cap. 7. de Testam.* Verum idemmet Pontifex *Cap. 12. eod.* dicit, quod quamvis mobilia per Ecclesiam acquisita de iure ad alios transferri morientis arbitrio non possint; Consuetudinis tamen non improbandae est, ut de his aliquid conferatur Pauperibus, & religiosis locis, eisque etiam, qui viventi servierant, sive sint consanguinei, sive extranei. Eo itaque tempore factum est, ut potuerint Clerici testari de bonis Ecclesiasticis mobilibus sub quibusdam apposis in dicto Capite moderationibus; quibus utique insistendo Paulus III. in sua Constitutione *Romanus Pontifex* decernit, ut Praelati, & aliae Personae Ecclesiasticae, quae facultatem testandi non habent,

bent, piis locis decimam duntaxat bonorum partem relinquere possint. At Pius IV. in Constitutione *Grave nimis* propter abusum dictae facultatis quaelibet testamenta de Bonis Ecclesiasticis absque licentia Romani Pontificis facta nullius statuit esse momenti.

V. Attamen semel aperta via facile fuit consuetudinem induci, ut Clerici praesertim inferiores de bonis omnibus Ecclesiasticis tam mobilibus, quam immobilibus testarentur, nedum ad pias causas, sed etiam ad profanas; maxime cum vix discerni possint patrimonialia, & industrialia ab iis, quae acquisivit Clericus titulo Ecclesiae, unde satius fuit ea testamenta tolerare, & Clericorum conscientiae relinquere, quomodo de acquisitis ab Ecclesia disponant.

Dixi; *Clerici praesertim inferiores*; nam Episcopi absque Apostolico beneplacito, quod tamen passim obtinent, de bonis Ecclesiasticis testari revera non solent; quamvis id etiam non ubique obtineat, nec in omnibus Regionibus, ut ob defectum praedictae facultatis irrita censeantur ea testamenta. Et haec pro II. nostrarum Institutionum Canonicarum Libro dicta sunt satis,



INSTITUTIONVM

CANONICARVM

LIBER TERTIVS.



Ostquam de Personis, ac rebus est actum, iuxta traditam iuris universi divisionem, de iudicijs nobis agendum superest. Et quia eorum duo potissimum sunt genera etiam in iure nostro, alia nempe ad privatorum negotia proprie ordinata, alia ad publicam vindictam; de primis in praesenti, de alijs in sequenti dicemus libro. Sit itaque

T I T V L V S I.

De Iudicijs, eorumque divisione.

I. Iudiciorum nomine, ut optime ad hanc Rubricam monet Cuiacius intelligere hic haudquaquam debemus *res iudicatas*, quae lites, causasque componunt, dirimuntque; neque *actiones*, quibus ad lites instruimur, ac paramur, ut non raro in Pandectis usurpantur; sed iudicia impraesentiarum non dicuntur, nisi controversiarum, litiumque inter aliquos venturum forenses disceptationes. Hinc inter varias Iudicii definitiones illa mihi probatur magis quam tradit Panormitanus, ut nempe sit: *legitima causae, seu controversiae apud Iudicem facta discussio.*

II. Ex varijs radicibus varia sortita sunt iudicia &
no-

nomenclaturas, & speciales iuris dispositiones. Et quidem ex rebus, seu causis iudicium vel publicum dicitur, vel privatum *Infl. de Publ. Iud. & de Iustit. & Iur. §. Huius studii*; quibus addi potest iudicium *Centum-virale*, seu *Maflae*, Causarum nempe graviorum, ut Tutelae, Vfuscapionis, Haereditatis, Testamenti &c. quorum post *Tullium l. de Orat. & Quintilianum lib. IV. cap. 1.* meminit *Plinius lib. II. epist. 14.* ac *lib. VI. ep. 12.* Ex Personis etiam appellatur iudicium vel *paganicum*, vel *militare*; breviori enim tempore expediri solent lites Militum, quam Paganorum. Ex *litigantium voluntate* evadit iudicium vel *ordinarium*, quod coram Iudice Ordinario fit, vel *Arbitrarium*, seu *Compromissarium*, quod ab Arbitris exercetur *l. penult. C. de recept. Arbit.* Pariter ex *Principis Placito* erit iudicium vel *ordinarium* quoque, vel *extraordinarium*, quod coram Delegato initur *l. 2. C. de Dilat. & can. inducine. III. q. 3. & Cap. quoniam de Probat.* Sunt quoque extraordinaria Iudicia illa, in quibus Iuris solemnitates & Ordo non observantur iuxta Pauli sententiam in *l. Actio de Neg. gest.*, ut accidit in *Summariis*, quae brevi tantum sunt adnotatione, ut loquitur Imperator in *Novel. 82.* ad differentiam *plenariorum*, quae nonnisi iuris ordine servato absolvuntur. Ex *actionum diversitate* demum iudicium vel *Civile* nominatur, quod privata civium negotia respicit, sive *petitorium* ipsum fuerit, sive *possessorium*, vel *Criminale*, quod ad publicam vindictam instituitur.

In Christianâ tandem epochâ celebris alia accessit iudiciorum divisio, ut quaedam nempe *Ecclesiastica* sint, quaedam *secularia*; nam sicuti haec coram Iudice seculari agitantur; ita ea coram Ecclesiastico Magistratu, qui certam causam iudicandam adsumit, vel quia iudicii materia non alium, nisi Ecclesiasticum Iudicem acclamat, puta, quia de rebus agitur spectantibus ad fidem, ceremonias, ritus Sacrorum &c. vel quia Personae iudicantur Ecclesiasticae, quas ad secularem iudicem trahi, nisi in quibusdam casibus, ut monuimus in *Tit. de Eccl. immunit.* non sinit fori, quo gaudent, privilegium.

III. In quolibet autem iudicio tres praesertim interveniunt Personae: *Actor* videlicet, *Reus*, & *Iudex*, ut habetur *cap. 10. de Verb. signif. §. In omni.* Actor ab agendo

dictus est ille, qui actionem intentat contra alium in causa civili; nam si agat in causa criminali *Accusator* appellatur. Reus a re, super qua convenitur, denominationem accepit, estque ille, contra quem in iudicio agitur. Iudex denique est persona, quae iurisdictioni praest, atque Populo iuxta legis praescriptum, locique consuetudinem ius dicit *cap. 10. cit.*

IV. Tanquam Actores, & rei in iudicio stare possunt generatim omnes, paucis exceptis, qui iure prohibentur, ut sunt I. Pupilli, & minores sine Tutoribus, & Curatoribus *l. 1. & 2. C. qui legitimam personam standi in iudicio habeant*; Quibus accensentur quoque filii familias etiam Maiores, quoties proprio nomine agunt de bonis sive profectitiis, sive adventitiis *l. 6. §. Sancimus C. de Bonis, quae liberis*; Scus vero quoties nomine alieno, aut de bonis Castrensibus, vel quasi Castrensibus causam tractant, in quibus etiam contra Patrem agere possunt *l. lis nulla ff. de Iudic.* Imo de iure nostro post XIV. aetatis annum legitime stare possunt in iudicio etiam absque Patris consensu in Causis spiritualibus, Matrimonii scilicet, Decimarum, vel beneficiorum *cap. Si annum 3. h. t. in 6.*

Prohibentur II. excommunicati maiori excommunicatione, qui Actoris partes agere non possunt, bene vero conveniri, ne ex sua malitia commodum reportent; debent tamen per alium interesse, & respondere, cum ad vetitam communionem admitti nequeant *cap. Intelleximus 7. h. t.*

Prohibentur III. furiosi, mentecapti, prodigi, & alii, qui aut rationis usu carent, aut per iudicis mandatum libera bonorum suorum administratione destituuntur; *l. 1. C. de curat. furiosor. & Prodig.* His etiam equiparantur servi, seu mancipia, quorum actus iudiciales, propterea quod sui iuris non sunt, nullius habentur roboris, *l. Servus. C. de Iudic. & l. quod attinet ff. de Reg. Iur.*

Mulieres demum etiam in variis casibus in iure expressis ab Iudiciis non arceantur, si fuerint tamen Claustrales nequeunt e Monasterio extrahi ut iudicio se sistant *cap. Mulieres 2. h. t. in 6.* Item cum nec Capitulum sine Praelato, nec Praelatus sine Capitulo res Monasterii alienare possit *ex cap. 7. Concilii I. Cabilon.* constetque quod, qui

qui rem alienare nequit, nequeat eam in iudicium deducere *l. ait Praetor ff. de iure deliberandi*; ideo nec Conventus sine consensu Abbatis, nec Abbas sine Conventu potest iudicium agitare de bonis, quae sunt ipsis communia *cap. causam 9. & cap. deputati 16. b. t.* Possunt nihilominus quibusdam in casibus etiam sine Praelati licentia Religiosi forum adire, ut v. g. si de Prioratu, Parochia, aut alia agatur administratione, quam in titulum habeant *arg. cap. 16. b. t.* vel si iniuste fuerint gravati, ut colligitur ex *cap. 22. de Rescript.*

V. Iudex autem vel *Ordinarius* est, vel *Delegatus*, seu *extraordinarius*. Ordinarii nomine ille passim intelligitur, qui iure suo, & ratione officii, vel dignitatis iurisdictionem exercet *l. more maiorum ff. de iurisdic.* Inter Ordinarios Ecclesiasticos Iudices principem locum obtinet Romanus Pontifex, nedum propter ipsam ordinariam iurisdictionem, sed propter illam quoque Potestatis, qua fruitur, plenitudinem *cap. 4. de concess. Praeb.* Deinde Patriarchae, Primates, Metropolitae, & Episcopi in suis Provinciis, & Dioecesibus; imo etiam Vicarius Episcopi habens generale mandatum, Capitulum quoque, seu Vicarius Capitularis sede vacante, & alii inferiores Praelati respective ad suos Subditos.

VI. Iudex vero *Delegatus* est, qui iurisdictionem non ratione dignitatis a lege habet, sed ex nuda Superioris commissione ad speciale aliquod negotium. Delegare quidem Iudicem possunt omnes Ordinarii Iudices, ad quos causae definitio de iure spectat *cap. 7. de off. ord. in 6.* licet nequeant totam suam iurisdictionem inconsulto Principe alteri demandare, ut docent DD. passim; quia non tam censerent delegare, quam proprio officio se abdicare, quod propria auctoritate fieri nequit *l. penult. ff. de Off. Praef.* Videte Fagnanum in *Cap. cum causam de Appellat.*

Delegatus huiusmodi Iudex quamvis revera subdelegare nequeat, ut patet ex *l. More maiorum ff. de iurisd.* & ex *cap. Cum causam cit.* tamen Delegatus Principis causam alteri subdelegare poterit *cap. 2. de Off. Leg. in 6. & Clem. un. eod.* quoad eas saltem, quarum gravitas propriam illius praesentiam non exposculet, aut illius Personae industria non fuerit specialiter electa, *cap. si pro de-*
bi-

Uilitate, & cap. fin. de off. Iud. deleg. & cap. Is cui eod. in 6. Et haec de generica Iudiciorum notione, in sequentibus de eorundem initio, medio, & fine.

T I T V L V S II.

De Procuratoribus.

I. **Q**UAMVIS apud Romanos olim haud liceret per Procuratorem agere, nisi pro Populo, libertate, vel Tutela, quibus ex lege Hostilia accessit postea furti dumtaxat actio *Inst. de his per quos agere possumus*; attamen consuetudine demum obtinuit, ut unusquisque in suis negotiis Procuratorem constituat *l. 1. §. Vfus ff. h. t.*

II. Procurator igitur in genere est, qui aliena negotia Domini mandato administrat *l. 1. ff. eod.* quapropter duo in Procuratore desiderantur omnino; primum, quod alterius nomine agat, cum nemo in re propria Procurator existat *l. licet §. Is qui ff. eod.* Secundum, quod sui Domini mandatum legitime confectum habeat ex D. Gregorio M. in *cap. alia quidem 1. h. t.* Si enim illud non adest, aut insufficiens est, nemo pro alio ad agendum in iudicio admittitur, etiamsi caveat Dominum ratum habiturum *l. Pomponius C. h. t.* Imo ne iudicium reddatur illusorium Iudex ex proprio officio, parte quoque non opponente, repellere quiverit Procuratorem mandato destitutum.

III. Procurator legitime constitutus licet egredi nequeat fines proprii mandati, potest nihilominus mandatum interpretari etiam quoad aliqua in eo miuine expressa, *cap. petitio h. t.* dummodo illius generis non fuerint quae speciale requirunt mandatum, ut sunt delatio iuramenti, transactio, in integrum restitutio &c. *cap. quia h. t. in 6.* Quinimo mandatum generale ad negotia extendi etiam potest ad iudicia *cap. qui generaliter ibidem*; licet non possit ullo modo ad contrahendum Matrimonium *cap. Procurator 9. ib.*

IV. Vt quis legitime alterius procurationem accipiat,

piat, quoties ad agenda negotia eligitur annum xvii. aetatis expleverit necesse est; quoties vero ad lites deputatur, requiritur etiam, ut xxv. excesserit *cap. 5. §. fin. b. t. in 6.* Quod tamen maxime cavendum est, ne sit expressè ab iure prohibitus *cap. 1. ib.* Prohibentur sane I. Excommunicati, Pupilli, Minores, & generatim omnes, qui pro se in iudicio stare non possunt. II. Infames pro Personis, aut negotiis ecclesiasticis ex Glossa ad *can. Infamis III. q. 7.* licet iure Caesareo spectato infamiae exceptio contra Procuratorem non admittatur *Inst. lib. IV. de Except. §. fin.* III. Religiosi sine licentia sui Superioris, etiamsi per alium Religiosum proprii, vel alterius Monasterii quis fuerit constitutus, nisi pro suo in eadem lite consorte *Clem. Religiosus b. t.* IV. Clerici omnes in S. Ordinibus constituti saltem pro foro seculari, rebusque temporalibus, sicuti & advocati partes agere prohibentur coram laico iudice, nisi pro se, suaeque Ecclesiae, aut pro pauperibus id praestent *cap. 1. de postuland.* V. Feminae, *l. neque feminae ff. b. t.* nisi agant in causa propria, vel Parentum, qui seipos defendere prae infirmitate nequeunt *l. feminis ff. cod.* VI. Milites ne ea occasione a militia avocentur *l. Militem ib.* VII. Potentes *l. 1. C. Nec licet Potentioribus*, idque ne Procuratoris potentia Iudicem deterreat. VIII. Criminis Capitalis rei antequam suam purgaverint innocentiam *l. Reum C. b. t.* Denique qui Reipublicae causa abfuturi, aut Magistratum inituri sunt, quique perpetuo morbo tenentur, aut sunt inviti *l. neque feminae cit.*

V. Ad idem negotium non unus dumtaxat potest assumi Procurator, sed etiam plures, dummodo dentur eodem tempore *Cap. Si duo b. t. in 6.* Nam secus, per ultimum constitutum semper censetur prior revocatus *l. Si quis ff. b. t. & cap. non iniuste cod.* Ex pluribus vero in solidum datis, qui negotium prius occupavit, illud prosequi debet, aliis omnino exclusis. At si contingat, quod is propter emergens aliquod impedimentum ab incepto negotio remotus fuerit, nequit cessante etiam impedimento idem negotium adsumere cum exclusione alterius, qui ei successit *dict. cap. si duo §. Sane.* In causis vero spiritualibus nempe Electionum, Postulationum &c. ex pluribus

bus Procuratoribus in solidum datis eligi ab Superiore debet ille, sive Clericus, sive Laicus fuerit, qui maiori pollet idoneitate *cap. non indifcrete b. t. in 6.*

VI. Tria specialiter spectant ad munus Procuratoris. I. Non excedere fines mandati. II. Si velit alium Procuratorem sibi substituere, id non exequi, nisi post litem contestatam *cap. is qui b. t. in 6.* III. Denique in casu gravaminis ad Superiorem appellare, quod praestare tenetur semper, nec opus habet, ut de sui Domini consensu doceatur, nisi ex peculiari aliqua iusta causa excusetur *Dist. cap. iniuste.*

VII. Omnes vero, qui plenum rerum suarum dominium habent Procuratores pro se dare possunt. Quamobrem constituendi etiam Procuratorem ad lites iis est facultas, qui per se ipsos ad agendum, vel se defendendum stare in iudicio possunt iuxta *Reg. LXVIII. Iuris in 6.* quae sane locum habet in omnibus quibuslibet causis, iis tantum exceptis, quae ad publicam vindictam spectant, & criminales passim appellantur, *Can. in criminalibus V. q. 3. cap. 5. b. t. & 15. de accusation.* In his enim cum de poena capitali, aut alia, quae relegatione sit maior, agatur nisi actor, & reus per se ipsos agere tenerentur, facile iudicium redderetur illusorium, quia pars, quae succubuerit in iudicio fugâ sibi consulens sententiae executionem declinaret.

VIII. Procuratorem constituere nemo regulariter cogitur, neque contumax reputari debet, qui legitime impeditus noluit per Procuratorem comparere *cap. querelam b. t.* Verum quibusdam in casibus id iura praecipiunt. I. quidem cogitur qui citatus ad Iudicem in causa, quae moram non patitur, diuturna detinetur infirmitate ex *cod. cap. & L. Quaesitum ff. de re iudic.* II. qui potentia, aut dignitate ita pollet, ut ipsius persona terrori futura esset Iudici, aut parti adversae *l. quicumque C. b. t.* III. Monasterium, aut Capitulum, quando praesertim contra ipsum agitur *cap. cum venisset de in integ. restitut. & un. de Sindic.* IV. Cogitur demum excommunicatus quoties tanquam reus ad iudicium vocatur, ne commodum a malitia percipiat *cap. intelleximus de iud. & cap. fin. b. t.*

IX. Ex

IX. Ex Iuris regula dissolvi aliqua possunt eodem, quo colligantur, modo; quare expirat I. Procuratoris munus per mutuum constituentis, & constituti consensum. II. Finitâ instantiâ per sententiam definitivam, cum nemo sit gravandus ultra id, ad quod se obligavit. III. Per mortem constituentis, si tamen res adhuc integra fuerit, vel etiam si non integra, quoties moriente per civilem, aut naturalem mortem Praelato, aut Ecclesiae Rectore, qui illum constituerat, Successor iusta de causa mandatum revocari iusserit *Clem. Procuratorum b. t.* IV. Expirat tandem per legitime factam revocationem, & ipsi intimatam. Circa hoc ramen notetis velim, Dominum re integra semper posse Procuratorem revocare etiam absque causa, secus vero post litis contestationem; nisi nova emergens rationabilis causa id ipsi suaserit *cap. quamvis b. t. in 6.* quod si evenerit, post revocationem lis procedere in eo debet statu, in quo reperitur *cap. auditis b. t.*

X. Huiusmodi autem revocatio, si fiat, Iudici, & Adversario significetur oportet, aliàs rata haberentur, quae ab Procuratore gesta fuerint *cap. 4. & 13. b. t.* Quare Procurator ad litem constitutus ob Domini absentiam non censeretur revocatus, si Dominus litem per se iterum prosequatur; sed quoties contigerit Dominum abesse, causam ipse readsumet *cap. Si quem b. t. in 6.* Quinimo quamvis sententia post Procuratoris revocationem lata praeiudicium non adferat Domino *cap. ex insinuatione b. t.* neque obtentum ab eo rescriptum profit *cap. in nostro eod.* Nihilominus si post conclusionem in causa demum innotuerit revocatio, opportune fertur sententia.

T I T V L V S III.

De Pactis, & Transactionibus.

I. **Q**uoniam exoptabile in Republica, optimumque foret, quod ab dispendiosis litibus se temperarent Cives, merito ius nostrum praesertim hortatur eos, qui causas habent, ut ad pacta potius, & transactiones veniant,

ant, vel declinent saltem ad Arbitros, quam in iudiciis agant *cap. ex parte de Transact.* quapropter antequam ad horum Ordinem exponendum accedamus, nonnulla de iisdem a lite discendenti modis sunt nobis dicenda.

II. Pactum igitur a verbo *paciscor* derivatum, non est, nisi duorum, vel plurium in idem placitum consensus *L. 1. §. 2. ff. de Pactis.* Quapropter satis distinguitur a Pollicitatione, quae est solius offerentis promissio *l. 3. ff. de Pollicit.* Ex pactis vero huiusmodi quaedam dicuntur *legitima*, seu vestita, quae scilicet ab civili iure adproban- tur, & cum nomine causam quoque producendae obliga- tionis habent, ut emtio, locatio, mutuum &c. quia veluti stipulationis veste induta actionem producant in iudicio, & proprie appellantur etiam contractus. Aliqua vero di- cuntur *nuda*, quae scilicet ab iure proprium non habent nomen, neque causam producendi obligationem, sed tan- tum conventionem, vel exceptionem *l. Iurisdictionum 7. §. Sed cum ff. eod.*

III. Sex potissimum modis vestiri possunt pacta ex Glossa in laud. *leg. §. Quinimo*, nempe re, verbo, litteris, consensu, coherentia contractus, & rei interventu. Quare inter pactum simplex, & contractum hoc potissimum adsi- gnatur discrimen, quod pactum ex natura sua nec nomen, nec causam habet, contractus tamen utrumque, ut supra dicebamus. Ex pactis vero vestitis, seu potius Contracti- bus aliqui sunt nominati, speciale scilicet nomen in iure habentes, ut emtio, locatio &c. aliqui etiam innominati, quos nempe ius non speciali, sed generali tantum nomine notavit, & ad quatuor classes revocantur in *l. Naturalis ff. de Praescript. verbis*, nimirum: Do, ut des: Facio, ut facias; Do, ut facias; Facio, ut des. Hi ergo quo- ties nulla stipulatione, chirografo, aut rei traditione ful- ciuntur locum poenitentiae relinquunt, altera etiam par- te non consentiente *l. 5. C. de act. & oblig. Inst. lib. 3. de Litt. oblig. l. 1. ff. de verb. oblig. & l. Omnes C. de contrahend. stipulat.* Nisi tamen I. alterutra pars promissum impleverit, cui tantum poenitere licebit, non vero alte- ri, quae actione ex *praescriptis verbis* conveniri poterit *l. Si pecuniam ff. de condict. causa data*. II. Nisi iuramen- tum intervenerit *l. ut Iurisiurandi ff. de Operib.* III. De-
mum

num nisi lex expresse adfiterit, seu actionem ex pacto etiam nudo expresse concesserit, ut ex promissione dotis praestandae *l. ad exactiorem C. de Dotis promissione.*

IV. Licet de iure naturali, & in foro conscientiae ex pacto simpliciter nudo oriatur obligatio *arg. can. ad praedicandum XXII. q. I.* attamen ex iure nostro nullam actionem, aut obligationem in externo foro oriri censent melioris notae Canonistae; cum nullibi id reperiatur expresse statutum in Sacris Canonibus; & idem prorsus militet hic finis, propter quem ius Caesareum actionem ex cuiusmodi pactis non permittit; minus recte ergo quidam eam inducere tentant, praesertim cum alia non desint media, ut quis stare cogatur promissis, sic ut videre est in *cap. 3. b. t. fin. de for. comp. & 13. de Iudic.*

V. Pacisci possunt quicumque iure, aut naturâ non prohibentur, ut qui pro se stare in iudicio, aut Procuratorem constituere nequeunt. Verum pacta locum non habent, nisi fiant de rebus honestis, & possibilibus, quae tamen in hominum commercio sunt. Hinc pacta contra bonos mores inita, aut de rebus sacris, & religiosis nullam habent firmitatem *cap. ult. de Pactis.*

VI. Transactio, qua plerumque forensia iudicia vitantur est *rei dubiae, nec finitae conventa decisio, aliquo dato, accepto, vel promisso, l. 1. ff. de Transact.* Quare si fiat post latam sententiam ignoratam a parte victrice, nullius momenti esset, nisi forte interposita fuerit appellatio. Haec confundi non debet cum proprie dicta compositione, per quam gratis, & amicabiliter litigantes a lite discedunt.

VII. Transigere possunt qui pacisci, atque de iis omnibus, de quibus, & eo modo, quo pactum inire. Per transactionem legitime initam litibus motis, sive movendis ita finis imponitur, ut amplius reviviscere non possint, etiamsi nova Instrumenta, vel testes exhiberentur, *cap. Sicut grave de Transact. & l. fratris C. eod.* Cum ipsa non minorem vim habeat, ac res iudicata *l. non minorem C. eod.* quapropter ad successorem transit, & quidem semper si fuerit haereditarius, si vero succedat ex officio, quoties Superioris auctoritas intervenerit. Videte *cap. 5. de Transact.*

T I T V L V S IV.

De Arbitris.

I. **A**rbitri quamvis frequenter a Magistratu, vel Iudice Pedaneo ad lites dirimendas dari soleant, qui & necessarii appellantur *l. Apertissimi C. de Iudic., & l. Si ab arbitrio ff. qui satisdat. cog.* Attamen hic proprie agitur de Arbitris receptis ex partium voluntate, compromisso, & mutua stipulatione constitutis, qui Iudicum Ordinariorum morem imitantur ex Paulo in *l. non distinguemus §. Item C. de recep. Arbit.* Ecclesia quoque hoc iudicandi genus adprobavit quammaxime, cum facilius tali pacto ad dirimenda civium dissidia praeparetur via, ut adfirmant PP. Carthag. III. & Milevit. Syn. apud Grat. *can. ab Iudicibus, & can. Sane II. q. 6.*

II. Quia ergo arbitria ad Iudiciorum morem sunt recepta *l. 1. ff. b. t.* ideo sicuti quivis iure non prohibitus potest ad Iudicis Ordinarii Officium adsumi, ita eligi a fortiori in arbitrium *l. Si Pupillus ff. eod.* Imo aliquando etsi nequeat quis esse Iudex Ordinarius, nihilominus haud vetant iura, quin fieri arbiter possit; quare optime Duarenus cum aliis existimat incapacem Filium non esse, ut in causa Patris arbitrium exerceat, neque interest cuius sint conditionis *l. Paedius ff. de receptis qui arbit.*

III. De iure tamen civili excluduntur ab Arbitri officio servi, infames, Pupilli, minores xx. annis, dict. *l. Paedius, & l. Cum lege ff. eod.* ex Iure autem Canonico excommunicati, furiosi, muti, surdi, feminae iurisdictione destitutae, & religiosi *cap. Significasti de Sent. Excom. cap. Dilectus b. t. & can. praesentia XVI. q. 1.* Laici etiam, qui licet in causis temporalibus eligi a Clericis ad arbitrandum possint, prohibentur tamen in causis spiritualibus, nisi de licentia Episcopi id fecerint, *cap. contingit, & cap. per tuas b. t.*

IV. Non omnibus vero libera datur in Arbitros consentiendi facultas, nam omnes, qui alienandi facultate careant,

rent, neque arbitros eligere possunt, ita Servi *d. l. Non distinguemus §. Servi*; Impuberes absque Tutoris auctoritate *l. Idem §. It ff. b. t.* Minores, Prodigii, & Furiosi sine suis curatoribus. Ob eandem rationem compromittere non possunt Possessores Maioratum, quibus non adest facultas eos alienandi, quod extenditur etiam ad Emphyteutas sine Dominorum consensu, & iuxta probabiliorum sententiam ad feudatarios super rebus feudalibus. His quoque adconsendi sunt Canonici, & Beneficarii, cum sint administratores dumtaxat beneficiorum, quae possident *cap. 3. b. t.* Demum compromittere nequeunt exempti super iure exemptionis *cap. cum tempore b. t.* neque in praedictum iuris electionis *cap. cum olim eod.*

V. De causis omnibus compromitti potest, iis exceptis, quae ob sui gravitatem, & praedicti periculum maiores Iudices exigunt, ut sunt causae restitutionis in integrum, dissolutionis Matrimonii, servitutis, aut libertatis, & causae criminales criminaliter motae *cap. 9. de in integ. rest. l. fin. ff. de priv. delict. & cap. exposita b. t.* quemadmodum causae iam decisaе, etiam circa dubia emergentia, quae sententiae executionem impedire possunt *d. cap. exposita.*

VI. Compromissum fieri potest in unum, vel plures Arbitros sive praesentes, sive absentes, esto ubi plures fuerint consultius existimatur eos eligi in dispari numero, ut facilius maioris partis arbitrium obtineatur iuxta Regulam in *cap. sane b. t.* traditam; quod si omnes ab se invicem discordent in taxanda v. g. poecuniaria quantitate, minima quantitas erit attendenda, in quam omnes conveniunt *cap. 1. b. t.* Praesertim cum non satis ab iure probetur *l. item si unus §. Si in duos ff. de receptis qui arbit.* compromissum in plures sub hac formula initum: *ut in casu discordiae eligatur Tertius per eosdem, vel per alios*; quamvis in praxi, quemadmodum notat Rebuffus in *Tract. de Arbit.* iam obtinuerit, ut si fiat habeatur ratum. Demum quando ab Arbitris ferenda est sententia, seu laudum, iure Caesareo cautum erat, ne altero eorum absente ceteri ad ipsam procederent *l. 18. ff. eod.* Verum ex iure nostro satis est si ille fuerit legitime citatus *cap. 1. b. t. in 6.*

K

VII. Quia

VII. Quia vero ab sententia Arbitri compromissarii appellare nequitquam licet *l. 1. C. de recep. Arbit.* accidit saepe, ut compromisso poena adiiciatur solvenda ab eo, qui laudo non steterit. Quoties ergo ita inter compromittentes convenerit; & iuramentum quoque appositum fuerit de laudo servando, adversus resilientem nedum datur actio in poenam statutam, sed etiam in rem ipsam, *cap. 2. de Pact. in 6.* quod extendunt DD. passim ubi adiuncta fuerit clausula: *Rato manente pacto*; secus vero, si iusiurandum non interfuerit; tunc enim non nisi ad poenae solutionem resiliens tenetur *l. 2. & 27. ff. b. t. & cap. 9. eod.*

Quod si nulla fuerit adiecta compromisso poena, & laudum expresse receptum nondum fuit a partibus, nec decem dierum lapsu tacite homologatum, quia alterutra pars boni viri expetit arbitrium; tunc ex eo datur actio in expensas lite factas, vel faciendas contra partem a laudo resilientem *cap. 9. cit. & ead. l. 27. §. fin.* At si vel expresse receptum, vel tacite homologatum fuerit, actio erit in factum ad petendam coram Iudice ordinario laudi executionem, *tit. cap. & l. 4. C. de recep. Arb.*

VIII. Cum ex compromisso inito Iudicis ordinarii iurisdictioni, & causae cognitio, si quae forte apud ipsum iucoeperat, suspendatur ex *Clem. 4. de Appell.* ut illud revera factum esse probari queat, solemni compromittentium stipulatione, coram Notario, ac testibus fieri debet; & eius effectus erit, quod causa ad iudices compromissarios, seu Arbitros penitus devolvatur. Ipsorum vero arbitrium quia legibus compromissi initi contineri debet, tangere nequit nisi ea, super quibus fuit compromissum, vel quae causae principali necessario connectuntur; quare esto coram Iudice ordinario habeat locum reconventio, nequit tamen ex *cap. Cum dilectus 6. b. t.* fieri coram arbitro; qui de cetero debet in omnibus ordinem iudicalem servare ex *d. l. 1. ff. b. t.*

IX. Per prolationem demum sententiae definitivae expirat compromissum, & omnis Arbitri potestas; cum ad ipsum non spectet laudi executio, sed ad Iudicem ordinarium *l. quia ff. b. t. & l. Cum antea C. de recep. Arb.* Quinimo expirare poterat ante latam sententiam, si res,

X

de

de qua agebatur, pericrit, vel Partes super eadem re coram ordinario Iudice comparuerint, aut acceptilatione, vel pacto in contrarium celebrato, aut elapso tempore ad arbitrandum definito; ac tandem morte omnium, vel unius Arbitri, aut compromittentis, cum ad haeredes non transeat compromissum *cap. Compromissum, & cap. ex parte b. t.*

X. Praeter huiusmodi compromissarios Arbitros, alij etiam sunt, ad quos recurrere solent litigantes, & arbitratores vulgo appellari consueverunt. Differunt vero ab iis, I. Quod extraiudicialiter procedunt, causamque de bono, & aequo componunt, non ad strictam iuris normam, ut illi *l. 3. §. Recessisse ff. de recept. qui Arb. & cap. 2. eum Gloss.* II. Quod Arbitratoris laudum etiam si notoriam iniquitatem, aut manifestam doli praesumptionem non habeat, quoties gravem laesionem contineat reduci potest ad arbitrium boni viri *l. 27. §. Stari ff. eod. cap. 2. de Praesumpt. l. 3. c. de recept. arb. & l. 26. §. Arbitrorum ff. Pro socio*; quamvis in praxi, ut observat Rebuffus loco supra laud. ab utraque passim fieri soleat restrictio.

De Arbitris necessariis non est hic quod verba fecerim, cum in omnibus fere iudiciis delegatis aequiparentur, ut videre est in *cap. 39. de off. Iudic. deleg. & cap. 21. eod. in 6.*

T I T V L V S V.

De Oblatione Libelli.

I. Libelli Oblatio Editionis actionis loco successit, de qua in Pandectis *Tit. de Edendo*, Libelli vocem apud veteres Ecclesiasticos varie usurpatam reperimus; charta etenim, in qua haeretici resipiscentes Fidei professionem scribebant, & Episcopo dabant libellus dicebatur *can. 7. l. Nicaen. apud Socratem lib. 4. cap. 12. can. 46. Trullan. & aff. 6. VIII. Oecumenicae Synodi*. Posterioribus vero seculis chartae contractuum, seu cuiusvis pacis generis, ut Emphytheusis praecariae, vel praestariae

libelli dicti fuerunt, de quibus saepe fit mentio in Chronico Casinensi. Item breves Scripturae, quibus publice alterius fama laeditur, libelli nominantur in Pandectis *Tit. de Famosis libell.* Postremo tamen Scripturae omnes, quibus praecipue preces Principi, vel Magistratui exhibentur, aut desideria exponuntur libelli dici etiam consueverunt. Secundum quam significationem.

II. *Libellus* hic proprie sumitur pro brevi scriptura claram Actoris intentionem continente; sublata enim antiqua Romanorum formula designandi, seu edendi unam ex actionibus in albo contentis, huius vicem hodie gerit libellus, qui est vel *conventionalis* locum obtinens in causis ad privatas civium iniurias pertinentibus; vel *querimoniales*, seu *accusatorius* causas prosequens ad publicam vindictam devolutas.

III. In libelli igitur efformatione praeter *Iudicis*, *Actoris*, & *rei* nomina, interveniat quoque necesse est *facti narratio*, *medium concludendi*, & ipsa *conclusio*. Primo siquidem narrari debet factum cum suis omnibus circumstantiis, ut Iudex facile comprehendat quid petatur, ac integrum petitionis statum, deinde proponendum est concludendi medium, ut evidenter constet quo iure petatur, & vera petendi causa. Qua in re notanda est disparitas inter actiones, an videlicet in Personam sint, an autem in rem; cum pro diversa actione, diversa evadat quoque causa petendi proxima, vel remota; nam in actione personali, causa proxima est obligatio, remota vero contractus, ex quo nascitur obligatio; Quare Actor in ea utramque causam exprimere tenetur v. g. Peto mille ex contractu mutui. In reali tamen actione, quia proxima petendi causa est dominium, remota vero titulus, sufficit si exprimat proxima, dummodo in specie designetur, v. g. peto domum, quia mea est, *cap. Dilecti*, & *cap. Significasti b. t.* & *Gloss. in l. r. ff. de edendo.*

Postremo quamvis in libello criminali sufficiat accusationem proponere, quia lex, quae certis delictis suas poenas decrevit, sufficienter concludat; nihilominus in libello civili conclusio est omnino necessaria, ut distincte indicetur quid, & quantum petat Actor. Imo solet etiam addi clausula: *Super his omnibus peto mihi ius, & iustitiam*

tiam administrari omni meliori modo & forma, qua de iure statuto, vel consuetudine fieri potest; ut nempe per eiusmodi clausulam petiisse intelligatur Actor fructus, & expensas &c. quamvis de omnibus non expresse meminerit in sua petitione.

IV. Libellus denique, qui in scriptis porrigi debet *sap. Hincmarus* 1. b. t. post litis Contestationem non potest amplius per Actorem mutari, nisi velit cum expensarum refusione ab priori libello, & instantia penitus recedere, novumque offerre. Emendare vero eundem, vel declarare si quid obscurum contineat licitum est ad sententiam usque.

V. Oblati libelli effectus sunt I. quod sententia ad normam petitionis in libello formatae feratur. II. quod secuta citatione rem faciat litigiosam, prescriptionemque interrumpat. III. Quod post porrectum per Iudicem reo libellum actor prosequi tenetur litem, & ad finem perducere, si reo intersit quod lis finiatur, quia de expensis dolet, nisi Actor eas refundere paratus sit.

T I T V L V S V L

De Citatione.

I. **A** Ccepto libello, ubi cognoverit Iudex aptum esse, & iustam continere petitionis Causam statim rei Conventi Citationem decernit; quae Citatio olim in *iur vocatio* appellabatur, unde Tituli in Pandectis *de in iur vocando*; si quis in iur vocatus &c. in iur vocati, ut *ant* &c. Quapropter satis recte definitur ab I. C. *Actus legitimus, quo quis mandato Iudicis iuris experiundi causa in Iudicium vocatur*. Eaque adeo necessaria est in iudiciis, ut nullatenus omitti queat; spectat enim ad ius naturae defensio, & quod nemo inauditus condemnatur.

II. Dividitur Citatio in *Realem* & *Verbalem*; prima apud Veteres fiebat etiam per manus iniectionem in eum, qui vocatus in ius ire nollet; quod citationis genus in Criminalibus proprie locum habet; in Civilibus vero non nisi quando debitor est fugitivus, aut de fuga suspectus,

& haec tria intervenerint, nempe I. debitum omnino liquidum vel chirografo, vel publico instrumento, vel testibus. II. integritas fidei, quia debitor tempore contractus diffamatus non erat tanquam impotens ad solvendum. III. Suspicio fugae probabilis, & adserta iuramento saltem Creditoris, *l. non est singulis ff. de reg. iur.* Quinimo debitor incaute sua libertate spoliatus ante omnes actus relaxari debet *arg. l. Pleriq. ff. de in ius vocando.*

III. Verbalis autem Citatio est quoties Iudex per apparitorem, aut nuncium significat reo, ut statò die in iudicium compareat; Verbalis aequè reputatur sive ore tenus id fiat, sive per praeconem, tubam, aut campanam; sive etiam appositis publicis edictis, ut contingit quoties aliter reus in ius vocari nequit, quia latitat, vel vagabundus errat, aut quia contradictores sunt incerti. Haec vero Citationis species etiam *edictalis* nomine appellari ab iure nostro consuevit aliquando, *Clem. un., & cap. ubi periculum de Elect. in 6.*

IV. Rursus Citatio est vel *iuris*, cum ipsa res terminum ad aliquod faciendum statuit, quo elapso quis damnum incurrit, *cap. I. de appell. in 6. vel hominis*, cum quis mandato Iudicis, ut diximus in ius vocatur.

V. Demum eadem Citatio est vel *simplex*, vel *peremptoria*; simplex, quae in ius vocatum non prius contumacem reddit, quam iusto tempore intervallo, tribus nempe vicibus facta fuerit. Olim siquidem decem dierum periodo solvebantur singulae vices *Auth. qui Semel, & l. très denuntiationes C. quomodo, & quando Iudices, ac l. tertium ff. de Iud.* hodie vero dierum triginta *l. nonnunquam in fin. ff. de Iudic. cap. consuluit de off. deleg. & cap. 1. de Feriis.* Peremptoria vero citatio dicitur, quae additâ clausulâ *peremptorie* instar est omnium simul simplicium, quarum spatium ita coarctat, ut si praefinita die citatus non comparuerit contumax habeatur *d. l. nonnunquam, & cap. 22. de accus.*

VI. Ut huiusmodi Citatio legitime facta habeatur, exprimat I. necesse est Iudicis nomen, ut qui vocatur in ius dignoscat an ab Iudice competente, an ab Ordinario, vel delegato fuerit ipsa decreta, cum incompetenti Iudici, & delegato ante delegationis ostensionem, nemo pare-

re teneatur *cap. fin. de Const. n. 6. & cap. 31. de off. Iud. deleg. II. nomen, & cognomen rei, qui in ius vocatur cap. 34. & 36. de rescript. III. nomen, & cognomen Actoris; nam proprio motu citationem decernere non debet Iudex arg. cap. 19. de For. Comp. ut notat Abbas. IV. Causam saltem in genere, ob quam quis citatur; imo consultius fieret libellum Citationi inferendo, ut inspiciat reus an in iudicio contendere sibi expediat cap. praeterea de Dilat. V. Iudicii locum, quod reus ire debet cap. ult. de rescript. & l. si ut proponis C. Quomodo, & quando Iudex. VI. denique terminum, sive statum comparendi diem.*

VII. Debet etiam Citatio, ut vim habeat, mandato Iudicis fieri l. sed si haec §. Fin. ff. de in ius vocando; & per apparitorem praesentari reo, vel ipsi, vel ipsius Procuratori, aut saltem in domum propriam deferri, aut alteri publico loco affigi; qua de re Cursor Iudici exhibere debet relationem, & haec per notarium referri in Acta, cap. causam quae, ultim. de Dolo, & Contum. Clem. 1. de Iud. l. 4. §. 6. ff. de in ius vocan. & cap. 2. de Probat. Notate hic obiter, quod esto reus in iudicio negaverit in ius fuisse vocatum, adferenti tamen nuncio publico, atque iurato se legitime citasse ratione muneris fides adhibebitur, nisi Iudex ex aliis probabilioribus coniecturis, & habito respectu ad qualitatem causae, aut Personarum contrarium arbitretur; Quamobrem, quoties citatus in iudicium comparere neglexerit, nisi iusta se tueatur exceptione contumaciae poenis sit obnoxius cap. ult. ut lite non contest.

VIII. Expleta citatione cessat omnium Iudicium, eandem habentium in causa iurisdictionem, concursus, sive quod ordinarius aequae ac delegatus de ipsa causa cognoscere in solidum poterat, sive quod de re mixti fori agebatur; & penes illum dumtaxat iudicium erit, qui ceteros praevenit cap. 19. de for. Com. & l. si quis postea ff. de iudic. Quinimò si Delegatus in ius vocavit, ipsius iurisdiclio hac in parte neque per Delegatarii mortem expirabit cap. 20. de off. Iudicis deleg.

IX. Demum ex huiusmodi citatione inducitur revera litis pendentia, & res evadit litigiosa, ita ut alienari nullatenus possit, Clem. 8. ut lite pendent. & auth. litigiosa res C. de Litigiosis.

T I T V L V S VII.

De Dolo, & Contumacia, ac in possessionem Immissione.

I. **E**X Tituli inscriptione unusquisque vestrum facile intelliget nos hic non loqui de dolo absolute accepto, ut l. 1. §. 2. ff. de dolo pro omni calliditate, Videlicet, fallacia, machinatione ad circumveniendum, fallendum, decipiendum alterum adhibita contra ius, & bonos mores; sed tantum quatenus Contumaciae coniungitur; qui enim Iudici in ius vocanti obedire detrectat, nonnisi ex dolo detrahere censetur.

II. Haec itaque Contumacia, seu inobedientia pluribus committitur modis, quos Glossa in cap. ex litteris b. t. his versibus comprehendit:

*Non veniens; non restituens; citiusque recedens;
Nil dicens; pignusque tenens; iurareque nolens;
Obscureque loquens, isti sunt iure rebelles.*

III. Contumacem itaque recte Paulus lib. V. sentent. illum appellat, qui tribus edictis evocatus, vel uno perentorio intra statum tempus nullo legitimo detentus impedimento in iudicium non venit, vel si venerit Iudicis iussui obtemperare recusat, aut sine illius facultate recedit, ne causam dicat cap. 3. b. t. l. Contumacia ff. de re Iudic. & l. un. ff. si quis si quis iudicanti non obtemperaverit.

IV. Pluribus tamen poenis Iudicis arbitrio subiiciuntur Contumaces, & I. si post secundam Citationem alterutra pars non comparuerit, comparenti refundere; teneatur expensas cap. Ex litteris 2. & cap. cum dilecti 6. b. t. quod etiam observandum est, quando calumniosae opponuntur exceptiones, quae contumaciae assimilantur cap. finem 5. b. t. II. puniri possunt Contumaces vel multa ab iudice infligta, vel interdicto possessorio, immisione scilicet in possessionem rei servandae causa, quod ortum ducit ex Praetoris Edicto in l. 1. & 2. ff. quibus ex causis possessionem. Ab excommunicatione tamen ferenda abstinere

re

re se debet Iudex ex *Trid. dispositione sess. 25. de reformat. cap. 3.* quoties fieri potest adversus Contumacem realem, aut personalis executio.

V. Quinimo, quia contumacia reddit reum desertorem, vel iuxta leges Salicas *tit. 52. abiectum, ductivum*, verum *eremedicium* inducentem, si de causa sufficienter liqueat, praesertim post litis contestationem potest iudex in ea procedere usque ad sententiam definitivam, & actorem comparentem immittere in veram, realemque possessionem *cap. prout nobis 4. b. t. & Novell. 115. aliisque relatis sup. text.*

VI. Quoties vero agitur per viam denuntiationis, vel inquisitionis contra reum contumacem semper procedi potest ad sententiam usque definitivam; etiamsi haec depositionis poenam importet *cap. veritatis 8. b. t.* In causis vero beneficialibus, vel quibuscumque ecclesiasticis, possunt contumaces audiri etiam post latam sententiam *cap. cum olim 7. eod.* Quia ex *Panorm. ib.* sententia, praesertim in causa beneficii non transit in rem iudicatam respectu Iudicis, qui eam tulit; quod multo magis militare debet, quando lata est contra absentem etiam contumacem.

VII. Haec omnia; quae contra reum contumacem sunt in iure disposita maiorem vim habent contra actorem; qui si post praesentatum libellum ab iudicio per annum contumaciter se absentaverit, erit in arbitrium rei an petere velit absolutionem ab instantia cum expensarum, & damnorum refectione, vel negative litem contestari, onusque probandi in se suscipere, & ad sententiam usque definitivam etiam absente Actore procedere. Quod si lis iam contestata fuerit, poterit Iudex etiam ante anni lapsum sententiam proferre, & Actorem contumacem condemnare in expensas *l. Propterandum §. 2. de Iudic. & Novell. 112. cap. 5.*

VIII. Ex remediis, quibus litigantium contumacia coerceri solet, est, ut diximus, *missio in possessionem rei servandae causa*, quod remedium ex iure Caesareo in ius nostrum descendisse supra notavimus; Verum cum possessionis privatio sit in iure maximi negotii, idcirco leges absque causa cognita eam disponere noluerunt. Quapropter contra contumacem praemittenda omnino est immissio collitigantis in rei controversae possessionem ex *primo De-*

cre-

creto custodiae tantum causa; itaut immissus per hanc immissionem nedum verum non adquirat dominium, imo nec stabilem possessionem, sed nudam dumtaxat detentionem; itaut immissionem passus vere dicatur possidere, missus vero nonnisi esse in possessione *l. 10. §. Adem Papinianus ff. de acquir. posses.* Parte tamen in sua contumacia insurdesciente post anni lapsum potest Iudex *secundum* interponere *Decretum*, quo Missus in possessionem efficitur verus, & incommutabilis possessor, itaut Dominus evadat omnium fructuum rei possessae, & gaudeat omnibus possessoriiis commodis, servata solum contumaci super proprietate legitima defensione. ex Alex. III. in *cap. constitutis 1. & ex Greg. IX. in cap. Si Adversarius 4. b. t.*

IX. Praescriptum tamen anni tempus non decurrit contra praesumptum contumacem immissionem passum, si infra annum comparuerit, obtuleritque de stando iudicio cautionem, quamvis haec cautio infra annum oblata ab Iudice recepta haudquaquam fuerit, dummodo per ipsum reum non steterit, quominus reciperetur. Imo si reus, qui passus est immissionem, se ab contumacia purgaverit, non solum restitui debet ad omnia, sed etiam expensarum solutionem evitabit *cap. cum venissent 3. b. t.*

X Hoc tamen missionis in possessionem remedium tam ex primo, quam ex secundo Decreto cessat quoties de Dignitate, Personatu, seu quovis alio Ecclesiastico beneficio controversitur; etiamsi altera pars contumax adferatur incapax, vel neutiquam canonice instituta; eo enim in casu Iudex etiam lite non contestata procedere solum potest in causa, usque ad sententiam quoque definitivam non vero immissionem in possessionem discernere iuxta definitionem Concilii Lugdunensis sub Innoc. IV. de quo in *cap. Eum qui un. b. t. in 6.* Quae tamen constitutio nullo pacto est abrogatoria laudatae supra Alex. III. Decretalis in *cap. 1. b. t.* ubi non agitur de causa beneficii, sed de iure Ecclesiae.

XI. Illud denique notetis velim ad veram possessionem Actoris adquirendam non requiri necessario secundum Iudicis Decretum, nisi quoties agitur actione personali; cum in actione reali sufficiat si integrum labatur annuae contumaciae spatium. Cuius diversitatis ea est evidentissi-

ma ratio, quod in actione reali actor adfirmet rem esse suam, & hoc verum praesumitur propter rei contumaciam; at in actione personali non adlegatur nisi debitum, nec aliquod ius petitur circa rei litigiosae dominium.

T I T V L V S VIII.

De exceptionibus, & replicationibus.

I. **H**Actenus ea, quae ad iudiciales probandas actiones ordinantur, tradidimus; nunc de iis, quibus res se defendunt, agamus oportet; & quia, ut plurimum exceptionibus, quae reorum sunt defensiones, retunduntur actiones, l. 2. ff. de Except. itaut eleganter ab Tullio in Topicis *Clypei* appellentur, *telis*, actionibus nempe, *oppositi*; de ipsis exceptionibus praesentem inscripsimus Titulum, ubi tamen nonnisi aliqua, quae pene specialiter in iure nostro militare solent explicabimus; cetera nanque exceptionibus communia ex lib. XLIV. Pandectarum, ex VIII. Codicis, & ex IV. Institutionum Iustinianearum peti facile possunt.

II Exceptio itaque quatenus ad rem nostram facit, aliud profecto non est, nisi *Ius depellendi in Iudicio quod ab Actore petitur*. Cum igitur exceptio sit proprie *actionis exclusio*, sive *emendatio*, & *Rei defensio* l. 28. §. *Exceptio* ff. de Iureiur. ideo necessario actionem praesupponit; ubi enim nulla est actio, nequit locum habere exceptio; & diversum valde est reum ipso iure liberari, ac liberari exceptionis ope; hinc si reus proponat in iudicio *solutionem*, *novationem*, vel *acceptilationem*, non dicitur proprie exceptionem opponere, cum per eas allegationes repellatur quidem Actor, non excludatur Actio.

III. Omissis variis exceptionum divisionibus, praecipue Exceptio est vel *dilatatoria*, vel *peremptoria*, seu vel *temporaria*, vel *perpetua*. Prima ad certum tempus obstaré potest, neque causam, seu actionem perimit propositam, sed tantum eam differt ad tempus. Haec quidem vel respicit Personam *Iudicis*, ut exceptio fori *declinatoria*,

ria, incompetentiae iurisdictionis, vel recusationis *l. apertissimi C. de Iudic.* vel ipsas *litigantium* Personas, quae videlicet illegitimae sint, ut in iudicio agant, quemadmodum Pupillus sine Tutore, Minor sine Curatore, Filius, vel uxor sine Patris, vel mariti consensu, Procurator sine mandato ec. Vel tandem *Causam* principalem, ut exceptio libelli inepti, obscuri, rescripti subreptionis, aut obreptionis vitio laborantis, litis pendentiae, & similes.

Exceptio vero Peremptoria, & perpetua est, quae Actoribus semper obstat, itaut per eam veluti perimatur actio; ut exceptio rei iudicatae, iuramenti, doli mali, pacti de non petendo, solutionis, transactionis, praesumptionis, contractus invalidi, & similes, quae quia opponuntur ad tollendam omnem causae cognitionem bene dicuntur peremptoriae, quasi quod totum negotium absolvant, & vim definitivae sententiae habeant *l. 37. C. Theod. de Appell.*

IV. Exceptiones dilatoriae, sicut opportune opponantur, ante litis contestationem opponi debent; imo si respiciunt Personam Iudicis, ut sunt Fori declinatoriae, praecedant omnem actum necesse est; nam secus reus in Iudicem suspectum, vel incompetentem consensisse videtur. Nonnumquam tamen opponi quoque possunt nedum post litis contestationem, verum etiam post sententiam, puta, si post litis contestationem ea exceptio primo militare coeperit *cap. innotuit de Officio Deleg. l. 2. C. de Consort. lit.* vel saltem nonnisi post litem contestatam ad notitiam pervenerit *cap. praesentium de Testib. cap. Pastoralis b. t.* vel etiam, si exceptio, quamvis dilatoria, principalia tamen causae merita respiciat ex Vulteo in *l. Exceptionem C. hoc tit.* aut notabile gravamen contineat; veluti loci suspecti, non tuti &c. *cap. ex parte de appellat.*

Ne tamen litigantibus detur occasio iudicia frustrandi, ex Innocentio III. in *cap. 4. b. t.* Iudex Ecclesiasticus debet tempus praefigere, intra quod teneantur partes dilatorias, si quas habent, exceptiones opponere. Verum excommunicationis maioris exceptio etiam in litis exordio scienter omissa potest nihilominus in quavis Iudicii parte habere locum; imo eam reo non opponente, potest ex proprio officio opponere Iudex, ne periculum animae incurra-

ratur communicandi cum excommunicato *cap. exceptio. senp. 12. b. t. & cap. pia consideratione eod. in 6.* Idem sentiendum quoque de iis omnibus exceptionibus, quae iudicium, & acta irritant.

V. Exceptiones vero Peremptoriae ad sententiam usque opponere cuique fas est, non tamen post; tunc enim vel ad appellationis beneficium, vel si damnatus minorennis fuerit ad restitutionem in integrum est recurrendum, *l. 4. & 8. C. b. t. l. 2. C. Sententiam rescindi non posse*; quibus ius nostrum etiam consonat in *cap. Cum Venerabilis b. t. cap. 9. de Probat. & 4. de Procurat.* nisi tamen de iis peremptoriis exceptionibus agatur, quae sententiae executionem potius respiciunt, ut exceptio inopiae, quae donatori, aliisque datur contra Donatarium ex Senatuscons. Macedon. & Velleian. ne executio in plus fiat, quam servata congrua sustentatione fieri potest.

VI. Effectus oppositae exceptionis peti possunt ex iure Caesareo, quo liquet praesertim non alia ratione exceptiones esse institutas, nisi in gratiam defendendi reum. Quapropter quoties fuerint legitime oppositae eas admittere tenetur Iudex *cap. 13. de off. Iud. Deleg.* Cum id ad naturalem pertineat aequitatem; alioquin tanquam a gravamine sibi illato quiverit appellare reus.

VII. Ut ergo ipsas recto ordine cognoscat Iudex, distinguat oportet, an dilatoriae fuerint, an peremptoriae; Si primi generis, eas discutiat, & per Sententiam interlocutoriam de illis pronuntiet necesse est, antequam ad totius causae iudicium descendat. Si vero peremptoriae, diversimode se gerere tenetur in possessorio, ac in petitorio iudicio. In illo quidem, prius de possessione, postea de exceptione cognoscere debet *cap. 10. de restitut. spo. liat.* In altero tamen e contra prius de exceptione, deinde vero de principali actione *cap. 1. de ordin. cognit.* Ratio vero diversitatis est, nam qui possessorio agit iudicio, possessionem rei, quam habet, habuit, vel debuit habere exposcens, aliud non petit, nisi conservationem iuris, a quo deiiciendus non est, nisi causâ cognitâ, adeoque ante omnes actus debet in possessionem immitti, conservari, vel restitui. At in petitorio, quia si exceptio subsistit, tota corruiť causâ principalis Iudex rescindere sententiam co-

geretur, si quam ante exceptionis cognitionem protulisset; Ideo debet Actor suam prius probare intentionem, quae probata, ubi reus exceptiones habuerit, proferre tenetur, ut sic istis examinatis per unicam Sententiam toti negotio finis imponatur, *l. Siquidem C. b. t.*

VIII. Sicuti adversus Actorem reo datur exceptio, ita actori pro sui iuris tuitione conceditur *Replicatio*, quae est veluti exceptionis exceptio *l. 1. §. Exceptiones ff. b. t.* Huic si aliud opponat reus, huiusmodi oppositio dicitur *duplicatio*, contra quam licet Actori per *triplicationem* respondere, & sic deinceps, si id permiserit acquitas, & loci consuetudo tulerit *l. ead. §. Illud, & cap. 15. de For. Comp.* De istiusmodi replicationibus ea habetur iuris dispositio, quae de exceptionibus.

T I T V L V S IX.

De Mutuis Petitionibus.

I. **M**utuae petitiones hic non sumuntur pro reciprocis actionibus, quas mixtas, seu duplices I. C. appellant, & in quibus omnes colligantes sunt Actores, omnes sunt rei; ut accidit in actionibus finium regundorum, Familiae erciscundae, vel Communi dividundo, quae simul eodem tempore & nascuntur, & pereunt *l. actionis ff. de att. & obligat.* sed proprie de iis sermo est, quae reconventiones vulgo appellantur, seu contrariae actiones, quas reus compensationis vice adversum Actorem intendit; sicuti enim per recautionem, repignorationem, vel restipulationem prioris cautionis, pignorationis, vel stipulationis evenit dissolutio; ita a pari per reconventionem a reo contra actorem retortam rescinditur actoris actio, & debitum veluti compensatur.

II. Reconventionis itaque eiusmodi nomine aliud non venit nisi: *rei conventi adversus actorem durante conventionis iudicio instituta vicissim sub eodem Iudice actio.* Ita Gloss. & Panorm. in *cap. 1. h. t.* Et revera eo in casu neutri permittitur reconventionis causa ad aliud Tribunal re-

recurrere *l. si idem §. Quod si ff. de Iurisd. & cap. 2. h. 1.* Cuius dispositionis ea est potissima ratio, quae legitur tum in *l. cum Papinianus C. de sentent.*, tum *III. q. 8. can. 1.* quia scilicet cuius in agendo quis observat arbitrium, cum habere contra se Iudicem in eodem negotio designari non debet. Quare Iudex qui aliqui Actori incompetens erat, in reconventionis causa competens evadit, si ve ordinarius ille fuerit, si ve delegatus *cap. 1. cit.*, & *cap. prudentiam de officio deleg.* Ex eo praesertim quod utriusque Iurisdictio prorogatur, seu extenditur ad causam reconventionis.

III. Verumenimvero dantur nonnullae in iure causae quae ita proprium iudicem exigunt, ut neque per reconventionem agi queant penes incompetentem, cuius generis sunt Causae iurispatronatus, *cap. quando de Iudic. Decimarum, cap. 1. & 2. de decim. Matrimonii cap. 1. de Consang. & aliae de sua natura spirituales.* Reconventioni quoque locus non est coram Iudice arbitro, & adpellationis, quia ipsi cognoscere nequeunt, nisi ea, de quibus fuit vel compromissum vel adpellatum *cap. Apostolaris de off. Iud. Deleg.* Quinimo nec reconveniri actor potest coram Iudice delegato, qui ex Principis motu proprio est datus, quia cum ipsum non elegerint litigantes corrui ratio in laudatis supra textibus adducta.

IV. Ceterum reconventio in causis omnibus iure non exceptis admitti debet, & institui eodem prorsus modo, ac fuerat instituta conventio, cum actor, & reus iudicari nequaquam debeant per Impariā, *l. licet C. de fructib. & litium expens.* nec debeat actori prodesse, quod reo non prodest, *l. non debet ff. de reg. Iur.* Quod si actor actionem summarie intentaverit, & reconventionis causa processum requirat plenarium, utraque suspendetur, ut volunt aliqui; vel causa conventionis ad se trahet causam reconventionis, itaut idem omnino fervetur ordo, & quod cedit in favorem unius, alteri etiam faveat, ut expresse declaravit Coelestinus III. in *cap. Prudentiam 2. h. 1.* Quare si actor rescriptum impetravit cum clausula *appellatione amota*, neutri appellare licuerit; vel si actor super libello reconventionis reo respondere noluerit, neque reus in causa conventionis actori respondere teneatur.

V. Cef-

V. Cessat nihilominus quibusdam in causis huiusmodi reconventionis beneficium, ut in causis executivis, in quarum celeri expeditione procedi debet, posthabita etiam reconventionem, si haec eas quomodocunque redardet, ut si agatur de Deposito *cap. fin. de Depof. & l. penult. C. Depofiti* vel de Instrumento; ac debito liquido, cum absque actoris iniuria propter reconventionem non retardaretur causae liquidae decisio; in causa pariter spoli, ob spoliati privilegium non admittitur reconventio *cap. super spoliationis de Ordin. Cognit.* quemadmodum denique nec in causa criminali criminaliter mota, nam ex Vlpiano in *l. is qui reus ff. de publ. lud.* constitutionibus observatur, ut non relatione criminis, sed innocentia reus purgetur; dummodo tamen rei crimen ab crimine actoris non dependeat, ut ibidem notat Bartolus, veluti si de adulterio accusatus actorem de lenocinio in eodem Adulterio praestito reaccuset *l. 2. §. Extraneus ff. ad l. Iuliam de Adult.*

VI. Sicuti vero nec coram omnibus Iudicibus, nec in omnibus causis locum habet reconventio, ita quoque nec omnibus ab iure datur reconveniendi facultas, ut sunt Excommunicati, qui licet defendere seiplos possint opponendo exceptiones, haudquamquam tamen offendere queunt reconveniando actorem, ut existimant passim Canonistae in *cap. 1. de rescript.*

T I T V L V S X.

De Restitutione Spoliatorum.

I. **N**onnulla in huius libri *Tit. VII.* indicavimus quae ad interdicta possessoria generatim pertinent; nunc omisiss ceteris Interdictorum speciebus, de quibus in Pandectis, & Codice Iustiniani, institutam sequentes iuris nostri rationem de eo praesertim agendum adsumimus, quod interdictum *Vnde vi* in iure Caesareo nominatur, & competit ei, qui per vim, vel alio modo fuit possessione spoliatus, venitque propterea in nostris Decretalibus sub eodem

dem hoc titulo *de Restitutione Spoliatorum*, quae tamen inscriptio omnem comprehendit spoliationem, siue simplici vi factam, siue vi armata, siue in rebus immobilibus, pro quibus recuperandis competit interdictum *unde vi*, siue in mobilibus, pro quibus militat Interdictum *Quorum Bonorum*.

II. Adeo favorabilis in utroque iure est causa spoliati, ut si in iudicio ipse agat, nullo pacto sit reus audiendus, nisi prius spoliatus in pristinum restituatur *cap. licet 1. b. t.* etiamsi velit incontinenti ius probare proprietatis, vel etiamsi velit in eodem iudicio crimen spoliato obicere, *cap. item 6. b. t. & can. Nullus, ac seqq. II. q. 2.* Neque satis est integra restitutio, sed integerrima fieri debet, unà scilicet cum fructibus perceptis, quos spoliatus percipere potuisset, & refectione damni per spoliationem illati *cap. gravis 11. b. t.* nisi inopia, & impotentia restituendi spoliante excuset *l. inanis ff. de dolo, & cap. olim 16. b. t.* Quinimo interdictum huiusmodi nedum iis competit, qui a vera possessione deiectioni fuerunt, sed etiam qui libere, ac tute ob alterius vlm fructus de rebus propriis percipere nequeunt, *cap. Pisis b. t.*

III. Verumenimvero iuris istiusmodi remedium spoliatis competens licet amplissimum sit, nihilotamen minus ubi clare, evidenterque constiterit, quod spoliatus iniuste possidebat, cessare debet omnino *cap. 1. §. Ad hoc b. t. in 6.* Quemadmodum etiam, quia ex *cap. Olim 17. b. t.* idem restitutionis remedium locum non habet, nisi cum de vera, & reali possessione spoliatio contingit, ideo si ipsa de re contingat, quam spoliatus sub conditione, nondum purificata, detinebat, cessant iuris dispositiones in favorem spoliatorum *cap. olim 12. eod.*

IV. Insuper quia restitutio ex causa spolii fieri debet absque animae discrimine, idcirco in causa matrimoniali, si mulier absque iudicio Ecclesiae a viro discesserit, & contra eundem restitutionem petentem opponat consanguinitatis impedimentum, habeatque paratas probationes, restituenda omnino est viro quoad rem domesticam, licet non quoad thorum; si tamen probationes promptae non fuerint, restitutio plena prorsus erit facienda, nisi magna obstitit viri saevitia *cap. litteras 13. b. t. &*

cap. Ex transmissa 8. eod. Ex paritate rationis idem viceversa militat in favorem mulieris, dummodo constet realem inter coniuges adfuisse possessionem, quae satis probatur per translationem mulieris in viri domum *cap. ex conquestione 10. h. t. & Cap. ex parte 14. eod.*

Interdictum hoc unde vi iuxta utriusque iuris dispositiones militat potissimum quidem contra spoliantem *l. 1. ait Praetor ff. de vi, & vi armata*, consequenter vero militat quoque adversus eum, qui spoliationem per suos factam adprobavit, & ratam habuit, ac effectus est secutus *arg. text. in cap. cum ad sedem 15. h. t.* Militat insuper contra Iudicem, qui absque citatione, & causae cognitione aliquem spoliavit *cap. conquerente 7. eod.* & etiam contra tertium possessorem, qui rem ex spoliatione sibi quaesitam scienter retinet ex definitione Lat. IV. in *cap. saepe 18. h. t.* Nam quamvis hoc interdictum sit personale, ut apparet ex Praetoris verbis: *Vnde vi tu illum deiecisti &c.* attamen, ut animadvertit Concilium, tertius Possessor spoliatoris vitio succedere videtur, & ad animae periculum idem est iniuste detinere, ac alienum invadere. Non habet tamen locum adversus dominum, cuius servus absque mandato Adversarium spoliavit *l. 1. §. Quia ff. unde vi, & vi arm.* Neque contra haeredes spoliantis, nisi ad id, quod eis obvenit ex violentia, vel dolo defuncti *l. 1. C. Vnde vi.*

Haec autem quae huc usque diximus militant quoque in causis beneficialibus, in quibus, nisi prius restituatur spoliatus in suum beneficium, nullo pacto audiendus est spoliatus etiamsi opponat vel invaliditatem institutionis, vel ipsius beneficii resignationem post spoliationem factam, cum haec voluntaria non sit censenda *cap. ex litteris 5. h. t. & cap. Sollicite 2. eod.* contra vero si clare constiterit resignationem evenisse ante spoliationem *cap. eod. & cap. accepta 3. h. t.*

T I T V L V S X I.

De Litis Contestatione.

I. **O**blato libello sequitur iudicialis controversiae initium, quod I. C. non immerito *litis contestationem* adpellarunt, sic dictam secundum Festum. Nam olim tum lis exordiri dicebatur, cum litigaturi eos, qui tunc aderant Testes advocabant de iis, quae proponere, & quibus respondere oportebat; neque sane dissimili ratione eandem *contestationis* vocem usurpatam reperimus in Capitularibus Caroli M. *cap.* 144. Et apud Gregorium Papam *lib.* V. *ep.* 30. libelli, in quibus alicuius fama proscinditur *Contestationes* appellantur, quasi fidem facientes, vel contestantes illius infamiam.

II. Quare etsi varie interpretes litis contestationem descripserint, possumus tamen cum Cuiacio ad hanc Rubricam adscribere litis contestationem esse illius rei, de qua est controversia in foro, vel testibus praesentibus factam narrationem, vel clarius secundum Ostiensem *esse fundamentum Iudicis per petitionem in iure propositam, & congruam responsionem secutam animo litigandi*. Ex quo fit, quod nec sola Actoris petitio sine congrua rei responsione; neque haec sine animo litigandi inducit litis contestationem, ut luculenter colligitur ex definitione Greg. IX. in *cap. un. b. t.* ubi legimus non fieri litis contestationem *per Positiones, & responsiones, sed per petitionem in iure propositam cum responsione adversae partis*.

III. Quia vero in *laud. cap.* additur, quod, si huiusmodi omissa litis contestatione, in Iudicii Ordinarii forma procedatur; irritus sit processus, ideo ab eadem exordiantur nunc actus iudiciales n. c. esse omnino est, nisi grave aliquid praescriptum ab iure Ordinem perverti cogat, ut supra notavimus in casu contumaciae; praesertim si agatur de valore Electionis, Provisionis, & Matrimonii, ex *cap. Quoniam 5. ut lite non contest.* aut etiam si testium obitus timeatur, vel diuturna absentia, ita ut periculum sit in mora; tunc sane lite quoque non contestata examinari possunt

sunt testes citato adversario ad videnda eorum iuramenta. Attamen si reus non sit contumax, & sine dolo absuerit, tunc satis erit si intra annum conveniatur, vel factum iam testium examen intra annum ipsi denuntietur, ut notat Abbas, & alii in idem Caput.

IV. Animadvertendum hic tamen, hanc iuris dispositionem locum haud habere in criminalibus causis, in quibus, cum de negotio gravissimo agatur, & consultius sit nocentem dimittere, quam condemnare innocentem *l. 5. ff. de Poenis*, probationes liquidae omnino requiruntur, praesentes, & strictae *l. fin. C. de Probat.* Alteri propterea, nisi ipsi reo non permittitur ante litem contestatam adhibere testes ad suam probandam innocentiam, quoties revera timeat aliquando posse pro delicto accusari; quod si contingat, Testium depositiones ubi receptae fuerint in publicam Instrumenti formam redigi debent *cap. 41. de Test.*

V. Lite demum contestata censetur obligatio inter litigantes inducta de *Iudicio Sissi*, & *indicatum solvi*. Actiones temporariae redduntur perpetuae, hoc est durantes ad annos usque quadraginta *l. fin. C. de praescript. trigint. ann.* Cessant exceptiones fori declinatoriae, interrumpitur quaevis praescriptio, nequit libellus mutari, neque Procurator absque causa amoveri, quia factus iam est dominus litis, & quam plurima alia, de quibus iuris utriusque DD.

T I T V L V S XII.

De Iuramento Calumniae.

I. **Q**Uamvis *Calumniae* nomen apud posteriores auctores usurpetur saepissime pro *actione in iure* qua quis rem quampiam per solemnes iuris formulas sibi deberi adferit, aut pro qua litem intentat, ut *lib. II. leg. Langob. t. 27. lib. VI. capitular. cap. 189. & tit. 89. leg. Burgundor.* nec non etiam aliquando pro poena pecuniaria, ut in *Conc. Legion. an. 1012. cap. 9. & in chartis praesertim*
Fcy-

Perdianandi Hispan. Regis. Nihilominus impresentiarum Calumniae vox haud recedit a prima puriori latina significatione, & idem sonat quod apud Graecos διαβολή, malitiosam scilicet alicuius rei interpretationem, vel ut placet Nonio, & magis apposite ad rem nostram: Calumnia est malitiosa, & mendax infamatio, vel vexatio in litibus per fraudem, & frustrationem; cui consentit Tullius *offic. lib. 1.*

II. Ad compescendas utique huiusmodi litigantium calumnias varia in Iure fuerunt instituta remedia, ut poena solvendi decimam litis partem in causis civilibus *l. 1. ff. de poen. temere litig.* in criminalibus vero poena talionis; attamen in utroque foro, ut ab pravo hoc more litigantes religionis metu saltem se abtineant, iurare etiam coguntur se lites non calumniandi animo intentare. Cuius remedii inventum licet Iustiniano acceptum referat Cuiacius ex *l. 2. C. de Iuram. propt. Calumn.* Novell. 50. & 112. Illud nihilominus non fuisse antiquis *l. C. prorsus incognitum* patet ex *l. inter §. Qui familiae ff. famil. erciscund.* Quapropter rectius Gothofredus in *l. Iusurandum ff. rer. amot.* existimat huiusmodi calumniae iuramentum in Pandectis nullis solemnitatibus dispositum, fuisse ab Iustiniano in meliorem iuris formam redactum.

III. Hoc itaque iuramentum tres praesertim Articulos complectatur oportet I. quod litigantes instam putent suam litigandi causam. II. Quod nullam petant calumniosam dilationem, aut probationem superfluum litis protrahendae causa. III. Quod nihil promiserint, dederint, daturive sint vel per se, vel per alios Iudicibus patrocini gratia, vel aliis personis, nisi quibus iura permittunt, *Auth. Principales. C. de Iureiur. propter Calumniam.*

IV. Esto autem Calumniae iuramentum alterutra parte exposcente remitti neutiquam possit in quolibet iudicio & qualibet iudicii parte, imo etiam attendi omnino debeat, quia si actor delatum iuramentum recusaverit ab instituta cadet actio, reus vero propter eandem recusationem pro confesso erit habendus *cap. 1. h. t. in 6. & cap. cum in causa §. Poena 7. h. t.* attamen quoties nullo petente illud omittatur, non propterea causae processus evadit irritus *cap. fin. de Election. cap. 1. cit. §. Propter b. t. in 6.*

L 3

V. Ad

V. Ad praestandum idem iuramentum, exceptis Principibus, & quotquot in aliqua excellenti dignitate sunt constituti *cap. 3. b. t.*, tenentur omnes. Verum ad rem non refert an per se illud subeant, an per suum Procuratorem mandato instructum; imo Clerici sine sui Praelati speciali facultate per se praestare nequeunt *cap. 3. b. t. & l. cum Clerici C. de Episc. & Cler.*

VI. Hoc denique iuramentum *Calumniae* confundi non debet cum altero quod *Malitiae* dicitur, & peti potest super singulis causae articulis, si iudici expedire videbitur *cap. 2. b. t. in 6.*

T I T V L V S XIII.

Ut lite pendente nihil innovetur.

I. **H**Ec ipsa tituli inscriptio firmat regulam utrique iuri probatam, ut nempe omnia in eo perseverare debeant statu, in quo, cum lis mota fuit, reperiiebantur *can. ult. 11. q. 1. cap. cum teneamus, cap. cum significante de appellat. l. divus ff. de Pet. Haered. l. 1. C. de lite pendente*. Quamobrem privari non potest possessor, durante lite, suae possessionis commodo, iuribus, aut fructibus *cap. 1. b. t.* nisi tamen possessae rei praeciudicium inferat, aut de fuga sit suspectus, aut alia iusta ratio, & aequitas non postulaverit fieri litigiosae rei per mandatum Iudicis sequestrationem *cap. ult. de sequest. Posses.*

II. Possessori ergo litigiosam rem alienare nullatenus licet, & ubi id tentaverit; Emptor, satis de lite conscius, nedum eâ expoliatur, sed pretium & amittit, quod Fisco acquiritur; si vero ignarus, actionem obtinet adversus alienantem pro soluta pecunia, & aliâ tertia parte accipiendâ in poenam illius doli, & sui deceptionis *cap. 3. & 4. b. t.* nisi alienatio fiat ex causa transactionis, familiae eriscundae, dotis, donationis propter nuptias, impensarum funerum, & aliis a Praetore in Edicto concessis ex *Ulp. in l. Divus ff. de pet. haered. l. ult. C. de litig.* Imò potest etiam res litigiosa testamento relinqui *l. 3. C. cod.*

III. Si

III. Siquae etiam lite pendente impetrentur privilegia in alterius partis praeiudicium absque expressa litis mentione concepta, subreptitia censi debere monet *Panorm. in cap. 1. & fin. b. t.* Et omnia denique attentata, vel innovata hoc interim statim revocari debent in pristinum; & antequam revocentur, opponente parte, impeditur processus ad ulteriora *cap. si lis, & Cl. 2. b. t.*

T I T V L V S XIV.

De Probationibus.

I. Probationis nomine ex Brissonio, & *Glos. ad Rub. C. b. t.* hic venit rei dubiae per argumenta coram legitimo Iudice facta ostensio. Cum dicitur rei dubiae id capiamus oportet siue res de se dubia sit, siue ex adversarii negatione; nam notorium quoque cum negatur evadit dubium, & probatione indiget *cap. fin. b. t.* Argumentorum vero vocabulo intelligitur quidquid tale est, ut inde res an vera sit, aut falsa argui, & demonstrari possit. Additur coram legitimo iudice, nam nisi coram ipso probationes fiant, nullius ferme ponderis in causis erunt.

II. Probationis onus ut plurimum incumbit auctori, qui adfirmat, non reo qui negat, cum adfirmantis sit probare *l. 2. ff. b. t. & VI. q. 5. can. ult.* Verum si reus excipiendo aliquid ponat, & adfirmet ipse quoque ostendere debet quod adserit, & vice auctoris fungetur, *l. 19. b. t.*

III. Huiusmodi probationis octo passim adsignantur genera. I. Colligantis Confessio. II. Idonei testes. III. Probatae Scripturae. IV. Iurifurandi religio. V. Inspectio Iudicis. VI. Notorium. VII. Suspicio vehemens. VIII. Denique fama, aliaeque praesumptiones, & adminicula.

IV. Omnis autem probatio dividitur in plenam, & semiplenam. Plena dicitur, quae adeo evincit intentionem illius, qui ipsam adduxit, ut eam attentam, ex nullo alio requisito Iudex possit causam definire *cap. 2. b. t.* semiplena vero est illa, quae persuadet quidem sed non invincibiliter, & qua sola attentam Iudex nequit proferre sententiam,

cum semiplena probatio opinionem pariat, non plenam faciat veritatis fidem. Recensita ergo probationum genera si requisitas habeant in iure conditiones, de quibus infra, plenam constituent probationem; sin minus vero, semiplenam dumtaxat. Notandum tamen, duas semiplenas probationes ad finem eundem tendentes, puta unum testem, & famam; confessionem extraiudicialem, & unum testem plenam facere probationem in iudiciis civilibus, non tamen in criminalibus, ut sentiunt DD. His igitur notatis de probationibus in genere, earum vim singillatim inspicere debemus.

§. I.

V. *De Probatione per confessionem.*

Cum nulla maior sit probatio, quam proprii oris confessio *cap. 1. h. 1.* Colligatoris confessio ita efficax est, ut confessus pro iudicato habeatur *L. un. C. de confess.* Haec propterea locum habet tam in civilibus, quam in criminalibus causis, licet diverso modo.

In civilibus quidem ita accidit: Actor sane positiones quasdam concinnat, in quibus brevis quaedam facti narratio sit, hisque exhibitis Iudex adversario praecipit, ut dicat, an haec positiones sint verae potius, quam falsae. Itaque si Adversarius instante Iudice respondeat eas esse veras, iam qui posuit ab onere probandi per alia argumenta relevatur: Sed si respondere recusat pro confesso habetur; ita tamen, ut requiratur etiam citatio ad dicendam causam, quare pro confesso haberi non debet; nisi prius ipsi comminatum esset, quod haberetur pro confesso quoties non responderit. Verumtamen existimant iurisperiti posse moram purgari, maxime si adhuc res integra fuerit. Imo si confessio per errorem, iracundiam, aut nimiam festinationem facta sit, potest etiam, dummodo incontinenti fiat, revocari *cap. fin. de confess.*, uti Abbas *ib.* & in *caput Cum venerabilis de except.*

De quo hac in re non aequè convenit inter DD. est an reus cogi possit edere scripturas, quas apud se habet, quibus Actor adversus ipsum utatur, quemadmodum factis positionibus potest Iudex ab reo etiam invito extorquere
con-

confessionem, attamen probabilius sentire mihi videntur
 adserentes quod cogi revera non possit ex *L. 1. C. de eo-
 dendo. L. Nimis C. de Testib. & cap. 1. eod.* Nam desu-
 menda non sunt arma de domo rei; nisi scripturae eius-
 modi utrique fuerint litigatori communes, ut docent pa-
 sim *I. C. in d. L. & Cap.*

In Criminalibus vero confessio exigitur etiam per tor-
 menta, & quaestiones, modo post tormenta ratificetur,
 non quidem statim, sed post aliquod temporis intervallum,
 ne tormentorum vi extorta videatur; ita DD. communi-
 te; in *cap. 1. de confessis in 6. & in L. 1. ac 7. ff. de
 Quaest.*

§. II.

VI. De Probatione per Testes.

Quae a Testibus petitur probatio ceteris praestantior
 est *cap. 10. de fid. instrum. & Novell. 76. Iustin.* Verum
 ut testium depositio valida, & firma sit, oportet, quod spon-
 te sua neutiquam veniant, nam pro suspectis haberentur, sed
 rogati accedant, vel etiam citati, cum testes ad testifican-
 dum teneantur, ac propterea cogi possunt ut partes suae
 iura probare queant. Opus est etiam, ut ipsi super om-
 nibus, & singulis iurent se veritatem dicturos, nam tes-
 ti non iurato haud creditur, cum in alterius praeiudicium
 deponat, nisi forte ab adversa parte iusiurandum remitta-
 tur *cap. tuis de Testib. vel nisi veritas a testibus elicien-
 da ab omni alieno damno sit remota can. parvulis, & can.
 cum itaque dist. 4. de conf. vel nisi quis tanquam peritus
 in arte deponat cap. proposuisti eod.* Opus est tandem, ut
 pars adversa moneatur, citeturque ad videnda testium iu-
 ramenta *cap. quoniam frequenter Vt lite non contestata.*

Testes, ut plene probent duo saltem sint oportet
 omnino, iique testes, cum unus etiam si omni exceptio-
 ne maior, non admittatur *L. Iurisdictione C. de Testib.* nec
 aliam nisi semiplenam probationem pro civilibus causis in-
 ducat, & pro criminalibus indicium dumtaxat ad torturam ex
 Gloss. & DD. in *L. 3. C. ad Legem Iuliam Maiestatis.* Notat
 vero Abbas in *cap. Super eodem de Testibus* satis esse dictum
 unius quibusdam in casibus, ut v. g. si de impediendo pec-

cato agatur, vel de negotio parvi momenti, aut ab alterius praeiudicio alieno.

Huiusmodi vero testium depositiones clam, & seorsum ab aliis faciendas tum super articulis a producente propositis, tum super interrogatoriis ab Adversario oblatis Iudex per se recipiat, ut advertat quo vultu, qua constantia, quave animi trepidatione testes loquantur, cum saepe ex huiusmodi indiciis rerum veritas elucescat *cap. causam de Testib. & L. Testes ff. eodem*. Nec praetermittat eos diligenter examinare an de visu, & scientia, an de auditu tantum & fama deponant, quo in casu praesertim ubi de criminali iudicio agitur, non plene probarent, ut docent Canonistae in *cap. per tuas de Test.* Quoties tamen quis testium sit valetudinarium, septuagenarium maior, nobilis paupertate depressus, mulier honesta, vel eiusmodi, quae ad Iudicem venire non possit, tunc Iudex per idoneum aliquem electum Scribam eorum attestaciones exquirat, ita DD. in *cap. Si quis de Test. & cap. quoniam frequenter ut lite non contest.*

Ad testimonium ferendum admittuntur omnes, qui non sint speciatim ab iure prohibiti *L. 1. ff. de Testib.* Prohibentur vero alii conditione status, ut servi *can. Si testes IV. q. 3. Auth. Si dicatur C. de Test.* Alii propter infamiam personae, & vitae pravitatem *L. 3. ff. eod. & cap. testimonium 58. eod.* Alii propter defectum aetatis, & cognitionis *L. 3. cit. 6. Ideoque Alii propter suae professionis decentiam quibusdam tantum in causis, ut religiosi in criminalibus. Alii propter suspicionem aut affectionis, aut odii pro certis tantum personis, vel contra certas personas, L. Parentes C. de Test. L. 5. ff. eod. cum L. fin. ib. L. quoniam C. de Haereticis, cap. Iudaei 21. de Test. & Clem. cum Iudaei eod. can. Consanguinei III. q. 3. & L. 3. de Test. cap. 5. & 28. eod.*

Illud hic notate de testibus iure prohibitis, quod inopia probationum potest huiusmodi hominum genus, exceptis tamen inimicis, aliquando admittere saltem ad semiplene probandum, vel si agatur de causa gravissima, ut de haeresi, *cap. ii fidei de Haeret. in 6. L. Gentium C. eod. vel de Simonia cap. 3. de Sim. vel de crimine lesae Maiestatis can. fin. XV. q. 6. cap. final. de Testib. cogendis.*

Ad

Ad feminas vero quod attinet, quae a testimonio ferendo in causis testamentorum arcentur, & ab omnibus aliis arcebantur olim *L. qui Testamento §. Mulier de Testam. & can. Mulierum XXXIII. q. 5. & cap. forus de verb. signif. hodie admittendas esse censent DD. tam in civilibus, quam criminalibus causis, quoties aliunde veritas haberi nequeat.*

Adnotate etiam exceptionem de partium studio haud locum habere adversus testimonium Monachi, vel Canonici in favorem Monasterii, vel Capituli prolatum *cap. 6. & 12. de Testib.* imo nec adversus illud civium in favorem suae Communitatis, quoties res, de qua agitur ad singulos non pertineat, ut notat Panormit. in *cap. Insuper 6. eod.* Sed tantum si de ipsa singuli participant, ut de communibus pascuis &c.

Testes productos, & admissos Iudex vel examinador interroget super proposita a parte capita, quae si neglexerit pars proponere, ipse quaedam magis necessaria, praesertim generalia, & causam concernentia faciet interrogatoria, de quibus *cap. 37. de Testib.* & ad illa tantum respondere tenentur Testes; alias essent ultronei, & suspectae fidei. Debent tamen congruam dictorum suorum asserre rationem, quam si interrogati non reddiderint, eorum attestationem nullius esse momenti docemur ex *L. solam C. de Testib. & Can. Si testes §. Sola IV. q. 3.* Finito examine possunt testes ab Notario exquirere, ut sua dicta perlegantur *cap. 7. de Testib. cogendis aut non.*

Post testium examen Iudex exposcat a partibus utrum alios ulterius testes producere velint, vel depositionum promulgationem; quod si primum, concedere eis debet secundam, & tertiam quoque testium productionem, non vero quartam, nisi praestito vitandae malitiae iuramento, nec didicerint priorum testium depositiones *cap. 55. de Testib.* Tandem attestations sunt promulgandae in scriptis. Cuius promulgationis praecipuus effectus est quod non liceat amplius novos testes proferre *cap. 17. eod.* Imo quamvis iure civili, ut quidam putant, in causa appellationis admittantur novi Testes *L. 6. C. de appellat.* De iure tamen Canonico admittendi non sunt *Clem. 2. de Testib.* Ab hac autem regula excipitur, quoties agitur de causis Ma-

tri-

rimonialibus, Beneficialibus, & Capitalibus; vel quoties prima vice non fuerint plene examinati Testes, aut fuerint de periurio convicti *cap. 9. & 48. eod. & Clem. 2. cit.*

Alter promulgationis eiusmodi effectus est, quod amplius non liceat contra Personas Testium excipere; nisi aliqua exceptio primum post publicationem innotescat; vel excipiens praemisso iuramento *malitiae* aliquam possit afferre probabilem causam cur prius non exceperit; vel denique nisi sibi exceptionem contra personas testium statim ab initio per protestationem usque post publicationem reservasset *cap. 30. de Testib.*

Potest tamen optime excipi contra Testium dicta, quod nimirum absque ratione scientiae deposuerint, vel extra articulum propositum, quod obscurè & confusè sint locuti, quod sibi contrariantur, quod non sint Contestes, quod falsum deposuerint & similia &c.

6. III.

VII. De Probatione per instrumenta, seu Scripturas.

Instrumentorum nomine hic veniunt scripturae ad rei alicuius probationem in futurum faciendam confectae. Et duplicis sunt generis aliae publicae, privatae aliae: de utrisque agitur in iure nostro sub *Tit. de fide Instrum. cap. 2. 13. 14.* Publicae sunt quae fiunt a publica persona servatis omnibus ab iure requisitis solemnitatibus, ut in *cap. 2. cit.* & probandi vim obtinent ex auctoritate Tabellionis, ac testium subscriptione; unde eodem modo probat Instrumentum huiusmodi, quo duo testes *l. in exercendis C. de fide Instrum. & laud. Capp. Decret.* dummodo tamen in nulla sui parte fuerit vitiatum, abrafum &c. aut alio modo de substantiali immutatione, vel depravatione suspectum.

Publicis instrumentis hac in re aequiparantur primo Acta judicialia, seu, ut vocant, Protocolla, & scripturae inde extructae *l. fin C. de re iudic. II.* Scripturae authentico Sigillo Personae alicuius in dignitate constitutae, & Magistratum habentis munitae, ac subscriptione firmatae *cap.*

2. de

a. de fid. Instrum. III. scripturae ex publico Archivio desumptae *Authent. ad haec C. de fid. Instrum.* IV. demum scripturae etiam inter privatos exaratae, quibus praeter contrahentes tres quoque integrae opinionis testes subscribunt.

Privata instrumenta sunt scripturae, quae a privatis tantum Personis conficiuntur, cuius generis sunt *Cautio*, seu *chirografum*, quo quis fatetur quod alteri debet; *Apocha* seu scriptura, qua creditor fatetur se recepisse summam debitam; *Antapocha*, qua debitor profiteatur se creditori solvisse debitum, ut omnis praescriptionis occasio auferatur; *Syngrapha*, quae sit propria paciscentium manu; *Liber rationum*, in quo quis suas rationes, negotia, & computa describit; *Epistola* tandem, quam alter alteri mittit absenti; quorum omnium fides quanta esse possit, maxime attendenda est ex locorum consuetudine, quemadmodum monet Innocentius III. in *cap. cum dilectus de fid. Instrum.*

Instrumentis producendis semper est locus antequam in causa conclusum sit, imo etiam post conclusionem quandoque, si nempe tum emerferint, quod producens iurare tenetur *L. Videamus §. fin. ff. de in litem iurando.* vel si utatur producens privilegio restitutionis, quia ne debito tempore fuerint producta a parte adversa fuit impeditum; vel denique si causae criminales sint, aut matrimoniales, vel etiam beneficiales.

§. IV.

VIII. De Probatione per Iusiurandum.

Si cui probationes per idoneos testes, vel per instrumenta non suppetant, sed aliqua tamen ex seniplene probantibus, poterit sive ab Iudice, sive ab Actore iusiurandum adhiberi. Hoc autem non est aliud, nisi *Invocatio Divini nominis in testimonium alicuius rei*. Sicut illud definivit Augustinus *cap. 7. de sermone Domini in Monte*.

Triplicis generis est iuramentum huiusmodi, *voluntarium, iudiciale, & necessarium*. Primum ex mera partium conventionione extra iudicium uni ab altero litigantium deferitur, vel refertur *L. 1. & 2. ff. de iureiur.* Iudiciale non cogente, sed adprobante iudice pars parti alteri deferit in iu-

iudicio; quod ubi non accipiat, nec referatur suspicionem in recusantem generat, nisi obstitit ignorantio eius rei, de qua iurari debuisset, *cap. ult. de iureiur. L. Marcellus §. 1. ff. rerum amotarum*, vel nisi probata satis plena intentio fuerit *cap. 2. de probat.* Necessarium, quod & suppletorium appellari consuevit, plena deficiente probatione, actori, vel reo defertur *L. admonendi ff. de iureiurand.* Dicitur necessarium, tum quia illud ex necessitate ad supplendum probationis defectum Iudex defert: tum quia omnino alterutra partium subire debet; secus pars recusans pro confessa habetur, nisi delatum fuerit Actori, qui plenarie probaverit; aut reo, contra quem nihil probaverit Actor, *cap. 2. de probat. cit. & L. generaliter ff. de reb. creditis, & iureiur.* Deferri tamen non convenit iusurandum, nisi semiplene probantibus, & remotis omnino ab omni suspicione periurii; quia per illud plena haberetur probatio, itaut Iudex ad definitivam sententiam progredi posset *L. 31. ff. de iureiur.*

Quamobrem hic animadver ite I. quod Iuramentum deferendum non est in causis gravioribus, neque in criminalibus criminaliter motis, quamvis concedatur reo criminaliter convento ad se tuendum *cap. fin. de iureg. & toto tit. de Purg. Can.* neque in causis, in quibus agitur de facto, cui non interfuit pars, a qua illud exigendum foret. II. quod quamvis sententia ab Iudice propter iuramentum prolata transeat in rem iudicatam; nihilominus si illud necessarium fuerit, ex novorum instrumentorum plane, & dilucide rem probantium productione, sententia eadem revocari debet *L. 31. cit.* quia per ipsum non censentur partes aliis probationibus renuntiassent, ut in iuramento voluntario, quod ex partium consensu defertur *L. cad.*

§. V.

IX. De Probatione per Iudicis inspectionem.

Quoties de iis agitur negotiis, quae non alia via, aut saltem non ita facile expediri queunt nisi oculari Iudicis inspectione, ut quaestio de novi operis nuntiatione, agrorum limitibus &c. de quibus *cap. 4. & fin. h. t. & 6. de*

6. *de frigid. & malef.* tunc Iudex vel per se, vel per Commissarios, aut alios artis peritos rem, de qua controversitur, inspiciat necesse est.

Verum ut legitime haec inspectio fiat requiritur partis utriusque citatio, cum ad actum quemlibet omnes vocari debeant, quibus praeiudicium ex eo oriri poterit; neque partes absque suis respective testibus ad inspectionem accedant oportet, ut melius rem, reique statum exponere, & Iudicem informare possint. Demum quoties iudex artis peritis huiusmodi inspectionem committit, iuramentum ipsis deferre debet, quod in neutrius partis gratiam, sed quicquid reverà suâ conscientia deprehenderint, edicere velint.

§. VI.

X. *De Probatione per Praesumptiones.*

Praesumptio, de cuius vi ad probandum in iudicio sexto loco agendum nobis est, definitur passim ab I. C. anticipata de re dubia opinio deducta ex argumentis, indiciis, & coniecturis plerumque evenientibus ex rerum circumstantiis. Quia vero huiusmodi indicia, & coniecturae maioris, aut minoris momenti deprehendi solent, ideo maiorem etiam, minoremve inducunt praesumptionem.

Dividitur ergo praesumptio in praesumptionem *hominis*, & *legis*. Prima, quae & Iudicis dicitur ex *L. Nonius ff. de negot. gestis*, ex nullo iure inducitur, sed ex circumstantiis, & qualitate facti desumi a viris prudentibus assolet. Haec vero aliquando extra ipsam rem petitur, ut quando oritur ex concursu facti cum tempore, aut loco &c. aliquando autem ipsimet rei inest, attentâ illius naturâ, ut cum oritur ex eo quod est magis obvium, & naturale; aliquando fundatur in qualitate specifica illius talis rei, aut Personae, ut cum desumitur ex dignitate, indole, munere &c. de qua in *cap. Cum in Inventure 13. de Praesumpt.*

Praesumptio vero iuris est probabilis coniectura deducta per ipsum ius ex quibusdam circumstantiis, sed non pro certo adserta; unde fit ut contra eam admitti possint probationes in contrarium, de qua in *L. Si Chirographum ff. de*

ff. de Probation. & in capp. 3. 6. & 9. de Praesumpt.

Est etiam alia praesumptio *iuris*, & de iure appellata, & oritur quando lex nedum aliquid praesumit, sed etiam de eo tanquam sibi comperto disponit, & quod praesumitur pro vero habendum esse decernit. Huiusmodi praesumptionis exempla invenire est in *L. 22. C. ad S. G. Velleia. L. fin. C. Arb. tut. l. fin. C. ad S. C. Macedon. cap. 2. de Praesumpt. & cap. is qui fidem de Sponsalib.*

Ad Praesumptionum vim in Iudicio quod attinet animadvertatis oportet non eandem omnibus inesse. Nam primò Praesumptiones hominis, seu Iudicis, sunt vel *leves*, vel *probabiles*, vel *vehementes*. Leves, quae & temerariae, quia ex levibus habentur indiciis nihil probant *cap. Inquisitionis de sent. excom.* Probabiles, quia ex verosimilibus indiciis exurgunt, probant semiplene. Vehementes vero, seu violentae & vehementissimae, quia emergunt ex indiciis adeo efficacibus, ut Iudicis animum trahant, & violentent ad credendum rem ita se habere, gravem probationem inducunt, ex qua patere locum poenae ordinariae existimant *DD. arg. L. 3. C. Theod. de Abolit. L. 2. C. quorum appellat. L. 1. §. Idem ff. de quaest. L. 5. §. In Barbaris ff. de re milit. cap. afferte, cap. illud quoque & cap. litteris de Praesumpt.*

Praesumptio iuris, quae & liquidissima probatio dici solet, pro veritate haberi debet, & plenam facit fidem, qualibet hominis praesumptione maiorem; ac proinde ipsi standum, donec contrarium probetur *L. fin. ff. quod meus causa, L. Cum de indebito §. fin. ff. de Probat.*

Praesumptio iuris & de iure non solum plenam facit fidem, sed neque contra eam admittitur probatio, nisi in contrarium haberetur confessio eius, pro quo stat praesumptio; exceptis tamen iis causis, in quibus ab partium potestate non pendet, ut huiusmodi praesumptio cesset, quemadmodum accideret in causa Matrimonii contra vetitum Ecclesiae contracti.

§. VII.

XI. De probatione per notorium, & famam.

Quamvis notorii nomine relationem facinoris, quae ab apparitoribus transmittitur ad Magistratum intelligant Budeus, & Gothof. in *L. Ea quidem ff. de accusat.* hic tamen notorium venit quidquid nulla potest tergiversatione celari, quia praesentibus civibus omnibus, aut eorum maxima parte gestum, vel dictum fuit, & iam super eo ab Iudice pronuntiatum. Quare in notorio opus non est, ut iuris ordine procedatur, nec appellatio conceditur *cap. pervenit, & cap. consuluit de appellat.* quia cum notoria probationibus non indigeant *cap. evidentia de accusat. & can. de manifesta XXIX. q. 1.* nullum imminet iudicio erroris periculum.

Differt notorium a fama, quod haec licet vulgo in urbe invaluerit, tamen non omnes cives, aut eorum pars maxima aliquid viderunt, ut in notorio, sed alii voce acceperunt ab aliis. Quapropter, ut ipsa semiplenam probationem faciat opus est, ut constans sit, & uniformis, originemque trahat a viris fide dignis, & quorum nihil inter sit, *cap. primus de Elect. cap. praeterea, & cap. super eo de Testib.* Nihilominus in factis quibusdam, quae hominum aetatem excedunt, & aliae meliores non habentur probationes, fama etiam plenarie probat, seu verius, sufficienter, ut Iudex sententiam proferre queat. Quod tamen locum minime obtinet in causis criminalibus, in quibus nec semiplenam inducit probationem, nec indicium ad torturam, nisi alia fuerint adminicula, *cap. 24. de accusat.* vel nisi probetur etiam per duos testes, ut animadvertunt DD. ex *cap. illud de Praesumpt. & L. de minore §. Tormenta ff. de Quaestion. L. Cum quidem §. Quod dicitur ff. de acquir. haered. & L. Labeo ff. de suppellectili legata.*

T I T V L V S XV.

De Sententia, & Re iudicata.

I. **S**ententia, ad quam denique cognitis iuribus Actoris, & Rei ab Iudice deveniendum est, nihil est aliud, nisi *iuridica declaratio, qua alter litigantium absolvitur, alter condemnatur, ac omni controversiæ finis imponitur.* Per eam quippe quid Iudex de proposita controversia senserit, declaratur; & quidem non iuxta suam opinandi rationem, sed potius iuxta legis dispositionem, ut monet Abbas in huius Tit. *Rubric. ex can. iudicet III. q. 7.* Quamobrem sententia palam iniusta, aut ab iure dissonans, irrita est, nec ab ea appellari oportet, *cap. post longas 1. b. 1. & cap. inter ceteras 5. cod.*

II. Sententia in scriptis redacta ab Iudice pro Tribunali sedente coram partibus proferatur oportet *cap. 4. b. 1. in 6.* Et quævis iudices inferiores huiusmodi Sententiae recitationem aliis demandare prohibeantur, Episcopus tamen id potest, si velit, *cap. etsi 5. cod. in 6.*

III. Sententia vero omnis duplex distinguitur, alia *interlocutoria* passim appellata, quæ non litem dirimit, sed aliquid dumtaxat emergens, aut incidens in causa. Alia vero *definitiva*, quæ recte prolata quæestionem propositam terminat *L. 1. ff. de re iudicata.*

IV. Illud hac in re observandum præsertim, quod interlocutoriam sententiam sive in principio, sive in fine causæ latam Iudex semper revocare potest *L. quod iussit ff. de re iudic.* At non ita definitivam, quam declarare tantum, & eodem saltem die supplere potest, si quid omiserit *L. 42. ff. cod.* Et ratio discriminis inde petitur, quod Iudex post sententiam definitivam, desinit esse Iudex *L. ead. & cap. 9. de Offic. delegati.* Hinc ab definitiva appellare cuique licet, non vero ab interlocutoria, nisi definitivæ vim habeat *L. ante sententiam C. quorum appellationes non recipiantur, & Trid. Sess. XXIV. cap. 20. de Ref.*

V. Ad

V. Ad alteram Tituli partem quod attinet, docent I. C. sententiam servato iuris ordine prolatam, a qua condemnatus intra decem dies non appellaverit, transire in rem iudicatam, quod idem est, ac ius facere inter partes litigantes, ut saltem per remedium ordinarium retrahari amplius nequeat, neque oppositae nullitates prodesse quid poterunt *L. Servo §. Cum Praetor ff. ad SC. Trebell. & Cap. Cum inter vos 13. b. t.* etiamsi ad eam rescindendam novum producatur instrumentum, vel aliquod aliud probationum genus *cap. 10. & 21. b. t.*

Potest tamen aliquando contingere, quod sententia incapax sit transcundi in rem iudicatam, vel quia iudex est incompetens *L. factum ff. de reg. iuris*, vel quia haud lata fuit adversus novum comparentem *L. Si Servus §. I. ff. de Leg. & cap. 17. b. t.* vel quia legi divinae opponitur, & salutis aeternae dispendium importat, ut in causa Usurarum, Simoniae, Matrimonii &c. *cap. lator 7. b. t.* vel quia dum evidenter constiterit fuisse latam ex falsis instrumentis, Testibus corruptis, & manifestam continere iniquitatem *cap. 1. b. t.* In causis vero criminum nulla sententia transit in rem iudicatam, cum possit ex Principis indultu semper revocari *cap. 23. Cum tu b. t.*

T I T V L V S X V I.

De Appellationibus.

I. **Q**uia saepe contigit, ut qui in iudicio victus succubuit, sibi illatum esse gravamen conqueratur, ideo iura remedium appellationis, & restitutionis in integrum litigantibus decreverunt. De primo itaque in praesenti, de altero in sequenti Titulo dicemus.

II. Non aliud itaque ad rem praesentem appellationis vocabulo venit, nisi *provocatio ab inferiori iudice ad Superiorem propter illatum, aut imminens gravamen facta.* Et est vel *iudicialis*, vel *extraiudicialis*; prior fit ab actibus iudicialibus, quibus se gravatum quis credit, qualis

lis erit illa, quae fit tum a sententia definitiva, tum ab interlocutoria. Extraiudicialis e contra fit ab actibus extraiudicialibus, quibus aliquis se gravatum queritur, vel gravandum probabiliter timet, quales sunt quae fiunt contra electiones, collationes, & provisiones ab eo, qui optabat *cap. 8. b. t. in 6.*

Differunt inter se iudicialis, & extraiudicialis appellatio. I. quia iudicialis necessario supponit iudicem, a quo appelletur, extraiudicialis vero fieri potest contra quemcumque, qui gravamen infert. II. Iudicialis suspendit executionem, & facit revocari attentata in contrarium *cap. 55. b. t.* In extraiudiciali vero rationabilis causa exprimitur oportet, & non primùm revocantur attentata, nisi postquam fuerit ab Superiore admissa *cap. 16. de Elect.* Quia haec non est proprie appellatio, sed potius provocatio ad Superiorem, ut dicitur in *cap. 5. b. t.*

III. Diversimode quoque se habet appellatio, quando ab definitiva, ac quando ab interlocutoria sententia fit. Nam I. appellatio a definitiva interponi incontinenti potest viva voce per verbum *appello*, aut aequivalens; quae vero ab interlocutoria in scriptis exhiberi debet, non secus, ac illa si post unum, aut alterum diem fiat *cap. 1. b. t. in 6.* II. Appellans ab interlocutoria causam appellationis exprimere in scriptura tenetur *cap. eod.* non ita appellans a definitiva *L. 2. ff. b. t.* III. quoties a definitiva appellatur utrique parti licuerit novis probationibus uti, atque instrumentis, quae eandem principalem causam respiciunt *L. per hanc C. de temp. appell.* In appellatione ab interlocutoria nonnisi ex iisdem causis, & in appellatione expressis iustificatur processus primi Iudicis *Clem. 5. b. t.*

IV. Per appellationem quoque a definitiva suspenditur omnis iurisdictio Iudicis, a quo appellatur, itaut ad executionem procedere nequeat *L. un. ff. nihil innovar. appell. interp.*, dummodo non agatur de censuris absolute inflictis, quarum valor non suspenditur per interpositam appellationem *cap. 53. b. t.* Quamobrem tota iurisdictio ad iudicem superiorem devolvitur, qui nedum in causa principali, sed etiam in accessoriis, & incidentibus pronuntiare, & novam concipere, si opus fuerit, sententiam poterit *cap. 55. b. t. & 18. de Testam.*

V. Ap-

V. Appellatio vero ab interlocutoria, quamvis effectum habeat suspensivum, tamen medio tempore attentata non aliter revocantur, nec prius inhibito conceditur, quam fuerit per appellantem causa gravaminis in appellatione expressa etiam probata *cap. 7. h. t. in 6.* Imo si gravamen huiusmodi per sententiae revocationem, aut correctionem sublatum fuerit, non posset appellatus Iudex ulterius in causa procedere *cap. 60. h. t.* Et quod spectat ad effectum devolutivum, nisi bene appellatum esse constiterit principalis causae cognitio ad primum Iudicem remitti debet *cap. 59. h. t. & L. 6. C. eod.* quoties hic sponte appellationi non detulerit, & sic iurisdictione seipsum spoliaverit, ut dicitur *cap. 5. h. t. in 6.*

VI. Ut vero appellatio suum sortiatur effectum, illam intra legitimum tempus interponere, praesentare, & prosequi debet appellans; quae tempora ab iure statuta *fatalia* a DD. nuncupantur, eo quod ab ipsis fatum sententiae dependeat.

Tempus itaque interponendae appellationis, licet olim biduum concederetur agentibus nomine proprio, triduum vero agentibus nomine procuratorio *L. 1. & 2. ff. Quando appellandum est*; hodie tamen novellis Iustiniani Constit. & iure Canonico decem dies ad appellandum designantur *Auth. hodie de appellat. cap. 8. h. t. in 6. & cap. Cum dilectus de Elect.* Hoc tamen decendum licet ab initio sit utile, ita ut non incipiat nisi post scientiam latae sententiae, vel eius intimationem; attamen postquam coepit est continuum.

VII. Post interpositam appellationem, ut ea praesentetur, debet appellans impetrare ab Iudice inferiori a quo appellat, *apostolos* id est, litteras dimissoriales, seu libellos ab ipso ad Superiorem datos, in quibus testatur appellationem fuisse interpositam, & a se admissam, vel non admissam adiecta reiectionis causa, quare hi libelli alii dicuntur dimissorii, alii refutatorii. Absque hisce apostolis appellatio non recipitur a superiore, nisi appellans doceret Iudicem inferiorem contumaciter illos denegasse. Tempus vero ad eos petendos, & concedendos est triginta dierum a die latae sententiae *L. Iudicibus C. h. t. Clem. 2. eod.* quod si huiusmodi tempus elabatur appellatio cen-

setur deserta, & sententia transit in rem iudicatam.

VIII. Tempus autem prosequendae appellationis in iure praecise determinatum non est, sed Iudex, a quo tenetur illud praefigere habita ratione distantiae Iudicis, ad quem, aliarumque circumstantiarum *cap. ad aures 23. b. t.* Videte Engel ad hunc Tit.

IX. Appellationis demum finiendae tempus est unius anni spatium, & legitimè occurrente causâ ad biennium usque protrahitur *Ausb. Ei qui C. Quo tempore Appell. & cap. eum sit Romana 3. b. t.* quod tempus secundum communem sententiam a die interpositae appellationis erit duccendum.

X. Huiusmodi appellationis beneficium ita gravatis conceditur, ut tamen ab eadem Sententia super eodem articulo, sive gravamine lata nonnisi bis appellare liceat *L. unic. C. ne liceat in una eademque causa provocare, & cap. 55. b. t.* Potest nihilominus Princeps ex speciali privilegio, & certâ scientia novam causae cognitionem concedere. Imo etsi quis non audiat tertio per viam appellationis, auditur tamen per viam nullitatis, ostendendo videlicet quod prior sententia fuerit ipso iure nulla, ita tamen, ut ipsa possit prius executioni mandari *Clem. 1. de Sent. & re iudic.*

XI. Ad Tituli complementum superest, ut dicamus quibus, a quibus Iudicibus, ad quos, & quibus in causis appellare liceat.

Omnès ergo possunt, nedum illi, contra quos sententia lata est, sed etiam quorum interest, vel quibus mandatum est, vel qui negotium gerunt alienum *L. 1. & seqq. ff. de appellat. recipiendis, II. q. 6. can. non solent, cap. 17. de sent. & rei iudic. & cap. 55. b. t.* Quinimo si unâ eademque sententiâ plures damnentur, & ceteris non appellantis, unus eorum dumtaxat appellare, appellationis victoria omnibus proderit *cap. 72. b. t.* Denique in causa sanguinis contra capitalem sententiam quilibet extraneus appellare potest in favorem damnati, quem innocentem esse novit, aut probare vult *L. non tantum ff. de appell. & relat.*

XII. A quovis Iudice superiorem cognoscente appellare ad immediatum superiorem fas est, nisi agatur de cau-

causis ecclesiasticis, & spiritualibus, in quibus etiam prætermisiss mediis adiri potest Romanus Pontifex tanquam totius Ecclesiae caput *can. omnis oppressus, & can. ad Romanum II. q. 6. & can. 4. II. q. 3.* Non potest ab arbitris appellari, ut alibi diximus, neque ab executore sententiae ab alio prolatae *cap. novit b. t. &* neque ab eo Tribunali, quod unum, idemque constituit corpus cum persona Supremi Principis.

XIII. Demum in omnibus causis adpellatio admittitur, dummodo non sit manifeste inhibita. Et 1. quidem iure civili non admittuntur appellationes a sententiis interlocutoriis haud habentibus vim definitivae, nec inferentibus gravamen irreparabile per appellationem a definitiva *L. ante Sententiae C. quorum appellationes recipiantur.* Et quamvis iure Canonico olim admitterentur ex *cap. 11. & 12. b. t.* nihilominus iuris civilis dispositionem adoptavit Trid. *Sess. XIII. cap. 1. & Sess. XXIV. cap. 20. de Reform.*

2. Propter delicti atrocitatem non habet locum appellatio a sententia definitiva in causis criminalibus delicti laesae maiestatis divinae & humanae *cap. 18. de haereticis in 6. & l. Constitutionis ff. b. t. falsae monetae L. 1. C. de Falsa moneta, Raptus Virginitatis L. un. C. de raptu, &* similium criminum; modo tamen convicti fuerint, aut sponte confessi, non vero tormentorum vi.

3. Appellare non possunt qui in Iudicio transigerunt *cap. 1. & ult. de Transact. ac L. 16. & 20. C. eod.* Qui per delationem iuramenti voluntarii causam terminarunt *L. 5. §. 2. ff. de Iurciur.* Qui appellationis beneficio renuntiarunt, sive per pactum expressum *L. 1. ff. a quibus appellare non licet,* sive tacite exercendo actum aliquem appellationi contrarium *cap. 54. §. fin. b. t. 23. de Testib. & 20. de Off. Delegat.*

4. In causa, quae dilationem non patitur haud locum habet appellatio saltem quoad effectum suspensivum, ut si iubeat Iudex Testamentum aperiri, scriptum haeredem mitti in possessionem &c. *L. ult. ff. de appellat. recipiend.*

5. Neque in notoriis ubi veritas adeo patet ut nulla possit tergiversatione celari *cap. 61. b. t. & 3. eodem in*

6. Quemadmodum in causa quam Iudex definierit, secundum claram iuris dispositionem *L. 7. §. 1. ff. de appellat. recipiend. & cap. 29. b. t.*

6. Non admittitur appellatio a legitima Superioris correctione *cap. 2. de Off. Ordin.* nisi superior modum in corrigendo excesserit. Quod confirmavit *Trid. Sess. XXIV. cap. 10. de Reform.* statuens quod visitationem & morum correctionem nulla inhibito, appellatio, seu querela impedire, aut suspendere possit.

7. Appellari non potest a Sententia prolata contra verum contumacem *L. 1. C. quorum appellationes non recipiantur.*

8. Demum in rerum parvi momenti causis saltem ex iure Caesareo non est admittenda appellatio, ut docent *DD.* licet ius Canonicum id concedat *cap. 11. b. t.*

T I T V L V S XVII.

De restitutione in integrum.

I. Alterum iuris remedium in favorem illorum, qui gravamen passi sunt, aut se passos esse existimant, est in integrum restitutio, qua postulent, ut in statum pristinum ex iusta causa restituantur.

II. Competit huiusmodi restitutionis beneficium I. minoribus xxv. annis propter fragile, & infirmum actus consilium *L. 1. ff. de minoribus, & cap. 8. b. t.* II. Reipublicae, Principi tanquam Reipublicae capiti, universitati, ceterisque corporibus, quae aliena manu reguntur *L. Respublica C. quibus ex causis maiores &c. & L. Remp. C. de iure Reip.* III. Ecclesiae nescum adversus privatos, & laicos, sed adversus quocunque aliam Ecclesiam *cap. 1. & seqq. eodem privilegio fruuntur omnia loca pia, quae in favorabilibus Ecclesiis comparantur cap. 2. de consuetud. & L. 35. C. de Episcopis, & Cler.* IV. Maioribus etiam xxv. annis ob legitimam absentiam, & errorem, aut

ant circumventionem *L. 1. & seqq. ff. quibus ex causis maiores in integrum restituantur.*

III. Est nihilominus notabile discrimen inter eiusmodi beneficium minoribus competens, & maioribus indultum. Nam ut eo utatur minor, Ecclesia, aut Respublica sufficit quod ex actu, vel contractu, aut sententia gravis laesio contigerit, nec opus est alia probatione, cum omnium loco sint minor aetas, Ecclesiae favor, & Reipublicae commune bonum. At vero in maioribus propter allegatam laesionem requiritur alia iusta causa v. g. absentia Reip. gratia, detentio in vinculis, captivitas, circumventio &c. Praeterea maioribus nunquam conceditur restitutio, quando suppetit remedium ordinarium; minoribus vero quoties est utilior *L. 2. C. de rescind. vendit.*

IV. Datur quoque restitutionis remedium contra sententiam ipsius Principis, aut Summi Pontificis, quoties ex ea, quemadmodum ex omni alio contractu enormis evenit laesio.

V. Tempus petendae in integrum restitutionis in utroque iure quadriennium utile concessum est, quod propterea non currit ignoranti, minori, aut legitime impedito *L. ult. C. de Temporib. in integrum restit. & cap. Ecclesia b. t. in 6.* ubi de minoribus statuitur, ut huiusmodi tempus incipiat dumtaxat a primo die anni xxvi. nisi veniam aetatis impetrassent *L. 1. C. de his qui veniam aetatis impetrarunt.* Etsi vero elapso praedicto quadriennio concedi amplius non solat huiusmodi restitutio in integrum, potest nihilominus aliquando iusta causa subesse, qua Iudex etiam ad eam concedendam moveatur, ut si revera praevaricatio in iudicio fuerit, fraus enormis in contractu &c. ex *cap. 1. b. t. in 6. & arg. cap. 11. de reb. Ecclesiae non alienandis.*

VI. Statim ac postulatur restitutio suspenditur latae sententiae executio, nisi dolo malo postulari prudenter suspicetur *L. un. C. de in integrum restitut. postulata, & cap. Sciscitata b. t.* Et ubi etiam obtenta fuerit, si est contra sententiam, haec corrigi debet, si contra contractum omnia in pristinum revocantur *L. 24. §. Restitutio, 27. §. Si pecuniam ff. de Minoribus, & 16. C. de Praedictis Minorum.*

VI. De-

VII. Debet denique restitutio peti ab Iudice ordinario, vel etiam Delegato, quoties id ei specialiter fuit demandatum, aut ad commissum sibi negotium incidenter pertinet *L. in causa, & seq. §. ff. de minor. & cap. cum causa h. t.* Videte Glossam ibidem. Et haec pro III. Institut. Libro.



I N S T I T V T I O N V M

C A N O N I C A R V M

L I B E R Q V A R T V S .



Vplex omnino esse iudiciorum genus superiori libro diximus, aliud nempe civilium, criminalium aliud. De primis quantum nobis licuit, iam ibi satis est actum, superest ergo ut de istis breviter agamus. Et quoniam quae instituuntur criminalia iudicia vel accusatione, vel denuntiatione, vel inquisitione instituuntur, ideo ab his quoque initium nos ducamus oportet.

T I T V L V S I.

De accusationibus, denuntiationibus, & inquisitionibus.

I. **A**ccusatio itaque est criminis alicuius apud Iudicem competentem vindictae publicae causa in scriptis facta delatio cum inscriptione, & subscriptione delatoris. Huiusmodi libelli accusatorii formam ex L. 3. ff. b. t. exhibet Gratianus ad calcem can. 5. II. q. 8. ubi praecipue observandum occurrit, quod accusator se libello inscribere tenetur, nedum in publicis delictis, sed etiam in privatis criminaliter intentatis; quod adprobat Innocentius III. in Capp. 16. & 24. b. t. & confirmat Tridentinum Sess. XXIV. cap. 3. de Reform. Hac inscriptione profecto seipsum obligat accusator ad crimen probandum, vel
ad

ad poenam talionis subeundam eam nempe, si non probaverit, quam reus pati debuisset, ut docet Glossa ad idem *exp. 16.* & habetur *can. 4. ib.* Hanc tamen libello se inscribendi necessitatem non subeunt qui per exceptionem crimen obijciunt, vel qui tanquam denuntiatores ad iudicium accedunt, cum non publicam vindictam spectent, sed illi suam defensionem, delinquentis correctionem isti; nihilotamenminus ubi non constiterit crimen, serio sunt corripienti, ut in posterum cautiore denuntient.

II. Institutam accusationem qui deseruerit, impensas, & damnum reficere cogitur; imo de iure civili etiam infamiam incurrit *L. Spuria 6. ff. de Decur.* Potest nihilominus aliquando aboleri accusatio; & T. cum abolentur reorum nomina publicae letitiae gratia *L. Si interveniente ff. ad S. C. Turpil.* II. Si probeat accusator se per errorem falso accusasse. III. Si decesserit is, aut legitime impediatur, nec alius prosequatur accusationem, quanquam, si ex gravioribus delicta fuerint, iudicium instauraretur per inquisitionem.

III. Attamen notate hic, deferentem institutam accusationem poenas non effugere ex eo, quod libellum in scriptis non exhibuerit; nam satis est, si, quemadmodum fert praxis, accusatio oretenus fiat, & per publicum actuarium redigatur in scriptis, quoties cetera fuerint servata, quae iure exquiruntur.

IV. Accusare generatim loquendo possunt omnes, qui ob aetatem, sexum, statum, officium, defectum, delictum, suspicionem calumniae, sanguinis conjunctionem, vel reverentiam non prohibentur ab iure, quemadmodum habetur *II. q. 1. can. 12. & L. 8. ff. b. t.* & iidem fere sunt, quos ut minus idoneos ad testificandum recensuimus. Hi tamen omnes praeter ratione carentes, & excommunicatos, ubi suam, vel suorum iniuriam prosequantur ab accusatione repelli nequaquam possunt *L. 11. ff. b. t.* quemadmodum ubi de crimine agitur laesae maiestatis, blasphemiae, apostasiae, haeresis, simoniae, sortilegii, falsae monetae, falsi Testamenti &c. in quibus quilibet ad accusandum admittitur, exceptis capitalibus inimicis, & ratione sui status clericis, & religiosis, quoties poena sanguinis imminet reo.

V. Quem-

V. Quemadmodum nonnulli accusare, ita etiam alii accusari nequeunt, hæc sunt; Mortui, absentes causa Reipublicæ, Legati Principum, Magistratum exercentes, data interim cautione *de se sistendo*, absoluti semel, vel damnati de crimine eodem, infantes, furiosi, alique dolit incapaces. Videte text. ad *L. Corneliam de Sicariis*, & alibi, præsertim *ff. b. s.*

VI. Vbi vero accusator, & accusatus in iudicio comparuerint, in carcerem recipi, & ibi usque ad causæ finem manere debent, maxime si de poena capitali agatur, cum uterque sit de fuga suspectus *L. ult. c. de accusat.* & *L. 2. c. de exhibendis reis*; & licet poena talionis amplius accusatori non immincat, tamen id iudicis arbitrio relinquitur.

VII. Alter procedendi in criminalibus modus est per denuntiationem, quæ definiri solet; *criminis alicuius apud Iudicem sine inscriptione facta delatio*; & dividitur passim in *Evangelicam*, *Canonicam*, & *Civilem*. Prima est, quæ fit ad spiritualem alterius emendationem; idcirco eam præcedat oportet una, & altera monitio, ut docemur ex Matth. XVIII. 21, & Lucae XVII. 3. Canonica a sacris Canonibus est instituta ad coercenda delicta adversus Ecclesiasticas sanctiones perpetrata II. q. 7. cap. 47. Civilis demum ad publicam vindictam est adinventæ, ut nempe publici quidam ministri ab iudice destinati crimina in Republica, vel civitate commissa scrutentur, & ad ipsum referant. Alii vero melius fortasse denuntiationem dividunt in *Evangelicam*, de qua diximus, & *Iudicialem*. Hanc subdividunt in *publicam*, & *privatam*; primam dicunt, quæ fit ad publicam vindictam sive a publicis ministris, sive a privato quolibet; & hæc proprie est criminalis denuntiatio. Privatam vero, quæ fit ad privatum tantum negotium; & hæc est proprie Civilis, cum non publica vindicta intendatur a denuntiante, quamvis subinde Iudex ex officio ad eam procedat.

VIII. Denuntiare Iudici ad publicam vindictam possunt omnes, & soli qui accusare non prohibentur, & vicissim, qui accusari non potest, neque potest denuntiari. Ex recepta tamen consuetudine ad denuntiationem faciendam non repelluntur inhabiles ad accusandum, cum per ipsam non nisi sternatur via ad inquirendum. IX. De-

IX. Denuntiatio praeter libelli inscriptionem ea praestare debet quae accusator. Quinimo debet statim denuntiare etiam testes, probationes, & instrumenta quae scit, vel habet, ut Iudex ad inquisitionem procedere queat; cum accusatori satis sit ea omnia praestare tempore, quo erunt necessaria ad probationem sibi incumbentem.

X. Tertius denique procedendi modus est per inquisitionem, quae est investigatio criminis ab Iudice ex officio facta; & quamvis olim de iure communi sine accusatore damnaretur nemo *L. 6. §. 2. ff. de Muner. & honor.* adeoque huiusmodi procedendi per inquisitionem modus esset extraordinarius; hodie tamen ob defectum accusatorum evasit ordinarius, partes accusatoris exercentes Promotor, & Advocatus Fiscalis.

XI. Est vero inquisitio vel *generalis*, vel *specialis*, vel *mixta*. In generali Iudex ex officio de delictis in genere inquit ut in *Cap. I. de Off. Ordin. & L. congruit ff. de Off. Praesid.* In speciali de aliquo certo delicto, & aliqua determinata persona. In mixta demum de aliquo certo crimine, sed de aliqua incerta persona, vel vicissim, de qua *Cap. cum nobis, Cap. per venerabile de Elect. & can. 4. dist. 28.*

XII. Cum generalis inquisitio non sit nisi praeparatoria ad specialem, docent passim DD. ex *cap. 1. de Off. Ord.* fieri illam posse nulla etiam praecedente infamia, nulloque criminum commissorum indicio; huius quippe generis sunt omnes visitationes statim temporibus per Episcopos in suis Diocesis facienda; inquisitiones &c. secus vero, est in speciali, & mixta, ubi criminis diffamatio exigitur vel indicia, aut semiplena probatio *cap. qualiter, & quando, & cap. Inquisitiones de Accusationibus.*

XIII. Quoties ergo huiusmodi indicia emerferint, investigare debet Iudex, quid ferat de illa personae fama, quod utique omni maiori circumspeditione, & prudentia exequatur oportet, ne per illam ipsam inquisitionem inquisiti existimatio laedatur, atque inde nascantur iniuriae, ut dicitur in *cap. 17. de Accusat.* Quod si hoc iuris ordine non servato processerit iudex, legitimam exceptionem, aut etiam appellationem interponeret inquisitus, qua neglecta
pro-

processus Iudicii esset omnino nullus *cap. 1. & 2. de Ac-
cusat. in 6.* Ubi tamen decernitur quod si praesens fuerit
inquisitus, & nihil exceperit intelligitur proprio iuri, aut
favori renuntiassse.

XIV. Haec autem diffamatio in quibusdam crimini-
bus quam maxime reipublicae noxis, & ex quibus impen-
dat aliis periculum everfionis necessaria non est; cum ex
levi notitia, atque ex sola socii confessione peculiaris in-
quisitio instituat, ut in crimine haereseos, Apostasiae,
laesae maiestatis, falsae monetae &c. quemadmodum opti-
me deducunt DD. ex *cap. Excommunicamus §. Adiciamus
de Haeretic. & L. Apostatarum 4. C. de Apost.*

Neque necessaria est eiusmodi diffamatio, quoties in-
quisitio instituat dumtaxat ad finem mali alicuius impe-
diendi, ut si agatur de officiorum, & beneficiorum col-
latione, de contrahendo matrimonio &c. Quinimo neque
necessaria est diffamatio ubi publica criminis suspicio fuerit
contra aliquem, aliunde non infamatum, *arg. L. 1. ff. ad
I. C. Sillan.*

XV. Facta ergo inquisitione, seu processu informa-
tivo, si ex eo plena, aut saltem semiplena probatio ha-
beatur, constituendus est reus, citandus nempe ad perso-
naliter comparandum; imo etiam si de gravi crimine aga-
tur, & de poena corporali infligenda, timeaturque eius
fuga procedendum erit ad incarcerationem.

XVI. Reo comparente, & constituto debet primò ei
iuramentum deferri de dicenda veritate iuxta Tribunalium
praxim. Deinde ab Iudice, vel Commissariis coram Pro-
motore Fiscali examinandus est super Articulis, & inter-
rogatoriis, quae ex processu informativo sunt depromen-
da; quod si reus respondere absque dilatione detrectaverit
poenis, & tortura cogi poterit. Obtinet etiam ex consue-
tudine, ut reus examinetur ante datas eidem defensiones,
& copiam processus informativi, atque depositionum con-
tra ipsum factarum a Testibus. Non semel tantum, sed
bis, & tertio examinari potest reus, qui si in negatione
perstiterit, Testes qui in praevia informatione auditi fue-
runt rursus examinari debent, citato reo ad videndum ipsos
iurare, non ad audiendum quid deponant; Interdum quo-
que Testes praedicti iubentur suam depositionem renovare.

coram ipso reo, quae depositionis renovatio appellari consuevit *confrontatio*.

XVII. Finito huiusmodi examine debet Iudex offerre reo Patronum, nisi proprium habeat, eique concedere defensiones cum competenti termino trium, aut quatuor dilationum, etiamsi reus iam confessus, & convictus esset. Quinimo nomina Testium, eorumque depositiones eidem notificentur oportet, ut possit se tueri, & exceptiones proponere adversus eorum dicta, & personas *cap. 24. h. t.* quod tam non praestari minime debet, quoties ob potentiam inquisiti aut consanguineorum testibus imminere periculum iure timeretur. Congestae denique per Patronum defensiones Advocato Fiscali exhibentur, cuius munus est ad eandem respondere contra reum pro iustitia vindicativa.

XII. Quoties vero de crimine satis clare confiterit, & reus iam confessus, & convictus habeatur procedendum erit ad sententiam; si autem nec confessus, nec plane convictus sit & tamen semiplena contra ipsum habeatur probatio iuxta Tribunalium praxim applicandus erit torturae, nisi exilis fuerit qui de iure ab tortura eximuntur, ut sunt senes, infirmi, mulieres pregnantes, &c.

XIII. Quia vero confessio vi tormentorum extorta non probat ad poenam saltem ordinariam, ideo altera die extra torturae locum, & absque vinculis releguntur reo ab actuario quae in tortura deposuit, ut eadem ratificet, quod si praestiterit pro confesso habetur. Huius vero confessionis copia Patrono conceditur, ut infra triduum rei novas defensiones prodat, quae iterum Advocato Fiscali sunt tradendae ad opponendum. Quibus omnibus perpensis Iudex ad definitivam sententiam descendet.

XIV. Pro complemento notate in iudicio criminali non semper iuris solemnitatem requiri, cum aliquando procedi possit summarie, ut in delicto Notorio, notorietate *iuris* aut *facti*; quia videlicet vel res ita est evidens, ut nulla possit tergiversatione celari; vel reus in fraganti deprehensus fuit.

XV. Si tamen per inquisitionis iudicium probatum fuerit crimen regulariter poenam ordinariam non meretur *cap. Inquisitionem h. t.* quod locum non obtinet in crimi-

ne.

ne quod de iure impedit ordinis exercitiũ, ut esset irregularitas probata.

T I T V L V S II.

De duplici purgatione.

I. **A**ccidit plerunque ut innocenti accusato ordinariae probationes, quibus se tueatur, defint; quapropter ad innocentiae praesidium extraordinarius modus adinventus est, legibusque approbatus, qui purgatio passim appellari consuevit, & duplex distinguitur, *Vulgaris* una, *Canonica* altera.

II. *Vulgaris* quidem, quia populi superstitione potius, quam Canonum auctoritate introducta *can. Monomachiam*, & *c. Mennam II. q. 5.* variis modis olim peragebatur, aliquando nempe per Duellum, *cap. 1. & 2. de Purg. vulg.* Non raro etiam per ignem, seu per rogam, aut per ferrum candens, vel per vomeres ignitos, quorum experimento, praecedentibus tamen variis exorcismis, & precibus, se committebat infamatus, *cap. 3. cod.* Multoties quoque fiebat per iudicium aquae frigidae, in quam proiciebantur accusati, qui si submergebantur Innocentes, si vero supernabant Rei pronuntiabantur; vel etiam per discrimen aquae ferventis, in quam nudato brachio manum de crimine suspecti immittere cogeabantur, & ubi illaescam extraxerint insontes habebantur, &c. Quae quamvis ab Ecclesia fuerint diu tolerata, tandem optima ratione fuerunt prohibita primum a Nicolao Papa, & postea a pluribus illius successoribus *can. consuluisse II. q. 5.*

III. Purgatio vero Canonica *iudicium Crucis* olim dicebatur; & quamvis de forma, qua fiebat, adhuc incompertum apud Scriptores, nihilominus non improbabiler quidam putant eam non fuisse aliam, nisi iuramentum ad Crucis contactum praestitum. Quare hodie quoque tota ratio purgationis Canonicae consistit in iuramento, quo quis a crimine sibi obiecto se immunem esse adferit Deum in testem vocando, quod purgationis genus locum etiam

obtinet in Pandectis *L. 4. §. Sed si servus ff. de Edendo.* ac expresse adprobatur iure Decretalium, eiusque forma describitur praesertim *cap. 5. de Purgat. canonic.*

IV. Iplius indicendae ius penes Iudicem competentem residet *cap. Nos inter 6. eod.* Verumtamen non ad illius arbitrium indici debet, sed praecesserit necesse est vel accusatio vel publica infamatio cum sufficientibus indiciis, & praesumptionibus *capp. 4. 12. & 14. eod.* dummodo delictum notorium non fuerit *cap. 15. eod.*

V. Quoniam vero accusatus per huiusmodi purgationem constituitur veluti Iudex in propria causa, ne ipsi facilis peierandi aditus praebeatur exigunt Canones, ut nedum iuret accusatus, sed etiam ut alii, quos Compurgatores vocant, iureiurando adfirment se credere iurantem vera dixisse, & revera innocentem esse *cap. 2. aliisq. eod.* Vnde patet discrimen inter iuramentum purgandi, & compurgatorum; ille enim iurat de *Veritate*; isti de *Credulitate* *cap. 5. h. t.* Horum vero copiam qui non habuerit, quod peregrinus sit, ignotus, vel pauper, hoc etiam iurare cogitur, Abbas in *cap. inter de purgat. can.*

VI. Admissus demum accusatus ad sui purgationem, si ab hac deficiat, quia compurgatores delictum suspicantes iurare noluerunt, veluti convictus damnandus est ab Iudice iuxta praesumptionis gravitatem ordinariâ, vel extraordinariâ poenâ *capp. 11. & 13. de Sim. & 10. de Purgat. can.* Plura de huiusmodi canonica purgatione dicere non est opus, praesertim cum rarius evaserit eius usus, imo verius in desuetudinem abierit.

T I T V L V S I I I.

De Criminibus, & praesertim de Simonia.

I. **I**ndiciis, de quibus hic agendum nobis proposuimus materiam suppeditant crimina, quorum iure civili celeberrima divisio est in *publica*, & *privata*. Eorum delatio, sive accusatio cuivis e populo datur; horum vero iis dumtaxat, quorum interest; illa quoque ex suapte

na-

natura reis infamiam ingerunt; hæc nequaquam. Omnia tamen vel *capitalia* sunt, vel *non capitalia*. Primi generis poena est mors naturalis, aut civilis, sive aquae, & ignis interdictio. Alterius vero pecuniaria multa, aut simplex corporis coercitio. At iure nostro Canonico præter vulgatam illam, quam superiori libro indicavimus in *Secularia*, *Ecclesiastica*, & *Mixti fori*, ea est criminis partitio præcipua, ut alia sint, quibus *Proximus*, alia quibus *Deus* ipse potissimum læditur. Hæc inter sese primo offert *Simonia*, quam hæresim omnium antiquissimam, & adeo grave flagitium, ut huic comparata cetera nihil fere sint, Patres existimarunt. De hac igitur primo loco agemus, de aliis infra.

II. *Simonia* itaque a Simone Mago propter factum, quod Actorum VIII. narratur, sic dicta, definitur passim: *Studiosa voluntas emendi, vel vendendi spiritualia, vel spirituali adnexum pro temporali*. Dicitur *studiosa voluntas*, idest deliberata cum advertentia mali; cum enim res sacrae ab contractuum commercio exemptae sint, ideo actus ille prohibitus explicari non potest nomine emptionis, & venditionis, sed voluntatis *emendi*, aut *vendendi*; sub cuius voce venit quilibet alius contractus non gratuitus. Dicitur quoque *aliquid spirituale, aut spirituali adnexum* idest nedum quodlibet supernaturale donum ad animae salutem directe ordinatum, sed omne temporale etiam quod spiritualibus aliquo modo adnectitur. Dicitur demum *pro temporali*, nam si daretur spirituale, pro spirituali, sicut non esset verus contractus, ita neque *Simonia*. Ex his colligere est ad *Simoniam* tria omnino, concurrere videlicet *pactum*, *munus*, seu pretium temporale, & *mercedem*, seu rem spiritualem, aut spirituali adnexam. Pro quorum maiori intelligentia notate.

III. Huiusmodi quidem pactum non requiritur necessario quod sit explicitum, sed sufficit implicitum saltem ex una parte incohatum vel intentum, quo quis temporale aliquid dat, aut dare proponit animo, ac intentione alterum obligandi & movendi ad reciproce dandum spirituale, & e contra, etiamsi hunc animum verbis, aut signis expressis non manifestaret, *cap. 18. & 34. b. t.*

IV. Munus quoque seu pretium quod in *Simonia* inter-

tervenit triplex est, aliud *a manu*, aliud *a lingua*, aliud *ab obsequio* ut docemur *Can. sunt nonnulli* 114. I. q. 1. Munus a manu est nedum pecunia stricte sumpta, sed quaelibet etiam res temporalis pretio extimabilis, quae pecuniae equiparatur I. q. 3. C. 6. Munus ab obsequio est omne servitium, vel obsequium temporale tacito, vel expresso pacto pro re spirituali praestitum, vel praestandum. Munus denique a lingua sunt laudes, commendationes, preces, intercessionem, officia &c. quae tacito vel expresso pacto pro re spirituali, aut spiritualibus adnexa interponuntur, aut exiguntur in futurum apud Magnates, Principes &c.

V. Mercis denique nomine veniunt, ut dicebam ipsae res spirituales seu spiritualibus adnexae, quae pro temporali pretio dantur, vel accipiuntur; omnia scilicet quae eiusmodi sunt naturae, ut gratis dari debeant iuxta illud: *gratis accepistis, gratis date*. Attamen Simoniacum non est vel pro celebratione Missarum, vel pro Sacramentorum administratione &c. aliquid temporale accipere, non quidem ut pretium rei spiritualis, sed ut debitum stipendium ad vitae sustentationem eorum, qui altari inserviunt; idque iuxta modum ab Ecclesiasticis Statutis praescriptum vel laudabili consuetudine inductum, non tantum sponte oblatum accipere possunt Ecclesiae Ministri, sed etiam exigere.

Ita quoque quae spiritualibus adnectuntur quoties unum ab altero est separabile emi, & vendi possunt absque Simoniae piaculo, ut Vasa Sacra, vestes, & ornamenta, reliquiarum; dummodo tamen pluris non vendantur, ac venderentur si sacra non forent, & reliquias non continerent. Huiusmodi tamen separatio locum non habet in beneficiorum collatione; cum ius ad temporales proventus beneficiato non detur nisi propter officium spirituale; adeoque ut optime docemur I. q. 1. can. 7. *Quisquis horum alterum vendit, sine quo nec alterum provenit, neutrum invenditum relinquit*.

VI. Omnis vero Simonia triplex est *mentalis* nempe, *conventionalis*, & *realis*. Mentalis quidem cum quis dat spirituale pro temporali, & vice versa, sed absque ullo pacto expresso, aut tacito externe manifestato, ea tamen interna intentione, seu proposito ut movat alterum, obliget,

get, & alliciat &c. De hac Simoniae specie agitur *cap. 34. & fn. b. t.*

Conventionalis Simonia est in qua intervenit conventio, seu pactum expressum, vel tacitum expresse manifestatum, sed tamen effectu postea caruerit. Huiusmodi conventionalis Simoniae casus occurrit in *cap. 12. b. t.* si ergo ex nulla parte fiat executio dicitur conventionalis *pura*, si vero ab aliqua parte executioni mandari coepit vocatur conventionalis *mixta*, utpote participans aliquid de pura conventionali, aliquid de reali.

Realis denique Simonia committitur quoties conventioni integra accedit executio, sive utrinque traditio. Huius Simoniae rei habentur nedum ipsi pacificentes, sed etiam omnes mediatores, sponsores, depositarii &c. Adiungunt nonnulli *fiduciarium*, seu *confidentialem* ad unam, vel alteram ex enumeratis facile referendam, in quam incidit confereus, vel procurans alteri beneficium ea mente, ut hoc sibi, aliisque postea resignetur, vel ex eo redditus aut pensionem percipiat.

VII. Dividitur praeterea Simonia, ut alia sit *iuris divini*, alia *Ecclesiastici*; Illa est eadem quam usque modo prosecuti sumus. Altera vero committitur quoties spirituale pro spirituali datur, aut temporale pro temporali contra Ecclesiasticam legem eas permutationes sub poenis Simoniacorum prohibentem ob periculum, & speciem Simoniae iuris divini; ita v. g. prohibetur beneficiorum permutatio propria auctoritate facta *cap. 4. de Pactis, & 4. de Transact.* Venditio officiorum temporalium Ecclesiae ut Economi, Sacristae &c. *I. q. 1. C. 8. & cap. 33. b. t.* haec de Simonia, pauca de poenis.

VIII. Ausuri autem de huiusmodi poenis in Simoniacos decretis primum animadvertamus oportet eas *ipso iure & facto* non incurri ob quamlibet Simoniam, sed propter eam tantum, quae committitur vel in susceptione ordinum vel in religionis ingressu, vel denique in collatione, & receptione Ecclesiastici beneficii, cum nonnisi de his iura loquantur, ut patet ex Extravag. *cum detestabile*, & alia *Sane b. t. inter Com.* quemadmodum quoque ex Bulla Pii V. *Intolerabilis*.

2. Nullam incurri poenam in foro exteriori ob *solum*

mentalem Symoniam quolibet in casu commissam *cap. 3. & fin. b. t.* quod docent etiam quam plurimi DD. de pura conventionali ex *cit. Extrav. cum detestabile*, & ex Constit. *cum tam divino* Iulii II. quinimo eorum nonnulli illud idem sentiendum quoque putant, defenduntque ob Conventionalem mixtam; verum ipsis minus hac in re favet D. Thomas II. 2. q. 100. art. 1. ac plures cum ipso melioris notae Canonistae, secundum quos perinde est pro spirituali accepto, vel dato fuerit ne tradita pecunia, an tantum promissa I. q. 3. C. 5.

Ad poenas itaque in Simoniacos decretas quod attinet, nulli dubium esse poterit quin utrumque ius gravissimas constituerit. Caesareum quippe Simoniacae promotiones deponi, & agentes, ac consentientes, infamiam notatos a gradu turpiter depelli iubet L. *si quamquam* 29. C. *de Episc. & Clericis, ac alibi*. Nostrum vero Canonicum eos sive manifesti, sive occulti fuerint, excommunicatione Romano Pontifici reservata innodavit; Electiones vero, Postulationes, collationes quascumque &c. Simonia pollutas irritas, & cassas omnino pronuntiavit; & sic electos vel institutos beneficium etiam dimittere, fructus perceptos restituere, & ab ordinibus universis, etiam antea susceptis remanere suspensos praecipit; Electores, Collatores &c. illico ab omnium Ordinum Collatione, eligendi iure &c. expoliatos, ut videre est in toto *Tit. de Simonia*, & alibi incidenter, quae iura confirmarunt postea secuti Romani Pontifices.

T I T V L V S IV.

De Haereticis, Schismaticis, & Apostatis.

I. **H** *Aeresis* est error contra Catholicam fidem. Dividitur in *materialem*, & *formalem*; illa non ex malo animo, sed ignorantia potius, & defectu debitae cognitionis proficiscitur, nec proprie est haeresis 24. q. 3. C. 20. Formalis vero error est voluntarius, quem Christianus pertinaciter tenet contra aliquam Catholicorum do-

dogmatum doctrinam. Et dividitur in *internam*, seu mentalem, & *externam*. Interna quatenus nec signis, verbisve manifestatur; externa vero foris aliquo modo prodit. Quamvis autem interna etiam haeresis gravissimum peccatum sit, Ecclesia tamen de occultis non iudicat *cap. 33. de Simonia*. Sola ergo formalis externa haeresis Canonicis subiicitur poenis.

II. Inter has vero prima est excommunicatio Rom. Pontifici reservata, quam ipso iure, & facto incurrunt haeretici *cap. 8. 9. & 13. b. t.* & ex Bulla Caenae Domini 6. I. Eorum quoque receptores, fautores, & defensores. Tridentinum nihilominus *Sess. XXIV. cap. 6. de Ref.* concessit Episcopis potestatem absolvendi ab huiusmodi excommunicatione haereticos fere occultos, qui videlicet se ipsos non manifestarunt, nisi quibusdam tantum, penes quos non est probabile divulgationis periculum. An vero huic Tridentini decreto derogatum sit per Bullam Coenae Domini, non una erat Doctorum sententia. At demum per Constitutionem Benedicti XIV. fel. regn. declaratum fuit amplius fas id episcopis non esse.

III. Praeter excommunicationem aliae sunt in haereticos poenae statutae; & primo irregularitas cum infamia, ex qua haeretici, eorumque liberi usque ad secundam generationem in linea paterna, & usque ad primam inclusive ex linea materna inhabiles reduntur ad sacros ordines, & beneficia Ecclesiastica, ac si quae antea obtinissent, amittunt *cap. 2. 12. 15. b. t. in 6. II.* Haeretici, eorumque fautores, & receptores sunt interstabiles active & passive *cap. 5. & 13. eod.* Quod iam pridem quoque Imperatores nonnulli zelo Christianae Fidei instructi decreverant, ut Arcadius, Honorius, Valentinus, & Iustinianus in *l. Manichaeos l. Arriani l. Quae de Samaritanis C. de Haeret.* ac demum Fridericus Imperator in sua Novella. III. Haeticorum bona post Ecclesiae sententiam, si laici fuerint, per laicum iudicem addicuntur Fisco, si vero Ecclesiastici, applicantur Ecclesiae, cui inserviebant, *cap. 10. 13. b. t. & 19. eod. in 6. IV.* Demum si prorsus pertinaces perseverant, & maxime si postquam semel haeresim ex mandato iudicis abiurarunt de novo in eam relapsi fuerint, Iudici laico traduntur ultimo afficiendi supplicio.

N 4

IV. Hae-

IV. Haeresi, & Haereticis proxime accedunt *Schisma*, & *Schismatici*. Est vero graecis *Schisma*, quod latinis scissura. Eaquepropter qui Ecclesiae unitatem disrumpunt seipfos ab ea, eiusque visibili Capite separantes Schismatici dicuntur. Et quamvis posset revera concipi quod quis ex prava cupiditate Ecclesiae capiti subesse renuat, absque eo quod alicui fidei articulo contradicat, unde purum, non vero haeresi immixtum schisma constaret, attamen ut optime ex Hieronymo dicitur in *can. 26. XXIV. q. 3. Nul- lum schisma non aliquam sibi confingit haeresim*, ut recte ab Ecclesia recessisse videatur.

V. Variis quoque poenis puniuntur Schismatici, & I. quidem excommunicatione Rom. Pontifici reservata in Bul- la Coenae. II. Inhabilitate ad beneficia, & Ecclesiasticas dignitates, praesertim Episcopalem, etiam post peractam poenitentiam *arg. cap. 5. de Elect.* III. Bonorum confiscatione, & beneficiorum, ac dignitatum spoliatione *cap. un. de Schismat. in 6.* IV. Ecclesiasticae iurisdictionis priva- tione, itaut omnes impofterum actus huiusmodi sint irriti *cap. 1. de Schismaticis*.

VI. *Apostasia*, quae latine defectum, seu recessum si- gnificat triplex est, a *Fide*, ab *Ordine Sacro*, & a *Reli- gione*. Prima est totalis defectio a fide Christiana quam quis in baptismo professus fuerat, ad infidelitatem, pa- ganismum, vel iudaismum. Horum poenae eadem sunt, quae haereticorum, sed difficilior remissio propter maio- rem criminis atrocitatem.

Apostasia ab Ordine sacro est cum quis sacris Ordini- bus initiatus ad statum laicalem, vel etiam coniugii, di- misso clericali habitu sacrilege transit. Poenae in ipsos de- cretae sunt I. excommunicatio non quidem latae, sed fe- rendae sententiae, nisi etiam Matrimonium contraxerint *arg. cap. 1. de Apost. & Clem. un. de consang. & affinis.* II. Infamia, & inhabilitas ad dignitates, & honores, ir- regularitas, & amissio privilegii Canonis *Si quis suaden- te XVII. q. 4. ex cap. 1. de Apost. & 23. & 25. de sent. excom.* aliaeque Episcopi arbitrio ipsis infligendae ut habi- tum reassumant.

Apostasia denique a religione, seu statu religioso, est discessus a religione animo non amplius redeundi ad il- lam.

lam. Nam absque perverso huiusmodi animo non apostata, sed fugitivus quis diceretur. Quamvis autem parum referat ad veram apostasiam an quis retento habitu, vel dimisso discesserit, tamen ex iure Decretalium excommunicationem in Apostatas latam ipso facto non incurrebat, qui illum retinuerat. Hodie vero par est utrisque haec poena iuxta *cap. 2. ne Clerici, vel Monachi in 6.*

Huiusmodi ergo Apostatae per Superiores cogendi sunt ad Monasterium redire. Quae de re praeter ea, quae in corpore iuris, & in Decreto Pauli IV. statuta reperiuntur, exstat Decretum Sacrae Congregationis de *Apostatis*, & *Eiektis sub Urbano VIII.* anno 1624. editum, ubi in superiores negligentes decernitur poena privationis officiorum, vocis activae, & passivae, ac perpetuae inhabilitatis ipso facto incurrendae.

T I T V L V S VI.

De Sortilegis, Maledicis, & Sacrilegis.

I. **S**ortilegium a sorte sic dictum est vera credulitas, aut magica divinatio, qua quis futura, aut occulta praedicere, aut cognoscere vult ex aliquibus signis, quae ad ea cognoscenda nec a natura, nec a Deo sunt instituta. Quia ergo divinatoriae huiusmodi sortes nullam habent connexionem cum rebus futuris ab incerto eventu, liberoque hominum arbitrio pendentibus merito cum superstitiones reiciuntur *XXVI. q. 1. cap. 7.* Imo quia neque ex speciali Dei ordinatione ad eum finem adhibentur, ideo sortilegia continere etiam solent expressum, vel tacitum pactum cum Daemone, a quo mediantibus illis signis futurorum, vel occultorum scientia expetitur. Qui vero ipsis utuntur, vel ad eiusmodi scientiam comparandam, vel ad mira quaedam perpetranda proprie *magi* appellantur. & ubi per magiam alicui noceant vel in corpore, vel in bonis dicuntur *malefici*, & maleficium, seu veneficium exercere.

II. Cum tamen varia sint signa, quibus sortilegi utuntur

runtur, ideo plures sunt fortilegii species. Nam quaedam desumuntur ab elementorum observatione, unde nomen quoque fortiunt. Sic *Geomantia* a terra, *Pyromantia* ab igne, *Steromantia* ab aere, & *Hydromantia* ab aqua. Quaedam vero a brutis, ut *Aruspicium* ab animalium extis, *Auspicium* a volatu avium, *Augurium* ab eorum garritu &c. Quaedam etiam ab hominibus, ut *Chyromantia* a manibus, *Pedomantia* a pedibus, *Omen* a voce, *Oniroptica* ab insomniis, *Pythonia* ab hominibus abreptis, & *Necromantia* a cadaveribus, ut aiunt, assumptis, & quaedam denique a cursu Syderum, ut *Astrologia* iudiciaria. De his fortilegii speciebus mentio occurrit tum in S. Canonibus, tum in legibus Principum *C. de Maleficiis*, & *Mathematicis*.

III. Poenae in huiusmodi Sortilegos decretae sunt pro varia ipsorum conditione verbera, cruciatus, carceres, & etiam excommunicatio, infamia, beneficiorum amissio, si fuerint Clerici, depositio &c. ut videre est *XXVI. q. 5. can. 4. & 10. & ib. q. 7. can. 15.* Quinimo si abusus quoque Sacramentorum, vel rerum sacrarum intervenerit, Haereticorum poenae erunt adhibendae. Hac tamen in re adhaerendum praesertim Constitutionibus posteriorum Pontificum Innocentii VIII. *Summis*, Leonis X. *Honestis*, Gregorii XV. *Omnipotentis*, & Sixti V. *Coeli*, & *Terrae*.

IV. *Maledici* hic potissimum sunt blasphemi. Blasphemia vero irrogatur vel *facto*, vel *dicto*. Facto quidem si sacrae imagines, templa, aliaque loca Deo dicata in contemptum foedentur, polluantur &c. vel si debitus uni Deo patriae cultus impeudatur sanctis, vel si hisce duliae, aut Deiparae hyperduliae veneratio denegetur. Dicto autem cum in Deum, vel Sanctos maledictio, seu contumeliosa locutio profertur. Huiusmodi blasphemiarum aliae *haereticales* sunt, aliae *simplices*. Illae fidei veritatem evertunt, aut articulo cuiuspiam opponuntur, quia Deo, Sanctisque quod non debetur adscribunt, vel quod est proprium, denegant. Qui earumdem est reus tanquam haereticus plecti debet, nisi illius poenitentia poenam temperandam obtinuerit. Simples vero nihil a religione absonum pronuntiant, sed tantum mali aliquid Deo, San-

ctis.

etisque imprecantur. Huius generis blasphemiae convictus, si laicus fuerit, in conspectu publico constituitur ante Ecclesiae fores continuis septem Dominicis diebus, & earum postrema sine pallio, ac sine calcamentis corrigi collum divinctus dum Missarum solennia peraguntur, necnon septem praecedentibus sextis feriis pane, & aqua ieiunare iubetur, duos, tres, vel unum saltem ex pauperibus alere, cui si facultas non suppetat, poenam corporalem subire, cogendus etiam vel per iudicem laicum, si dives sit, solidos quadraginta, vel aliquid aliud iuxta ipsius conditionem persolvere. Clerico tamen ad vitandam ordinis contumeliam publica poenitentia non imponitur *can. ex poenitentibus dist. 50.* sed in eum animadvertitur per suspensionem, & depositionem etiam ab officio, & statu clericali *XXII. q. 1. can. 10. & cap. 1. de Maledicis*, vel per alias graviores quoque iuxta Constitutiones Leonis X. *Supremae dispositionis*, & Pii V. *Ad primam*.

V. Adversus Blasphemos haereticales Iudex Ecclesiasticus de iure procedit; & alicubi ex consuetudine quoque laicus; adversus alios uterque; & licet detur locus praeventioni pro alterutro foro; tamen si unus processerit non impedit quin procedat & alter etiam usque ad ultimum supplicium iuxta Levit. praeceptum 24. *qui blasphemaverit nomen Domini morte morietur ex Novell. 77. Iustin. Imper. & arg. cap. 2. de Maledicis*.

VI. *Sacrilegium* in genere est rei Sacrae Violatio, quae duplici modo committitur, nimirum *ratione rerum*, vel *personarum*. Rerum quidem, auferendo Sacrum de Sacro vel non Sacrum de Sacro, vel Sacrum de non Sacro, ut habetur *XVII. q. 4. can. 21.* Ratione vero Personarum propter Clericorum percussione *can. 29. ib.* vel carnalem cognitionem Personae Deo dicatae *XXVII. q. 1. can. 11.* Sacrilegia primi generis asperius, vel levius puniuntur pro criminis qualitate; secundi vero generis praeter clerici percussione, aut claustrae Monialium ad malum finem violationem, cetera summo Pontifici non reservantur.

T I T V L V S VI.

De Furtis, Rapinis, & Incendio.

Furtum est ablatio alienae rei, & possessio invito rationabiliter domino. Ex hac definitione patet Furti nomen magis late sumi iure Canonico, quam Civili, ubi *L. 1. §. 3. ff. de Furt.* describitur, ut sit *fraudulosa rei contrectatio, lucri faciendi causa vel ipsius rei, vel etiam usus eius, aut possessionis*. Quamobrem, ut videtis plura a ratione furti proprie dicti excludit Ius Caesareum, quae ius nostrum comprehendit, cum aeque in omnibus peccatum potissimum inspiciat ex quo obligatio oritur ad restitutionem, ut ius laesum resarciatur *cap. 1. & seqq. de Furt.*

II. Ad rem nostram igitur: Furti reus non solum est, qui rem abstulit alienam, sed etiam qui sublatam scienter suscepit *L. eos qui C. de Furtis*, & etiam qui conscius Furti illud quaerenti domino caelat *cap. 4. eod.* Quod tamen intelligatis velim, si furtum occultaverit, non vero si tantum indicare omiserit; quia ut dicitur *L. 48. ff. eod. multum interest furtum quis caelat, an non indicet, qui novit, furti non tenetur, qui caelat hoc ipso tenetur*.

III. Furtum ex variis circumstantiis diversas induit species, secundum quas gravius, vel levius redditur. Sic ratione *temporis* quo comittitur gravius, & gravioribus poenis dignum reputatur, unde fures nocturnos leges magis insectantur, quam diurnos *l. 4. ff. ad L. Aquilianam*. Ratione *modi*, quo fit, ut si addatur violentia conatus &c. puta perfractorem muri, effractionem scrinii &c. vel si repetitis vicibus perpetratur &c. Nam violentum, aut in notabili quantitate saepius repetitum poena etiam capitali plecti potest. Ratione *loci* ubi committitur an in propria domo, an in aliena, & multo magis an in loco publico, ut in Balneis, an in loco Sacro, quia illud speciali poena punitur iure civili, & hoc naturam induit sacrilegii. Demum ratione *rei* ablatae potest esse *Plagium*,

gium, Abigeatum, Peculatum, de Residuis, expilatae haereditatis, violati Sepulchri, & termini moti. Adversus quas Furtorum species diversas diversae dantur actiones ex utroque iure, & diversae decernuntur poenae quemadmodum pro maiori vel minori deformitate, & recessu ab lege aeterna gravitas reputatur peccati, quod ex furto proficiscitur.

IV. De iure ergo Canonico, imo etiam divino tenentur plures quicumque ad restitutionem rerum furto ablatarum iuxta *reg. 4. iuris in 6.* Ita tamen, ut ante Iudicis sententiam plus restituere non teneantur, quam abstulerunt; bene vero post illam, cum debeant iustae iudicis sententiae parere. Ut ea restitutio fiat, potest Episcopus iusta de causa excommunicationem ferre in furem & in furti conscios ut rem furtivam revelent ex *Trid. sess. 25. de reform. cap. 3.*

V. Ex eodem Canonico iure fur quilibet notorius sive laicus, sive clericus infamis est, adeoque irregularis, & inhabilis, ut ad Sacros Ordines promoveatur, ministretve in susceptis. *cap. fin. de furt.* Quinimo olim Clericus de notabili, atque iterato furto convictus depositione ab officio, & ordine clericali puniendus erat *C. 2. dist. 81. & cap. 10. de Iudic.* hodie tamen ex declaratione S. Congregationis 1650. pro quolibet quantumvis etiam gravi id fieri prohibetur teste Fagnano in *cap. 10. cit.* nisi clericus contemptis omnibus censuris prorsus incorrigibilis evadat ex *eod. cap. 10.*

VI. Furibus accenserj debent *Raptores, & Incendiarj* Raptores dicuntur qui rem ab altero possessam per violentiam, seu apertam vim invadunt, & auferunt. Haec autem aliquando fit ex confidentia iuris sui; aliquando a sceleratis hominibus lucri causa. Prioris poena de iure civili est ut inuasor rem ablatam restituat, & ubi dominus rei non fuerit persolvat insuper illius valorem; ubi vero dominus, dominium amittat *L. 7. C. unde vi.* Quemadmodum si creditor debitum a debitore violenter extorserit, ius crediti amittit, & actione criminali intentata tertia parte bonorum multetur cum infamia *L. ult. ff. ad Legem Iuliam de vi privata.* Alterius vero rapinae genus punitur vel civiliter per restitutionem rei ablatae cum

refusione lucri cessantis, & damni emergentis, ac insuper per triplum poenae auctori applicandae; vel criminaliter per applicationem poenalis mulctae fisco, aut per corporalem poenam a raptore luendam; qui si cum armis rapinam fecerit poena etiam capitali plectitur *L. penult. ff. ad L. Iuliam eodem*; si absque armis tertia parte bonorum dignitatisque & honoris privatione cum infamia, *Instit. lib. IV. tit. de Public. Ind. §. 8. & L. 1. ff. de vi privata*. Ex iure autem Canonico raptoribus excommunicatio inferenda est ab Episcopo loci ubi rapina committitur, a quo tantum absolvi potest, ctsi fuerit alterius Dioecesis *cap. 1. de rapt.*

VII. Incendiarii, proprie dicuntur, qui civitatem, oppidum, pagum, praedium, aedes, vel alia aliena bona, ut segetes, fructus, ligna, &c. dolo malo ex odio, vel vindicta, vel alicuius lucri, aut commodi consequendi gratia supposito igne incendunt, vel ad hoc scienter praestant consilium, aut auxilium. Contra huiusmodi incendiarios, eorumque fautores iure civili poena decernebatur, ut nobiles capite, aut deportatione plecterentur; vulgares vero, aut bestias obliicerentur, aut comburentur vivi, *L. fin. ff. de Incend. & L. Siquis 10. ff. ad Legem Corneliam de Sicar*. Iure autem Canonico excommunicati ipso facto intelliguntur si Ecclesiae incenderint, *cap. in litteris de rapt.* si tamen Ecclesiae minime nocuerint, excommunicandi sunt, arcendique ab Ecclesiastica sepultura, nec absolvi nisi damna vel repararint, vel iurantes se reparaturos etiam per suos haeredes promiserint *XXVII. q. 8. & 32.*

Quinimo licet de iure Civili haeres ex delicto defuncti conveniri nequeat, nisi ex eo factus locupletior probetur, vel lis cum defuncto contestata fuerit *L. unic. C. Ex delictis defunctorum*; nihilominus iure nostro ad exonerandam defuncti conscientiam, qui de iure naturali ad illati damni compensationem tenebatur, etiam ipse haeres pro viribus haereditariis satisfacere tenetur *cap. 5. de raptor.*

VIII. Pro absolutione obtinenda si incendiarius per Ecclesiae sententiam pervulgatus, damnatusque fuerit ad Apostolicam sedem mittendus es, ut statuitur *cap. 19. de sen.*

sentent. Excom. quamvis alias ab Episcopo absolvi possit, ut notat Hostiensis in Summa ad Titulum de Raptor. & Incendiariis.

T I T V L V S VII.

De Usuris.

I. **V** *Suræ* a Canonibus rapina dicta, & rapinâ ipsâ etiam atrocior existimata *can. si quis usuram 10. XIV. q. 4.* definitur passim ab Theologis, & Canonistis, *Actio, per quam aliquod pretio aestimabile supra sortem intenditur, vel accipitur ex mutuo, tanquam debitum ex pacto, & iustitia.*

Ex qua definitione liquet usuram nedum re ipsâ susceptâ vel conventâ posse committi, verum etiam mente, & intentione dumtaxat. Liquet præterea id, quod forti ex vi mutui accedat, ut usurarium sit, debere omnino tanquam ex pacto vel iustitia accedere; nam si ex gratitudine, vel liberalitate tantum, nec ullo modo a mutuante intentum accesserit, usura indiscriminatim non est; quod tamen diligenter adverteudum ne palliata usura committatur.

II. Principales usuræ species tres numerantur a Canonistis; *lucratoria* scilicet, seu *quæstiosa*, quæ proprie *faeneratitia* nominatur, *compensatoria*, & *punitoria*. De duabus hisce non est cur multa dixerim; nam optimo iure exigi possunt, vel quoties damnum, quod creditor ex mutuo passus, est compensatur; vel quoties mora debitoris mutuum non reddentis punitur. De sola ergo faeneratitiâ præsertim iura loquuntur; & hæc est vel *realis* si ex pacto explicito, aut implicito procedat; vel est tantum *mentalis*, si eo sine, & intentione pecunia mutuo datur, ut aliquid supra sortem exigatur, secus non daretur.

III. Istiusmodi usurarum genus utpote iniquum, & proximi charitati oppositum nedum divino utriusque federis iure, & positivo Ecclesiastico prohibetur, sed civili quoque & gentium quam plurimum moribus criminofum reputatur. *Quapro-*

propter impotens hominum aviditas licet ab aperta, & conventionali usura ut plurimum abſtineat; veruntamen perſaepe eandem ſub praetextu aliquo, plerumque liciti contractus, veluti pallio conteſtam admittit: ſic praetextu *iuſtae compensationis* uſuram exigit qui carius vendit ob dilatam ſolutionem, aut e contra vilius emit ob anticipatam; quod ſane licitum eſſe poterit, ſi carius revera venditurus eſſet, vel vilius emturus tempore exigendae, aut perſolvendae ſolutionis. Secus quippe aliud non eſſet, quam emptori mutuo dare pecuniam poſt aliquod tempus cum augmento recipiendam quod reprobatur *cap. 6. & 10. h. t.* aut vice verſa in altero caſu ex *cap. ſin eod.*

Praetextu quoque liciti contractus palliata uſura committitur ab eo qui vendenti ſibi rem valoris 100. dat. 60. & pro reliquo adſignat debitum inexigibile. Vel praetextu pietatis pauperes v. g. alendi, ſubveniendi Pupillis &c. aliquid ſupra ſortem ex mutuo exigit. Qua de cauſa tanquam uſurarios damnarunt Montes Pietatis Caietanus, & Sotus *lib. 6. de iuſtit. & iur. q. 1. art. 6.* licet eos probarint melioris notae Theologi, & Canoniſtae, quorum ſententiam confirmarunt poſtea Paulus II. Sixtus IV. Innocentius VIII. Alexander VI. Iulius II. & demum Leo X. in ſua Conſtit. *Inter multiplices* in Concilio Later. lata.

III. Plures alii etiam ſunt tituli ſub quibus palliata uſura committitur quamvis eorum ratione interdum liceat aliquid ex mutuo exigere, & principales ſunt *lucrum ceſſans, damnum emergens, aſſecuratio, contractus ſocietatis, cenſus, & cambii*. Quoties enim non extiterit unde lucrum ex pecunia mutuo data revera ſperetur, aut timeatur damnum, vel periculum illam amittendi; quemadmodum ubi par non fuerit omnium ſocietatis membrorum ſors, & eventus, aut conditiones a Pio V. in Bulla *Cum onus Apoſtolicae contractui cenſuali deſuerint*, ac demum fictitiae intervenerint cambiales litterae; huiusmodi contractus haberi non debent, niſi cu tituli ſine re ad occultandam uſurae deformitatem adinventi.

IV. Uſurae, & uſurariorum paenae praeter obligationem reſtitutionis iure divino ex iuſtitia debitae, ad quam

quam ipsorum etiam haeredes tenentur *cap. tua nos b. t.* plures utroque iure sancitae sunt, quarum pleraeque notorios tantum usurarios perstringunt. Notorius usurarius est qui vel factio palam exercet usuras; vel qui iure convictus, aut confessus, & per iudicis sententiam condemnatus. Sunt itaque I. infames *III. q. 7. C. infames, & cap. 13. de Excess. Praelat.* II. Altaris Communionem privantur nec eorum oblationes recipi possunt *cap. 3. b. t. Et ex cap. 2. eod. in 6.* intestabiles evadunt, nec ante plenam satisfactionem, aut saltem idoneam cautionem finali absolutione, Ecclesiasticae sepultura donantur. Demum si laici fuerint usque dum satisfecerint excommunicationi obnoxii fiunt *cap. 7. b. t.* si clerici, & moniti non destiterint, ab officio & beneficio in perpetuum expelluntur, *dist. 46. can. 5. & cap. 11. de Excess. Praelat.*

V. Usura est crimen mixti fori, itaut tam laicus, quam Ecclesiasticus Iudex de eo cognoscere, & iudicare valeat *ex cap. 12. b. t.* Et sane de facto non est quaestio; de iure licet nonnulli dubitent, tamen cum aequitas contractuum, & commerciorum non minus pertineat ad inspectionem iudicis laici, quam Ecclesiastici, nonnullis videtur acque posse Iudicem laicum iudicare de iniustitia eiusmodi actuum, ac Ecclesiasticum de peccato eorundem.

T I T V L V S VIII.

De Adulterio, aliisque Coniunctionibus illicitis.

I. **A** *Adulterium* est vel proprii, vel alieni coniugalis Thori violatio, *XXXVI. q. 1. cap. 2.* Hinc triplex Adulterii genus Coniugati nimirum cum Coniugata, Coniugatae cum Libero, & Coniugati cum Libera. Quia tamen ius civile in adulterio praesertim respicit prolis incertitudinem, ideo aliud non cognoscit adulterium proprie dictum praeter illud quod cum coniugata perpetratur. Cum vero e contra ius nostrum aeque principaliter attendat etiam coniugalis fidei violationem, adulterium quo-

O

quo-

quoque reputat, & ceu tale punit coniugati cum libera commixtionem.

II. Ex Adulterio agi potest vel civiliter, vel criminaliter. Civiliter agit coniux innocens contra adulterum in divortium perpetuum, ut iam diximus ubi *de Divortijs*. Et in iudicio civili adulterae poena est dotis amissio, adulteri vero donationis propter nuptias. Civilis item obligatio in conscientiae foro incumbit adultero, vel adulterae quoties concepit ex adulterio *cap. 10. de probat. & L. 6. ff. de his qui sui, vel alieni iuris*.

III. Criminaliter agitur ex adulterio ad poenam, & vindictam publicam, quae ultimi etiam supplicii decreta fuerat a Constantino in *L. 30. C. ad L. Iuliam de Adult.* Hanc tamen mitigavit postea Iustinianus iubens ut fustigatione castigata mulier adultera in Monasterium detruderetur, reddenda quidem viro, si intra biennium eam exposulasset; secus vero toto vitae suae tempore ibi mansura ad agendam poenitentiam *Auth. si bod. C. eod.* quod confirmavit ius nostrum *cap. 19. b. t.* Adulteri autem usu passim recepto extraordinaria etiam poena modo multantur, exilii, deportationis, fustigationis &c.

IV. Iure Canonico ordinaria Adulterorum poena, si laici fuerint, est excommunicatio non latae, sed ferendae sententiae *cap. 6. b. t.* si Clerici, depositio ab officio, et beneficio, ac detrusio in Monasterium ad poenitentiam *c. 2. dist. 81.*

V. Adulterii crimen si poenâ sanguinis est puniendum ad solum laicum Iudicem spectat; si actione civili prosequatur, est mixti fori; si denique in divortium dumtaxat, ad solum Iudicem Ecclesiasticum pertinet de eo cognoscere *cap. 4. de Divort.*

VI. *Stuprum* proprie acceptum est illicita virginis defloratio ex Grat. in *can. 2. XXXVI. q. 1.* Huius criminis reus habetur nedum qui vi, vel blanditiis usus virginem, aut honestam viduam compresserit, sed etiam qui volentem corruperit. Verumenimvero cum feminam honestam esse oporteat, non procacem, abiectique pudoris, si probet corruptor eam alteri sui copiam antea fecisse, aut homines excepisse suspectae familiaritatis, stupri non tenetur, non secus ac qui meretricio cultu ornatam virginem vitiaverit.

VII. Iu-

VII. Iuris civilis dispositione constuprator violentus capite plectitur *L. 1. ff. de Extraord. crimin. si absque vi, & seductione nobilis id commiserit publicatione dimidii bonorum; humilis vero fustigatione, vel relegatione punitur Instit. lib. 4. de Publ. iudic. §. Item lex Iulia.*

VIII. Iure autem Canonum poena stupratoris laici est stupratam dotare, & in uxorem ducere *cap. 1. b. t.* Horum tamen alterutrum praestare satis existimant DD. ad quod si fuerit impotens corpore castigatus, excommunicatusque in Monasterium ad poenitendum detrudatur *arg. cap. 1. & 2. b. t.* Clericus vero praeter dotationem deponendus est *ex can. 3. & 13. dist. 81. & poenae arbitrarie subiicitur habita ratione delicti, & personarum; imo si violentiam adhibuerit etiam ad carceres perpetuos, qui poenae mortis in laicos statutae aequiparantur, condemnari potest.*

IX. Adulterio, & stupro alii accedunt illegitimi concubitus, & primo quidem *fornicatio*, soluti scilicet, cum soluta iampridem detorata commixtio. Haec quidem ad praecavendam supra, & adultertia iure civili tolerantur *L. 13. ff. ad L. Iuliam de Adult. & 29. C. cod.* Quia vero etiam simplex fornicatio est lethale peccatum ex Conc. Viennensi in *Clem. Ad nostrum 3. de Haeret.* ideo iure nostro prohibita est *can. nubendi XXVII. q. 1. & in fornicarios animadvertitur; in Clericos quidem suspensione, & inhabilitate ad maiora, ingressu in Ecclesiam, aliisque arbitrio Iudicis infligendis habita ratione delicti, & scandali can. bi qui XV. q. 8.*

X. 2. *Concubinatus*, consuetudo nempe carnalis viri cum muliere uxoris loco habitae sine iure coniugii, siue illam domi quis habeat, siue alibi *L. 11. de naturalibus liberis* olim quidem, nullis poenis coercebatur in iure civili, semper vero prohibitus. sacris Ecclesiae Canonibus, ut patet ex *can. Praeter 5. dist. 34. & potissimum Trid. Sess. XXV. cap. 14. de Reform.* ubi pluribus poenis animadvertitur in Clericos Concubinarios; in laicos autem ter admonitos, nec resipiscentes excommunicatione, & poenis etiam corporalibus, quoties in censuris, & crimine per annum integrum perstitierint; decerniturque extra Dioecesim pellendas huiusmodi mulieres si ordinario

videatur, invocato etiam seculari brachio quoties oportuerit.

XI. 3. *Incestus* Concubitus nempe consanguineorum, vel affinium in eo gradu, in quo Matrimonium contrahi prohibetur. Huic autem crimini, ubi publice perpetratur, infamiam irrogat Ius civile, ceterasque adulterio decretas poenas L. 1. ff. de his qui not. infam. L. 11. §. 1. & L. 38. ff. ad L. Inliam de Adult. Ius vero Canonicum excommunicationem ferendae sententiae, imo etiam latae si sub figura Matrimonii contigerit, arg. cap. 4. de Iudic. & Clem. un. de Affinit. & consanguinit.

XII. 4. *Raptus* crimen committunt qui mulierem aut violentia, aut seductione rapiunt, & abducunt libidinis exercendae causa. Raptoribus huius generis iure civili poena capitalis decernitur L. un. C. de Raptu virginum, eorumque bona, sicut & comitum atque auxiliatorum adducuntur raptae in eius dotem, si ingenua fuerit, cessura; omnis coniugii spes inter raptorem, & raptam interdicatur, & raptae parentibus, & consanguineis permittitur raptorem in raptu deprehensum interficere. Verum haec duo sublata sunt postrema poenarum genera per ius nostrum, quod per Tridentinum Sess. XXIV. de Reform. Matr. cap. 6. indulgit ut rapta loco tuto reddita si velit raptori nubat. Hoc tamen coniugio, vel dotis assignatione per Iudicis sententiam raptae facienda, raptor, eiusque socii poenas iure Canonico statutas non evitant; cum nihilominus laicis excommunicatio, clericis vero ab gradu, & ordine deiectio decernatur XXXVI. q. 1. cap. 1. & 2. & cap. 4. de Purgat. Can.

XIII. *Sacrilegium* in hac materia est carnis commixtio cum Moniali. Quamvis enim sacrilegium committatur nedum si persona violata, sed etiam si violans voto castitatis fuerit adstricta, eaque voti circumstantia sit speciem immutans in confessione aperienda, in foro tamen externo poenae ab iure determinatae non sunt, nisi adversus violationem foeminae Deo consecratae. Quamobrem in laicos iure nostro animadvertitur excommunicatione, iu Clericos depositione, & in Monasterium detrusione, & in ipsam Monialem arctiori Monasterii, vel etiam carceris clausura ad poenitentiam agendam XXVII. q. 1. capp.

21. 28. & 30. De iure autem civili rapiens, & violans Monialem capite plectitur, eiusque bona Monasterio addicuntur *L. un. C. de rapt. virg. & Nov. CXXIV. cap. 43.*

XIV. Denique *Crimen pessimum*, seu coniunctio contra naturam, utpote peccatorum omnium foedissimum iam divino iure *Levit. XX.* morte puniebatur, quemadmodum illud nunc quoque punit Ius Civile *Inst. lib. 4. de publ. Ind. §. Item Lex Iulia*; & ius nostrum excommunicatione, & irregularitate *cap. 4. de excess. Praelat.* Quinimo adversus Clericos huius criminis reos extat constitutio Pii V. *Horrendum illud scelus* edita an. 1568. qua privantur omni privilegio clericali, ac omni dignitate, officio, ac beneficio, atque a gradu deiectioni Curiae seculari tradi debent ultimo supplicio afficiendi.

T I T V L V S IX.

De Crimine Falsi.

I. **F**alsum in genere acceptum est veritatis immutatio cum dolo, & iactura. Nisi enim dolo malo pervertatur veritas, & iactura inferatur alteri, proprie non est falsi crimen ex *Novell. LXXIII. ex L. 1. & 22. ff. ad L. Corneliam de falsis, & 2. 6. & 8. C. eod.* Huiusmodi ergo falsum quatuor praesertim modis committi potest, dicto nimirum, scripto, facto, & usu.

Dicto quidem quoties mendacium aliquod in alterius damnum vergens scienter pronuntiatur; & hoc locum praecipue habet in Testibus, de quo in *cap. Falsidicus 1. b. 1.* Falsus vero testis Ecclesiasticus ab omni officii honore deponitur, & in Monasterium detruditur, & quandiu vixerit laica tantum communione donatur *can. Si Episcopus 7. dist. 50.* vel ad triremes, vel carceres damnantur, qui poenae detractionis in Monasterium successere. Laicus vero deportatione, & bonorum publicatione, vel poena talionis, triremium, aliarumque Iudicis arbitrio, illius nempe coram quo falsum deposuit *L. 1. §. Praeterea & ult. ff.*

ad L. Corneliā de falsis, L. 14. L. de Test. & 1. C. ubi de crimine agi oport.

Scripto autem quoties Notarius falsas Tabulas, sive Testamenta scribit, signat, recitat, subiicit; vel veras Tabulas in alterius damnum caelat, vel adversario scripturas apud se depositas prodit, aut quovis alio modo adulterat radit &c. L. 1. ff. b. t. In huiusmodi falsarios praeter infamiam animadvertunt Iudices poena arbitria pro ratione delicti, & personarum usque etiam ad ultimum supplicium: Canones vero excommunicatione reservata; nedum in ipsos osiores, sed etiam in scientes, & intra XX. dies non revelantes depravationis Bullarum, aut rescriptorum reos; in clericos demum depositione, & Curiae Seculari traditione puniendos cap. 4. & 7. b. t. iuxta Bullam Coenae Domini §. 6.

Falso Falsarii sunt primo qui falsis ponderibus, & Mensuris utuntur, vel falsas merces distrahunt II. Supponentes alicui falsum partum. III. Dolose moventes agrorum limites, & terminos. IV. Falsam monetam euentes vel quovis alio modo bonam adulterantes, aut in pondere minuentes. Puniantur huiusmodi falsarii, iure Civili, bonorum publicatione, exilio, multa pecuniaria, aliisque Iudicis arbitrio usque ad ultimum supplicium; iure vero Canonico congruis poenitentiis; ut videre est in Pandectis, & in Codice sub hisdem titulis, aliisque, quemadmodum, & in Decretalibus Greg. IX. b. t.

Usu demum falsarii ii sunt qui aliena falsitate utuntur, ut qui testimonium, aut instrumentum &c. falsum in iudicio proferunt, quique falsam monetam dolose colligunt & expendunt &c. qui omnes praeter restitutionem damni & poenas ordinarias criminibus falsi decretas, arbitrariis etiam pro delicti & personarum qualitate subiiciunt, ut apparet ex l. 1. ff. ad L. Corn. de Falsis; & 38. ff. de Poenis.

T I T V L V S X.

De Homicidio.

I. **H**omicidii nomine hic proprie venit iniusta hominis interemptio. Ex qua definitione videtis minime nos loqui de homicidio quod a publica Legislatoris potestate iubetur, vel quod ad propriae vitae defensionem cum moderamine inculpatae tutelae ab privato aliquo perpetratur; quinimo neque loquimur de eo homicidii genere, quod prorsus involuntarium est, quia ab ratione, & voluntate carentibus commissum. Nam contra huiusmodi homicidia cum nulla ex iuribus petatur actio, neque ulla Occisoribus statuitur poena. Et quamvis publica potestate utentes propter homicidium irregularitatem incurrant, ea tamen non provenit ex delicto, sed potius ex laenitatis defectu.

II. Homicidium itaque sic acceptum dividunt Canonistae in *voluntarium* & *casuale*. Illud libere, & determinate intenditur vel in se, vel in causa, & variis modis committitur, unde diversos consequitur malitiae gradus simul & diversa nomina. Dicitur quidem *simplex* si accidat ex rixa temere exorta, vel ex subito irae impetu cum advertentia tamen rationis. *Proditorium* vero, & *insidiosum* si committatur sub colore simulatae amicitiae, vel ex machinatis insidiis. *Sacrilegium* si interficiatur Sacerdos, Religiosus, Clericus, vel etiam persona laica in loco Sacro. *Parricidium* si parentes quis occiderit vel filios, aut etiam alios sanguine coniunctos. *Veneficium* si venenum adhibeatur, quod locum habet nedum respectu porrigentis, vel propinantis venenum, sed etiam respectu vendentis, si hac intentione vendat. *Assassinium* si quis mercede conductus alterum necat. Denique *deliberatum*, seu praemeditatum, si iracundiae calore iam sedato, & praevia animi deliberatione impie patretur; His addi potest *Abortus*, de quo infra.

III. Casuale homicidium dividitur & ipsum in *mere Casuale*, & in *Casuale culpabile*. De primo quod prorsus

inopinato & fortuito, absque ulla culpa, aut dolo contingit, non est quod hic dicamus, cum & ipsum penitus involuntarium censeatur. Alterum ergo licet praeter voluntatem committatur, aliqua tamen culpa intervenit; ut si quis det operam rei illicitae, unde alterius sequatur mors, quavis ad eam evitandam omnem adhibuerit diligentiam vel è contra dederit quidem operam rei licitae, sed non omni adhibita diligentia, aut sufficienti instructus peritia.

IV. Homicidis comparantur, & pro talibus habentur, quoad incurrendas poenas utroque iure decretas qui lethale vulnus infligunt unde mors sequatur, & qui nobile aliquod Corporis membrum abscindunt *arg. cap. 18. b. t. & L. XII. ff. de L. Aquilia, & Clem. unic. b. t.*

V. Ad poenas ergo Homicidarum quod attinet, illos ius Civile olim ex *L. Cornelia de Sicariis* puniebat deportatione, si nobiles erant; capite, si plebei; modo tamen ex *L. 6. de vi publ. & Instit. lib. 4. Tit. de publ. Iudic. §. Item Lex Cornelia*, indiscriminatim poena mortis manet; quam utique inspectis circumstantiis, & criminis qualitate Iudex quandoque vitat, quandoque etiam exasperat, gladium commutando in rotam, furcam, aut rogam; vel poenam augendo aduisione per ferrum Candens, forcipibus, obtruncatione membrorum &c.

Iure autem nostro in laicos excommunicatione ferendae sententiae animadvertitur *XXIV. q. 3. c. 10.* In Clericos depositione ab ordine, & officio, perpetuis Carceribus ac Triremibus *c. 7. dist. 15. cap. 6. b. t. & 6. de Poenis*; quibus consonat *Trid. sess. 14. de refor. cap. 7.* Insuper tum laici, cum clerici homicidae ipso facto irregularitatem incurrunt; itaut quantumvis occultum homicidium fuerit, ordines suscipere vel susceptos exercere etiam post peractam poenitentiam, sine dispensatione summi Pontificis non valeant *cap. 6. & 7. b. t. Clement. unic. eod. & Trid. cit.* Clericus quoque si homicidium iterat, & incorrigibilis evadit excommunicatur, degradatur, & Curiae seculari traditur *cap. 10. de Iudiciis*. Quod si homicidium fuerit qualificatum gravius etiam in foro Ecclesiastico punitur. Nam Clericus parricida v. g. comparatur incorrigibili. Homicidae Proditorii, Assassinii, & Sacrilegi iure asyli privantur, & excommunicationem ipso facto incurrunt, si quem

oc-

occiderunt persona fuerit Ecclesiastica XVII. q. 1. *can. si quis suadente.*

Omnes istiusmodi poenas, & irregularitatem praesertim incurrunt nedum homicidae, sed etiam mandantes, consulentes, cooperantes, vel quovis alio modo in alterius mortem confluentes, etiamsi effectus non sequatur L. 15. ff. ad L. Corn. de Sicar. can. 8. dist. 50. cap. 1. & 3. b. t. in 6. & 2. de Cler. pugn. in Duello.

VI. Ad abortum procurantes quod spectat, iure civili mater huius criminis. rea, si foetus erat animatus paricidii poena punitur, si vero nondum animatus erat iudicis arbitrio damnatur. Iure autem Canonico quamois Gregorius XIV. Bullam Sixti V. *Ad effrenatam* ad terminos iuris revocaverit quoad iuanimati foetus abortum procurantes vel sterilitatem, substuleritque excommunicationis reservationem; integram tamen illam reliquit quoad reliqua. Quapropter procurantes abortum foetus animati ipso facto incurrunt irregularitatem, inhabilitatem ad Ecclesiastica officia, & beneficia, necnon excommunicationem; quibus quoque poenis ante omnem iudicis sententiam in foro conscientiae tenetur, esto delictum fuerit occultum. Clerici vero deponendi, degradandi, & Curiae seculari ad legitimum supplicium tradendi sunt.

VII. Haec ad voluntarium homicidium pertinent. De casuali iam praemonuimus propter illud *mere casuale* nullam incurri irregularitatem, nullamque poenam, idque confirmamus ex L. 9. ff. ad L. Aquiliam, L. 1. ex S. C. ad L. Corn. de Sicar. & capp. 9. 13. 14. 15. 16. 22. & seqq. b. t. ubi varii huiusmodi casus narrantur. Omnis ergo irregularitas, quae in homicidio casuali incurritur procedit tantum ex qualibet interveniente in eo culpa esto etiam levissima. Quinimo si opus, unde homicidium sequitur fuerit quidem licitum tum ratione sui, tum ratione personae illud exercentis, sed tamen negligentia aliqua in vitando mortis periculo intervenerit, eiusmodi homicida extraordinariis saltem Iuris poenis fit etiam obnoxius cap. 7. & 8. b. t. Quemadmodum si omnem quidem adhibuerit diligentiam, sed opus minime licitum erat ei, & ex se capax mortem, aut mutilationem inducendi cap. 13. 19. & 23. *cod.* praesertim si ea ratione fuerit prohibitum. Quam-

Quamobrem Clericus, vel Monachus chirurgiam exercens summa licet cum peritia, & diligentia, etiam pietatis causa, si sequatur ex ea mors; aut in venatu aliquem citra culpam ullam interimens, aut in verito sibi ludo &c. irregularitatem contrahit, quam non contrahit Laicus.

VIII. Illud tamen hac in re animadvertendum occurrit, quod ubi quis dubitaverit an propter homicidium, aut mutilationem sit irregularis, debet pro tali se gerere ex *cap. 12. h. t.* ea potissimum de causa, quod in dubiis semitam debramus tutiorem eligere. Vnde ea Canonistarum regula, quod irregularitas non incurratur nisi in casibus iure expressis locum habet in foro dumtaxat externo, ubi delictum probatum sit oportet; non autem in foro conscientiae, ubi omne peccati periculum vitari debet.

IX. Quamvis ex *cap. 7. Sess. XIV. Trid. cit.* exclusa non sit Pontificia dispensatio super irregularitatem ex homicidio ortam, nihilominus difficillime obtinetur, nec eam possunt ullo modo concedere Episcopi quamvis occultum illud fuerit. Verum si de casuali agatur, vel ad vitae defensionem, aut publica auctoritate perpetrato, nec manifesto aut ad forum contentiosum deducto, tunc poterunt Episcopi ex *cod. Trid. Sess. XXIV. cap. 6. de refor.* ubi ipsis dispensandi facultas conceditur super omnibus irregularitatibus ex delicto occulto provenientius, sola excepta, quae ex homicidio voluntario oritur. Vnde etiam colligunt DD. posse Episcopum dispensare super irregularitate proveniente ex mutilatione voluntaria, modo ea occulta sit, & ad forum contentiosum non deducta.

T I T V L V S XI.

De iniuriis, & damno dato.

I. **I**niuria generatim sumpta est omne id quod non iure fit *L. 1. ff. h. t.* At vero in specie eiusmodi nomine venit contumelia alteri dolo malo illata, qua eius fama, atque existimatio laeditur. Tribus praesertim modis haec

haec iniuria infertur, *verbo* scilicet, *scripto*, & *facto*, seu *re*. Verbo quidem, ut cum in alium verba contumeliosa proferuntur; scripto autem, ut cum carmen famosum vel Historia, vel libellus scribitur, quo alterius fama proscinditur; facto denum, ut cum violentae manus in aliquem iniiciuntur, vel eius domus violenter aperiatur, vel aliud quid fiat in eius contemptum. Cum vero nedum in seipso quis iniuriam patitur, sed etiam in personis sibi subiectis, ut in filio familias pater, in uxore maritus, in monacho abbas &c. ideo isti proprio etiam nomine iniuriarum actionem instituere valent L. 1. §. 3. ff. b. t.

II. Actio iniuriarum duplex est. vel *Civilis*, pro iniuriae scilicet estimatione, quando iniuriam passus petit poenam pecuniariam sibi in compensationem adiudicari; vel *Criminalis*, cum videlicet petit, ut iniurius extraordinaria poena. aut in corpore, aut in bonis fisco applicandis puniatur. Alterutro ergo modo liberum erit agere iniurato, quamvis postea non liceat ab una ad aliam transire actionem L. 6. ff. b. t. Quinimo potest actio civilis qui iniurans falsa protulit cogi ad canendam palinodiam; secus tamen qui vera, cum nemo mentiri teneatur alterius famae gratia.

III. Condemnatus ex iniuriarum actione ipso iure est infamis L. 1. & 4. ff. de his qui not. infam. nisi coram Iudice cum eo qui iniuriam est passus transegerit, aut Iudex in prolatione sententiae famam & honorem ei reservaverit L. 6. §. 2. & L. 13. §. 7. ff. cod. speciali etiam nomine in Libellorum auctores, & promotores poena capitis animadvertitur in L. unic. cod. de Libellis famos. & flagellorum, ac etiam excommunicationis can. si quis inventi v. q. 1. Quae excommunicatio erit latae sententiae si libellus Ordines Religiosos persequatur ex Bulla Alex. IV. Ex alto; non item vero si aliquem tantum ex ipsis ordinibus.

IV. Iniuriarum actio tollitur primo condonatione sive expressa, sive tacita. II. Morte tam iniurantis, quam iniuriati ante litis contestationem, cum ad haereditatem non transeat, nisi cum damno dato coniuncta sit. III. praescriptione unius anni, nisi fuerit realis L. 3. c. b. t. 4. IV. deum retorsione, ut si illatae iniuriae iniuria referatur; qui tamen modus minime Christianae mansuetudini cohaeret.

V. Al-

V. Altera huius tituli pars est de *Damno dato*. Cuius nomine hic non venit nisi illud, quod inferitur *corruptione*, vel *deterioratione alienae rei absque lucro damnificantis*, ut si quis domum alterius, aut segetes incendat, aut alienum patrimonium quoquo modo diminuat, laedat &c. *L. 3. ff. de damno infecto*; ob istiusmodi damnum ergo de iure datur actio legis Aquiliae ad simplicem compensationem; licet nonnunquam detur etiam in duplum ob virentium v. g. arborum furtivam excisionem *L. 2. §. ult. ff. Arborum furtim caesarum*; vel etiam in quadruplum si per vim fuerit damnum illatum *L. 2. ff. de vi bon. rap.*

VI. Quamvis damnum iniuriosum procedere regulariter debet ex animo nocendi; nihilominus ad hoc ut quis ad damni reparationem teneatur, non semper necessario requiritur prava eiusmodi voluntas, sed satis est quaecvis culpa, & aliquando etiam laevissima *ex cap. 1. Si culpa b. t.* ubi definitur per Greg. IX. damna illata vel ex culpa, vel ex negligentia, vel imperitia semper esse refarcienda, quod optime probant sex priora huius Tituli capita ex Exodo desumpta. Imo damnificans nedum tenetur ad eiusmodi reparationem, sed praeterea ad lucrum etiam, quod ex damnificatione cessavit *cap. 1. b. t.*

VII. Quia multoties illata damna rapraeessaliis compensata fuisse in quibusdam Canonibus, & in iure nostro legimus, ideo de iis nonnulla in huius Tituli calce vobis indicare operae pretium duxi. *Rapraeessalia* igitur vox fortasse barbara ita exponitur apud Du Cang. *Quando aliquis oriundus de una terra spoliatur, vel damnificetur ab alio oriundo ab alia terra, vel etiam si non debitum solverit ei; tunc enim datur potestas illi spoliato, quod ei satisfaciat contra quemlibet de terra illius, unde est spoliator, vel debitor.* Ex hac notione secutis temporibus usurpari coepit pro potestate etiam, pignoriandi contra quemlibet de terra debitoris Creditori data pro iniuriis, & damnis illatis; & hoc pacto illam accepisse videntur Patres Avenionensis Conc. an. 1279. *can. 2.* ubi statuunt: *Si contingat vel homines, vel res quaslibet, animalia quaecvis Ecclesiarum, vel Personarum Ecclesiasticarum. abduci per aliquos, vel per aliquas in praedictam, sive pignorationem, aut rapraeessaliam &c. quare ita etiam*

DD.

DD. impofterum, a vetuftiffimis Romanorum moribus re-
 praefaliam originem repetentes. Verum male haec duo
 compensationum genera confunduntur, cum repraefaliam
 non darentur olim, niſi publica auctoritate, & Principis
 conſenſu ob denegatam iuſtitiam, & de his intelligi po-
 teſt *can. Dominus noſter XXIII. q. 2.* At vero pignora-
 tiones fiebant ob turbatam iuriſdictionem, vel poſſeſſio-
 nem, idque etiam privato arbitrio; de quibus fit mentio
 a Bonifacio VIII. in *cap. un. b. t. in 6.* & in *Authent.*
Sed omnino C. Ne uxor pro marito, imo clarius in *Conſt.*
Theodorici Langob. Regis apud Caſſiod. lib. IV. cap. 10. atque
 etiam in *L. Pignoris cauſa 10 C. de Pignor. actiō.* ubi Gloſſa
 ſui aevi fortasſe morem reſpiciens dubitat, an debitor ſoluto
 debito poſſit mancipium pignori datum propria auctoritate
 eripere de manu Creditoris, ubi illud reddere hic neglexerit.

VIII. Saepe etiam cum reſpreſſaliis confunduntur lit-
 terae, in quibus Princeps, vel Reſpublica ſubditis, vel
 militibus ſuis iniuſtum damnum paſſis dat poteſtatem in-
 vadendi terras eorum, qui damnum intulerunt, & occu-
 pandi bona incolarum etiam innocentium in compenſatio-
 nem eiufmodi damni. Hae tamen quamvis in laudato *cap.*
un. b. t. in 6. tanquam iuri naturae, & civili contrariae
 reprobari videantur, nihilominus quoties adefſt legitima
 cauſa, quae iuſta ſit ad bellum indicendum, & Principis
 auctoritas interveniat, exerceanturque cum debita modera-
 tione, & innocentium indemnitate probantur in laud. *cap.*
Dominus noſter XXIII. q. 2. ex Auguſtino deſumpto.

T I T V L V S XII.

De Eccleſiaſticis poenis, & Cenſuris.

I. **P**OSTquam de iudiciis criminalibus, & praecipuis cri-
 minibus, quae ipsis materiam ſuppeditant, egimus,
 reliquum eſt, ut de poenis, quibus praefertim Eccleſiaſti-
 cus iudex utitur, dicamus.

II. Quod praecipue hac in re animadvertatis velim
 illud eſt, quod ex iſtiusmodi poenis licet aliquae ſeculares
 vi-

videantur, quia directe non spiritus, sed corporis sunt afflictivae, ut omnes *pecuniariae*, *incarcerationes*, *relegationes*, *ad metalla*, & *triremes condemnationes*, *fustigationes* &c. Aliquae vero *spirituales*, quia directe non corpus, sed spiritum tangunt, ut *excommunicatio*, *suspensio*, *irregularitas* &c. Nihilominus omnes Ecclesiasticae revera sunt, nedum quod ab Ecclesiastico Magistratu adhibentur, sed praesertim quoque quod Ecclesiae Canones eas decreverunt ad finem spiritualis medicae, non vero vindictae; Mitiores quidem salutarem correctionem continent; acerbiores autem eò tendunt, ut Rei nocere fidelibus nequeant, salvā conversionis viā; & propterea, ut optime notat Abbas Fleury *Inst. 3. par. cap. 18. n. 2.* a sanguine, & a suppliciis capitalibus, quae tempus resipiscendi intercipiunt, omni tempore abhorruit Ecclesia.

III. Et sane poenae poenuniariae usus originem ducit ab antiquissimo Ecclesiae more imponendi poenitentibus in poenam suorum peccatorum Eleemosynarum largitionem; cumque postea circa seculum XII. ut censet Morinus *lib. 1. de Sacram. Poenit. cap. 9. & 10.* forensia iudicia penitus separarentur a poenitentialibus, contigit quoque quod Iudices Ecclesiastici ad publica crimina coercenda poenas pecuniarias adhibuerint. Istiusmodi poenarum frequens occurrit mentio in Decretalibus, ubi tamen monentur Praelati, ne id ad pecuniae quaestum convertant, nec ipsis utantur neglectis Canonice poenis *cap. 3. h. 1. & Glossa ib.* Hinc Trident. *Sess. XIII. cap. 1. & Sess. XXV. cap. 2. & 14. de Reform.* decrevit tales poenias pauperibus, vel aliis piis usibus applicandas, interdicens Praelatis in proprium emolumentum convertere, ut notant DD. *ad cap. 2. de Poenit.*

IV. Mos quoque antiquissimus obtinuit in Ecclesia recludendi Poenitentes in Monasteriis ad poenitentiam agendam. Huius quidem disciplinae vestigia reperiuntur *can. 7. dist. 50. cap. 6. de homic. & 35. de Sent. excom.* sed cum deinde experientia compertum sit delinquentium malitiam inutilem saepe reddere huiusmodi poenam, ideo eius loco successit incarceration, aut etiam ad metalla, & triremes damnatio. Ad has tamen poenas, ut optime eruitur ex *cap. 3. h. 1. in 6.* procedendum non esse docent

Ca-

Canonistae, nisi propter gravissima delicta, quando nempe de iure Civili poena capitalis esset imponenda.

V. Consuevit etiam olim Poenitentibus imponi recessus a Patria, ut vel occasiones peccandi vitarent, vel scandalum populo adimeretur, vel peregrinatio suscepta esset poenitentiae loco. Inde ergo factum videtur, ut in Ecclesiastico foro decernatur aliquando relegatio, de qua S. Gregorius relatus in *c. 1. de Calumniator.* & plures apud Grat. loquuntur Canones, 1. videlicet *III. quæst. 4. 3. quæst. 5. cad. & 23. distin. 63.* Quos tamen intelligendos adserunt DD. non de poena veri, & civilis exilii, sed potius de privatione iurium Civitatis, & Patriae; Quod etiam exilii genus, quoties decernere velit Ecclesiasticus Iudex implorare debet brachium seculare ex *cap. 1. de Clerico Excom. & Trid. Sess. XXIV. cap. 8. de ref.*

VI. Similiter non dubium est quin iam pridem usitatum fuerit, ut Episcopi, & Praelati in suos respective Clericos, & Monachos fustigatione animadverterint, ad exemplum dominorum qui in servos, parentum qui in filios, magistrorum qui in discipulos, ut refert Augustinus in epistola ad Marcell. relatus *Can. 1. XXIII. q. 3.* & S. Gregorius ibidem *cap. 1. de Calumniat.* unde flagellationes voluntariae ortae videntur, inquit Fleury *loco cit. ex cap. 3. de Crim. fals.* Monet vero circa hanc poenam Alex. III. in *cap. 4. de Rapt.* quod ita moderate adhiberi debeat, ut in vindictam sanguinis non videatur adhibita. Quinimo cum publica flagellatio per manus carnificis minus lenitati Ecclesiastici fori correspondere putaretur, ab huiusmodi animadversionis genere penitus recessit Ecclesia.

VII. Inter poenam demum corporis afflictivas tortura quoque recensetur ad eum finem imposita, ut reus veritatem detegere cogatur; cui licet de iure antiquo Clerici subijci non potuerint *L. 8. C. de quæstibus*; hodierna tamen Tribunalium Ecclesiasticorum consuetudine Clerici, & Sacerdotes etiam torquentur, quamvis propter innocentiae praesumptionem fundatam in ordinis, & status dignitate, maiora, quam in laico, criminis indicia requirantur.

VIII. De alterius generis poenis non est nunc cur multa dixerim; De Depositione enim, & Degradatione iam satis Lib. I. locuti sumus; De Excommunicatione, verò, ceterisque

tisque censuris, quemadmodum, & de irregularitate, post generales quasdam earum notiones in suis propriis titulis infra dicemus.

IX. Censura itaque, mutuato fortasse nomine a Censurionibus censorum, qui penes Romanos excludendo a censu Senatorum, aut Equitum quos praeteriissent infamia notatos ordine movebant, ut notat Gravina *Instit. Can. de Criminibus*; apud nos generatim sumpta definiri solet: *Paena Spiritualis, & Medicinalis privans usu aliquorum spiritualium bonorum per Ecclesiasticam potestatem imposita delinquenti Christiano ad hoc ut corrigatur, & a contumacia desistat.*

X. Quia vero Potestas haec ferendi censuras ex ea oritur ligandi, atque solvendi, quam Christus Dominus suo in terris Vicario concessit, ideo nemo capax est ferendi censuras, qui incapax est clavium potestatis. Quare facmina quolibet etiam decorata privilegio ius illud obtinere nequit, ut patet ex *cap. 10. de Paenitent. & remiss.* Quamobrem *cap. 12. de Maior. & obed.* non de suspensione proprie dicta, sed de prohibitione aliqua intelligunt Canonistae.

XI. Huiusmodi negotium ut clarius percipiatis notetis oportet; duplicem distingui in Ecclesia clavium potestatem; alteram, quae nascitur ex charactere Sacramenti Ordinis, & respicit forum paenitentiale internum; alteram vero, quae dependet ex munere, seu officio, quo quis in Ecclesia est insignitus, & respicit propterea forum iudiciale externum; cum igitur censuras ferendi potestas exerceatur per actum forensis iurisdictionis, nam proferuntur instar cuiusvis iudicialis sententiae; consequatur necesse est neminem ferre posse censuram, nisi qui iurisdictionem habet in foro externo contentioso, nec sufficere quod habeat usum clavium in foro paenitentiali absolvendi, & retinendi peccata.

XII. At quia huiusmodi iurdictio exterioris fori ex duplici ratione obtineri potest, vel ratione dignitatis, muneris, & officii, quo quis in Ecclesia fungitur, ut dicebamus; vel ex speciali commissione, seu delegatione ab eo facta, qui ratione dignitatis eam habet potestatem; hinc sequitur ius ferendi censuras penes omnes residere, qui
vel

aritate, vel ordinariam habent iurisdictionem, vel delegatam.

XIII. Ex allata doctrina sequitur ergo I. potestatem ferendi censuras competere etiam Episcopo confirmato, licet non adhuc consecrato, quia ipsi competunt omnia quae sunt iurisdictionis. II. competere posse etiam simplici Clerico, cum non repugnet iurisdictionem contentiosam in simplici tonsurato residere. III. Cum ea, quae iurisdictionis sunt consuetudine, & praescriptione acquiri possint, eodem modo acquiri poterit potestas ferendi censuras, ut adferunt Canonistae de Plebano, cuius mentio est in c. 3. de Off. Ord. Demum quia iurdictio alicuius extra proprium territorium non se extendit, ita neque censura extra proprii territorii fines lata alicuius est ponderis.

XIV. Quamvis in Ecclesia potestas ferendi censuras, ut monueram ex Christi Domini institutione emanare; Censurae tamen non Divini, sed Ecclesiastici iuris sunt, & ferri possunt vel per modum legis perpetuae & stabilis, vel per specialem sententiam. Unde fit, quod ex iis quaedam latae *ab iure*, quaedam vero latae *ab homine* dicantur. Et differunt praesertim quod illae generales sunt, habeantque vim etiam post Legislatoris mortem, vel amotionem; hae vero contra determinatas in individuo personas feruntur propter culpam, quae, moriente legislatore, aut amoto, cessat esse materia censurae.

XV. Pariter censura praesertim quae ab iure, alia est latae, alia *ferendae sententiae*. Prior incurritur statim post patratum peccatum etiam absque alia Iudicis sententia. Posterior e contra non incurritur, nisi per declarationem, seu sententiam Iudicis. Ut autem dignoscatur cuiusnam sit speciei censura legi adnexa, attendi praecipue debent verba, & formulae quibus lex est concepta. Quoties enim indicant tempus praeteritum, aut praesens, est latae sententiae; quoties vero futurum, est ferendae.

XVI. Nulla tamen censura innodare hominem potest, nisi aliquo exteriori signo feratur, sive hoc per verba, sive per scriptum fiat; quemadmodum nisi requisitae ab iure observentur solemnitates; inter his vero praecipua recensetur *admonitio*, seu comminatio censurae, si ferendae sententiae fuerit, & praesertim *ab homine* iuxta cap. 26. de Appell. 9. eod. in 6. 24. de sent. Excom. & 13.

cod. in 6. Nam de censurâ *ab iure* latâ satis nos scriptum ius admonet. Summus tamen Pontifex non tenetur eiusmodi solemnitates servare; bene vero quæ sunt de iure naturali, ut quis possit iuste puniri.

XVII. Praeterea censurae, quae in seipsis inspectae sunt propria arma, quibus utitur Ecclesia ad compescendos criminosos contumaces *cap. cum dilecto 6. b. t. in 6.* sive considerentur ut poenae, sive, ut spiritualia remedia semper requirunt culpam; imo si sermo sit de censura excommunicationis, & suspensionis, saltem quatenus est poena, nedum culpam requirunt, sed propriam quoque illius, qui iisdem erit censuris puniendus. Quapropter tota excommunicari nequit populorum universitas, cum in ea innocentes quamplurimi inveniri possint. Culpâ vero supra quam cadere potest censura debet esse externo actu nota, & manifesta; nam de internis actibus directe non iudicat Ecclesia in foro exteriori, in quo militant censurae.

XVIII. Ut aliquis censurae subiiciatur non sufficit quod sit reatu aliquo irretitus, quod sit Baptizatus, capax delicti, & emendationis, sed praeterea requiritur, ut sit contumax. Quapropter cum ubi est ignorantia, nec sit, nec esse possit contumacia, consequitur ignorantiam, excusare a censura. De ignorantia quidem facti clarissimus est textus in *cap. 4. de sent. Excom.* De illa iuris dummodo crassa, & supina non fuerit, docent DD. ex *cap. 2. de Constitutionibus in 6.*

XIX. Ad absolutionem a censuris quod attinet certum est illam non tolli per desitionem tantum contumaciae, & satisfactionem, seu obedientiam, sed requiri praeterea ut superioris accedat solutio. Et quamvis censuris innodatus, si in charitate decesserit, reddatur apud Deum absolutus; Ecclesia tamen nequit pro eo orare, nisi prius ipsum externe absolvat, seu potius apud Deum absolutum declaret; quae declaratio eo in casu fungitur absolutionis vice.

De iure igitur ordinario a censuris latis ab homine solus absolvit, qui eas tulit, vel eius superior in iurisdictione, non vero in dignitate, aut eius successor, vel delegatus. A censuris autem latis a canone, non tamen.

re-

reservatis, absolvere potest quivis Sacerdos habens potestatem absolvendi a mortalibus in foro conscientiae *cap. Nuper b. t.* secus vero a reservatis; nam in his potestas absolvendi peti debet a reservationis tenore.

Absolvens tamen a censuris persona Ecclesiastica omnino sit oportet, itaut in nullo casu haec potestas possit Laico competere, neque ex speciali delegatione a quovis Ecclesiastico superiore facta, licet non sit necesse, ut a Sacerdote impendatur; nam regulariter eos, contra quos potest quis censuras ferre, potest etiam absolvere, praesertim in mortis articulo, quamvis Sacerdotali charactere careat; quod tamen intelligatis velim, si ipsius spirituali iurisdictioni externae subiiciatur: secus vero non nisi a Sacerdotibus absolvi possunt, etiam in mortis articulo.

XX. Absolutio a censuris licet absolute dari soleat; attamen nulli dubium esse potest quin sub conditione de praeterito, vel de praesenti dari queat; imo etiam sub conditione de futuro, quemadmodum omnes aliae sententiae, quae in externo foro proferuntur. Quapropter triplici modo potest quis a censura absolvi I. *absolute* per eum, qui iurisdictionem habet absque ulla conditione. II. *ad cautelam*, puta cum rationabiliter dubitatur an quis indigeat absolutione. III. *ad reincidentiam*, idest sub aliqua conditione, puta refarciendi damnum, se praesentandi superiori, &c. qua conditione non adimpleta absolutus reincidit in censuram.

XXI. De forma demum absolvendi a censuris, utique quoad eius substantiam nullum esse ab Ecclesia verborum tenorem, seu formulam constitutam consensum est DD. opinio; verum necesse omnino est, ut signis sensibilibus innotescat absolutionis beneficium concessum esse ab eo, qui a censuris absolvere poterat.

T I T V L V S XIII.

De Excommunicatione.

I. **M**axima omnium censurarum est Excommunicatio, cuius antiquissima vestigia nedom apud Apostolum I. ad Corinth. & ad Titum 3. nobis occurrunt, sed apud Iudaeos quoque, qui gravissimi criminis reis cum infamiae nota Synagoga, & sacrorum communione interdicebant; imo huic quiddam simillimum consuevisse apud Athenienses, Romanos, & Gallos, testes sunt Plato in *lib. de Leg.* Livius *lib. 36.* & Caesar *de Bell. Gall. lib. 6.* Et sane illius nomine apud nos aliud non venit nisi: *Pœna Ecclesiastica*, qua homo Christianus a Communione, seu corpore fidelium excluditur, & bonis, quae inter eos communia sunt privatur; ita sane describitur *cap. 59. de sent. Excom. & XI. q. 3. can. 32.* Huiusmodi vero Excommunicatio alio nomine *Anathema* dicitur, quoties videlicet infligitur adhibitis quibusdam aliis ceremoniis ad ceterorum terrorem praescriptis, quae videri possunt apud Grat. *ib. Can. 106* Hinc est quod in *cap. 10. de Iudiciis* contumax contra Ecclesiam primum puniri iubetur excommunicatione, crescente deinde contumacia, anathemate.

II. Excommunicatio praeter divisionem cum aliis censuris communem dividitur praesertim in *maiorem*, & *minorem*. Illa quidem simpliciter, & quoad omnia separat a communione fidelium; haec autem secundum aliquid tantum, nempe a Sacramentorum perceptione. Antequam de eiusdem effectibus loquamur notate quoties in iure, decreto, aut sententia, excommunicationis simpliciter fiat mentio, semper de maiori esse sermonem *ex cap. 59. de Sent. excomm.* Praeterea hanc poenam ferri non posse in universitatem, collegium &c. sed in singulos tantum, ut supra diximus Tit. antecedenti n. 17. *ex cap. 5. eod. in 6.*

III. Maioris ergo excommunicationis effectus generalis est separatio ab fidelium communione, quia autem

COM-

communio istiusmodi dividi solet a DD. in *mere internam*, *mere externam*, & *mixtam* animadvertatis oportet, de qua hic loquamur. Prima siquidem est, qua fideles per fidem, spem, & charitatem inter se, & cum Christo uniuntur, & qua singuli per interna pia opera non tantum sibi, sed & aliis aliquid a Deo impetrare possunt. Secunda consistit in communione fori iudicialis, & alio quovis externo commercio, colloquio &c. Tertia demum oritur ex externis actibus, qui interiorem, ac spiritualem fructum concernunt quod spectant tum perceptio; tum administratio Sacramentorum, Ecclesiae Suffragia, quae in sacrificio, aliisque publicis officiis ad Deum pro universa Ecclesia funduntur, & satisfactiones Christi, Sanctorumque, quae ex communi Ecclesiae thesauro per indulgentias fidelibus applicantur.

Cum ergo primi generis communio interna omnino sit, non poenā, sed culpā tantum amitti potest, & per contritionem recuperari, manente adhuc excommunicatione ut in *cap. 28. de Sent. excomm.* Praeterea cum Ecclesia Excommunicatorum quoque salutem studeat, numquam potest rationabiliter velle, ut ipsi priventur fructu orationum, & aliorum bonorum operum, quae alii fideles proprio nomine, & privata intentione ad eorum emendationem dirigunt.

Nonnisi ergo secunda, & tertia communionis specie excommunicati privantur. Hinc tamen speciales huius censurae effectus proveniunt; nam primo ab hac communione seiuncti omnibus Ecclesiae suffragiis, & publicarum orationum fructu destituuntur *arg. cap. Sacris de Sent. excomm.* nec absque peccato excommunicati, & Clerici ipsum admittentes, divinis officiis interesse queunt *cap. 18. & 43. eod.* licet concionem audire, & horas canonicas ex vi ordinis, aut beneficii recitare privatim teneantur. II. Carent usu activo, & passivo Sacramentorum, ita quod nec ea recipere, nec administrare absque lethali culpa valeant, nisi in extrema necessitate, aut in mortis articulo. III. Privantur omni iurisdictione ecclesiastica, omnique forensi communione, & exercitio *cap. decernimus eod. in 6.* IV. Removentur ab omni civili commercio *cap. nuper, & cap. Si aliquando de Sent. Excomm.* & inhabiles evadunt ad quod-

libet Ecclesiasticum officium, aut beneficium imposterum obtinendum *cap. 7. de Cleric. excom. ministrante*, & alibi. V. Demum impetrata in eorum favorem rescripta, nisi causam respiciant excommunicationis, nullius sunt roboris *cap. 26. de rescript. & 1. eod. in 6.*

IV. Istiusmodi maioris excommunicationis effectus obtinent de iure in quovis excommunicato. Verum quia necessitas civilis societatis, & etiam Christianae charitatis exposcunt, ut quandoque cum ipsis aliqua habeatur communicatio, & propter censurarum, quae in iure latae sunt, frequentiam plura sequebantur incomoda, Martinus V. animarum tranquillitati consultum volens per suam Bullam in Concilio Constantiensi editam, quam confirmavit postea Leo X. in Later. V. declaravit eosdem praefatos effectus locum quidem habere omnes in excommunicatis vitandis, publice videlicet denunciatis, aut notoriis Clericorum percussoribus; non vero in toleratis, qui suae iurisdictionis actus valide exercent, nisi contra ipsos tamquam excommunicatos excipiat iuxta *cap. 24. de Sent. & re iudic.* Quinimo ex laudata Bulla quamvis excommunicati illicite agant, si ultro se ingerant actibus iurisdictionis exercendis, a culpa tamen immunes sunt, quoties agant requisiti a fidelibus, quibus permixtum est cum excommunicatis toleratis etiam in spiritualibus communicare.

V. Allata superius ratio, cum militet quoque respectu civilis commercii, aut officiorum charitatis, ideo etiam quoad huiusmodi caput quaedam limitatio intelligi debet. Et revera plures esse possunt rationabiles causae, ob quas licitum est ceteris fidelibus cum excommunicato denunciato quoque & vitando communicare, de quibus apud Grat. *XI. q. 3. c. 103.* Earumdem praecipuas sub hoc versiculo comprehendunt Canonistae.

Vtile, Lex, Humile, Res ignorata, necesse.

Primò itaque, quoties utilitas aut spiritualis, aut temporalis tam excommunicati, quam communicantis id exposcat *cap. 34. & 54. de Sent. excom. & 7. de Iudiciis*. II. ob legem Matrimonii, consanguinitatis, affinitatis, & rei familiaris administrationem *XI. q. 3. cap. 53. & cap.*

Cap. 31. de sent. excomm. III. Propter subiectionem, ut fervorum, subditorum, militum &c. cum suis respective Dominis, Superioribus, Ducibus &c. IV. Propter probabilem ignorantiam tum iuris tum facti. Demum propter necessitatem quamcumque notabilem, cui subveniri alio modo haud facile queat, sive illa animae sit, vel corporis, sive ex alia ratione proficiscatur *cap. 32. eod.*

VI. Praeter huiusmodi vero causas cuique nefas omnino erit cum excommunicato communicare, & iuxta veteres Canones apud Grat. *ib. cap. 1. & seqq.* delinquentes eadem immodabantur censurâ. Verum postea huiusmodi poena restricta tantum fuit ad socios, fautoresve criminis; ceteri extra crimeu communicantes minorem tantum excommunicationem contrahunt, & ex plurium sententia, non nisi veniale peccatum committunt, dummodo huiusmodi cum excommunicato commercium nimis frequens non fuerit, ut contemptum pariat, & ipsum contumaciorem reddat.

VII. Minoris huius excommunicationis effectus praecipuus est privatio susceptionis Sacramentorum. Quapropter administrans, vel celebrans divina mysteria in hoc casu, licet ob irreverentiam culpâ haud vacet, irregularis tamen non evadit, cum Sacramentorum administratio ei directe non interdicitur *cap. fin. de Cler. excomm. Ministr.* Indirecte tamen potest etiam remanere impeditus ad ea beneficia Ecclesiastica obtinenda, quibus adnexus est ordo, ad quem promoveri debet; quapropter licet electio non esset ipso iure nulla, ut in excommunicatione maiori, posset nihilominus annullari.

VIII. Absolvere ab hac censura quoad forum conscientiae potest quilibet adprobatus Confessarius, at quoad forum externum Ordinarius tantum Iudex Ecclesiasticus.

T I T V L V S XIV.

De Ecclesiastico Interdicto.

I. Interdicti nomine hic intelligitur: *Censura Ecclesiastica*, qua prohibetur quorundam Sacramentorum usus, divinatorum officiorum omnium celebratio, & ecclesiastica sepultura.

II. Huiusmodi autem interdictum nedum in Clericos, & in Laicos, verum etiam in privata loca, in urbes, ac regna ferri potest; proindeque triplex passim distinguitur; aliud nempe quod *locale* dicatur si locum; aliud *personale* si personas; aliud denique *mixtum* si utrumque sibi subiiciat. Illud vero inter ipsa discriminis intercedit, quod per primum, nemini fas est in loco huic censuræ subiecto sacris interesse, bene vero alibi; per secundum, Personae huiusmodi sacra, & cetera divina officia interdiciuntur ubique; per tertium demum, omnibus ibidem commorantibus quoquo modo personis, & illius loci incolis etiam aliis commigrantibus.

III. Interdictum tam locale quam personale, est vel *generale*, vel *particulare*. Locale generale dicitur quoties locus cum suis adiacentibus, & pertinentibus interdicto subiicitur, puta Regnum, Provincia, Dioecesis &c. ut in *cap. 10. & 19. de sent. Excom. in 6.* Particulare vero quoties locus particularis, puta unica Ecclesia, ut in *eodem cit. cap. 17.*

Personale autem generale dicitur pariter quoties aliqua communitas, capitulum v. g. collegium, monasterium interdicitur, de quo in *cap. 16. de sent. Excom. in 6.* Particulare personale, quoties expresso singulorum nomine personae interdiciuntur. Hinc quia clerus & populus constituunt diversa corpora, altero interdicto, non comprehenditur uterque; quae ratio militat quoque quoad corpus clerici regularis, non comprehensum in odiosis sub generali cleri notione, quemadmodum non comprehenditur Episcopus, & aliae personae in dignitate Ecclesiastica constitutae ex *eod. cap. & 4. ibidem*; idque probat

bat Fagnanus saepe laudatus in *cap. 3. de Postulatione Praelatorum*.

IV. Alexandro III. Summo Pontifice antiquiorem esse interdicti poenam inde constat, quod de ipsius usu iam Lotharii, & Ludovici temporibus in Ecclesia testetur Ademar Monachus, qui Balduino Episcopo Cenomanensi sic scribit: *Saepe idem Balduinus pro nequitia Populi novam observantiam constituit; Ecclesias nimirum, & Monasteria cessare a divino cultu, & Sancto Sacrificio, & Populum quasi Paganum a Divinis cessare*. Eiusdem rei vestigia invenire facile est apud Ioannem Carnotensem *ep. 50*. Quinimo Gregorius Turonen. *lib. 1. cap. 31*. quoddam Civitatis Rothomagensis interdictum refert, & alterius etiam meminerunt Annales Franciae ad an. 878. lati ab Ioanne VIII. in Concil. Cabilouen. *cap. 26*. Videte Bosquetum in Notis ad Innoc. III. *lib. 2. ep. 72*. Verum quia saepe contingit, ut maior Populi pars plane innocens eadem interdicti involvatur poenâ, ideo Alexander III. omnium primus, & alii postea nonnulli Romani Pontifices diversa huic censuræ adhibuere temperamenta.

Et revera seculo XII. indulxit ipse, ut interdicti tempore parvulis baptisma, & morituris Poenitentia administrarentur *cap. 11. de Sponsal.* Huic indulto Innocentius III. addidit, ut praeterea populo Verbum Dei praedicaretur, & non denegaretur parvulis Confirmatio *cap. 4. de Sent. excomm.* atque etiam *cap. 11. de Poenit. & Remiss.* ut in mortis articulo constitutis administraretur Eucharistia; & decedentibus Clericis, qui interdictum servaverunt sepultura in coemeterio privatim concederetur. Quinimo indulxit quoque, ut in Conventualibus Ecclesiis Clerici bini, & bini Horas Canonicas legerent ianuis clausis tamen, & submissa voce. Tandem ob Crucifixi reverentiam concessit Crucesignatis, & Peregrinis etiam benevolentibus, ut quoties postulaverint ad Poenitentiae Sacramentum admitterentur.

Gregorius IX. postea Interdicti rigorem magis moderatum voluit, cum permisit Ecclesiarum Ministris, ut possent semel in hebdomada, absque campanae sonitu, ianuis clausis, & exclusis omnino interdictis Missarum Solemnia celebrare causa conficiendi Corpus Christi, quod

in mortis articulo poenitentibus denegari non debet *cap. 57. de Sent. excomm.* Tandem Bonifacius VIII. ad maiora ex interdicto sequentia indevotionis, & contemptus rerum divinarum mala vitanda permisit, ut omnes etiam sani admitterentur ad poenitentiam, dummodo excommunicati non fuerint, qui nonnisi in vitae discrimine admittendi sunt; aut etiam causam non dederint interdicto, quia & ipsi, nisi satisfecerint, vel sufficientem dederint cautionem de satisfaciendo ab ea prorsus arceantur.

Insuper iussit quoque sub poena amissionis distributionum, ut in Ecclesiis, & Monasteriis Missae consuetae, & divina officia celebrarentur iuxta morem extra interdictum, sed submissa tamen voce, ianuis clausis, & sine campanarum sonitu; indulgens praeterea laudatus Pontifex, ut quater in anno, scilicet in festivitatis Natalis Domini, Paschae, Pentecostes, & Assumptionis BB. Mariae Virginis sacra omnia publice peragerentur cum consuetis solemnitatibus ianuis apertis, cum sonitu campanarum, excommunicatis quidem exclusis, sed interdictis admissis, dummodo ii, propter quorum excessum fuit interdictum latum, Altari nullatenus appropinquare audeant *cap. Alma Mater fin. de Sent. excomm. in 6.* His demum postea Martinus IV. & Eugenius IV. addiderunt solemnitatem Sacri Corporis Christi per totam Octavam.

V. Ex communiore etiam DD. sententia interdicti tempore non creditur prohibitum Matrimonium absque solemnitate celebratum, etiam si interdictum fuerit personale; at Sacramentum Ordinis nullatenus ministrari posse, nisi deficerent ministri.

VI. Interdictum observandi gravis est obligatio; ita ut Clerici personaliter interdicti actus proprii ordinis exercentes irregulares evadant; quemadmodum si ad divina officia interdictos admittere audeant, vel si superiores fuerint patiantur, ut divinis interfint. Laici vero, siue Domini Seculares, qui in terris proprio dominio subiectis non permittunt subditis interdicti custodiam excommunicationem Sedi Apostolicae reservatam ipso facto incurrunt *clém. 2. de sent. Excomm.* Eandem censuram incurrunt Regulares, si interdicti observantiam neglexerint *clém. 1. cod.* Quod etiam extenditur ad Fratres Minores si tempore in-

ter-

terdicti ad divina officia admittant *serores* quas vocant
 tertii Ordinis *Clem. exl.* Sacerdos denique celebrans in-
 terdicti tempore in casibus non permissis irregularis eva-
 dit; licet celebrans etiam scienter in Ecclesia polluta, vel
 presente Excommunicato vitando, huiusmodi poenam non
 incurrat, quemadmodum declaravit Bonifacius VIII. *in cap.*
is qui, & praesertim §. Is vero 18. cod. in 6.

VII. Interdictum quamvis ferri possit in totam Civi-
 tatem vel dominium ob solius Domini, vel Magistratus
 contumaciam, & eo non obstante etiam innocentes feriat
cap. si sententia cod. in 6. & cap. non est de sponsal.; ne-
 quit tamen id fieri sine speciali summi Pontificis licentia
 propter Dominum non solventem debita, *ex cap. provide*
ext. com. cod.

VIII. Interdictio locali valde affinis est *cessatio a divi-*
nis, quae non est proprie censura, sed suspensio quaedam
 celebrationis divinatorum officiorum propter gravem aliquam
 iniuriam Ecclesiae illatam, ut iniurantes rescipiant; &
 differt ab interdicto, tum quia locum tantum afficit, &
 nullo modo personas, tum quia Clericus celebrans in loco
 cessationis irregularis non evadit, esto graviter peccet,
 & excommunicationem in violatores cessationis decretam
 incurrat *Clem. 2. de sent. Excom.* tum demum quia non in-
 terdicitur Ecclesiastica sepultura, quamvis sine pompa fu-
 nebri peragi debeat.

T I T V L V S XV.

De Suspensione.

I. Tertia demum Ecclesiastica censura est *suspensio*, per
 quam nempe Ecclesiae minister impeditur ne Ec-
 clesiasticas, propriasque functiones exerceat, vel potestate
 aliqua Ecclesiastica utatur. Ex hoc liquet suspensionem pro
 Censura acceptam differre ab ea, quae per modum poenae
 frequenter imponi solet vel ab iure, vel ab homine, tam
 perpetuo, quam ad certum tempus, de qua in *cap. etiam*
Sacrofanctae Ext. de sent. Excom. ubi Io. XXII. contra

taxationis transgressores suspensionis poenam adhibet. Cum ergo fertur, ut ab contumacia recedatur, habet rationem censuræ; cum vero fertur ob excessum commissum, cui nulla adnectitur contumacia, propriè est poena.

II. Verum sive ut censura, sive ut poena afficere nequit suspensio nisi Ecclesiasticas Personas, eas arcendo a divinis, & etiam ab omnibus iurisdictionis actibus iuxta plurimum DD. sententiam in *cap. 1. de sent. & reind. in 6.* si fuerit quoad officium tantum; sed si etiam quoad beneficium, suspensus privabitur quoque fructuum perceptione; nunquam tamen passivo Sacramentorum usu.

III. Quamvis omnes Ecclesiasticæ Personæ huiusmodi Suspensioni subesse possint. Episcopi nihilominus, alique superiores Praelati suspensionis, & interdicti censuras nunquam incurrunt in quavis constitutione, vel sententia latus ipso iure incurrendas, nisi de ipsis specialis mentio facta fuerit, ut indulget Bonifacius VIII. in *cap. quia periculosum 4. de sent. Extrem. in 6.*

IV. Denum Suspendio quandoque imponitur ab ingressu Ecclesiæ tantum; ideoque qui hac Suspensione est innodatus sive ab iure, sive ab homine, cum divinorum officiorum celebratio videatur consequenter interdicta, efficitur irregularis, si divinis officiis in Ecclesia se ingerat; ac propterea Ecclesiastica sepultura erit privandus, quoties cum eiusmodi suspensione decesserit ex *Bonif. VIII. in cap. is tui eod.*

T I T V L V S XVI.

De Irregularitate.

I. **Q**uia in nostris hisce Institutionibus de irregularitate sæpe locuti sumus, operæ pretium duxi antequam a labore manum amoveremus nonnulla de ipsa quoque vobis indicare.

II. Irregularitatis igitur nomen etsi non effectus, incognitum quidem fuit apud antiquos Canones; usurpari tamen coepit pro eo impedimento, quo quis vel nequit
in

in ordine suscepto ministrare, vel ad maiores ordines promoveri, & merito hoc impedimenti genus *irregularitas* dicitur. Ab ævo siquidem Apostolico, & deinde Sanctis Ecclesiae Patribus certa regula constituta fuit de iis, qui ad Sacra Mysteria admittendi erant, atque in iis ministraturi, quemadmodum habemus ex Nicaeni I. *can. 9.* & in decreto Gregorii VII. de quo in *can. si qui sunt diss. 81.* & fuse ex Tolet. IV. *relato in can. unum Orarium diss. 15.* & ex Gregorio M. *lib. VII. ep. 100.* ad Syagrium Episc. *can. sicut diss. 48.* Quamobrem initio Clerici omnes passim *Regulares*, seu *Canonici* dicebantur à Canone, seu regula, cui inscripti erant, & secundum quam vivere debebant, ut ex Laodicaeno *can. si qui vero diss. 32.* Qui igitur ob aliquem defectum, vel impedimentum ab Sacro arcebantur ordine, vel in ordine iam suscepto ministrare non poterant, Irregulares merito dici coeperunt, quasi a regula praescripta diffformes *can. I. diss. 47.* ubi Clericus usurarius elicitur a Clero, & alienus sit a *regulis*.

III. Ex hisce omnibus inferitur irregularitatem nullo pacto esse censuram, cum non sit vinculum, nec sententia, nec poena medicinalis, sed tantum inhabilitas, & Canonicum impedimentum, & quandoque sine culpa contractum, *can. si quis viduam diss. 10.* & clare patet ex *cap. quærenti de verb. signific. ibi* enim censura ex naturâ suâ medicina est, non vero irregularitas, cum non semper praesupponat opus peccaminosum, ex quo oritur; imò aliquando meritorium, nec privet Sacramentorum participatione, nec fidelium communione, sed tantum Ordinum Susceptione, & exercitio; unde nascitur quod irregularitas, ut tollatur indigeat *dispensatione*; censura vero *absolutione*.

IV. Praecipua irregularitatis divisio est, ut alia ex *delicto* oriatur, alia ex *defectu*; neutra vero incurritur, nisi in casibus ab iure notatis *arg. cap. 8. de sentent. Excom. in 6.*

Quamobrem incurritur I. propter delictum, quoties serio, & scienter reiteretur baptisma tam ex parte dantis, quam recipientis. II. Quoties censura Ecclesiastica violatur per ordinis exercitium; licet non incurratur propter exercitium iurisdictionis. III. Quoties indebite ordines suscipiantur; ut si quis scienter ordinari patiatur ab Episcopo-

scopo excommunicato, suspenso, interdicto, Simoniaco, vel Schismatico; vel etiam post prohibitionem, praesertim sub excommunicationis poena ab suo Ordinario factam; furtive ordinari obtineat. IV. Quoties per apostasiam Christiana fides deferatur, aut schisma constetur; quod ad fautores, & receptores ipsorum extenditur. V. Quoties homicidium, aut mutilatio perpetretur. VI. Quoties crimen admittitur, cui ab iure infamia est adnexa, dummodo tamen publicum fuerit, & notorium *cap. fin. de temp. Ordin.*

V. Oritur vero irregularitas ex defectu; primo ex carentia rationis usus; quia iure naturali, & divino ordinis est incapax qui ad illius exercitium est ineptus. Hinc II. irregulares sunt ex defectu Corporis, qui ita sunt corpore vitiiati, ut vel absolute ordinem exercere nequeant, vel non sine notabili deformitate *can. illiteratos d. 39.* III. Ex defectu natalium irregulares censentur, qui illegitime sunt nati, nisi per subsequens matrimonium legitimi fiant; quod de spuriis dici nequit. Tollitur vero haec irregularitas quoad Sacros Ordines per ingressum in religionem, quamvis perseveret quoad Praelaturam *cap. 1. de filiis Presb.* IV. Ex defectu libertatis irregulares sunt servi, ut in *tit. de servis non Ordin.* Item coniugati, qui sine uxoris licentia votum castitatis emittentes ad ordines promoveri nequeunt. Demum obligati ad rationes reddendas, qui admitti ad clericatum non debent, nisi post deposita onera, & reddita ratiocinia *cap. 1. de Obligatis ad ratiocinia.* V. ex defectu aetatis dici possunt etiam irregulares qui requisitam ad ordinum susceptionem aetatem nondum attigerunt. VI. Ex defectu lenitatis irregulares sunt qui homicidium, vel mutilationem etiam iustam committunt, mandant, aut eidem quovis modo cooperantur. VII. Demum irregularitas contrahitur ex defectu Sacramenti, seu ex bigamia; quod ut clarius intelligatis animadvertendum vobis est triplicem distingui apud Canonistas bigamiam; *veram* nempe, *interpretativam* & *similitudinariam*. Veram & proprie dictam bigamiam committit qui pluribus successive nupsit uxoribus, & Matrimonium consummavit, ex qua bigamia irregularitatem induci traditur in *cap. 1. & 2. de Big.*

Interpretativa vero dicitur quoties per quamdam iuris fictionem, seu interpretationem, quis censetur duas habuisse uxores, ut si contraxerit cum vidua, vel ab alio quoquò modo corrupta *can. Maritum dist. 33. & can. si quis viduam dist. 34.* aut etiam si propriam cognoverit uxorem post perpetratum ab ipsa adulterium *can. si cuius, & can. si laici dist. 34.* Quia vero irregularitas, quae inde exurgit, non ex delicto oritur, sed ex defectu dumtaxat Sacramenti, incurritur propterea etiam ubi contigerit ut quis ignorans corruptam duxerit, aut uxorem iam adulteratam cognoverit.

Bigamia denique *similitudinaria* provenit ex attentatione & consumatione Matrimonii licet invalidi post votum solemne professionis, aut Sacrorum Ordinum receptionem. Cum enim qui eiusmodi votum emittit, aut ordinibus initiatur spirituale Coniugium cum Deo, & Ecclesia contrahere videatur, si postea ad carnale transire praesumpserit similis censetur iterato contrahenti *cap. 5. & ult. de Biganis.*

Illud circa huiusmodi irregularitatem observandum est quod nemo bigamus iure dicatur, nisi post consummationem Matrimonii. Hinc vir, cuius uxor obiit post Matrimonium dumtaxat ratum si aliam duxerit bigamus non est *can. 20. dist. 34. & cap. 5. de Big.* hinc etiam viduam virginem ducens, aut corruptam, quam non cognoverit, nec bigamus, nec irregularis efficitur; cuius rationem reddit Innocentius III. In laudato Capite, quod hisce in casibus non desit signaculum, seu significatio Sacramenti, nec vir carnem suam in plures dividerit.

VI. Irregularitatis cuiuslibet effectus est inhabilitas ad Ordines suscipiendos, privatio exercitii ordinis iam suscepti, et ineptitudo ad beneficia, si irregularitas totalis est; quia cum beneficium debeatur propter officium *cap. fin. de rescript. in 6. & irregularis non sit divini officii capax*, ideo nec beneficium obtinere potest *arg. cap. fin. de Clerico excommunicato Ministrante. Vid. cap. fin. de Temp. ordin.*

VII. In quavis irregularitate, dummodo absolutam incapacitatem non importet, dispensare potest Rom. Pontifex, cum sit tantum iuris positivi sive ex defectu

ex

ex delicto oriatur. Episcopi quoque in omni irregularitate ex delicto occulto proveniente, excepto homicidio voluntario, dispensare possunt. Quare facultas ipsis conceditur dispensandi in ea, quae ex bigamia similitudinaria contrahitur *cap. 4. de Clericis coniugatis, & 1. qui Clerici, vel voventes*; quia, ut animadvertit Fagnanus de Bigamis, haec irregularitas provenit ex delicto potius, quam ex defectu.

Plura de irregularitate, quae concludi nequeunt intra breves harum Institutionum terminos, legite apud Scriptores. Atque hic tandem finem imponimus eisdem, quae ad id praesertim inservire possunt, ut rudis quaedam Canonici iuris, & maxime recentioris notitia habeatur.

F I N I S.





